

M. FABII QUINTILIANI
INSTITUTIONIS ORATORIAE

LIBRI DUODECIM.

AD FIDEM CODICUM MANU SCRIPTORUM

RECENSUIT

EDUARDUS BONNELL.

VOL. I.



LIPSIÆ
SUMPTIBUS ET TYPIS B. G. TEUBNERI
MDCCLXIX.

PRAEFATIO.

Prodit post editionem Zumptianam nunc primum nova haec integros duodecim libros Institutionis oratoriae M. Fabii Quintiliani continens. Praeclaram quidem operam huic scriptori viginti abhinc annis Henricus Meyerus Helveto-Turicensis, adjutus imprimis Codice Lassbergensi, impendere coeperat, sed dolendum est, quod post absolutum quartum librum vir doctus cessavit. Praeterea optime meruit de Quintiliano Fridericus Leonardus Enderlein, gymnasii Ludoviciani professor, quum egregii Codicis Bambergensis aditum quattuor seriationibus scholasticis ab anno 1843—1852 subinde Suevofurti emissis maximam partem aperiret. Plurima hominum eruditorum studia invitavit liber decimus, inter quos post editionem Georgi Augusti Herbst imprimis memorandus est F. Osannus Gissensis professor. Horum et quaecunque mihi aliunde oblatæ sunt curas Quintiliano dicatas in fructum meae convertendas mihi esse censui editionis, non mihi uni sed universae literatorum hominum civitati pro virili parte profuturae. At insigne adjumentum nactus sum diligenti collatione ejus partis Codicis Bambergensis, cujus varias lectiones Enderlein nondum publici juris fecerat. Gratiae hanc ob causam hoc loco mihi agenda sunt Antonio Linsmayer, nunc Monacensis gymnasii collegae, qui a me rogatus acri diligentia et insigni comitate certam ac fidam effigiem praestantis illius Codicis confecit mihi que liberaliter permisit. Codicis hujus scriptura primae quidem manus cum secunda classe Codicum Quintiliani plerumque consentit, contra secunda manus emendantis librarii cum prima classe, maxime cum Florentini secunda manu, alias cum Ambrosiano eodum optimo. Inde a libro

quarto negligentius scriptus sed diligenter et intelligenter correctus est. A quinto libro augetur ejus auctoritas, quo magis Ambrosiani decrevit, qui praecipue lacunis laborare coepit. Libro septimo et octavo confirmat fere semper Ambrosiani scripturam contextum saepe optime emendantem, atque unde nono libro (cap. 4. § 135) princeps ille codicum Fabianorum omnino deficere coepit, praecipue valet auctoritas manus emendantis Bambergensem librarii, qui luculentissimam opem fert in parte libri duodecimi posteriore. Codicis mser. instar haud paucis locis erat mihi C. Julii Victoris ars rhetorica ab Casp. Orellio in volumine V. operum M. Tullii Ciceronis edita, in qua haud pauci loci Quintiliani aut integri aut leviter mutati leguntur.

Ubi mihi his auxiliis adjuto in mea emendatione a Zumptiana discedendum videbatur, quaeque conjectura emendanda esse censui, haec omnia in criticis animadversionibus infra adjectis breviter annotavi.

Berolini mense Februario MDCCCLIV.

E. Bonnell.

LIBER I.

Prooemium. 3. pleniore. *Codd. vett.*; Z. pleniori. — 6. quamquam sint. *Codd. optt.*; Z. q. sunt. — 24. sucum, *Bamb.*; Z. succum.

Cap. I. 3. sed plus efficit. *Bamb. c. optt. Codd.*; Z. sed ut plus efficiat. — 6. et Laelia C. filia. *de conj. Meyeri*; Tur. Flor. Lelia filia; Z. om. C. filia. — Hortensiae Q. filiae oratio. *Sic Meyer codd. optt. scripturam secutus*; Z. et Q. Hortensii filiae. — 8. est pejus. *Bamb. c. Codd. vett.*; Z. pejus est. — partibus. *Bamb. c. optt. Codd.*; Z. peritis. — 13. Hoc enim. *Sic Codd.*; Z. *de conj. Regii* Hinc en. — 15. Aristophanen. *Bamb. c. Turic.*; Z. Aristophanem — 20. non fecisse. *Sic etiam Bamb.* — putet et. *Bamb. c. Codd. vett.*; Z. om. et. — 21. sua etiam studiis. *Bamb.*; Z. om. etiam. — mox fort. *Bamb. c. optt. Codd.*; Z. *inser.* etiam. — 25. turbent. *Bamb. c. Turic. cett.*; Z. perturbent. — 28. ipsam. *Amb. 1.*;

Z. ipsum. — quae transferenda. *Bamb. c. Amb. 1.*; Z. *inser.* ex his.

Cap. II. 7. quam mores. *Sic etiam Bamb. sec. m.* — audiunt. *Sic Amb. 1. Bamb. sec. m.*; Z. audierunt. — 8. ex scholis. *Bamb. c. optt. Codd.*; Z. e scholis. — 20. firmissime. *Bamb. Turic. Lassb.*; Z. firmissimae.

Cap. III. 4. quidquid illud possunt. *Sic Bamb.*; Z. om. illud advers. *Codd.* — 8. retenduntur. *Sic etiam Bamb. pr. m.* — 11. cujuscunque. *Flor. Lassb.*; Z. cujusque. — 16. vel praeceptorum. *Amb. 1. Bamb. Lassb.*; Z. et praec.

Cap. IV. 5. in omni. *Amb. 1.*; Z. om. in. — 8. propriae. *Bamb.*; Z. proprie. — ut medius. *Bamb. sec. m. c. aliis Codd.*; Z. et m. — 9. opipum. *Sic Bamb.* — et Q. *Bamb.*; Z. om. et. — specieque. *Sic Bamb. pr. m.* — ultima. *Sic Bamb. c. optt. Codd.*; Z. *adj. X.* — 10. fieri. *Sic Bamb. c. optt. Codd.*; Z. *adj.* quod nequit. — 12. scabillum. *Bamb. Turic.*; Z. scabellum. — pinnis. *Bamb. c. optt. codd.*; Z. pennis. — 13. sed quae. *Amb. 1.*; Z. *inser.* et. — 14. Atque ipsa. *Sic optt. Codd.*; Z. *inser.* haec. — possit. *Bamb.*; Z. posset. — 16. Culcidis et Pulixena. *Sic Bamb. c. optt. codd.*, nisi quod Culcidis *de conj. Seyfferti emendavi*; Z. Culchides et Polyxena. — 17. quae partes. *Bamb. c. optt. Codd.*; Z. mser. sint. — 18. Aristoteles quoque. *Amb. 1. Bamb. pr. m.*; Z. om. quoque. — 20. deducerent. *Sic c. optt. Codd. Bamb. sec. m.*; Z. diduc. — ut cheu. *Bamb. c. optt. Codd.*; Z. heu. — fasceatim. *Sic Bamb. c. cett. Codd. praeter Amb. 1.*, ex quo Z. fasciatim. — 23. si quis. *Bamb. c. Codd. omn.*; Z. *de conj.* At qui. — 27. an verbi. *Bamb. pr. m.* a verbi, *sec.* an verbi *c. cett. Codd. praeter Amb. 1.*, qui an verba an appellationes; Z. verbi an app. — lectum. *Sic Bamb. c. optt. Codd.*; Z. lectus.

Cap. V. 3. aliquid. Z. aliquod. — 8. Cantus. *Sic codd.*; Z. canthus. — casnar assectator. *Codd. casami vel casamo affectator.* — irridens. *Sic Bamb. quoque sec. m.* — 12. Tinga. *Bamb. c. optt. Codd.*; Z. Tinea. — praeponeret. *Bamb. c. optt. codd.*; Z. *adj. e.* — Mettioeo Fufettioeo. *Sic Meyerus ex codicum vestigiis, quibus assentitur Bamb.* — 13. Trasumennum pro Tarsumanno. *Sic Bamb. fere consentiens c. optt. Codd.*; Z. Trasimenum pro Tarsimeno. — analogian. *Sic Bamb.*; Z. analogiam. — 16. adjectionem habeant. *Sic Bamb. c. cett. codd.*; Z. *inser.* non. — 18. Phaethon.

Bamb. c. Turic.; *Z. Phaeton.* — 20. servatum. *Sic etiam Bamb. sec. m.* — 23. ut apice circumducta sequenti. *Sic Bamb. pr. m. i. e. ut si circumducta esset secunda syllaba*; *Z. aut apice circ. seq.* — 26. cum quale. *Bamb. c. cett. codd.*; *Z. inser. quantum.* — 33. deprehendimus. *de conj. Burmanni*; *Codd. reprehendimus.* — 35. Vergilius. *Sic Bamb. pr. m. ut fere semper*; *Z. Virgilius.* — 36. uti. *Bamb. c. optt. Codd.*; *Z. ut.* — interrogante. *Sic Bamb. c. optt. Codd.*; *Z. interrogatione.* — 39. Navigavimus Pelusio. *Sic de conj.*; *Codd. optt. fere nam enim de Susum*; *Z. ut Veni de Susis.* — igitur initio. *Bamb. c. optt. codd.*; *Z. inser. in.* — 40. cadat. *Bamb. pr. m.*; *Z. cadant*; *Amb. 1. Turic. Lassb. cadunt.* — 42. dualem. *Codd. optt. omnes*; *Z. duale.* — 43. quod Antonius. *Bamb. Tur. Lassb.*; *Z. quamquam id Ant.* — 45. quidquid horum. *Etiam Bamb. sec. m.* — 56. reda. *Bamb. c. Turic. raeda*; *Z. rheda.* — 57 circo quoque usitatum. *Bamb. c. optt. codd.*; *Z. quoque usit. c.* — 58. sermonem praecipue. *Bamb. c. cett. codd.*; *Z. praecermonem.* — nonnunquam a nobis. *Bamb. c. vett. codd.*; *Z. a nob. nonn.* — 62. sed tis. *Sic etiam Bamb. sec. m.* — 63. patietur. *Bamb. sec. m. c. Amb. 1.*; *Z. patitur.* — 64. tamen citra. *Sic Bamb. sec. m. c. Lassb.*; *vett. Codd. om. citra, Z. om. tamen.* — 68. pedisecus. *Bamb. c. vett. Codd.*; *Z. pedisequus.* — praepositio. *Bamb. c. vett. codd.*; *Z. adj. evl.* — reda. *Bamb. epiraedium et postea c. vett. codd. raeda*; *Z. epirhed.* — rheda. — alieno utroque. *Bamb. c. optt. codd.*; *Z. utr. al.* — 69. erepet. *Sic Bamb. sec. m. in marg.*; *Z. de conj. vet. erepti* — 70. simus. *Amb. 1.*; *Z. sumus.*

Cap. VI. 1. vel. *Bamb. c. optt. Codd.*; *Z. om.* — 2. religiosa. *Amb. 1.*; *Bamb. c. optt. Codd. religio se*; *Z. religio.* — nisi. *Bamb. sec. m. c. vett. Codd.*; *Z. adj. si.* — velut. *Bamb. c. optt. Codd.*; *Z. vel.* — 3. in analogia. *Bamb. c. optt. codd.*; *Z. om. in.* — 4. et incerta. *Amb. 1.*; *Z. ut inc.* — 9. dicet. *Bamb. pr. m.*; *Z. dicetur.* — curro et lego. *Bamb. c. vett. codd.*; *Z. lego et curro.* — 12. epicoenon. *Bamb. c. vett. codd.*; *Z. epicoenum.* — 13. nomen positum. *Bamb. c. cett. codd.*; *Z. de conj. Regii inser. [simpliciter].* — 16. quomodo. *Amb. 1. Bamb. sec. m. Lassb.*; *Z. quoque modo.* — 18. quoque. *Bamb. c. optt. Codd.*; *Z. om.* — 19. emendat — malit. *Sic Bamb. quoque pr. m.*; *Z. emendatius calidum dicere quam calidum mavult.* — 22. jecur etiam. *Bamb. c. vett. Codd.*; *Z. et jec.* — 26. urgere. *Amb. 1. et Bamb. al. m. in marg.*; *Z. ruere.*

— 29. ut M. *Amb. 1. c. Bamb. sec. m.*; *Z. inser. cum.* — 31. Pythiici. *Sic Codd. Z. de conj. Politii.* — Beneventum quae. *Bamb. c. Codd. optt. nisi quod Beneventumque*; *Z. de conj. Beneventumque quae.* — 36. visus est. *Bamb. c. oppt. Codd.*; *Z. v. et.* — jovit. *Bamb. c. vett. Codd.*; *Z. om.* — 38. pluraque. *Bamb. c. Codd. postt.*; *Z. pleraque.* — 42 placet. *Bamb. c. optt. Codd.*; *Z. placeat.*

Cap. VII. 2. sic interim. *Goth. c. posterr. Codd.*; *Z. sed.* — malus arborem. *Amb. 1. Bamb.*; *Z. inser. utrum.* — 5. duas. *Sic Bamb. pr. m.*; *Z. adj. U.* — 12. adj. ultimum. *Sic Amb. 1.*; *Z. ult. adj.* — 13. geminare diu non. *Bamb. c. optt. Codd.*; *Z. non gem. d.* — 18. aquai. *Bamb. c. optt. Codd.*; *Z. aulai.* — 19. credet. *Bamb. c. optt. Codd.*; *Z. credat.* — 25. seruum ceruumque. *Bamb. c. vett. Codd.*; *Z. cervum servumque.* — 27. praeposui. *Optt. Codd.*; *Z. proposui.* — u et o. *Amb. 1.*; *Z. om. et.* — 34. loquendi asper. *Bamb. c. vett. Codd.*; *Z. inser. usquequaque.*

Cap. VIII. 1. quid — lentius; *Z. distinguit quid quoque fl.*, quid l. *Cf. 6, 16.* — 2. et carmen. *Bamb. c. Amb. 1.*; *Z. om. et.* — 6. nolim in quibusdam. *Amb. 1.*; *Z. in quib. nol.* — qua amat — et qui sunt. *Sic fere optt. codd.*; *Z. quae am.* — et quibus s. — 9. petenda est. *Bamb. sec. m. c. vett. Codd.*; *Z. om. est.* — 13. sint posita. *Bamb. sec. m. c. Flor.*; *Z. sunt p.* — 18. accedit. *Bamb. c. vett. Codd.*; *Z. accedet.* — quid quisque. *Bamb. c. vett. libris*; *Z. quod q.* — 19. schidas. *Bamb. pr. m. c. optt. Codd.*; *Z. schedas.*

Cap. IX. 4. simplici. *Bamb.*; *Z. simplice.* — dixisse aliquid. *Sic Bamb. c. Codd. optt.*; *Z. aliq. dix.* — 6. rhetores. *Bamb. sec. m.*; *Z. praeceptores.*

Cap. X. 2. scientia possunt. *Bamb. pr. m. c. vett. Codd., fort. etiam Amb. 1.*; *Z. inser. non.* — 3. data. *Bamb. pr. m. c. vett. Codd.*; *Z. in data.* — 4. et nulla. *Amb. 1.*; *Z. ex n.* — 6. eorum. *de conj. necessaria*; *Z. earum.* — 7. suorum. *Bamb. ut semper.*; *Z. suorum.* — 9. quia. *Bamb. c. vett. Codd.*; *Z. quod.* — 10. et cetera. *Bamb. c. Turic.*; *Z. om.* — 20. quantum. *Vett. Codd.*; *Z. quantam.* — 21. a Gratiis. *Bamb. sec. m. c. Turic.*; *Z. om. a.* — 22. alterum canore. *Bamb. c. Turic. Lassb.*; *Z. can. alt.* — 25. duci. *Bamb. sec. m.*; *Z. affici.* — 26. actus. *Bamb. sec. m. c. optt. Codd.*; *Z. aptus.* — et est. *Bamb. c. vett. Codd.*; *Z. om. et.* — 32. Pythagoran. *Bamb. c. Tur.*; *Z. Pythagoram.* — 34. Id. *Sic Codd.*; *Z.*

de vet. conj. Ea. — 45. cludatur. *Bamb. c. optt. Codd.*; Z. claudatur. — 49. augenda. *Bamb. pr. m. c. postt. Codd.*; Z. augendi.

Cap. XI. 2. neque servili. *Bamb. sec. m. c. Tur.*; Z. neo. — 5. emolliuntur. *Codd. fere* ac demoll.; Z. ac D moll. — 10. alterum. *Amb. 1.*; Z. altero. — 15. corporum. *Bamb. c. optt. Codd.*, Z. corporis. — 17. haec esse. *Bamb. c. optt. Codd.*; Z. hoc e. — et a Chrysippo. *Bamb. c. vetl. Codd.*; Z. inser. a. — 18. ejus. *Bamb. c. vetl. Codd.*; Z. adj. etiam.

Cap. XII. 5. potest. *Amb. 1.*; Z. possit. — 10. afflictet. *Amb. 1.*; Z. affligit. — 14. partibus. *Bamb. sec. m. c. optt. Codd.*, Z. artibus.

LIBER II.

Cap. I. 3. subsidat. *Sic. Codd.*; Z. subsideat. — videatur. *Bamb. sec. m. c. optt. Codd.*; Z. videtur. — 7. non id. *Amb. 1.*; Z. adj. est. — 8. officia operis sui. *Sic optt. Codd.*; Z. op. s. off. — 11. Quinto. *Sic Codd.*; Z. Q. — 12. utaris. *Bamb. pr. m. c. cett. Codd. praeter Amb. 1. cf. I, 5, 42.*

Cap. III. 2. quanta. *Sic. optt. Codd.*; Z. quantaque. — 9. etiam obscurior. *Sic. optt. Codd.*; Z. obsc. etiam.

Cap. IV. 2. historica. *Bamb. c. optt. Codd.*; Z. historia. — 4. et indoles. *Bamb. c. vetl. Codd.*; Z. om. et. — 10. Nec. *Amb. 1.*; Z. Me. — 12. ipsum totas. *Amb. 1.*; Z. tot. ips. — 14. et corrigendum opus. *Bamb. c. optt. Codd.*; Z. op. et corr. — 15. dum non. *Sic. Codd.*; Z. inser. aliud. — 17. sibi rei. *Amb. 1.*; Z. rei sibi. — 18. aut de. *Amb. 1. c. Bamb. pr. m. ante rasuram*; Z. ut de. — 22. de his. *Bamb. c. optt. Codd.*; Z. de iis. — 25. et hae. *Bamb. c. vetl. Codd.*; Z. om. et. — 29. Nec vero. *Sic Codd.*; Z. necesse est. — 37. aut in rebus est. *Sic Codd. et edd. vetl.*; Z. est. aut in r. — 42. ne hi. *Bamb. c. optt. Codd.*; Z. n. ii.

Cap. V. 5. cujusque—liberis. *Bamb. c. Amb. 1. et optt. fere Codd.*; Z. cujus quisque eorum velit libri. — 6. videtur magis. *Bamb. c. optt. Codd.*; Z. mag. vid. — 8. his quae. *Optt. Codd.*; Z. iis. q. — 11. quam his. *Amb. 1.*; Z. q. iis. — communi boni. *Amb. 1.*; Z. communis habitus bonis. — 13. docendi semper. *Amb. 1.*; Z. semp. doc. — 22. deleniantur. *Bamb. pr. m.*; Z. deliniantur. — 25. modo concesserim. *Amb. 1.*; Z. conc. mod.

Cap. VI. 1. praevia. *Amb. 1. Flor. uterque sec. m.*; Z. brevia.

Cap. VII. 4. et figuris. *Amb. 1.*; Z. ac fig. — 5. plurium. *Bamb. c. Codd. vetl.*; Z. plurimum.

Cap. VIII. 1. in his. *Bamb. c. optt. Codd.*; Z. in iis. — 9. certe eum. *Bamb. sec. m. c. Codd. vetl.*; Z. om. — 13. componet. *Amb. 1. c. Bamb. sec. m.*; Z. incumbet. — 14. ad quod. *Amb. 1.*; Z. cui.

Cap. X. 1. atque exerc. *Amb. 1. Bamb. pr. m.*; Z. ac satis ex. — ratione declamandi. *Sic Amb. 1.*; Z. decl. rat. — 3. veritatibus. *Amb. 1.*; Z. veritati. — 6. cujuseunque. *Bamb. c. Turic. Lassb.*; Z. ejusque. — 9. simus. *Bamb. c. optt. Codd.*; Z. sumus. — 10. voluntatem. *Bamb. c. vetl. Codd.*; Z. voluptatem.

Cap. XI. 7. sit puerorum commentariis. *Optt. Codd.*; Z. puer. comm. sit.

Cap. XII. 5. provenit. *Sic etiam Bamb. sec. m.* — 6. intenderunt. *Bamb. sec. m.*; Z. intenderint. — 9. gestus. *Bamb. c. vetl. Codd.*; Z. gestu.

Cap. XIII. 3. Quid si enim. *Bamb. c. optt. Codd.*; Z. Quid enim si. — obstabit, collibus. *Bamb. sec. m. c. Codd. vetl.*; Z. inser. si. — 8. deceat et. *Sic Bamb. c. vetl. Codd.*; Z. om. et. — 10. est ipsa illa. *Bamb. c. vetl. Codd.*; Z. illa ipsa. — 14. vocitant. *Amb. 1.*; Z. vocant. — et subruui. *Codd. optt.*; Z. aut subr. — 17. sint. *Bamb. c. cett. Codd.*; Z. sunt.

Cap. XIV. 2. effertur. *Amb. 1. c. Bamb. sec. m.*; Z. effertur. — 4. certe et. *Amb. 1.*; Z. om. et.

Cap. XV. 4. δύναμιν. *Sic optt. Codd.*; Z. τὴν δύναμιν. — 7. Manium. *Bamb. sec. m. c. optt. Codd.*; Z. M'. — 8. contione. *Bamb. c. Codd. fere omn.*; Z. contionem. — 13. Arist. dicit. *Bamb. c. plerisque Codd.*; Z. inser. qui. — 14. tantum. *Bamb. c. optt. codd.*; Z. tamen. — 16. vim esse videndi. *Sic Bamb. quoque sec. m.* — Diodorus. *Bamb. Deodorus. Goth. c. similibus Eudorus. cf. Proleg. rhetorices a Spengelio primum editae ἡγορευτικὴ τοίνυν ἐστίν, ὡς Διόδωρος φησὶ, δύναμις εὐρετικὴ καὶ ἐμνηνευτικὴ μετὰ νόσμον τῶν ἐνδεχομένων πιθανῶν ἐν παντὶ λόγῳ.* — loquendi. *Amb. 1.*; Z. eloquendi. — 21. nuntiatrice. *Bamb. c. optt. Codd.*; Z. enuntiatrice. — decenti. *Sic Turic. sec. m.*; *Amb. 1. decentis*; Z. decente. — mentionem. *Sic Turic. Lassb.*; *Amb. 1. Bamb. mentionem*; Z. inventionem. — 22. dubia civili. *Bamb. c. optt. codd.*; Z. inser. in. — 25. cocorum. *Bamb. c. vetl. Codd.*; Z. coquorum. — artificium, exercit. *Sic Amb. 1.*; Z. inser. et. — 27. putat. *Bamb.*; *Amb. 1.*

Turic. c. similibus putant; *Z.* putavit. — 30. facilitate. *Codd. omn.*; *Z.* facultate. — 33. eandem philosophiam. *Sic Amb. 1.*; *Z.* etiam philosophiae. — 36. intra. *Amb. 1.*; *Z.* intraque. — utrique jam. *Amb. 1.*; *Z.* jam utrique.

Cap. XVI. 5. gessere. *Bamb. pr. m. ger. sec. gere c. Turic. i. c.* gessere; *Z.* egere. — 10. est tamen. *Amb. 1.*; *Z.* tamen est. — 16. irrationalia. *Sic Bamb. quoque.* — 19. fulgurare. *Bamb. sec. m.*

Cap. XVII. 4. Socraten. *Bamb. c. optt. Codd.*; *Z.* Socratem. — 8. exquirere. *Bamb. sec. m. c. Amb. 1.*; *Z. om.* — 11. faciant qui non didicerint. *Bamb. sec. m. c. Codd. optt.*; *Z.* faciat — didicerit. — 12. quantuscunque. *Z. sine certa auctoritate* quantuscunque. — 30. contrariam sibi. *Sic Bamb. c. optt. Codd.*; *Z.* sibi contr. — 35. sint. *Amb. 1.*; *Z.* sunt. — 36. defendat. *Bamb. c. Codd. optt.*; *Z.* defendantur. — 41. esse artem eam. *Bamb. c. optt. Codd.*; *Z.* eam artem esse. — viam, id est ordinem. *Amb. 1.*; *Z.* via id est ordine. — ostendemus. *Bamb. sec. m. c. Codd. optt.*; *Z.* ostendimus. — 43. idque. *Bamb. c. cett. Codd.*; *Z.* Id quod.

Cap. XIX. 2. credam naturae. *Amb. 1.*; *Z.* naturae credam.

Cap. XX. 3. neque b. neque m. *Bamb. c. Codd. vett.*; *Z.* nec — nec. — 5. virtus. *Amb. 1. c. Bamb. sec. m.*; *Z.* virtutis. — 8. ut iudicio. *Bamb. c. optt. Codd.*; *Z. inser. in.*

Cap. XXI. 4. sint. *Sic Codd. optt.*; *Z.* sunt. — 24. in id. *Amb. 1.*; *Z.* et id.

LIBER III.

Cap. I. Prooemium. 3. arbitrabamur. *Sic Bamb. sec. m. c. Flor.*; *Z.* arbitramur. — 3. muniverunt. *Amb. 1.*; *Z.* munierunt. — 9. Socraten. *Bamb. sec. m. c. Turic. Lassb.*; *Z.* Socratem. — 14. Ἰσογόρη. *Bamb. sec. m.*; *Z. καὶ Ἴσ.* — 18. fuit Latine Gajus Valgius. *Bamb. c. Codd. optt. f. L.*; *idem sec. m. c. Amb. 1.* Gajus; *Z. L. f. C. Valg.* — Mattium. *Amb. 1.*; *Z.* Matium. — 22. auctores. *Bamb. c. Codd. optt.*; *Z.* scriptores.

Cap. II. 3. sicuti. *Amb. 1.*; *Z.* sicut.

Cap. III. 2. Hic si. *Bamb. Flor. uterque sec. m.*; *Z.* Ac si. — 7. quintam quoque. *Bamb. sec. m. c. Codd. vett.*; *Z.* quintamque. — 14. igitur sunt. *Bamb. Flor. uterque sec. m.*; *Z. om.* sunt.

Cap. IV. 2. sed paene. *Bamb. c. Codd. fere omn.*; *Z. inser.* etiam. — 6. orationis. *Bamb. c. Codd. fere omnibus*; *Z.* oratoris.

— 14. pleraque. *Amb. 1.*; *Z.* plerumque. — 15. ac — ac. *Sic Amb. 1. Turic.*; *Z.* aut — aut.

Cap. V. 4. in scripto et in. *Amb. 1.*; *Z.* aut in scr. aut in. — scripto de. *Amb. 1.*; *Z. inser. sunt.* — rationale, hoc legale. *Bamb. c. Codd. fere omnibus*; *Z.* leg. hoc rat. — 7. quae ἕνωθι. *Amb. 1.*; *Z.* haec ἕνω. — 10. thesis posse. *Bamb. c. optt. Codd.*; *Z.* posse th. — 14. confirmant. *Amb. 1.*; *Z.* confirment. — scripsit, et. *Bamb. c. optt. Codd.*; *Z. inser. libris.* — 16. Adhuc. *Bamb. c. Codd. optt.*; *Z.* Ad hoc. — 18. rerum controversiam. *Amb. 1. c. Codd. optt., certe controversiam dantibus*; *Z.* rem controversam.

Cap. VI. 11. primam partem. *Bamb. c. optt. Codd.*; *Z.* prima parte. — competere equitem. *Amb. 1.*; *Z. inser. in.* — 16. habes. *Amb. 1.*; *Z.* habet. — 21. fuit: cum — credere. *Sic Bamb. c. cett. Codd.*; *Z. f., ut, cum — crederem.* — 22. quive. *Amb. 1.*; *Z.* nec qui. — 23. ducta est. *Amb. 1.*; *Z.* ductae. — 26. quia. *Bamb. sec. m. c. Codd. optt.*; *Z.* qui. — 29. sequeretur. *Bamb. c. Codd. vett.*; *Z.* sequetur. — 34. constet — non constet. *Amb. 1.*; *Z.* non constet — constet. — 46. ducuntur. *Bamb. c. optt. Codd.*; *Z.* dicuntur. — 49. rhetoricis. *Bamb. pr. m. c. Bern. Voss. 1. 3. om. verba intellectu difficilima:* etiam sic omne opus dividit in veritatem et petenda ac fugienda, quod est suasoriae et de eodem atque alio, partiendo tamen ad haec pervenit, quae *Z. recepit c. conjectura Buttmani* etiam si. — 49. quod dicit. *Bamb. sec. m. c. Codd. vett.*; *Z.* quod. — 52. incidit. *de conj. Capperonnerii: Codd. incidunt.* — 61. Aristotelen. *Bamb. c. Codd. optt.*; *Z.* Aristotelem. — 64. jam editos libros. *Bamb. c. Codd. optt.*; *Z.* suos libr. j. editos. — 66. has quinque. *Bamb. sec. m. c. Codd. optt.*; *Z. om.* has. — 75. quaestiones. *Bamb. c. Codd. vett.*; *Z.* et qu. — 76. mortem maerebat. *Amb. 1.*; *Z.* morte. — 77. Et similiter. *Amb. 1.*; *Z.* Ac sim. — 83. dicatur. *Bamb. sec. m. c. Codd. optt.*; *Z.* dicitur. — 84. actiones sive translationes. *Bamb. sec. m. c. optt. Codd.*; *Z.* actionis s. translationis. — non natura. *Bamb. sec. m. c. Codd. vett.*; *Z. om.* non. — 86. veluti. *Amb. 1.*; *Z.* velut. — 91. subjacent his et. *Amb. 1.*; *Z.* subjacentes. — 93. et duos. *Bamb. sec. m. c. Codd. optt.*; *Z. om.* et. — 94. crimina neget. *Amb. 1.*; *Z. inser. vel omnia.* — 96. parentum. *Bamb. c. Codd. vett.*; *Z.* parentum. — 99. et scripti. *Bamb. sec. m. c. Codd. optt.*; *Z. om.* et. — tunc natus. *Amb. 1.*; *Z.* tum n.

Cap. VII. 1. attulerint. *Bamb. c. optt. Codd.*; *Z.* attulerunt.

— 9. in quibusdam. *Bamb. c. Codd. optt.*; Z. in qu. — sint. *Bamb. c. Codd. optt.*; Z. sunt. — 11. promiserunt. *Bamb. sec. m. c. Codd. optt.*; Z. promiserint. — 13. vero tum. *Bamb. c. Codd. fere omn.*; Z. v. cum. — 18. uti. *Amb. 1.*; Z. ut. — 19. adquisiere. *Amb. 1.*; Z. atque Iro *de vet. conj.* — Plisthenem. *Amb. 1.*; Z. Plisthenem. — 20. a familia. *Amb. 1.*; Z. e fam. — 25. ducetur. *Bamb. c. Codd. optt.*; Z. ducatur. — 27. erit et. *Bamb. c. Codd. optt.*; Z. erit etiam.

Cap. VIII. 5. Demosthenem. *Bamb. c. Codd. optt.*; Z. Demosthenem. — Halonnesum. *Bamb. c. Turic.*; Z. Halonesum. — 6. ubique. *Bamb. c. Codd. optt.*; Z. utique. — 9. cum queritur. *Bamb. c. Codd. optt.*; Z. conqueritur. — C. Sallustius. *Bamb. c. Codd. optt.*; Z. Crispus Sall. — 15. jure. *Bamb. sec. m. c. Codd. optt.*; Z. in re. — erit, si. *Amb. 1.*; Z. inser. ut. — 19. Deliberat. *Bamb. c. Codd. omn.*; Z. ut deliberat. — 26. et partes. *Amb. 1.*; Z. ut p. — 31. Sed neque. *Amb. 1.*; Z. inser. tamen. — 33. deliberabat. *Amb. 1.*; Z. deliberavit. — 38. cavendum. *Bamb. c. Codd. optt.*; Z. cav. est. — 39. fecerint. *Bamb. c. omn. fere Codd.*; Z. fecerit. — 40. Namque. *Sic Turic. sec. m.*; *Bamb. c. cett. Codd.* nam quod; Z. Nam. — 42. praepositis. *Amb. 1.*; Z. propositis. — 46. reipublicae se. *Amb. 1.*; Z. se reip. — 51. ab re. *Amb. 1.*; Z. a re. — 54. exhortationem vitiorum. *Amb. 1.*; Z. hortationem amorum. — 55. ex utroque. *Amb. 1.*; Z. et ex utr. — 60. moderationem consilia. *Amb. 1.*; Z. inser. rationemque. — 62. affectione. *Codd. vet.*; Z. affectatione. — 68. apta. *Amb. 1.*; Z. aptata.

Cap. IX. 2. inventio, eloc. *Bamb. c. Codd. optt.*; Z. inser. et. — 5. propositio ei. *Amb. 1.*; Z. om. ei. — 7. constituerit. *Bamb. c. Codd. optt.*; Z. constituterit. — 9. dicemus. *Amb. 1.*; Z. dicimus.

Cap. XI. 1. continens vel. *Bamb. c. Codd. fere omn.*; Z. inser. id est *συνέχων*. — 9. potentissimam. *Amb. 1. c. Lassb. pr. m.*; Z. appositissimam. — 10. tractetur. *Bamb. c. Codd. optt.*; Z. tractatur. — 14. Arrunti. *Bamb. c. Amb. 1.*; Z. Aranci. — Lusium. *Bamb. c. Codd. optt.*; Z. C. Lus. — 17. recessum. *Amb. 1.*; Z. et rec. — constituta et hic. *Amb. 1.*; Z. constituta, hic, om. et. — 19. brevius hi. *Amb. 1.*; Z. om. hi. — judicationem esse. *Bamb. c. Codd. optt.*; Z. inser. idem. — 24. Neque. *Bamb. c. Codd. optt.*; Z. Nec.

LIBER IV.

Prooemium. 6. sive. *Bamb. c. Codd. optt.*; Z. seu. — 7. infinitum laborem. *Bamb. c. Codd. optt.*; Z. inser. mihi.

Cap. I. 3. possit. *Amb. 1.*; Z. prosit. — 8. imparatos. *Bamb. sec. m. c. Amb. 1.*; Z. et. — 10. praecipueque. *Bamb. c. Codd. optt.*; Z. praecipue. — 11. sed ne quod. *Sic Amb. 1.*; *Bamb. sec. m. alique Codd. vet. inser.* ne post quod; Z. om. ne. — 13. Multo magis. *Amb. 1.*; Z. Multum agit. — ut in. *Bamb. sec. m. c. Codd. optt.*; Z. om. ut. — 15. illa. *Bamb. c. Codd. optt.*; Z. illud. — 18. adversariis. *Bamb. sec. m. c. Codd. optt.*; Z. adversario. — pravus hic. *Sic Ald.*; *Codd. om. iudicibus, quod Z. uncis inclusum inser.*; *Amb. 1. Lassb. parvus; Bamb. c. cett. parvis.* — 24. exiget. *Amb. 1.*; Z. exigit. — 28. in exordiis. *Bamb. sec. m. c. Codd. vet.*; Z. om. in. — 31. pertinent. *Amb. 1.*; Z. pertinet. — 34. Vergilius. *Bamb. pr. m.*; Z. Virg. — 35. ejus. *Amb. 1.*; Z. istius. — 36. inniti. *Amb. 1.*; Z. niti. — 38. ergo est. *Amb. 1.*; Z. om. est. — levanda. *Bamb. c. Codd. optt.*; Z. elevanda. — 42. Eo. *Amb. 1.*; Z. Et eo. — quae esse. *Bamb. c. Codd. vet.*; Z. quae quia esse. — 43. sibi ipsi. *Amb. 1.*; Z. ipsi sibi. — 49. inde. *Amb. 1.*; Z. deinde. — 50. supra diximus. *Amb. 1.*; Z. om. supra. — cum his. *Turic. Lassb.*; Z. tum his. — 53. dubio — aliis. *Amb. 1.*; Z. d. ex aliis partibus sunt aut aliis. — 56. ullaē. *Codd.*; Z. de *Conj. Regii* illa. — 61. portu. *Amb. 1.*; Z. portum. — 65. putent. *Bamb. c. Codd. fere omn.*; Z. putant. — 67. languere. *Amb. 1.*; Z. languescat.

Cap. II. 2. Haec. *Amb. 1.*; Z. Ea. — Lollius. *Amb. 1. olius; Z. Acilius.* — 3. Chrysogoni. *Amb. 1.*; Z. Chrysogonus. — 5. corporis habitu. *Amb. 1.*; Z. hab. corp. — 7. et propositione. *Bamb. Amb. 1., uterque pr. m.*; Z. inser. cum. — 8. neque — neque. *Bamb. c. Codd. optt.*; Z. nec — nec. — de templo pecuniam. *Amb. 1.*; Z. pec. de t. — 10. atque. *Codd. omn.*; Z. de *conj. Spaldingii* atqui. — 14. et interdum. *Bamb. c. Codd. optt.*; Z. om. et. — 15. qui. *Amb. 1.*; Z. si quis. — 20. esse supervacuam. *Amb. 1.*; Z. superv. esse. — quid factum. *Amb. 1.*; Z. factum quid. — 26. transferendum. *Amb. 1.*; Z. transf. erit. — 32. nec liceat. *Bamb. c. Turic. pr. m. Goth.*; Z. ne l. — solum relinquunt. *Amb. 1.*; Z. solam relinquunt. — 36. dicentur. *Amb. 1.*; Z. dicuntur. — 37. et vocif. *Bamb. c. Codd. optt.*; Z. ac voc. — 45. ubicunque. *Bamb. sec. m. c. Codd. optt.*; Z. ubique. — 46. accipi solum. *Amb. 1.*; Z. sol. acc. — quia et. *Bamb. sec. m. c. Codd. vet.*; Z. om. et. — 47. Neque. *Amb. 1.*; Z. Neque enim. — 51. et cetera. *Bamb. c. Guelf.*; Z. etc. — 53. etiam ductus. *Obr. ac fort. Amb. 1.*; Z. et

duct. — 54. tamen etiam. *Obr. ac fort. Amb. 1.; Z. etiam tamen.*
 — 61. utilis, velut. *Bamb. sec. m.; Z. inser. ut etiam.* — 68. quaeretur. *Amb. 1.; Z. quaeritur.* — 70. nimium in. *Bamb. sec. m. c. Codd. vet.; Z. de conj. inser. quantum.* — Quid. *Codd. vet.; Amb. 1. qui; Z. Sed quid.* — est et nihil. *Bamb. sec. m. c. Codd. optt.; Z. om. et.* — 77. aliam mentem. *Amb. 1.; Bamb. pr. m. om. mentem, sec. expunxit aliam; Z. om. aliam ment.* — 80. esse eorum. *Bamb. c. Codd. optt.; Z. eorum esse.* — 86. ita. *Sic Amb. 1.; Bamb. pr. m. om. aliqua ita, sec. superscr. vel ita; Z. aliqua ita.* — mentior. *Bamb. sec. m. c. Codd. vet.; Z. mentiar.* — 87. palam — praecessisse adjiciunt. et *Bamb. sec. m. ac Lassb.* — 88. P. Clodius. *Bamb. c. vet. Codd.; Z. Publius Cl.* — 96. in omnibus. *Bamb. sec. m. c. Amb. 1.; Z. om. in.* — 98. invenit tum. *Sic de conj. Zumptii ex Amb. 1. inventum; Z. in ed. om. tum.* — 105. Sasiae. *Sic aut Sasiae codd.; Z. Sasiae.* — nonne. *Bamb. c. cett. Codd.; Z. non.* — 107. Staleni. *Sic optt. Codd.; Z. Staleni.* — 109. profectus. *Bamb. c. Codd. fere omn.; Z. prof. est.* — 110. ad suos. *Sic Bamb. c. cett. Codd.; Z. et ad suos, — affectu. Sic etiam Bamb. sec. m.* — 121. interjectione. *Sic etiam Bamb. sec. m. — 124. a vicibus. Amb. 1.; Z. om. a.* — 128. Est quaedam. *Bamb. pr. m. c. Codd. optt.; Z. inser. et.* — quid factum sit. *Sic Ambr. 1.; Bamb. c. vet. Codd. quod facti s.; Z. quid facti sit.* — 130. Cluentius fuit. *Bamb. sec. m. c. optt. Codd.; Z. inser. Habitus.*

Cap. III. 1. aut plaus. *Bamb. c. Codd. vet.; Z. ac pl.* — 5. vel quasi finis narrationis vel. *Bamb. c. Codd. vet. astipulante J. Victore; Z. vel egressio quasi.* — 6. velut erumpente. *Bamb. pr. m. astipulante J. Victore; Z. spiritum rumpente.* — 9. tuebimur. *Amb. 1.; Z. inferemus.* — 10. causa jam nota. *Sic Amb. 1.; Z. jam c.* — justum. *Sic optt. Codd.; idemque in Bamb. sec. m. superscriptum fuisse ex rasura adhuc cernitur.* — 14. totum. *Sic Bamb. quoque sec. m.* — 15. minutio. *Sic Bamb. c. Lassb. astipul. J. Victore et Cassiodoro.* — 16. Et plurima. *Bamb. sec. m. c. optt. Codd.; Z. sed pl.*

Cap. IV. 3. Nonnunquam vero valde utilis est. *Haec ex optt. Codd. scriptura astip. J. Victore eruntur; Z. Nunquam vero deest utiliter.* — 4. quin. *Sic Bamb. quoque pr. m.* — quaestionem judici. *Sic Bamb. sec. m. c. optt. fere Codd.; Z. om. judici.*

Cap. V. 1. simus. *Bamb. sec. m. c. optt. Codd.; Z. sumus.*

— 2. praeterimus. *Bamb. c. optt. Codd.; Z. praeterierimus.* — 3. hoc tamen. *Sic ex scriptura optimorum Codd., cum aut alio ex nota alius lectionis seu manus, ut saepius fit, ortum videatur.* — 9. si illa. *Bamb. c. Codd. optt.; Z. si ita.* — 12. fuisse partes. *Amb. 1.; Z. part. f.* — 13. et illo. *Sic omnes libri; Z. ex sola Ald. cum i.* — 14. incerta. *Bamb. c. Codd. optt. Z. incertae.* — 18. agitur. *Bamb. sec. m. Amb. 1.; Z. agitur.* — 24. ut quae. *Bamb. sec. m. c. Codd. vet.; Z. utique.* — 26. divisa autem. *Amb. 1.; Z. om. autem.*

LIBER V.

Prooemium. 1. pelli. *Amb. 1. c. optt. Codd.; Z. depelli.* — et voluptatem. *Sic Bamb. quoque pr. m.* — 4. huic. *Amb. 1.; Z. om.* — 5. sint. *Bamb. c. Codd. vet.; Z. sunt.*

Cap. II. 5. quantulacunque. *de conj. vet.; Codd. quantulumcunque.*

Cap. III. vulgantium. *Sic Julius Victor; Codd. vulgarium.*

Cap. V. 2. etiam ipsa saepe. *Sic Amb. 1. astipul. J. Victore; Z. ipsa s. etiam.*

Cap. VI. 3. negant. *Amb. 1. c. Codd. optt.; Z. negarent.*

Cap. VII. 8. Quomodo. *Sic Bamb. c. Codd. optt.; Z. de conj. Regii. Id quomodo.* — 11. inducuntur in laqueos. *Corr. Gernhard; Bamb. pr. m. inducuntur in laqueo; Codd. optt. inducuntur in latus.* — 13. multo magis. *Bamb. c. Codd. fere omn.; Z. inser. tum.* — 14. perseverarint. *Bamb. sec. m. c. Codd. optt.; Z. perseveraverint.* — reprehensio. *Sic, ut videtur, Amb. 1.; Bamb. reprehensio.* — 16. ne omnia. *Bamb. c. Codd. optt.; Z. inser. ad.* — 17. interr. est. *Bamb. c. Codd. optt.; Z. om. est.* — 27. pugnat, modestia mitigatur. *Sic Codd. optt. assentiente Bamb.; Z. pugnassent — mitigantur.* — 29. perducat. *Bamb. sec. m. c. Codd. optt.; Z. perducet.* — 31. est saepius. *Bamb. c. Codd. vet.; Z. om. est.* — 32. dictis tantum. *Amb. 1. c. Codd. optt.; Z. tantum dictis.* — 34. sunt et. *Amb. 1.; Z. om. et.* — 35. si qui. *Bamb. c. Codd. fere omn.; Z. si quis.* — vocatur. *Bamb. c. Codd. fere omn.; Z. vocantur.* — esse eorum. *Bamb. c. Codd. vet.; Z. eorum esse.* — partes divinationis. *Sic Jul. Victor; Z. de conj. partem divinationis; Codd. partis divinationem.*

Cap. VIII. 1. quam ii. *Bamb. c. Amb. pr. m.; Z. om. ii.* — delentii. *Bamb. c. Amb. 2.; Turic. Delenti; Z. deliniti.* — 2. in

ducti super. *Bamb. c. Codd. omn.*; Z. super inducti. — 7. supra. *Amb. 1.*; Z. super.

Cap. IX. 3. duas primas. *Amb. 1.*; Z. pr. d. — necessaria sunt quaeque aliter. *Sic ex Codd. optt.*, quibus accedit fere *Bamb.*; Z. *partim de conj. nec.* sunt alia quae non necessaria. Priora illa sunt, quae aliter. — 7. est fluctus. *Amb. 1.*; Z. esset fl. — 8. adjuta. *Bamb. c. Codd. optt.*; Z. adjuncta. — 11. Proinde. *Bamb. c. Codd. optt.*; Z. perinde. — 12. non sint. *Bamb. sec. m. astipul. optt. Codd.*; Z. om. sint. — 13. damnauerint. *Bamb. c. Codd. optt.*; Z. damnauerunt. — 14. aut fortasse. *Bamb. sec. m. c. optt. Codd.*; Z. ut f.

Cap. X. 1. uti. *Bamb. sec. m. c. Codd. optt.*; Z. usuri. — non de eo. *Bamb. c. Codd. optt.*; Z. de eo non. — 5. est posita. *Bamb. sec. m. c. Codd. optt.*; Z. posita est. — 7. epichirema. *Bamb. c. Codd. omn.*; Z. de conj. vet. enthymema. — 8. scilicet rationem — afferentem. *Bamb. sec. m. c. Codd. optt.*; Z. ut sit ratio — afferens. — 9. illius. de conj. *Spald.*; *Codd. omn. illi*; Z. de conj. *Regii* illinc. — 10. Vergilius. *Bamb. c. Flor. pr. m.*; Z. Virgilius. — 11. aliud. *Bamb. c. cett. Codd. praeter Par. 1. 2.*; Z. aliquid. — 15. efficiat. *Bamb. sec. m. c. Codd. optt.*; Z. plerumque effie. — 17. soleret. de conj.; *Bamb. c. Codd. omn. solet*; Z. de conj. *Regii* soleat. — 22. error est. *Amb. 1. c. optt. Codd.*; Z. err. et. — 23. ut dixi, sit. *Amb. 1.*; Z. sit, ut dixi. — 24. fluunt. *Bamb. pr. m. c. Codd. optt.*; Z. sunt. — 26. distantia. *Amb. 1.*; Z. adj. est. — 31. rationem. *Amb. 1. c. Codd. optt.*; Z. adj. plura. — 47. ante. *Amb. 1. c. aliis Codd.*; Z. antea. — 48. Hannibal. *Sic Bamb. sec. m. c. Guelf. aliisque, ut ap. Quint. ubique*; Z. Annibal; erat igitur etiam Hannibalem emendandum. — praecipueque. *Bamb. c. Codd. optt.*; Z. praecipue. — 52. nocte. *Bamb. c. Codd. optt.*; Z. noctu. — 54. Ita aut universam vim verbi complectamur. *Bamb. sec. m. c. Codd. optt.*; Z. Id aut universum verbis complectimur. — 56. vel quod — non potest. *Sic Bamb.*; Z. nec quod — utique potest. — veniendum ad. *Amb. 1. c. Bamb. sec. m.*; Z. inser. est. — 57. prae-moveantur. *Amb. 1. c. aliis Codd.*; Z. removeantur. — neque mortale est neque immortale. *Amb. 1. c. Flor. pr. m.*; Z. neque immortale est neque mortale. — 58. aut quidquid. *Amb. 1. c. Codd. vet.*; Z. aut quod. — calfacere. *Bamb. pr. m. c. Codd. postt.*; Z. calefacere. — 59. solvit — confirmat. *Bamb. sec. m. c. Codd. optt.*;

solvit — confirmabit. — 60. idem. *Sic Bamb. c. cett. Codd.*; Z. conj. vet. item. — 61. quadrupede. *Bamb. pr. m. c. Amb. 1.*; Z. quadrupede. — 64. ducere ea. *Bamb. c. Codd. optt.*; Z. ea ducere. — excandescere. *Verbum hoc num in quo cod. repertum sit, non constat.* — quamvis ita ex. *Codd.*; Z. ita quamvis ex. — 68. inimicus. *Bamb. c. Codd.*; Z. iniquus. — 69. telum e. *Bamb. c. Codd. optt.*; Z. inser. ei. — 72. rei ratio. *Bamb. c. Codd. optt.*; Z. ratio rei. — 74. bonum justitia est. *Amb. 1. c. aliis*; Z. est b. j. — insolubiliū. de conj. *Regii, cf. 9, 3.*; *Codd. innumerabiliū*; Z. immutabiliū. — 76. duas quidam. *Bamb. c. Codd. optt.*; Z. quid. d. — Kalendis Jan. *Bamb. c. Codd. vet.*; Z. Cal. Januarii. *utroque loco.* — 81. fiunt, et. *Bamb. sec. m. c. Codd. vet.*; Z. om. et. — 82. robustus. *Bamb. sec. m. c. Amb. 1.*; Z. adj. est. — 84. Paridi. Si impar esses. *Sic fere Codd.*; Z. Parl, si imperasses. — 85. illud his. *Bamb. c. Codd. fere omn.*; Z. his illud. — faciunt. *Bamb. c. Codd. optt.*; Z. faciant. — 86. quae minora ex majoribus, majora ex minoribus. *Bamb. partim sec. m. c. Codd. optt.*; Z. maj. ex min., min. ex maj. — 89. administranda respub. *Bamb. c. Codd. fere omn.*; Z. inser. est. — agenda si. *Sic levi emendatione Amb. 1. agendas dan- dis, astipul. Codd. optt.*; Z. si agenda. — 100. patiat. *Bamb. sec. m. c. Codd. optt.*; Z. patitur. — 101. Inde. *Bamb. sec. m. c. Codd. optt.*; Z. unde. — 105. lata lex. *Bamb. sec. m. c. Codd. optt.*; Z. om. lata. — 109. proposuerimus. *Amb. 1.*; Z. proposueris. — prouideris. *Amb. 1. c. Codd. optt.*; Z. praevideris. — 111. Amphictio- nas. *Sic ubique fere in Codd.*; Z. Amphictyonas. — 112. proinde. *Bamb. c. aliis Codd.*; Z. perinde. — 116. reperire est. *Amb. 1.*; Z. m. est. — 118. quia. *Bamb. sec. m. c. Codd. optt.*; Z. quod. — 121. nota sunt. *Bamb. sec. m.*; notant *Amb. 1.*; Z. nota. — 125. spectant. *Amb. 1.*; Z. spectent. — medios. *Amb. 1.*; Z. mediosque. — sequantur. Sc. argumenta; Z. conj. sequatur.

Cap. XI. 1. alterum. *Codd. vet. ac sine dubio Amb. 1. quo- que*; Z. hoc alt. — illud. *Bamb. c. Codd. fere omn.*; Z. et ill. — 6. igitur est. *Amb. 1.*; Z. om. est. — sunt. *Amb. 1.*; Z. erunt. — 7. iisdem. *Amb. 1.*; Z. eisdem. — 9. Urbes violata propter ma- rimoniam. *Amb. 1.*; Z. Pr. m. v. urb. — 10. Laudabilior. *Amb. 1. c. Codd. optt.*; Z. admirabilior. — 16. Ahala. *Bamb. c. Codd. optt.*; Z. om. aut — 18. in eadem. *Amb. 1.*; Z. eadem in. — sed sa- cientiss. *Bamb. c. optt. Codd.*; Z. inser. etiam. — 21. allegorian.

Bamb. c. Amb. 1.; Z. allegoriam. — 23. solventibus qui. *Bamb. c. Codd. fere omn.*; Z. *inser. ii.* — affert. *Bamb. c. Codd. omn.*; Z. *de conj. Regii* fert. — me tandem. *Amb. 1. c. Flor.*; Z. tandem me. — 24. spinas. *Bamb. sec. m. c. Codd. optt.*; Z. sentes. — 26. amicitiae. *Bamb. sec. m. c. Codd. optt.*; *intellige* a forma et nave nisi potius abjicienda pec et am.; Z. pudicitiae. — 27. Socratis. *Bamb. c. Codd. omn.*; Z. Socraticis. — 28. At cedo, inquit. *Sic de conj.*; *Amb. 1.* accedo inq.; *Bamb. sec. c. Codd. vet.* accede sis quit. *aut similia*; Z. Age sis, inquit. — 31. ut aquam frigidam. *Amb. 1. c. Codd. optt.*; Z. om. aquam. — 33. si qui — si qui. *Amb. 1. c. Codd. optt.*, quibus poster. loco accedit. *Bamb.*; Z. si quis. — 34. ita decem. *de conj. Spald.*; *Bamb. pr. m. c. Codd. cett.* et add. *vel* et d.; Z. sic d. — 36. Adhibebitur. *Bamb. c. Codd. optt.*; Z. adhibetur. — 39. sapientium. *Bamb. c. Flor. aliisque Codd.*; Z. sapientum. — 40. Megarios. *Codd. fere Megarius*; Z. Megareos. — 42. Socraten. *Bamb.*; Z. Socratem.

Cap. XII. 1. Neque. *Amb. 1. c. Codd. optt.*; Z. Nec. — eis. *Bamb. sec. m. c. optt. Codd.*; Z. his. — 5. sunt. *Turic. Flor. sec. m.*; Z. sint. — spectant. *Bamb. c. Codd. optt.*; Z. *de conj.* spectantia. — 10. Quod dicis, inquit, te non fecisses. *Amb. 1. c. Codd. optt.*; Z. Quid igitur, inq. tu n. fecisses. — 13. cuique. *Bamb. c. Codd. optt.*; Z. cujusque. — habeant. *Bamb. c. Codd. optt.*; Z. habent. — 14. quod. *Bamb. sec. m. c. Codd. optt.*; Z. ut. — 15. injuriam. *Bamb. c. Codd. omn.*; Z. invidiam. — 16. pro teste amico. *Amb. 1. c. Codd. optt.*; Z. in potentes amicos. — 18. proprie. *Bamb. c. cett. Codd.*; Z. propria.

Cap. XIII. 1. Et hoc. *Bamb. c. Codd. optt.*; Z. Et haec. — 3. Quamquam. *Bamb. sec. m. c. Codd. optt.*; Z. Nam. — 8. id est. *Bamb. c. Codd. omn.*; Z. om. — 10. dicat. *Amb. 1.*; Z. dicit. — 13. Urent. *Sic ex Bamb. legendum videtur, qui dat urgent*; *Codd. vet. plerumque* jungunt; Z. urgent. — 14. reus. *Amb. 1.*; *cett. Codd. vet.* quoque dant reum. — 19. communes locos habent. *Sic edd. vet.*; *Codd. fere* communis habet. — 22. nihil ad causam. *Amb. 1.*; Z. ad c. nih. — fecit. *Bamb. sec. m. c. Codd. optt.*; Z. facit. — et haec. *Amb. 1.*; Z. sed h. — 23. In jure. *Bamb. c. Codd. optt.*; Z. Id in j. — 24. omnia videndum. *Amb. 1. c. Codd. vet.*; Z. *inser. tum.* — 28. contradictione. *Sic de conj. Spald.*; *Codd. fere* contradictiones *vel* contradictionem. Z. contradictionibus. — 41. acuisse. *Bamb. c. Codd. omn.*; Z. tacuisse. — 45. rarum. *Bamb. c. Codd.*

optt.; Z. raro. — 50. recte plenioribus. *Sic de Conj. Gernhard.*; *Codd. fere* plenaribus; Z. om. — plurimum. *Bamb. sec. m. c. Codd. optt.*; Z. om. — 51. magnum. *Bamb. sec. m. c. Codd. optt.*; Z. nimum. — 54. Si ista prima. *Sic Gernh. legendum censuit*; *Codd. optt. c. Bamb.* ista pr. seu isti pr.; Z. si pr. — vocandum. *Bamb. c. Codd. omn.*; Z. *de conj. Regii* evocandum. — 56. ornanda. *Amb. 1.*; Z. adornanda. — dicendum. *Bamb. c. cett. Codd.*; Z. docendum *de conj. Regii.* — jejuna tamen erunt et infirma. *de conj. nostra. Codd. optt.* pecunia t. er. et inf.; Z. t. er. inf. — implentur. *Bamb. c. Codd. optt.*; Z. impleantur. — 58. proinde. *Bamb. c. cett. Codd.*; Z. perinde. — 59. Haec accidunt his qui. *Amb. 1.*; Z. om. acc. h. q.

Cap. XIV. 4. cum in propositione dissimili vel contraria. *Amb. 1.*; Z. c. proposito diss. v. contrario. — 6. pluribus. *Bamb. c. Codd. optt.*; Z. plurimis. — habet. *Bamb. c. cett. Codd. et edd. ante Gryph.*; Z. habent. — exornatio et. *Bamb. c. Codd. optt.*; Z. et exorn. *de vet. conj.* — 12. et cetera. *Amb. 1. c. Codd. optt.*; *Bamb. Cetera*; Z. Ceterum. — 13. ut et. *de conj. nostra. Codd. fere* ut est; Z. Et. — rationem alii. *Bamb. c. omn. fere Codd.*; Z. alii rat. — 15. pertinet. *Bamb. c. Codd. optt.*; Z. pertinent. — 16. non es heres. *Amb. 1.*; *Bamb.* non h.; Z. h. n. es. — 17. interimque. *Codd. fere* interim quae; Z. *de conj. Regii* quoque. int. — 18. incipere fas est. *Amb. 1.*; Z. fas est inc. — 19. hac. *Sic ter Amb. 1. c. Codd. optt.*, bis et *Bamb.*; Z. haec. — ratione et intentione. *Amb. 1. c. Codd. optt.*; Z. int. et rat. — 20. quaestio pro Milone. *Bamb. c. Codd. optt.*; Z. pro M. quaestio. — 22. Conclusio autem aut. *Sic Jul. Victor*; *Codd. fere* quod nescio autem; Z. *de Conj. Regii* Connexio aut. — efficitur. *Sic Amb. 1.*; *Bamb. c. Codd. vet.* afficitur; Z. conficitur. — afferret. *Amb. 1.*; Z. afferat. — repellit ut hostis. *Amb. 1. c. Bamb.*; Z. ut h. rep. — 25. quisquam. *Bamb. c. Codd. optt.*; Z. quisquam. — 28. illis. *Bamb. c. Codd. optt.*; Z. illi. — 30. similitudine J. Victor solus; Z. amplitudine. — 32. veneris. *De conj. Baden, Codd. fere* veris *vel* veri; Z. juris. — (non hoc solum pejus faciunt). *Amb. 1. c. Flor.*; *cett. Codd. vet. fere* omn. n. h. s. p. nos f.; Z. *partim de conj. vet.* nam h. s. p. nobis f. — 33. lato. *Bamb. c. cett. Codd. et edd. vet.*; Z. *de conj. Obrechtii* laeto. — 34. his ornatum. *Bamb.*; Z. ornatum iis. — 35. ipsa mala. *Sic Amb. 1.*, *cett. Codd. vet. fere* haec ipsa male; Z. h. male ipsa.

LIBER VI.

Prooemium. 3. repugnantibus. *Amb. 1.*; *Z.* reprobantibus. — 4. me alius. *Bamb. c. Codd. optt.*; *Z.* inser. est. — matre eorundem. *Bamb. c. Codd. optt.*; *Z.* eorundem matre. — 13. honorum prius. *Bamb. c. Codd. omn.*; *Z.* de vet. emend. patris. — spes acutissimae. *De conj. Gernhardi*; *Codd. pr. m. aculis, sec. acutae*; *Z. de vet. conj. spe Atticae.* — tantum poenas. *Aposiopesis. Sic Bamb. c. cett. Codd.*; *Z. de vet. conj. tantum ad poenas amisi.* — 16. cura alienas. *Bamb. c. Codd. omn.*; *Z. de vet. conj. inser. ad.*

Cap. I. 4. Reliquit hanc. *Bamb. c. Codd. optt.*; *Z. inser. vero.* — merito. *Bamb. c. Codd. optt.*; *Z. et m.* — 5. occasiones. *Idem, quod correxerat Regius, Bamb.* — 6. possint. *Amb. 1.*; *Z. possunt.* — 9. aliis hic atque ille. *Sic de conj. Stechov. Codd. optt. fere aliis sic aut ille*; *Z. de vet. correctione rarius hic ille.* — 11. ponat ante oculos. *Bamb. c. Codd. optt.*; *Z. ante oc. pon.* — 18. solitudinem. *Bamb. c. Codd. omn.*; *Z. de conj. Regii solitudo* — 20. ea praedicta. *Bamb. c. Codd. omn.*; *Z. de vet. conj. inser. quae.* — 23. non flecti. *Amb. 1. c. Flor.*; *Z. fl. non.* — petentur. *Bamb. c. cett. Codd.*; *Z. de conj. Gesneri petetur.* — iis — iis. *Bamb. c. optt. Codd.*; *Z. bis ex iis.* — 24. o te. *Bamb. c. Codd. omn.*; *Z. o me de vet. emend.* — 26. quales — fingimus. *Sic hunc locum levi emendatione ad exemplar optt. Codicum restitui; hi fere praebent, quales lit. dicit. (vel decet) patr. nudae tantum r. m. aut e. ipsos l. f. etc.*; *Z. q. l. decent vel p. Mutae t. r. m. si aut e. ipsis loquimur aut e. ipsas l. f. — desentis. Amb. 1. c. Bamb.*; *Z. desentes.* — 27. Frustra. *Bamb. c. Codd. optt.*; *Z. O frustra.* — meas. *Bamb. c. Codd. optt.*; *Z. meae.* — 30. verberata. *Bamb. c. Codd. optt.*; *Z. inser. ac verb.* — 32. tabula supra Jovem. *Sic fere Codd. omn., nisi quod tabulam*; *Z. de vet. conj. in tabula sipariove.* — 33. conjux. *Bamb. c. Codd. optt.*; *Z. conjunx.* — 38. risum moventes. *Amb. 1.*; *Z. inser. etiam.* — 40. cadaveri erat. *Sic levi emend.; Codd. fere caducaveri*; *Z. de conj. vet. cadaveri, om. erat.* — 43. quidem. *Sic de conj. Codd. omn. quidni*; *Z. de conj. Regii inquit.* — 47. Itaque nec illum. *Bamb. c. vett. edd.*; *Amb. 1. ita nec i.*; *codd. vett. rell. fere Ita nec quia i.* — 48. agendum. *Bamb. c. cett. Codd.*; *Z. de vet. conj. agentem.* — 49. ejusmodi. *Bamb. c. Codd. optt.*; *Z. hujusmodi.* — qui contra. *Bamb. c. Codd. optt. et edd. vett.*; *Z. inser. et.* — 51. sint. *Bamb.*

c. Codd. optt.; *Z. sunt.* — Nam et. *Bamb. c. Amb. 1.*; *Z. adj. his.* — 52. tota. *Sic Amb. 1. sec. m.*; *Codd. optt. fere toto*; *Z. tuta.* — elud. Plodite. *Bamb. c. Codd. optt.*; *Z. clauduntur. Plaudite.* — 53. erit affectus. *Bamb. c. Codd. vett.*; *Z. aff. erit.*

Cap. II. 1. causarum — praecipue. *Bamb. sec. m.*; *cett. Codd. optt. om. sit*; *Z. causarum sit summa, praecipueque.* — 3. flendum irascendum. *Bamb. c. Codd. optt.*; *Z. inser. et.* — 3. dominetur. *Codd. omn.*; *Z. de conj. Regii dominatur.* — 7. sint. *Bamb. c. Codd. optt.*; *Z. sunt.* — 9. perlationem. *Sic Codd. omn.*; *pertinet ad vim, qua causam, sicuti legem, tanquam perferimus*; *Z. de conj. Regii perturbationem.* — 12. nam quae πᾶθος conceitavit. *Bamb. c. Codd. optt., nisi quod dant namque*; *Z. namque π. conceitavit.* — 13. perluceant. *Bamb. c. Codd. vett.*; *Z. pelluceant.* — 14. convicium. *Abjeci alieni, ut signum variae lectionis, Codd. hic admodum variantibus.* — 15. his non. *Bamb. pr. m. c. Codd. optt.*; *Z. non his.* — fuit virtus simulationis. *Sic fere Bamb. c. Codd. optt.*; *Z. sunt virtutis simulatio.* — 18. ἦθος videretur. *Bamb. c. Codd. vett.*; *Z. c. Amb. 1. inser. non.* — 25. eruere. *de conj. Burmanni*; *Bamb. sec. m. uere*; *Turic. pr. m. c. Amb. 1. ac fort. Bamb. pr. m. mere*; *Z. mihi.* — et penitus. *Amb. 1.*; *Z. om. et.* — 30. An vero. *Sp. de conj.*; *Codd. Nihil v. vel nil vero.*

Cap. III. 1. maxime. *Bamb. c. Codd. vett.*; *Z. maximi.* — 6. ex ind. *Bamb. c. edd. vett.*; *Z. est ind.* — 9. invitus. *Bamb. c. Codd. optt.*; *Z. invitis.* — 13. cum quis aliquid. *Sic de vet. conj.*; *Codd. in eo aut in eum quis aliquid*; *Z. quid aliquis.* — 16. dicta. *Sic fere ad Codd. vett. auctoritatem*; *dictae modo pro dicta dantium*; *Z. quae dicta.* — 19. ille — aspersus. *Intellige sal.* — 20. mollius. *Bamb. c. Codd. optt.*; *Z. molles.* — Deliciis accipe pro Dativo commodi. — 28. quod — quod. *Amb. 1., cui accedit altero loco Bamb.*; *Z. quia — quia.* — 38. Rarum est. *Amb. 1. c. Bamb.*; *Z. inser. autem.* — Etiam ostendam. *Bamb. c. Codd. optt.*; *Z. Jam ost. de conj. Regii.* — qualem. *Sic Amb. 1.*; *cett. Codd. talem*; *Z. de conj. Regii tandem.* — 43. dictorum. *Bamb. c. Codd. optt.*; *Z. verborum.* — 44. emancipare. *Amb. 1.*; *Z. emancipare*; *cett. Codd. fere emanciparet.* — 58. Julium. *Amb. 1. c. Bamb.*; *Z. Junium.* — 69. timere quasi. *Sic de conj.*; *Codd. tamquam*; *Z. de vet. emend. dubitare tanquam.* — 73. Fabia Dolabellae. *Sic Bamb. c. Amb. 1., pr. m. dante Fabia Dolabella*; *Z. Fabiae Dolabellae.* — dicente.

de conj.; Z. dicenti. — hoc illam. *Bamb. c. Codd. optt.*; Z. h. jam. — 76. quod. *Bamb. c. Codd. vet.*; Z. quo. — 79. ter civica. *Amb. 1.*; idem latet in *Bamb. Tur.* teravica; Z. te civ. — 82. fere est. *Amb. 1. Bamb.*; Z. est f. — 88. hercule. *Bamb. c. Codd. recc.*; Z. hercle. — 94. ridiculum. *Amb. 1.*; Z. adj. est. — 95. et veniret. de conj.; Z. om. et. — 96. Larium. *Amb. 1.* lertium, *Bamb. c. Codd. vet.* arcium; Z. Marcium. — intervāsīt. *Bamb. c. Codd. optt.*; Z. rate evāsīt. — 97. habitus. *Bamb.*; Z. om. habitus. — 98. eruditum est. *Amb. 1.*; Z. om. est. — 99. stultissimi. *Bamb. c. Codd. optt.*; Z. stultis simili. — 102. infirmarem. *Bamb. c. Codd. optt.*, intellige: si plura adjicerem; Z. infirma sed. — 104. constat. de conj.; *Bamb. c. cett. Codd. et oditt.* fere sicut ista; Z. de vet. conj. constat. — 107. reddens. *Bamb. c. cett. Codd.*; Z. de conj. Regii redolens. — 109. eum dixerit. *Bamb. c. cett. Codd.*; Z. de conj. Regii eum ita dixit. — 110. urbana. *Abjeci esse, Codd. dantibus exerio ex sequenti dixerim ortum.*

Cap. IV. 1. prospectum. *Sic Bamb. quoque.* — 2. ex int. *Amb. 1.*; Z. aut int. — depuls. *Bamb. c. Codd. optt.*; Z. aut dep. — dicantur. *Bamb. c. Codd. optt.*; Z. dicuntur. — 4. actiones — explicant. *Sic Amb. 1. sec. m.*; *Bamb. c. plerisque Codd.* actionis — explicant; Z. actionis — explicat. — 8. fatue modo accedendum. *Bamb. c. cett. Codd.*; Z. de conj. fatui m. accedendum. — 9. aperte, quae rixemur. *Sic Bamb. c. Codd. optt., sed locus nondum est sanatus;* Z. de conj. aperta q. rixentur. — 10. in ipsos. *Bamb. c. Codd. optt.*; Z. om. in. — recipit. *Bamb. c. cett. Codd.*; Z. de conj. Regii reperit. — 11. improbitatem retundendo — appellando frequentius. *Sic Amb. 1., optt. Codd. fere accedentibus;* Z. improbitas retundenda — appellandi frequentes. — 14. est inop. — aut incursioni ex insidiis factae. *Codd. optt. fere est inop.* — aut incisio ex insid. f.; Z. et inop. — aut ex insidiis incursioni fiat. — potuerit. *Bamb. c. Codd. vet.*; Z. potuerat. — 20. iudex si fieri potest. *Bamb. c. Codd. optt.*; Z. si f. p. jud.

Cap. V. 2. obscurum. *Bamb. c. Codd. vet.*; Z. obscurumque. — 4. cujus. *Bamb. c. Codd. optt.*; Z. de conj. Regii cui. — 9. quod iudicii corrupti. *Bamb. quodie corr., Turic. quo dicit corr., Amb. 1. om. iudicii;* Z. quod corrupti iudicii.

M. FABIVS QVINTILIANVS

T R Y P H O N I

S U O

S A L U T E M.

Efflagitasti cotidiano convicio, ut libros, quos ad Marcellum meum de Institutione oratoria scripseram, iam emittere inciperem. Nam ipse eos nondum opinabar satis maturuisse, quibus componendis, ut scis, paulo plus quam biennium tot alioqui negotiis districtus impendi: quod tempus non tam stilo quam inquisitioni instituti operis prope infiniti et legendis auctoribus, qui sunt innumerabiles, datum est. Usus deinde Horatii consilio, qui in arte poetica 2 suadet, ne praecipitetur editio *nonumque prematur in annum*, dabam iis otium, ut, refrigerato inventionis amore, diligentius repetitos tanquam lector perpenderem. Sed si 3 tantopere efflagitantur quam tu affirmas, permittamus vela ventis et oram solventibus bene precemur. Multum autem in tua quoque fide ac diligentia positum est, ut in manus hominum quam emendatissimi veniant.

M. FABII QUINTILIANI
INSTITUTIONIS ORATORIAE

AD
VICTORIUM MARCELLUM
LIBRI XII.

LIBER I.

Libro primo haec continentur: Prooemium. Quemadmodum prima elementa tradenda sint. Utilius domi an in scholis erudiantur. Qua ratione in parvis ingenia dignoscantur et qua tractanda sint. De grammaticae. De officio grammatici. An oratori futuro necessaria sit plurimum artium scientia. De musicae. De geometria. De prima pronuntiationis et gestus institutione. An plura eodem tempore doceri prima aetas possit.

PROOEMIUM.

Post impetratam studiis meis quietem, quae per viginti annos erudiendis iuvenibus impenderam, cum a me quidam familiariter postularent, ut aliquid de ratione dicendi componerem: diu sum equidem reluctatus, quod auctores utriusque linguae clarissimos non ignorabam multa, quae ad hoc opus pertinerent, diligentissime scripta posteris reliquisse.
2 Sed qua ego ex causa faciliorem mihi veniam meae deprecationis arbitrabar fore, hac accendebantur illi magis, quod inter diversas opiniones priorum et quasdam etiam inter se contrarias difficilis esset electio; ut mihi si non inveniendi nova at certe iudicandi de veteribus iniungere laborem non
3 iniuste viderentur. Quamvis autem non tam me vinceret praestandi, quod exigebatur, fiducia quam negandi verecundia: latius se tamen aperiente materia plus quam imponebatur oneris sponte suscepti; simul ut pleniore obsequio demererer amantissimos mei, simul ne vulgarem viam in-
4 gressus alienis demum vestigiis insisterem. Nam ceteri fere,

qui artem orandi litteris tradiderunt, ita sunt exorsi, quasi perfectis omni alio genere doctrinae summam inde eloquentiae manum imponent; sive contemnentis tanquam parva, quae prius discimus, studia; sive non ad suum pertinere officium opinati, quando divisae professionum vices essent; seu, quod proximum vero, nullam ingenii sperantes gratiam circa res etiamsi necessarias procul tamen ab ostentatione positas; ut operum fastigia spectantur, latent fundamenta. Ego, cum existimem nihil arti oratoriae alienum, sine quo fieri non posse oratorem fatendum est, nec ad ullius rei summam nisi praecedentibus initiis perveniri: ad minora illa sed, quae si negligas, non sit maioribus locus, demittere me non recusabo; nec aliter, quam si mihi tradatur educandus orator, studia eius formare ab infantia incipiam. Quod opus, Mar-
6 celle Victori, tibi dicamus, quem, cum amicissimum nobis tum eximio litterarum amore flagrantem, non propter haec modo (quanquam sint magna) dignissimum hoc mutuae inter nos caritatis pignore iudicabamus; sed quod erudiendo
Getae tuo, cuius prima aetas manifestum iam ingenii lumen ostendit, non inutiles fore libri videbantur, quos ab ipsis discendi velut incunabulis, per omnes, quae modo aliquid oratori futuro conferant, artes ad summam eius operis per-
ducere destinabamus; atque eo magis, quod duo iam sub
7 nomine meo libri ferebantur artis rhetoricae neque editi a me neque in hoc comparati. Namque alterum, sermone per biduum habito, pueri, quibus id praestabatur, exceperant; alterum pluribus sane diebus, quantum notando consequi poterant, interceptum, boni iuvenes sed nimium amantes mei, temerario editionis honore vulgaverant. Quare in his quoque
8 libris erunt eadem aliqua, multa mutata, plurima adiecta, omnia vero compositiora et, quam nos poterimus, elaborata.

Oratorem autem instituimus illum perfectum, qui esse
9 nisi vir bonus non potest; ideoque non dicendi modo eximiam in eo facultatem sed omnes animi virtutes exigimus. Neque enim hoc concesserim, rationem rectae honestaeque
10 vitae (ut quidam putaverunt) ad philosophos relegendam; cum vir ille vere civilis et publicarum privatarumque rerum administrationi accommodatus, qui regere consiliis urbes,

fundare legibus, emendare iudiciis possit, non alius sit pro-
 11 fecto quam orator. Quare, tametsi me fateor usurum qui-
 busdam, quae philosophorum libris continentur, tamen ea
 iure vereque contenderim esse operis nostri proprieque ad
 12 artem oratoriam pertinere. An, si frequentissime de iustitia,
 fortitudine, temperantia ceterisque similibus disserendum
 est, adeo ut vix ulla possit causa reperiri, in quam non ali-
 qua ex his incidat quaestio, eaque omnia inventionem atque
 elocutionem sunt explicanda: dubitabitur, ubicunque vis in-
 13 genii et copia dicendi postulatur, ibi partes oratoris esse
 praecipuas? Fueruntque haec; ut Cicero apertissime colligit,
 quemadmodum iuncta natura sic officio quoque copulata,
 ut iidem sapientes atque eloquentes haberentur. Scidit deinde
 se studium, atque inertia factum est, ut artes esse plures
 viderentur. Nam ut primum lingua esse coepit in quaesta
 institutumque eloquentiae bonis male uti: curam morum, qui
 14 disertis habebantur, reliquerunt. Ea vero destituta infirmioribus
 ingenii velut praedae fuit. Inde quidam, contempto bene
 dicendi labore, ad formandos animos statuendasque vitae
 leges regressi partem quidem potiore, si dividi posset,
 retinuerunt; nomen tamen sibi insolentissimum arrogaverunt,
 ut soli sapientiae studiosi vocarentur, quod neque summi
 imperatores neque in consiliis rerum maximarum ac totius
 administratione rei publicae clarissime versati sibi unquam
 15 vindicare sunt ausi. Facere enim optima quam promittere
 maluerunt. Ac veterum quidem sapientiae professorum multos
 et honesta praecepisse et, ut praeceperint, etiam vixisse,
 facile concesserim; nostris vero temporibus sub hoc nomine
 maxima in plerisque vitia latuerunt. Non enim virtute ac
 studiis, ut haberentur philosophi, laborabant, sed vultum
 et tristitiam et dissentientem a ceteris habitum pessimis
 16 moribus praetendebant. Haec autem, quae velut propria
 philosophiae asseruntur, passim tractamus omnes. Quis enim
 non de iusto, aequo ac bono, modo non et vir pessimus,
 loquitur? quis non etiam rusticorum aliqua de causis naturalibus
 quaerit? nam verborum proprietas ac differentia omnibus,
 qui sermonem curae habent, debet esse communis. Sed ea et
 17 sciet optime et eloquetur orator; qui si

fuisset aliquando perfectus, non a philosophorum scholis virtutis
 praecepta peterentur. Nunc necesse est ad eos aliquando
 auctores recurrere, qui desertam, ut dixi, partem oratoriae
 artis, meliorem praesertim, occupaverunt, et velut nostrum
 repossidere; non ut nos illorum utamur inventis, sed ut illos
 alienis usos esse doceamus. Sit igitur orator vir 18
 talis, qualis vere sapiens appellari possit; nec moribus modo
 perfectus (nam id mea quidem opinione, quanquam sunt qui
 dissentiant, satis non est) sed etiam scientia et omni facultate
 dicendi. Qualis fortasse nemo adhuc fuerit, sed 19
 non ideo minus nobis ad summa tendendum est; quod fecerunt
 plerique veterum, qui, etsi nondum quemquam sapientem
 repertum putabant, praecepta tamen sapientiae traderunt.
 Nam est certe aliquid consummata eloquentia, neque 20
 ad eam pervenire natura humani ingenii prohibet. Quod si
 non contingat, altius tamen ibunt, qui ad summa nitentur,
 quam qui, praesumpta desperatione quo velint evadendi,
 protinus circa ima substituerint.

Quo magis impetranda erit venia, si ne minora quidem 21
 illa, verum operi, quod instituimus, necessaria praeteribo.
 Nam liber primus ea, quae sunt ante officium rhetoris, continebit.
 Secundo prima apud rhetorem elementa et quae de ipsa
 rhetorice substantia quaeruntur tractabimus. Quinque 22
 deinceps inventioni, nam huic et dispositio subiungitur, quatuor
 elocutioni, in cuius partem memoria ac pronuntiatio veniunt,
 dabuntur. Unus accedet, in quo nobis orator ipse informandus
 est, ut, qui mores eius, quae in suscipiendis, discendis,
 agendis causis ratio, quod eloquentiae genus, quis agendi
 debeat esse finis, quae post finem studia, quantum nostra
 valebit infirmitas, disseramus. His omnibus ad- 23
 miscebitur, ut quisque locus postulabit, docendi ratio, quae
 non eorum modo scientia, quibus solis quidam nomen artis
 dederunt, studiosos instruat et (ut sic dixerim) ius ipsum
 rhetorice interpretetur, sed alere facundiam, vires augere
 eloquentiae possit. Nam plerumque nuda illae artes nimia 24
 subtilitatis affectatione frangunt atque concidunt quidquid
 est in oratione generosius, et omnem sucum ingenii bibunt
 et ossa detegunt, quae ut esse et astringi nervis suis debent,

25 sic corpore operienda sunt. Ideoque nos non particulam
illam, sicut plerique, sed quidquid utile ad instituendum ora-
torem putabamus, in hos duodecim libros contulimus bre-
viter omnia demonstraturi. Nam si quantum de quaque re
26 dici potest persequamur, finis operis non reperietur. Illud
tamen in primis testandum est, nihil praecepta atque artes
valere nisi adiuvante natura. Quapropter ei, cui deerit in-
genium, non magis haec scripta sint quam de agrorum cultu
27 sterilibus terris. Sunt et alia ingenita quaedam adiumenta,
vox, latus patiens laboris, valetudo, constantia, decor;
quae si modica obtigerunt, possunt ratione ampliari, sed
nonnunquam ita desunt, ut bona etiam ingenii studiique cor-
rumpant; sicut et haec ipsa sine doctore perito, studio per-
tinaci, scribendi, legendi, dicendi multa et continua exer-
citatione per se nihil prosunt.

QUEMADMODUM PRIMA ELEMENTA TRADENDA SINT.

I. Igitur nato filio pater spem de illo primum quam
optimam capiat, ita diligentior a principii fiet. Falsa enim
est querela, paucissimis hominibus vim percipiendi, quae
tradantur, esse concessam, plerosque vero laborem ac tem-
pora tarditate ingenii perdere. Nam contra plures reperias
et faciles in excogitando et ad discendum promptos. Quippe
id est homini naturale; ac sicut aves ad volatum, equi ad
cursum, ad saevitiam ferae gignuntur: ita nobis propria est
mentis agitatio atque sollertia, unde origo animi coelestis
2 creditur. Hebetes vero et indociles non magis secundum
naturam homines eduntur quam prodigiosa corpora et mon-
stris insignia, sed hi pauci admodum. Fuerit argumentum,
quod in pueris elucet spes plurimorum, quae cum emoritur
aetate, manifestum est, non naturam defecisse sed curam.
3 Praestat tamen ingenio alius alium. Concedo; sed plus efficiet
aut minus; nemo reperitur, qui sit studio nihil consecutus.
Hoc qui perviderit, protinus ut erit parens factus acrem
quam maxime curam spei futuri oratoris impendat.
4 Ante omnia ne sit vitiosus sermo nutricibus, quas si fieri
posset sapientes Chrysippus optavit, certe quantum res pa-
teretur optimas eligi voluit. Et morum quidem in his haud

dubie prior ratio est, recte tamen etiam loquantur. Has pri- 5
mum audiet puer, harum verba effingere imitando conabitur.
Et natura tenacissimi sumus eorum, quae rudibus annis per-
cepimus; ut sapor, quo nova imbuas, durat, nec lanarum
colores, quibus simplex ille candor mutatus est, elui pos-
sunt. Et haec ipsa magis pertinaciter haerent, quo deteriora
sunt. Nam bona facile mutantur in peius; numquam in
bonum verteris vitia? Non assuescat ergo, ne dum infans
quidem est, sermoni, qui dediscendus sit.

In parentibus vero quam plurimum esse eruditionis opta- 6
verim. Nec de patribus tantum loquor. Nam Gracchorum
eloquentiae multum contulisse accepimus Corneliam matrem,
cuius doctissimus sermo in posteros quoque est epistolis
traditus; et Laelia C. filia reddidisse in loquendo paternam
elegantiam dicitur, et Hortensiae Q. filiae oratio apud Trium-
viros habita legitur non tantum in sexus honorem. Nec 7
tamen ii, quibus discere ipsis non contigit, minorem curam
docendi liberos habeant; sed sint propter hoc ipsum ad
cetera magis diligentes.

De pueris, inter quos educabitur ille huic spei desti-
natus, idem quod de nutricibus dictum sit.

De paedagogis hoc amplius, ut aut sint eruditi plane, 8
quam primam esse curam velim, aut se non esse eruditos
sciant. Nihil est peius iis, qui paulum aliquid ultra primas
litteras progressi falsam sibi scientiae persuasionem induerunt.
Nam et cedere praecipendi partibus indignantur et
velut iure quodam potestatis, quo fere hoc hominum genus
intumescit, imperiosi atque interim saevientes stultitiam suam
perdocent. Nec minus error eorum nocet moribus; siquidem 9
Leonides Alexandri paedagogus, ut a Babylonio Diogene tra-
ditur, quibusdam eum vitiis imbuit, quae robustum quoque et
iam maximum regem ab illa institutione puerili sunt persecuta.

Si cui multa videor exigere, cogitet oratorem institui, 10
rem arduam, etiam cum ei formando nihil defuerit; prae-
terea plura ac difficiliora superesse. Nam et studio perpetuo
et praestantissimis praeceptoribus et plurimis disciplinis opus
est. Quapropter praecipienda sunt optima; quae si quis 11
gravabitur, non rationi defuerint sed homini.

Si tamen non continget, quales maxime velim nutrices, pueros, paedagogos habere: at unus certe sit assiduus loquendi non imperitus, qui, si qua erunt ab his praesente alumno dicta vitiose, corrigat protinus nec insidere illi sinat; dum tamen intelligatur, id, quod prius dixi, bonum esse, hoc remedium.

- 12 A sermone Graeco puerum incipere malo, quia Latinum, qui pluribus in usu est, vel nobis nolentibus perbibet; simul quia disciplinis quoque Graecis prius instituendus est, unde et nostrae fluxerunt. Non tamen hoc adeo superstitiose fieri velim, ut diu tantum Graece loquatur aut discat, sicut plerisque moris est. Hoc enim accidunt et oris plurima vitia in peregrinum sonum corrupti et sermonis; cui cum Graecae figurae assidua consuetudine haeserunt, in diversa quoque loquendi ratione pertinacissime durant. Non longe itaque Latina subsequi debent et cito pariter ire. Ita fiet, ut, cum aequali cura linguam utramque tueri coeperimus, neutra alteri officiat.
- 15 Quidam litteris instituendos, qui minores septem annis essent, non putaverunt, quod illa primum aetas et intellectum disciplinarum capere et laborem pati posset. In qua sententia Hesiodum esse plurimi tradunt, qui ante grammaticum Aristophanem fuerunt; nam is primus *ὑποθήκας*, in quo libro scriptum hoc invenitur, negavit esse huius poetae.
- 16 Sed alii quoque auctores, inter quos Eratosthenes, idem praeceperunt. Melius autem, qui nullum tempus vacare cura volunt, ut Chrysippus. Nam is, quamvis nutricibus triennium dederit, tamen ab illis quoque iam formandam quam optimis institutis mentem infantium iudicat. Cur autem non pertineat ad litteras aetas, quae ad mores iam pertinet? Neque ignoro, toto illo, de quo loquor, tempore vix tantum effici, quantum conferre unus postea possit annus; sed tamen mihi, qui dissenserunt, videntur non tam discentibus in hac parte quam docentibus pepereisse. Quid melius alioqui facient, ex quo loqui poterunt? Faciant enim aliquid necesse est. Aut cur hoc, quantulumcunque est, usque ad septem annos lucrum fastidiamus? Nam certe quamlibet parvum sit, quod contulerit aetas prior, maiora tamen aliqua

discet puer ipso illo anno, quo minora didicisset. Hoc per singulos annos prorogatum in summam proficit; et quantum in infantia praesumptum est temporis, adolescentiae acquiritur. Idem etiam de sequentibus annis praecipuum sit, ne, quod cuique discendum est, sero discere incipiat. Non ergo perdamus primum statim tempus, atque eo minus, quod initia litterarum sola memoria constant, quae non modo iam est in parvis sed tum etiam tenacissima est. Nec sum adeo aetatum imprudens, ut instandum protinus teneris acerbè putem exigendamque plane operam. Nam id in primis cavere oportebit, ne studia, qui amare nondum potest, oderit et amaritudinem semel perceptam etiam ultra rudes annos reformidet. Lusus hic sit: et rogetur et laudetur et nunquam non fecisse se gaudeat, aliquando ipso nolente doceatur alius, cui invidet; contendat interim et saepius vincere se putet et praemiis etiam, quae capit illa aetas, evocetur.

Parva docemus oratorem instituendum professi, sed est sua etiam studiis infantia; et ut corporum mox fortissimorum educatio a lacte cunisque initium ducit: ita futurus eloquentissimus edidit aliquando vagitum et loqui primum incerta voce temptavit et haesit circa formas litterarum. Nec si quid discere satis non est, ideo nec necesse est. Quodsi nemo reprehendit patrem, qui haec non negligenda in suo filio putet: cur improbetur, si quis ea, quae domi suae recte faceret, in publicum promit? Atque eo magis, quod minora etiam facilius minores percipiunt; et ut corpora ad quosdam membrorum flexus formari nisi tenera non possunt: sic animos quoque ad pleraque duriores robur ipsum facit. An Philippus Macedonum rex Alexandro filio suo prima litterarum elementa tradi ab Aristotele, summo eius aetatis philosopho, voluisset, aut ille suscepisset hoc officium, si non studiorum initia et a perfectissimo quoque optime tractari et pertinere ad summam credidisset? Fingamus igitur Alexandrum dari nobis impositum gremio, dignum tanta cura infantem (quanquam suus cuique dignus est): pudeatne me in ipsis statim elementis etiam breviter docendi monstrare compendia?

Neque enim mihi illud saltem placet, quod fieri in plu-

rimis video, ut litterarum nomina et contextum prius quam
 25 formas parvuli discant. Obstat hoc agnitioni earum non in-
 tendentibus mox animum ad ipsos ductus, dum antecedentem
 memoriam sequuntur. Quae causa est praecipientibus, ut
 etiam, cum satis affixisse eas pueris recto illo quo primum
 scribi solent contextu videntur, retroagant rursus et varia
 permutatione turbent, donec litteras qui instituuntur facie
 norint non ordine. Quapropter optime sicut hominum pariter
 26 et habitus et nomina edocebuntur. Sed quod in litteris
 obest, in syllabis non nocebit. Non excludo autem, id quod
 est notum, irritandae ad discendum infantiae gratia eburneas
 etiam litterarum formas in lusum offerre; vel si quid aliud,
 quo magis illa aetas gaudeat, inveniri potest, quod tractare,
 intueri, nominare iucundum sit.

27 Cum vero iam ductus sequi coeperit, non inutile erit
 eas tabellae quam optime insculpi, ut per illos velut sulcos
 ducatur stilus. Nam neque errabit, quemadmodum in ceris,
 (continebitur enim utrinque marginibus neque extra prae-
 scriptum egredi poterit) et celerius ac saepius sequendo
 certa vestigia firmabit articulos, neque egebit adiutorio ma-
 28 num suam manu superimposita regentis. Non est aliena res,
 quae fere ab honestis negligi solet, cura bene ac velociter
 scribendi. Nam cum sit in studiis praecipuum, quoque solo
 verus ille profectus et altis radicibus nixus paretur, scri-
 bere: ipsam tardior stilus cogitationem moratur, rudis et
 confusus intellectu caret; unde sequitur alter dictandi, quae
 29 transferenda sunt, labor. Quare cum semper et ubique tum
 praecipue in epistolis secretis et familiaribus delectabit ne
 hoc quidem neglectum reliquisse.

30 Syllabis nullum compendium est; perdiscendae omnes
 nec, ut fit plerumque, difficillima quaeque earum differenda,
 31 ut in nominibus scribendis deprehendantur. Quin immo ne
 primae quidem memoriae temere credendum; repetere et
 diu inculcare fuerit utilius, et in lectione quoque non pro-
 perare ad continuandam eam vel accelerandam, nisi cum in-
 offensa atque indubitata litterarum inter se coniunctio sup-
 peditare sine ulla cogitandi saltem mora poterit. Tunc ipsis
 syllabis verba complecti et his sermonem connectere inci-

piat. Incredibile est, quantum morae lectioni festinatione 32
 adiiciatur. Hinc enim accidit dubitatio, intermissio, repetitio
 plus quam possunt audentibus, deinde, cum errarunt, etiam
 iis quae iam sciunt diffidentibus. Certa sit ergo in primis 33
 lectio deinde coniuncta et diu lentior, donec exercitatione
 contingat emendata velocitas. Nam prospicere in dextrum 34
 (quod omnes praecipunt) et providere, non rationis modo
 sed usus quoque est; quoniam sequentia intuenti priora di-
 cenda sunt, et, quod difficillimum est, dividenda intentio
 animi, ut aliud voce aliud oculis agatur. Illud non poeni-
 tebit curasse, cum scribere nomina puer (quemadmodum
 moris est) coeperit, ne hanc operam in vocabulis vulgaribus
 et forte occurrentibus perdat. Protinus enim potest inter- 35
 pretationem linguae secretioris, quas Graeci *γλώσσας* vo-
 cant, dum aliud agitur, ediscere et inter prima elementa
 consequi rem postea proprium tempus desideraturam. Et
 quoniam circa res adhuc tenues moramur, ii quoque versus,
 qui ad imitationem scribendi proponuntur, non otiosas velim
 sententias habeant sed honestum aliquid monentes. Prose- 36
 quitur haec memoria in senectutem et impressa animo rudi
 usque ad mores proficiet. Etiam dicta clarorum virorum et
 electos ex poetis maxime (namque eorum cognitio parvis
 gratior est) locos ediscere inter lusum licet. Nam et maxime
 necessaria est oratori (sicut suo loco dicam) memoria, et
 ea praecipue firmatur atque aliter exercitatione, et in iis,
 de quibus nunc loquimur, aetatibus, quae nihildum ipsae
 generare ex se queunt, prope sola est, quae iuvare cura do-
 centium possit. Non alienum fuerit exigere ab his aetatibus, 37
 quo sit absolutius os et expressior sermo, ut nomina quae-
 dam versusque affectatae difficultatis ex pluribus et asper-
 rime coeuntibus inter se syllabis catenatos et velut confra-
 gosos quam citatissime volvant; *χαλινολ* Graece vocantur.
 Res modica dictu, qua tamen omnia multa linguae vitia,
 nisi primis eximuntur annis, inemendabili in posterum pra-
 vitate durantur.

UTILIUS DOMI AN IN SCHOLIS ERUDIANTUR.

II. Sed nobis iam paulatim accrescere puer et exire

de gremio et discere serio incipiat. Hoc igitur potissimum loco tractanda quaestio est, utilis sit domi atque intra privatos parietes studentem continere an frequentiae scholarum et velut publicis praeceptoribus tradere. Quod quidem cum iis, a quibus clarissimarum civitatum mores sunt instituti, tum eminentissimis auctoribus video placuisse. Non est tamen dissimulandum, esse nonnullos, qui ab hoc prope publico more privata quadam persuasione dissentiant. Hi duas praecipue rationes sequi videntur: unam, quod moribus magis consulant fugiendo turbam hominum eius aetatis, quae sit ad vitia maxime prona, unde causas turpium factorum saepe extitisse utinam falso iactaretur; alteram, quod, quisquis futurus est ille praeceptor, liberalius tempora sua impensurus uni videatur, quam si eadem in plures partiatur. Prior causa prorsus gravis. Nam si studiis quidem scholas prodesse moribus autem nocere constaret: potior mihi ratio vivendi honeste quam vel optime dicendi videretur. Sed mea quidem sententia iuncta ista atque indiscreta sunt. Neque enim esse oratorem nisi bonum virum iudico, et fieri etiamsi potest nolo. De hac re igitur prius.

Corrumpi mores in scholis putant; nam et corrumpuntur interim, sed domi quoque, et sunt multa eius rei exempla tam laesae hercule quam conservatae sanctissime utrobique opinionis. Natura cuiusque totum curaque distat. Da mentem ad peiora facilem, da negligentiam formandi custodiendique in aetate prima pudoris: non minorem flagitiis occasionem secreta praebuerint. Nam et potest turpis esse domesticus ille praeceptor, nec tutior inter servos malos quam ingenuos parum modestos conversatio est. At si bona ipsius indoles, si non caeca ac sopita parentum socordia est: et praeceptorem eligere sanctissimum quemque (cuius rei praecipua prudentibus cura est) et disciplinam, quae maxime severa fuerit, licet, et nihilominus amicam gravem virum aut fidelem libertum lateri filii sui adiungere, cuius assiduus comitatus etiam illos meliores faciat, qui timebuntur.

Facile erat huius metus remedium. Utinam liberorum nostrorum mores non ipsi perderemus. Infantiam statim de-

licis solvimus. Mollis illa educatio, quam indulgentiam vocamus, nervos omnes mentis et corporis frangit. Quid non adultus concupiscet, qui in purpuris repit? Nondum prima verba exprimit, iam coquum intelligit, iam conchylium poscit. Ante palatum eorum quam mores instituimus. In lecticis crescunt; si terram attigerint, e manibus utrinque sustentium pendent. Gaudemus, si quid licentius dixerint. Verba ne Alexandrinis quidem permittenda deliciis risu et osculo excipimus. Nec mirum; nos docuimus, ex nobis audiunt. Nostras amicas, nostros concubinos vident, omnem convivium obscenis canticis strepit, pudenda dictu spectantur. Fit ex his consuetudo deinde natura. Discunt haec miseri, antequam sciant vitia esse; inde soluti ac fluentes non accipiunt ex scholis mala ista sed in scholas afferunt.

Verum in studiis magis vacabit unus uni. Ante omnia nihil prohibet esse illum nescio quem unum etiam cum eo, qui in scholis eruditur. Sed etiamsi iungi utrumque non posset, lumen tamen illud conventus honestissimi tenebris ac solitudini praetulissem. Nam optimus quisque praeceptor frequentia gaudet ac maiore se theatro dignum putat, at fere minores ex conscientia suae infirmitatis haerere singulis et officio fungi quodammodo paedagogorum non indignantur. Sed praestet alicui vel gratia vel pecunia vel amicitia, ut doctissimum atque incomparabilem magistrum domi habeat: num tamen ille totum in uno diem consumpturus est? aut potest esse ulla tam perpetua discentis intentio, quae non ut visus oculorum obtutu continuo fatigetur? cum praesertim multo plus secreti temporis studia desiderent. Neque enim scribenti, ediscenti, cogitanti praeceptor assistit, quorum aliquid agentibus cuiuscunque interventus impedimento est. Lectio quoque non omnis nec semper praecunte vel interpretante eget. Quando enim tot auctorum notitia contingeret? Modicum ergo tempus est, quo in totum diem velut opus ordinetur. Ideoque per plures ire possunt etiam quae singulis tradenda sunt. Pleraque vero hanc condicionem habent, ut eadem voce ad omnes simul perferantur. Taceo de partitionibus et declamationibus rhetorum, quibus certe quantuscunque numerus abhibeatur, tamen unusquisque to-

14 tum feret. Non enim vox illa praeceptoris ut coena minus pluribus sufficit, sed ut sol universis idem lucis calorisque largitur. Grammaticus quoque si de loquendi ratione disserat, si quaestiones explicet, historias exponat, poemata 15 enarret: tot illa discent quot audient. At enim emendationi praelectionique numerus obstat. Sit incommodum, (nam quid fere undique placet?) mox illud comparabimus commodis. Nec ego tamen eo mitti puerum volo, ubi negligatur. Sed neque praeceptor bonus maiore se turba, quam ut sustinere eam possit, oneraverit; et in primis habenda cura est, ut is omni modo fiat nobis familiariter amicus, nec officium 16 in docendo spectet sed affectum. Ita nunquam erimus in turba. Nec sane quisquam litteris saltem leviter imbutus eum, in quo studium ingeniumque perspexerit, non in suam quoque gloriam peculiariter fovebit. Sed ut fugiendae sint magnae scholae (cui ne ipsi quidem rei assentior, si ad aliquem merito concurritur,): non tamen hoc eo valet, ut fugiendae sint omnino scholae. Aliud est enim vitare eas, aliud eligere.

17 Et si refutavimus quae contra dicuntur, iam explicemus, 18 quid ipsi sequamur. Ante omnia futurus orator, cui in maxima celebritate et in media rei publicae luce vivendum est, assuescat iam a tenero non reformidare homines neque solitaria et velut umbratica vita pallescere. Excitanda mens et attollenda semper est, quae in huiusmodi secretis aut languescit et quendam velut in opaco situ ducit, aut contra tumescit inani persuasione; necesse est enim nimium tribuat 19 sibi, qui se nemini comparat. Deinde cum proferenda sunt studia, caligat in sole et omnia nova offendit, ut qui solus 20 didicerit quod inter multos faciendum est. Mitto amicitias, quae ad senectutem usque firmissime durant religiosa quadam necessitudine imbutae. Neque enim est sanctius sacris iisdem quam studiis initiari. Sensus ipsum, qui communis dicitur, ubi discet, cum se a congressu, qui non hominibus solum sed mutis quoque animalibus naturalis est, segregarit? 21 Adde quod domi ea sola discere potest, quae ipsi praecipentur, in schola etiam quae aliis. Audiet multa cotidie probari multa corrigi; proderit alicuius obiurgata desidia,

proderit laudata industria, excitabitur laude aemulatio, turpe 22 ducet cedere pari, pulchrum superasse maiores. Accendunt omnia haec animos, et licet ipsa vitium sit ambitio, frequenter tamen causa virtutum est. Non inutilem scio servatum 23 esse a praeceptoribus meis morem, qui, cum pueros in classes distribuerent, ordinem dicendi secundum vires ingenii dabant; et ita superiore loco quisque declamabat, ut praecedere profectu videbatur. Huius rei iudicia praebe- 24 bantur; ea nobis ingens palmae contentio, ducere vero classem multo pulcherrimum. Nec de hoc semel decretum erat; tricesimus dies reddebat victo certaminis potestatem. Ita nec superior successu curam remittebat et dolor victum ad depellendam ignominiam concitabat. Id nobis acriores ad 25 studia dicendi faces subdidisse quam exhortationem docentium, paedagogorum custodiam, vota parentum, quantum animi mei coniectura colligere possum, contenderim. Sed 26 sicut firmiores in litteris profectus alit aemulatio: ita incipientibus atque adhuc teneris condiscipulorum quam praeceptoris iucundior, hoc ipso quod facilius, imitatio est. Vix enim se prima elementa ad spem tollere effingendae, quam summam putant, eloquentiae audebunt; proxima amplectentur magis, ut vites arboribus applicitae inferiores prius apprehendendo ramos in cacumina evadunt. Quod 27 adeo verum est, ut ipsius etiam magistri, si tamen ambitiosis utilia praeferet, hoc opus sit, cum adhuc rudia tractabit ingenia, non statim onerare infirmitatem discientium sed temperare vires suas et ad intellectum audientis descendere. Nam ut vascula oris angusti superfusam humoris copiam re- 28 spuunt, sensim autem influentibus vel etiam instillatis complentur: sic animi puerorum quantum excipere possint videntur est. Nam maiora intellectu velut parum apertos ad percipiendum animos non subibunt. Utile igitur habere, quos 29 imitari primum mox vincere velit. Ita paulatim et superiorum spes erit. His adicio, praeceptores ipsos non idem mentis ac spiritus in dicendo posse concipere singulis tantum praesentibus quod illa celebritate audientium instinctos. Maxima 30 enim pars eloquentiae constat animo. Hunc affici, hunc concipere imagines rerum et transformari quodammodo ad natu-

ram eorum, de quibus loquimur, necesse est. Is porro, quo generosior celsiorque est, hoc maioribus velut organis commovetur; ideoque et laude crescit et impetu augetur et aliquid magnum agere gaudet. Est quaedam tacita dedignatio, vim dicendi tantis comparatam laboribus ad unum auditorem demittere; pudet supra modum sermonis attolli. Et sane concipiat quis mente vel declamantis habitum vel orantis vocem, incessum, pronuntiationem illum denique animi et corporis motum, sudorem, ut alia praeteream, et fatigationem, audiente uno: nonne quiddam pati furori simile videatur? Non esset in rebus humanis eloquentia, si tantum cum singulis loqueremur.

QUA RATIONE IN PARVIS INGENIA DIGNOSCANTUR ET QUAE TRACTANDA SINT.

III. Tradito sibi puero docendi peritus ingenium eius imprimis naturamque perspiciat. Ingenii signum in parvis praecipuum memoria est. Eius duplex virtus, facile percipere et fideliter continere. Proximum imitatio; nam id quoque est docilis naturae, sic tamen, ut ea quae discit effingat, non habitum forte et ingressum et si quid in peius notabile est. Non dabit mihi spem bonae indolis, qui hoc imitandi studio petet, ut rideatur. Nam probus quoque in primis erit ille vere ingeniosus; alioqui non peius duxerim tardi esse ingenii quam mali. Probus autem ab illo segni et iacente plurimum aberit. Hic meus quae tradentur non difficulter accipiet, quaedam etiam interrogabit, sequetur tamen magis quam praecurret. Illud ingeniorum velut praecox genus non temere unquam pervenit ad frugem. Hi sunt, qui parva facile faciunt et audacia proveci, quidquid illud possunt, statim ostendunt. Possunt autem id demum, quod in proximo est; verba continuant, haec vultu interrito, nulla tardati verecundia proferunt. Non multum praestant sed cito. Non subest vera vis nec penitus immissis radicibus nititur; ut, quae summo solo sparsa sunt semina, celerius se effundunt, et imitatae spicas herbulae inanibus aristis ante messem flavescent. Placent haec annis comparata; deinde stat provecus, admiratio decrescit.

Haec cum animadverterit, perspiciat deinceps, quonam modo tractandus sit discentis animus. Sunt quidam, nisi institeris, remissi, quidam imperia indignantur, quosdam continet metus quosdam debilitat, alios continuatio extundit, in aliis plus impetus facit. Mihi ille detur puer, quem laus excitet, quem gloria iuvet, qui victus fleat. Hic erit alendus ambitu, hunc mordebit obiurgatio, hunc honor excitabit, in hoc desidiā nunquam verebor.

Danda est tamen omnibus aliqua remissio; non solum quia nulla res est, quae perferre possit continuum laborem, atque ea quoque, quae sensu et anima carent, ut servare vim suam possint, velut quiete alterna retenduntur; sed quod studium discendi voluntate, quae cogi non potest, constat. Itaque et virium plus afferunt ad discendum renovati ac recentes et acriorem animum, qui fere necessitatibus repugnat. Nec me offenderit lusus in pueris; est et hoc signum alacritatis; neque illum tristem semperque demissum sperare possim erectae circa studia mentis fore, cum in hoc quoque maxime naturali aetatibus illis impetu iaceat. Modus tamen sit remissionibus, ne aut odium studiorum faciant negatae aut otii consuetudinem nimiae. Sunt etiam nonnulli acuendis puerorum ingeniis non inutiles lusus, cum positus invicem cuiuscunque generis quaestiunculis aemulantur. Mores quoque se inter ludendum simplicius detegunt; modo nulla videatur aetas tam infirma, quae non protinus, quid rectum pravumque sit, discat; tum vel maxime formanda, cum simulandi nescia est et praecipientibus facillime cedit. Frangas enim citius quam corrigas, quae in pravum induruerunt. Protinus ergo, ne quid cupide, ne quid improbe, ne quid impotenter faciat, monendus est puer; habendumque in animo semper illud Virgilianum: *Adeo in teneris consuescere multum est.*

Caedi vero discipulos, quamlibet et receptum sit et Chrysippus non improbet, minime velim. Primum, quia deformis atque servile est et certe, quod convenit si aetatem mutes, iniuria; deinde, quod, si cui tam est mens illiberalis, ut obiurgatione non corrigatur, is etiam ad plagas ut pessima quaeque mancipia durabitur; postremo, quod ne opus erit

quidem hac castigatione, si assiduus studiorum exactor asti-
 15 terit. Nunc fere negligentia paedagogorum sic emendari vi-
 detur, ut pueri non facere, quae recta sunt, cogantur sed,
 cum non fecerint, puniantur. Denique cum parvulum ver-
 beribus coegeris, quid iuveni facias, cui nec adhiberi potest
 16 hic metus et maiora discenda sunt? Adde, quod multa vapu-
 lantibus dictu deformia et mox verecundiae futura saepe do-
 lore vel metu acciderunt, qui pudor frangit animum et abiicit
 17 atque ipsius lucis fugam et taedium dictat. Iam si minor in
 deligendis custodum vel praeceptorum moribus fuit cura,
 pudet dicere, in quae probra nefandi homines isto caedendi
 iure abutantur, quam det aliis quoque nonnunquam occasio-
 nem hic miserorum metus. Non morabor in parte hac; ni-
 mium est quod intelligitur. Quare hoc dixisse satis est; in
 aetatem infirmam et iniuriae obnoxiam nemini debet nimium
 18 licere. Nunc quibus instituendus sit artibus, qui sic forma-
 bitur, ut fieri possit orator, et quae in quaque aetate in-
 choanda, dicere ingrediar.

DE GRAMMATICAE.

IV. Primus in eo, qui scribendi legendique adeptus
 erit facultatem, grammaticis est locus. Nec refert, de
 Graeco an de Latino loquar, quanquam Graecum esse prio-
 2 rem placet. Utrique eadem via est. Haec igitur professio,
 cum brevissime in duas partes dividatur, recte loquendi
 scientiam et poetarum enarrationem, plus habet in
 3 recessu quam fronte promittat. Nam et scribendi ratio
 coniuncta cum loquendo est, et enarrationem praecedat
 emendata lectio, et mixtum his omnibus iudicium est;
 quo quidem ita severe sunt usi veteres grammatici, ut non
 versus modo censoria quadam virgula notare et libros, qui
 falso viderentur inscripti, tanquam subditos summove-
 4 rint alios omnino exemerint numero. Nec poetas legisse satis
 est; excutiendum omne scriptorum genus non propter histo-
 rias modo sed verba, quae frequenter ius ab auctoribus su-
 munt. Tum neque citra musicen grammaticae potest esse
 perfecta, cum ei de metris rhythmisque dicendum sit, nec, si

rationem siderum ignoret, poetas intelligat, qui (ut alia omit-
 tam) totiens ortu occasuque signorum in declarandis tempo-
 ribus utuntur; nec ignara philosophiae, cum propter plurimos
 in omnibus fere carminibus locos ex intima naturalium quae-
 sitionum subtilitate repetitos, tum vel propter Empedoclen
 in Graecis, Varronem ac Lucretium in Latinis, qui praecepta
 sapientiae versibus tradiderunt. Eloquentia quoque non me-
 5 diocri est opus, ut de unaquaque earum, quas demonstravi-
 mus, rerum dicat proprie et copiose. Quo minus sunt fe-
 rendi, qui hanc artem ut tenuem atque ieiunam cavillantur,
 quae nisi oratoris futuri fundamenta fideliter iecit, quidquid
 superstruxeris, corruet; necessaria pueris, iucunda senibus,
 dulcis secretorum comes et quae vel sola in omni studiorum
 genere plus habeat operis quam ostentationis.

Ne quis igitur tanquam parva fastidiat grammatices ele-
 6 menta, non quia magnae sit operae consonantes a vocalibus
 discernere ipsasque eas in semivocalium numerum mutarum-
 que partiri, sed quia interiora velut sacri huius aduentibus
 apparebit multa rerum subtilitas, quae non modo acuere in-
 genia puerilia sed exercere altissimam quoque eruditionem
 ac scientiam possit. An cuiuslibet auris est exigere littera-
 7 rum sonos? non hercule magis quam nervorum. Aut gram-
 matici saltem omnes in hanc descendent rerum tenuitatem,
 desintne aliquae nobis necessariae litterarum, non cum Graeca
 scribimus (tum enim ab iisdem duas mutamur) sed propriae,
 in Latinis, ut in his *servus* et *vulgus* Aeolicum digammon
 8 desideratur, ut medius est quidam U et I litterae sonus; non
 enim sic *optimum* dicimus ut *opimum*, et in *here* neque E
 plane neque I auditur; an rursus aliae redundant, praeter il-
 9 lam aspirationis, (quae si necessaria est, etiam contrariam sibi
 poscit) et K, quae et ipsa quorundam nominum nota est, et
 Q, cuius similis effectu specieque, nisi quod paulum a nostris
 obliquatur, Koppa apud Graecos nunc tantum in numero
 manet, et nostrarum ultima, qua tam carere potuimus quam
 10 ψ non quaerimus? Atque etiam in ipsis vocalibus grammatici
 est videre, an aliquas pro consonantibus usus acceperit, quia
iam sicut tam scribitur et *quos* ut *cos*. At quae ut vocales *
 iunguntur aut unam longam faciunt, ut veteres scripserunt

qui geminatione earum velut apice utebantur, aut duas; nisi quis putat etiam ex tribus vocalibus syllabam fieri, si non 11 aliquae officio consonantium fungantur. Quaeret hoc etiam, quomodo duabus demum vocalibus in se ipsas coeundi natura sit, cum consonantium nulla nisi alteram frangat. Atqui littera I sibi insidit, *conici* enim est ab illo *iacit*, et U, quomodo nunc scribitur *uulgus* et *seruus*. Sciat etiam Ciceroni placuisse *aiio Maiam*que geminata I scribere; quod si est, 12 etiam iungetur ut consonans. Quare discat puer, quid in litteris proprium, quid commune, quae cum quibus cognatio; nec miretur, cur ex *scanno* fiat *scabillum* aut a *pinna* (quod est acutum) securis utrinque habens aciem *bipennis*; ne illorum sequatur errorem, qui, quia a pinnis duabus hoc esse nomen existimant, *pinnas* avium dici volunt.

13 Neque has modo noverit mutationes, quas afferunt declinatio aut praepositio, ut *secat secuit*, *cadit excidit*, *caedit excidit*, *calcat exculcat*, et sic a *lavando lotus* et inde rursus *illotus* et mille alia; sed quae rectis quoque casibus aetate transierunt. Nam ut *Valesii* et *Fusii* in *Valerios Furios*que venerunt: ita *arbos*, *labos*, *vapos* etiam et *clamos* 14 aetatis fuerunt. Atque ipsa S littera ab his nominibus exclusa in quibusdam ipsa alteri successit, nam *mertare* atque *pultare* dicebant, quin *fordeum foedos*que pro aspiratione velut simili littera utentes; nam contra Graeci aspirare solent, ut pro Fundanio Cicero testem, qui primam eius litteram dicere 15 non possit, irridet. Sed B quoque in locum aliarum dedimus aliquando, unde *Burrus* et *Bruges* et *Belena*. Nec non eadem fecit ex *duello bellum*, unde *Duellios* quidam dicere 16 *Bellios* ausi. Quid *stlocum stlites*que? Quid D litterae cum T quaedam cognatio? Quare minus mirum, si in vetustis operibus urbis nostrae et celebribus templis legantur *Alexanter* et *Cassantra*. Quid O atque U permutatae invicem, ut *Hecoba* et *notrix Culcidis* et *Pulixena* scriberentur, ac, ne in Graecis id tantum notetur, *dederont* ac *probaveront*? Sic *Ὀδυσσεύς*, quem *Ὀδυσσεύς* fecerant Aeoles, ad *Ulixen* ductus est. Quid? non E quoque I loco fuit? *Menerva* et *leber* et *magester* et *Diiove victore* non *Diiovi*? Sed mihi locum signare satis est, non enim doceo sed admonéo doctu-

ros. Inde in syllabas cura transibit, de quibus in orthographia pauca annotabo.

Tum videbit, ad quem hoc pertinet, quot et quae partes orationis; quanquam de numero parum convenit. Veteres enim, quorum fuerunt Aristoteles quoque atque 18 Theodectes, verba modo et nomina et convictiones tradiderunt; videlicet quod in verbis vim sermonis, in nominibus materiam, (quia alterum est quod loquimur, alterum de quo loquimur) in convictionibus autem complexum eorum esse iudicaverunt; quas coniunctiones a plerisque dici scio, sed haec videtur ex *συνδέσμων* magis propria translatio. Paulatim a philosophis ac maxime Stoicis auctus est numerus, ac primum convictionibus articuli adiecti, post praepositiones, nominibus appellatio, deinde pronomen, deinde mixtum verbo participium, ipsis verbis adverbia. Noster sermo articulos non desiderat, ideoque in alias partes orationis sparguntur. Sed accedit superioribus interiectio. Alii tamen ex 20 idoneis duntaxat auctoribus octo partes secuti sunt ut Aristarchus et aetate nostra Palaemon, qui vocabulum sive appellationem nomini subiecerunt tanquam species eius. At ii, qui aliud nomen aliud vocabulum faciunt, novem. Nihilominus fuerunt, qui ipsum adhuc vocabulum ab appellatione deducerent, ut esset vocabulum corpus visu tactuque manifestum, *domus*, *lectus*; appellatio, cui vel alterum deesset vel utrumque, *ventus*, *coelum*, *deus*, *virtus*. Adiciebant et asseverationem ut *eheu*, et attractionem ut *fasceatim*; quae mihi non approbantur. Vocabulum an appellatio di- 21 cenda sit *προσρηγοία* et subiicienda nomini necne, quia parvi refert, liberum opinaturis relinquo.

Nomina declinare et verba imprimis pueri sciant, neque 22 enim aliter pervenire ad intellectum sequentium possunt; quod etiam monere supervacuum erat, nisi ambitiosa festinatione plerique a posterioribus inciperent et, dum ostentare discipulos circa speciosiora malunt, compendio morarentur. Atqui si quis et didicerit satis et (quod non minus deesse in- 23 terim solet) voluerit docere quae didicit, non erit contentus tradere in nominibus tria genera et ea, quae sunt duobus omnibusve communia. Nec statim diligentem putabo, qui 24

promiscua, quae *epicoena* dicuntur, ostenderit, in quibus sexus uterque per alterum apparet; aut quae feminina positione mares aut neutrali feminas significant, qualia sunt *Murena* et *Glycerium*. Scrutabitur ille praeceptor acer atque subtilis origines nominum, quae ex habitu corporis *Rufos Longosque* fecerunt; ubi erit aliud secretius, *Sullae, Burri, Galbae, Plauti, Pansa, Scauri* taliaque; et ex casu nascentium; hic *Agrippa* et *Opiter* et *Cordus* et *Postumus* erunt; et ex iis, quae post natos eveniunt, unde *Vopiscus*.
 26 rii causis. Gentes quoque ac loca et alia multa reperias inter nominum causas. In servis iam intercidit illud genus, quod ducebatur a domino, unde *Marcipores Publiporesque*. Quaerat etiam, sitne apud Graecos vis quaedam sexti casus et apud nos quoque septimi. Nam cum dico *hasta percussi*, non utor ablativi natura; nec, si idem Graece dicam, dativi.
 27 Sed in verbis quoque quis est adeo imperitus, ut ignoret genera et qualitates et personas et numeros? Litterarii paene ista sunt ludi et trivialis scientiae. Iam quosdam illa turbabunt, quae declinationibus non tenentur. Nam et quaedam participia an verbi appellationes sint, dubitari potest, quia
 28 aliud alio loco valent, ut *lectum* et *sapiens*. Quaedam verba appellationibus similia, ut *fraudator, nutritor*. Iam *itur in antiquam silvam* nonne propriae cuiusdam rationis est? nam quod initium eius invenias? cui simile *fletur*. Accipimus aliter, ut *panditur interea domus omnipotentis Olympi*, aliter ut *totis usque adeo turbatur agris*. Est etiam quidam tertius modus, ut *urbs habitatur*, unde et *campus curritur, mare*
 29 *navigatur*. *Pransus* quoque ac *potus* diversum valet quam indicat. Quid? quod multa verba non totum declinationis ordinem ferunt, quaedam etiam mutantur ut *fero* in praeterito, quaedam tertiae demum personae figura dicuntur ut *licet, piget*, quaedam simile quiddam patiuntur vocabulis quae in adverbium transeunt? Nam ut *noctu* et *diu* ita *dictu* et *factu*. Sunt enim haec quoque verba participialia quidem, non tamen talia qualia *dicto factoque*.

V. Iam cum omnis oratio tres habeat virtutes, ut

emendata, ut dilucida, ut ornata sit (quia dicere apte, quod est praecipuum, plerique ornatui subiiciunt); totidem vitia, quae sunt supra dictis contraria: emendate loquendi regulam, quae grammatices prior pars est, examinet. Haec 2 exigitur verbis aut singulis aut pluribus. *Verba* nunc generaliter accipi volo, nam duplex eorum intellectus est; alter, qui omnia per quae sermo necitur significat, ut apud Horatium: *verbaque provisam rem non invita sequentur*; alter, in quo est una pars orationis, *lego, scribo*. Quam vitantes ambiguitatem quidam dicere maluerunt *voces, locutiones, dictiones*. Singula sunt aut nostra aut peregrina, 3 aut simplicia aut composita, aut propria aut translata, aut usitata aut ficta.

Unum verbo vitium saepius quam virtus inest. Licet enim dicamus aliquid proprium, speciosum, sublime: nihil tamen horum nisi in complexu loquendi serieque contingit; laudamus enim verba rebus bene accommodata. Sola est, quae 4 notari possit velut *vocalitas*, quae *εὐφωνία* dicitur; cuius in eo delectus est, ut inter duo, quae idem significant ac tantundem valent, quod melius sonet, malis.

Prima barbarismi ac soloecismi foeditas absit. 5 Sed quia interim excusantur haec vitia aut consuetudine aut auctoritate aut vetustate aut denique vicinitate virtutum; nam saepe a figuris ea separare difficile est: ne qua tam lubrica observatio fallat, acriter se in illud tenue discrimen grammaticus intendant, de quo nos latius ibi loquemur, ubi de figuris orationis tractandum erit. Interim vitium, quod fit in 6 singulis verbis, sit barbarismus. Occurrat mihi forsitan aliquis, *quid hic promissor* tanti operis *dignum?* aut quis hoc nescit, alios barbarismos scribendo fieri alios loquendo; — quia, quod male scribitur, male etiam dici necesse est; quae vitiose dixeris, non utique et scripto peccant — illud prius adiectione, detractone, immutatione, transmutatione, hoc secundum divisione, complexione, aspiratione, sono contineri? Sed ut parva sint haec: pueri docentur adhuc, et 7 grammaticos officii sui commonemus. Ex quibus si quis erit plane impolitus et vestibulum modo artis huius ingressus: intra haec, quae profitentium commentariolis vulgata

sunt, consistet; doctiores multa adiicient, vel hoc primum, 8 quod barbarismum pluribus modis accipimus. Unum gente, quale fit, si quis Afrum vel Hispanum Latinae orationi nomen inserat, ut ferrum, quo rotae vincuntur, dici solet *cantus*; quanquam eo tanquam recepto utitur Persius; sicut Catullus *placenum* circa Padum invenit, et in oratione Labieni (sive illa Cornelii Galli est) in Pollionem *casnar* assectator, e Gallia ductum est; nam *mastrucam*, quod est 9 Sardum, irridens Cicero ex industria dixit. Alterum genus barbarismi accipimus, quod sit animi natura, ut is, a quo insolenter quid aut minaciter aut crudeliter dictum sit, 10 bare locutus existimatur. Tertium est illud vitium barbarismi, cuius exempla vulgo sunt plurima, sibi etiam quisque fingere potest, ut verbo, cui libebit, adiiciat litteram syllabamve vel detrahat, aut aliam pro alia aut eandem alio, quam 11 rectum est, loco ponat. Sed quidam fere in iactationem eruditionis sumere illa ex poetis solent et auctores, quos praedegunt, criminantur. Scire autem debet puer, haec apud scriptores carminum aut venia digna aut etiam laude duci, 12 potiusque illa docendi erunt minus vulgata. Nam duos in uno nomine faciebat barbarismos Tinga Placentinus (si reprehendenti Hortensio credimus) *preculam* pro *pergula* dicens, et immutatione cum *c* pro *g* uteretur, et transmutatione cum *r* praeponeret antecedenti. At in eadem vitii geminatione *Mettioeo Fufetioeo* dicens Ennius poetico iure 13 defenditur. Sed in prosa quoque est quaedam iam recepta immutatio. Nam Cicero *Canopitarum* exercitum dicit, ipsi *Canobon* vocant; et *Trasumennum* pro *Tarsumenno* multi auctores, etiamsi est in eo transmutatio, vindicaverunt. Similiter alia; nam sive est *assentior*, Sisenna dixit *assentio* multique et hunc et analogias secuti, sive illud verum est: 14 haec quoque pars consensu defenditur. At ille pexus pinguisque doctor aut illic detractionem aut hic adiectionem putabit. Quid? quod quaedam, quae singula procul dubio 15 vitiosa sunt, iuncta sine reprehensione dicuntur? Nam et *dua* et *tre pondo* diversorum generum sunt barbarismi; at *dua pondo* et *tre pondo* usque ad nostram aetatem ab omnibus 16 dictum est, et recte dici Messala confirmat. Absurdum

forsitan videatur dicere, barbarismum, quod est unius verbi vitium, fieri per numeros aut genera sicut soloecismum: *scala* tamen et *scopa* contraque *hordea* et *mulsa*, licet litterarum mutationem, detractionem, adiectionem habeant, non alio vitiosa sunt, quam quod pluralia singulariter et singularia pluraliter efferuntur; et *gladia* qui dixerunt, genere exciderunt. Sed hoc quoque notare contentus sum, 17 ne arti culpa quorundam pervicacium perplexae videar et ipse quaestionem addidisse.

Plus exigunt subtilitatis quae accidunt in dicendo vitia, quia exempla eorum tradi scripto non possunt, nisi cum in versus inciderunt, ut divisio *Europae* et *Asiae*; et ei contrarium vitium, quod *συναίρεσις* et *συναλοιφήν* Graeci vocant, nos complexionem dicimus, qualis est apud P. Varronem: *Tum te flagranti deiectum fulmine Phaethon*. Nam si esset prosa oratio, easdem litteras enuntiare veris 18 syllabis licebat. Praeterea quae fiunt spatio, sive cum syllaba correpta producitur, ut *Italiam fato profugus*, seu longa corripitur, ut *Unius ob noxam et furias*, extra carmen non deprehendas; sed nec in carmine vitia ducenda sunt. Illa vero non nisi aure exiguntur, quae fiunt per so-19 nos; quanquam per aspirationem, sive adiecitur vitiose sive detrahitur, apud nos potest quaeri an in scripto sit vitium, si H littera est, non nota. Cuius quidem ratio mutata cum temporibus est saepius. Parcissime ea veteres usi etiam in 20 vocalibus, cum *oedos ircosque* dicebant, diu deinde servatum, ne consonantibus aspirarent, ut in *Graccis* et in *trumpis*; erupit brevi tempore nimius usus, ut *choronae*, *chenturiones*, *praechones* adhuc quibusdam inscriptionibus manent, qua de re Catulli nobile epigramma est. Inde durat 21 ad nos usque *vehementer* et *comprehendere* et *mihî*, nam *mehe* quoque pro *me* apud antiquos tragoediarum praecipue scriptores in veteribus libris invenimus.

Adhuc difficilior observatio est per tenores, (quos 22 quidem ab antiquis dictos *tonores* comperi videlicet declinato a Graecis verbo, qui *τόνοϋς* dicunt) vel accentus, quas Graeci *προσῳδίας* vocant, cum acuta et gravis alia pro alia ponuntur, ut in hoc *Camillus*, si acuitur prima; aut 23

gravis pro flexa, ut *Cethegus*, et hic prima acuta, nam sic media mutatur; aut flexa pro gravi, ut circumducta sequenti, quam ex duabus syllabis in unam cogentes et deinde flexa 24 clentes dupliciter peccant. Sed id saepius in Graecis nominibus accidit, ut *Atreus*, quem nobis iuvenibus doctissimi senes acuta prima dicere solebant, ut necessario secunda gravis esset, item *Nerei Tereique*. Haec de accentibus tradita.

25 Ceterum scio iam, quosdam eruditos nonnullos etiam grammaticos sic docere ac loqui, ut propter vocum quaedam discrimina verbum interim acuto sono finiant, ut in illis 26 *Quae circum litora, circum piscosos scopulos*, ne, si gravem posuerint secundam, *circus* dici videatur non *circuitus*. Itemque cum *quale* interrogantes gravi, comparantes acuto tenore concludunt; quod tamen in adverbis fere solis ac pronomibus vindicant, in ceteris veterem 27 legem sequuntur. Mihi videtur condicionem mutare, quod his locis verba coniungimus. Nam cum dico *circum litora*, tanquam unum enuntio dissimulata distinctione, itaque tanquam in una voce una est acuta, quod idem accidit in illo 28 *Troiae qui primus ab oris*. Evenit, ut metri quoque condicio mutet accentum, ut *Pecudes pictaeque volucres*; nam volucres media acuta legam, quia, etsi natura brevis tamen positione longa est, ne faciat iambum, quem non recipit 29 versus herous. Separata vero haec a praecepto non recedent, aut si consuetudo vicerit, vetus lex sermonis abolebitur; cuius difficilior apud Graecos observatio est, quia plura illis loquendi genera, quas *διαλέκτους* vocant, et quod alias vitiosum interim alias rectum est; apud nos vero bre- 30 vissima ratio. Namque in omni voce acuta intra numerum trium syllabarum continetur, sive hae sunt in verbo solae sive ultimae, et in his aut proxima extremae aut ab ea tertia. Trium porro, de quibus loquor, media longa aut acuta aut flexa erit; eodem loco brevis utique gravem habebit sonum, ideoque positam ante se id est ab ultima ter- 31 tiam acuet. Est autem in omni voce utique acuta sed nunquam plus una nec unquam ultima ideoque in disyllabis prior. Praeterea nunquam in eadem flexa et acuta, quoniam eadem flexa et acuta, itaque neutra claudet vocem Latinam. Ea

vero, quae sunt syllabae unius, erunt acuta aut flexa, ne sit aliqua vox sine acuta. Et illa per sonos accidunt, quae 32 demonstrari scripto non possunt, vitia oris et linguae: *ιωρισμοὺς* et *λαμβδαισμοὺς*, *ισχνότηας* et *πλατειασμοὺς* feliciores fingendis nominibus Graeci vocant, sicut *κοιλιοστομίαν*, cum vox quasi in recessu oris auditur. Sunt etiam proprii quidam 33 et inenarrabiles soni, quibus nonnunquam nationes deprehendimus. Remotis igitur omnibus, de quibus supra dixi, vitiiis erit illa, quae vocatur *ὀρθοέπεια*, id est emendata cum suavitate vocum explanatio; nam sic accipi potest recta.

Cetera vitia omnia ex pluribus vocibus sunt, quorum 34 est soloecismus, quanquam circa hoc quoque disputatum est. Nam etiam qui complexu orationis accidere eum confitentur, quia tamen unius emendatione verbi corrigi possit, in verbo esse vitium non in sermone contendunt; cum, sive 35 *amarae corticis* seu *medio cortice* per genus facit soloecismam (quorum neutrum quidem reprehendo, cum sit utriusque Vergilius auctor; sed fingamus utrumlibet non recte dictum) mutatio vocis alterius, in qua vitium erat, rectam loquendi rationem sit redditura, ut *amari corticis* fiat vel *media cortice*. Quod manifestae calumniae est; neutrum enim vitiosum est separatum, sed compositione peccatur, quae iam sermonis est. Illud eruditius quaeritur, an in sin- 36 gulis quoque verbis possit fieri soloecismus, uti si unum quis ad se vocans dicat *venite*, aut si plures a se dimittens ita loquatur *abi* aut *discede*. Nec non cum responsum ab interrogante dissentit, ut si dicenti *Quem video?* ita occurras *Ego*. In gestu etiam nonnulli putant idem vitium inesse, cum aliud voce aliud nutu vel manu demonstratur. Huic opinioni neque omnino accedo neque plane dissentio. 37 Nam id fateor accidere voce una non tamen aliter, quam si sit aliquid, quod vim alterius vocis obtineat, ad quod vox illa referatur, ut soloecismus ex complexu fiat eorum, quibus res significantur et voluntas ostenditur. Atque ut omnem 38 effugiam cavillationem, sit aliquando in uno verbo nunquam in solo verbo. Per quot autem et quas accadat species, non satis convenit. Qui plenissime, quadripertitam volunt esse rationem nec aliam quam barbarismi, ut fiat adiectione

39 *Navigavimus Pelusio in Alexandriam; detractio Am-
bulo viam, Aegypto venio, Ne hoc fecit; transmutatione,
qua ordo turbatur, Quoque ego, Enim hoc voluit, Autem
non habuit.* Ex quo genere an sit igitur initio sermonis
positum, dubitari potest, quia maximos auctores in diversa
fuisse opinione video, cum apud alios sit etiam frequens,
40 apud alios nunquam reperiatur. Haec tria genera quidam
deducunt a soloecismo, et adiectionis vitium *πλεονασμόν*,
detractionis *ἔλλειψιν*, inversionis *ἐναστροφὴν* vocant, quae
si in speciem soloecismi cadat, *ἐπιβεβητόν* quoque eodem
41 appellari modo posse. Immutatio sine controversia est, cum
aliud pro alio ponitur. Id per omnes orationis partes de-
prehendimus, frequentissime in verbo, quia plurima huic
accidunt; ideoque in eo sunt soloecismi per genera, tem-
pora, personas, modos, sive cui *status* eos dici seu *qua-
litates* placet, vel sex vel, ut alii volunt, octo; — nam toti-
dem vitiorum erunt formae, in quot species eorum quidque,
42 de quibus supra dictum est, divideris — praeterea numeros,
in quibus nos singularem ac pluralem habemus Graeci et
δ्विकोन. Quanquam fuerunt, qui nobis quoque adicerent
dualem *scripsere, legere*; quod evitandae asperitatis gratia
mollitum est, ut apud veteres pro *male mereris, male me-
rere*. Ideoque quod vocant *dualem*, in illo solo genere
consistit, cum apud Graecos et in verbi tota fere ratione
et in nominibus deprehendatur, et sic quoque rarissimus
43 eius sit usus; apud nostrorum vero neminem haec obser-
vatio reperiatur, quin e contrario *devenere locos et conti-
nuere omnes et consedere duces* aperte nos doceant, nihil
horum ad duos pertinere; *dixere* quoque, quod Antonius
Rufus ex diverso ponit exemplum, de pluribus patronis
44 praeco pronuntiet. Quid? non Livius circa initia statim primi
libri, *Tenuere, inquit, arcem Sabini?* et mox, *in adversum
Romani subiere?* Sed quem potius ego quam M. Tullium se-
quar, qui in Oratore, *Non reprehendo, inquit, scripsere;*
45 *scripserunt esse verius sentio?* Similiter in vocabulis et
nominibus fit soloecismus genere, numero, proprie autem cas-
ibus, quidquid horum alteri succedet. Huic parti subiungatur
licet per comparationes et superlaciones, itemque in quibus

patrium pro possessivo dicitur vel contra. Nam vitium, quod 46
fit per quantitatem ut *magnum peculium*, erunt qui soloe-
cismum putent, quia pro nomine integro positum sit demi-
nutum. Ego dubito, an id *improprium* potius appellem, signi-
ficatione enim deerrat; soloecismi porro vitium non est in
sensu sed in complexu. In participio per genus et casum, 47
ut in vocabulo, per tempora, ut in verbo, per numerum,
ut in utroque, peccatur. Pronomen quoque genus, nume-
rum, casus habet, quae omnia recipiunt huiusmodi errorem.
Fiunt soloecismi et quidem plurimi per partes orationis; sed 48
id tradere satis non est, ne ita demum vitium esse credat
puer, si pro alia, ponatur alia, ut verbum, ubi nomen esse
debuerit, vel adverbium, ubi pronomen, et similia. Nam 49
sunt quaedam cognata, ut dicunt, id est eiusdem generis,
in quibus, qui alia specie quam oportet utetur, non minus
quam ipso genere permutato deliquerit. Nam et *an* et *aut* 50
coniunctiones sunt, male tamen interrogas, *hic aut ille sit;*
et *ne* ac *non* adverbia; qui tamen dicat pro illo *ne feceris
non feceris*, in idem incidat vitium, quia alterum negandi
est alterum vetandi. Hoc amplius *intro* et *intus* loci ad-
verbia, *eo* tamen *intus* et *intro sum* soloecismi sunt. Eadem 51
in diversitate pronominum, interiectionum, praepositionum
accidunt. Est etiam soloecismus in oratione comprehensio-
nis unius sequentium ac priorum inter se inconueniens po-
sitis. Quaedam tamen et faciem soloecismi habent et dici 52
vitiosa non possunt, ut *tragoedia Thyestes* et *ludi Floralia*
ac *Megalesia*, quanquam haec sequenti tempore intercide-
runt nunquam aliter a veteribus dicta. *Schemata* igitur no-
minabuntur, frequentiora quidem apud poetas sed oratoribus
quoque permissa. Verum schema fere habebit aliquam ratio- 53
nem, ut docebimus eo, quem paulo ante promisimus, loco.
Sed hoc quoque, quod *schema* vocatur, si ab aliquo per
imprudentiam factum erit, soloecismi vitio non carebit. In 54
eadem specie sunt sed schemate carent, ut supra dixi, no-
mina feminina, quibus mares utuntur, et neutralia, quibus
feminae. Hactenus de soloecismo. Neque enim artem gram-
maticam componere aggressi sumus, sed cum in ordinem in-
curreret, inhonoratam transire nolimus.

55 Hoc amplius, ut institutum ordinem sequar, verba aut Latina aut peregrina sunt. Peregrina porro ex omnibus prope dixerim gentibus ut instituta etiam multa venerunt. 56 Taceo de Tuscis et Sabinis et Praenestinis quoque; nam ut eorum sermone utentem Vectium Lucilius insectatur, quem admodum Pollio deprehendit in Livio Patavinitatem, licet 57 omnia Italica pro Romanis habeam. Plurima Gallica valuerunt ut *reda* ac *petorritum*, quorum altero tamen Cicero altero Horatius utitur. Et *mappam* circo quoque usitatum nomen Poeni sibi vindicant, et *gurdos*, quos pro stolidis 58 accipit vulgus, ex Hispania duxisse originem audivi. Sed haec divisio mea ad Graecum sermonem praecipue pertinet, nam et maxima ex parte Romanus inde conversus est et confessis quoque Graecis utimur verbis, ubi nostra desunt, sicut illi nonnunquam a nobis mutuuntur. Inde illa quaestio exoritur, an eadem ratione per casus duci externa 59 qua nostra conveniat. Ac si reperias grammaticum veterum amatorem: neget quidquam ex Latina ratione mutandum; quia, cum sit apud nos casus ablativus, quem illi non habent, parum conveniat, uno casu nostro quinque Graecis 60 uti; quin etiam laudet virtutem eorum, qui potentiores facere linguam Latinam studebant, nec alienis egere institutis fatebantur. Inde *Castorem* media syllaba producta pronuntiarunt, quia hoc omnibus nostris nominibus accidebat, quorum prima positio in easdem quas *Castor* litteras exit; et ut *Palaemo* ac *Telamo* et *Plato* (nam sic eum Cicero quoque appellat) dicerentur, retinuerunt, quia Latinum, quod 61 *o* et *n* litteris finiretur, non reperiebant. Ne in *a* quidem atque *s* litteras exire temere masculina Graeca nomina recto casu patiebantur, ideoque et apud Caelium legimus *Pelia Cincinnatus* et apud Messalam *Bene fecit Euthia* et apud Ciceronem *Hermagora*, ne miremur, quod ab antiquorum 62 plerisque *Aenea* et *Anchisa* sit dictus; nam si ut *Maecenas*, *Sufenas*, *Asprenas* dicerentur, genitivo casu non *e* littera sed *tis* syllaba terminarentur. Inde *Olympo* et *tyranno* acutam syllabam mediam dederunt, quia duabus longis insequantibus primam brevem acui noster sermo non patitur. 63 Sic genitivus *Ulixi* et *Achilli* fecit, sic alia plurima. Nunc

recentiores instituerunt Graecis nominibus Graecas declinationes potius dare, quod tamen ipsum non semper fieri potest. Mihi autem placet Latinam rationem sequi, quousque patietur decor. Neque enim iam *Calypsonem* dixerim ut *Iunonem*, quam secutus antiquos C. Caesar utitur hac ratione declinandi. Sed auctoritatem consuetudo superavit. 64 In ceteris, quae poterunt utroque modo non indecenter efferri, qui Graecam figuram sequi malet, non Latine quidem sed tamen citra reprehensionem loquetur.

Simplices voces prima positione id est natura sua constant, compositae aut praepositionibus subiunguntur ut *innocens*, interdum repugnantibus inter se duabus, quale est *imperterritus*; alioqui possunt aliquando continuari duae ut *incompositus*, *reconditus* et, quo Cicero utitur, *subabsurdum*; aut e duobus quasi corporibus coalescunt, ut *maleficus*. Nam ex tribus nostrae utique linguae non concesserim; quamvis *capsis* Cicero dicat compositum esse ex *cape si vis*, et inveniantur qui *Lupercalia* aequae tres partes orationis esse contendunt, quasi *luere per caprum*; nam *So-litaurilia* iam persuasum est esse *Suovetaurilia*, et sane ita se habet sacrum, quale apud Homerum quoque est. Sed haec non tam ex tribus quam ex particulis trium coeunt. Ceterum etiam ex praepositione et duobus vocabulis dure videtur struxisse Pacuvius *Nerei repandirostrum*, *incurvicervicum pecus*. Iunguntur autem aut ex duobus Latinis 68 integris ut *superfui*, *subterfugi* (quanquam ex integris an composita sint quaeritur), aut ex integro et corrupto ut *malevolus*, aut ex corrupto et integro ut *noctivagus*, aut duobus corruptis ut *pedisecus*, aut ex nostro et peregrino ut *biclinium*, aut contra ut *epitogium* et *Anticato*, aut ex duobus peregrinis ut *epiredium*. Nam cum sit praepositio Graeca, *reda* Gallicum: neque Graecus tamen neque Gallus utitur composito; Romani suum ex alieno utroque fecerunt. Frequenter autem praepositiones quoque copulatio ista cor- 69 rumpit: inde *abstulit*, *aufugit*, *amisit*, cum praepositio sit *ab* sola; et *coit*, cum sit praepositio *con*; sic *ignavi* et *erepet* et similia. Sed res tota magis Graecos decet, nobis 70 minus succedit, nec id fieri natura puto, sed alienis fave-

mus; ideoque cum *ἠγοράζοντες* mirati simus, *incurvicercum* vix a risu defendimus.

- 71 Propria sunt verba, cum id significant, in quod primo denominata sunt; translata, cum alium natura intellectum alium loco praebent. Usitatis tutius utimur, *nova* non sine quodam periculo fingimus. Nam si recepta sunt, modicam laudem afferunt orationi; si repudiata, etiam in iocos 72 exeunt. Audendum tamen; namque, ut Cicero ait, etiam quae primo dura visa sunt, usu molliuntur. Sed minime nobis concessa est *ὀνομαστοιία*; quis enim ferat, si quid simile illis merito laudatis *Ἀλγῆς βίος* et *ὄψε ὀφθαλμός* fingere audeamus? Iam ne *balare* quidem aut *hinnire* fortiter diceremus, nisi iudicio vetustatis niterentur.

VI. Est etiam sua loquentibus observatio, sua scribentibus. Serio constat ratione vel vetustate, auctoritate, consuetudine. Rationem praestat praecipue analogia, nonnunquam et etymologia. Vetera maiestas quaedam et, ut 2 sic dixerim, religiosa commendat. Auctoritas ab oratoribus vel historicis peti solet; nam poetas metri necessitas excusat, nisi quando nihil impediens in utroque modulatione pedum alterum malunt, qualia sunt, *Imo de stirpe recisum*, et *Aëriae quo congessere palumbes*, et *Silice in nuda* et similia; cum summorum in eloquentia virorum iudicium pro 3 ratione et velut error honestus est magnos duces sequentibus. Consuetudo vero certissima loquendi magistra, utendumque plane sermone ut nummo, cui publica forma est. Omnia tamen haec exigunt acre iudicium, in analogia praecipue, quam proxime ex Graeco transferentes in Latinum *proportionem* vocaverunt.

- 4 Eius haec vis est, ut id, quod dubium est, ad aliquid simile, de quo non quaeritur, referat et incerta certis probet. Quod efficitur duplici via: comparatione similium in extremis maxime syllabis, propter quod ea quae sunt e singulis 5 negantur debere rationem, et deminutione. Comparatio in nominibus aut genus deprehendit aut declinationem; genus, ut si quaeratur, *fumis* masculinum sit an femininum, simile illi sit *panis*; declinationem, ut si veniat in dubium,

hac domu dicendum sit an *hac domo* et *domuum* an *domorum*: similia sint *domus*, *anus*, *manus*. Deminutio 6 genus modo detegit, et, ne ab eodem exemplo recedam, *funem* masculinum esse *funiculus* ostendit. Eadem in verbis 7 quoque ratio comparationis, ut, si quis antiquos secutus *fervere* brevi media syllaba dicat, deprehendatur vitiose loqui, quod omnia, quae *e* et *o* litteris fatendi modo terminantur, eadem, si infinitis *p* litteram media syllaba acceperunt, utique productam habent: *prandeo*, *pendeo*, *spondeo*, *prandere*, *pendere*, *spondere*. At quae *o* solam 8 habent, dummodo per eandem litteram in infinito exeant, breviter fiunt: *lego*, *dico*, *curro*, *legere*, *dicere*, *currere*; etiamsi est apud Lucilium *Fervit aqua et fervet, fervit nunc fervet ad annum*. Sed, pace dicere hominis erudi- 9 tissimi liceat, si *fervit* putat illi simile *currit* et *legit*: *ferro* dicet ut *lego* et *curro*, quod nobis inauditum est. Sed non est haec vera comparatio; nam *fervit* est illi simile *servit*, quam proportionem sequenti dicere necesse est *fervire* ut *servire*. Prima quoque aliquando positio ex obliquis inve- 10 nitur, ut memoria repeto convictos a me, qui reprehenderant, quod hoc verbo usus essem, *pepigi*; nam id quidem dixisse summos auctores confitebantur, rationem tamen negabant permittere, quia prima positio *paciscor*, cum haberet naturam patiendi, faceret tempore praeterito *pactus sum*. Nos praeter auctoritatem oratorum atque historicorum ana- 11 logia quoque dictum hoc tuebatur. Nam cum in XII tabulis legeremus *ni ita pagunt*: inveniebamus simile huic *cadunt*, inde prima positio, etiamsi vetustate exoleverat, apparebat *pago* ut *cado*, unde non erat dubium sic *pepigi* nos dicere ut *cecidi*. Sed meminimus non per omnia duci ana- 12 logiae posse rationem, cum et sibi ipsa plurimis in locis repugnet. Quaedam sine dubio conantur eruditi defendere, ut, cum deprehensum est, *lepus* et *lupus* similia positione quantum casibus numerisque dissentiant: ita respondent, non esse paria, quia *lepus* epicoenon sit, *lupus* masculinum; quanquam Varro in eo libro, quo initia Romanae urbis enarrat, *lupum feminam* dicit Ennium Pictoremque Fabium secutus. Illi autem iidem, cum interrogantur, cur *aper* *apri* 13

et *pater patris* faciat, illud nomen positum, hoc ad aliquid esse contendunt. Praeterea quoniam utrumque a Graeco ductum sit, ad eam rationem recurrunt, ut *πάτριος patris*,
 14 *πάτριον patri* faciat. Illa tamen quomodo effugient, ut, nomina quamvis feminina singulari nominativo *u s* litteris finita nunquam genitivo casu *ris* syllaba terminentur, faciat tamen *Venus Veneris*? item cum *e s* litteris finita per varios exeant genitivos, nunquam tamen eadem *ris* syllaba terminatos, *Ceres*
 15 cogat dici *Cereris*? Quid vero? quae tota positionis eiusdem in diversos flexus eunt? cum *Alba* faciat *Albanos* et *Albenses*, *volo volui* et *volavi*. Nam praeterito quidem tempore varie formari verba prima persona *o* littera terminata, ipsa analogia confiteatur; siquidem facit *cado cecidi*, *spondeo spondei*, *pingo pinxi*, *lego legi*, *pono posui*, *frango fregi*, *laudo laudavi*. Non enim, cum primum fingerentur homines, analogia demissa coelo formam loquendi dedit, sed inventa est, postquam loquebantur, et notatum in sermone, quid quomodo caderet. Itaque non ratione nititur sed exemplo, nec lex
 17 alia fecerit quam consuetudo. Inhaerent tamen quidam molestissima diligentiae perversitate, ut *audaciter* potius dicant quam *audacter*, licet omnes oratores alii sequantur, et *emicavit* non *emicuit* et *coire* non *coire*. His permittamur et *audivisse* et *scivisse* et *tribunale* et *faciliter* dicere, *frugalis* quoque sit apud illos non *frugi*, nam quo
 18 alio modo fiet *frugalitas*? Idem *centum milia nummum* et *fidem Deum* ostendant duplices quoque soloecismos esse, quando et casum mutant et numerum; nesciebamus enim ac non consuetudini et decori serviebamus, sicut in plurimis, quae M. Tullius in Oratore divine ut omnia exequitur.
 19 Sed Augustus quoque in epistolis ad C. Caesarem scriptis emendat, quod is *calidum* dicere quam *caldum* malit, non quia id non sit Latinum sed quia sit odiosum et, ut ipse
 20 Graeco verbo significavit, *πεπλεγρον*. Atqui hanc quidam *ὀρθοπέπειαν* solam putant, quam ego minime excludo. Quid enim tam necessarium quam recta locutio? Immo inhaerendum ei iudicio, quoad licet, diu etiam mutantibus repugnandum; sed abolita atque abrogata retinere insolentiae

cuiusdam est et frivolae in parvis iactantiae. Multum enim
 21 litteratus, qui sine aspiratione et producta secunda syllaba salutarit (*avere* est enim) et *calescere* dixerit potius, quam quod dicimus, et *conservavisse*: his adiciat *face* et *dice* et similia. Recta est haec via, quis negat? sed adiacet et
 22 mollior et magis trita. Ego tamen non alio magis angor, quam quod obliquis casibus ducti etiam primas sibi positiones non invenire sed mutare permittunt: ut cum *ebur* et *robur*, ita dicta ac scripta summis auctoribus, in *o* litteram secundae syllabae transferunt, quia sit *roboris* et *eboris*, *sulfur* autem et *guttur* *u* litteram in genitivo servent; ideoque *iecur* etiam et *femur* controversiam fecerunt. Quod
 23 non minus est licentiosum, quam si *sulfuri* et *gutturi* subiicerent in genitivo litteram *o* mediam, quia esset *eboris* et *roboris*; sicut Antonius Gniphio, qui *robur* quidem et *ebur* atque etiam *marmur* fatetur esse, verum fieri vult ex his *robura*, *ebura*, *marmura*. Quodsi animadverterent litte-
 24 rarum affinitatem, scirent sic ab eo, quod est *robur*, *roboris* fieri, quomodo ab eo, quod est *miles limes*, *militis limitis*, *iudex vindex*, *iudicis vindicis*, et quae supra iam attigi. Quid vero quod, ut dicebamus, similes positiones
 25 in longe diversas figuras per obliquos casus exeunt, ut *virgo Iuno*, *fusus lusus*, *cuspis puppis* et mille alia? cum illud etiam accidat, ut quaedam pluraliter non dicantur, quaedam contra singulari numero, quaedam casibus careant, quaedam a primis statim positionibus tota mutantur, ut *Iuppiter*. Quod
 26 verbis etiam accidit ut illi *fero*, cuius praeteritum perfectum et ulterius non invenitur. Nec plurimum refert, nulla haec an praedura sint. Nam quid *progenies* genitivo singulari, quid plurali *spes* faciet? Quomodo autem *quire* et *urgere* vel in praeterita patiendi modo vel in participia transibunt? Quid de aliis dicam, cum *senatus senati* an *senatus* faciat,
 27 incertum sit? Quare mihi non invenuste dici videtur, aliud esse Latine aliud grammatice loqui. Ac de analogia nimium.

Etymologia, quae verborum originem inquirat, a
 28 Cicerone dicta est *notatio*, quia nomen eius apud Aristotelem invenitur *σύμβολον*, quod est *nota*; nam verbum ex verbo ductum, id est *veriloquium*, ipse Cicero, qui finxit,

reformat. Sunt qui vim potius intuiti *originationem* vocent.
 29 Haec habet aliquando usum necessarium, quotiens interpre-
 tatione res, de qua quaeritur, eget: ut M. Caelius se esse
 hominem *frugi* vult probare, non quia abstinens sit (nam
 id ne mentiri quidem poterat) sed quia utilis multis id est
 fructuosus, unde sit ducta *frugalitas*. Ideoque in defini-
 30 tionibus assignatur etymologiae locus. Nonnunquam etiam
 barbara ab emendatis conatur discernere, ut cum, *Trique-*
tram dici Siciliam an *Triquedram*, *meridiem* an *medidiem*
 31 oporteat, quaeritur, aliaque quae consuetudini serviunt. Con-
 tinet autem in se multam eruditionem, sive ex Graecis orta
 tractemus, quae sunt plurima praecipueque Aeolica ratione
 (cui est sermo noster simillimus) declinata, sive ex histo-
 riarum veterum notitia nomina hominum, locorum, gentium,
 urbium requiramus, unde *Bruti*, *Publicolae*, *Pythici*? cur
Latium, *Italia*, *Beneventum*? quae *Capitolium* et collem
Quirinalem et *Argiletum* appellandi ratio?
 32 Iam illa minora, in quibus maxime studiosi eius rei
 fatigantur, quae paululum declinata varie et multipliciter
 ad veritatem reducunt aut correptis aut porrectis, aut ad-
 iectis aut detractis, aut permutatis litteris syllabisve. Inde
 pravis ingeniis ad foedissima usque ludibria labuntur. Sit
 enim *Consul* a consulendo vel a iudicando; nam et hoc
consulere veteres vocaverunt, unde adhuc remanet illud,
 33 *rogat boni consulas* id est bonum iudices. *Senatui* nomen
 dederit aetas, nam iidem *Patres* sunt, et *rex rector* et alia
 plurima indubitata; nec abnuerim *tegulae regulae*que et si-
 milium his rationem. Iam sit et *classis* a calando et *lepus*
 34 *levipes* et *vulpes volipes*: etiamne a contrariis aliqua sine-
 mus trahi, ut *lucus*, quia umbra opacus parum *luceat*; et
ludus, quia sit longissime a *lusu*; et *Ditis*, quia minime
dives? etiamne *hominem* appellari, quia sit *humo* natus
 (quasi vero non omnibus animalibus eadem origo, aut illi
 primi mortales ante nomen imposuerint terrae quam sibi),
 35 et *verba* ab aëre *verberato*? Pergamus: sic pervenimus
 eousque, ut *stella* luminis *stilla* credatur, cuius etymolo-
 36 quae a me reprehenditur, inhumanum est. Qui vero talia

libris complexi sunt, nomina sua ipsi inscripserunt; inge-
 nioseque visus est Gavius *coelibes* dicere veluti *coelites*,
 quod onere gravissimo vacent, idque Graeco argumento iuvit,
ἠθελός enim eadem de causa dici affirmat. Nec ei cedit
 Modestus inventionem, nam, quia *Coelo* Saturnus genitalia ab-
 sciderit, hoc nomine appellatos, qui uxore careant, ait.
 Aelius *pituitam*, quia *petat vitam*. Sed cui non post Var-
 37 ronem sit venia, qui *agrum*, quia in eo *agatur* aliquid, et
graculos, quia *gregatim* volent, dictos voluit persuadere
 Ciceroni (ad eum enim scribit), cum alterum ex Graeco sit
 manifestum duci alterum ex vocibus avium? Sed hoc tanti
 38 fuit vertere, ut *merula*, quia sola volat, quasi *mera vo-*
lans nominaretur. Quidam non dubitaverunt etymologiae
 subicere omnem nominis causam: ut ex habitu, quemadmo-
 dum dixi, *Longus* et *Rufus*, ex sono *stertere*, *murmur-*
rare; etiam derivata, ut a *velocitate* dicitur *velox*, et com-
 posita pluraque his similia, quae sine dubio aliunde originem
 ducunt sed arte non egent, cuius in hoc opere non est usus
 nisi in dubiis.

Verba a vetustate repetita non solum magnos asser-
 39 tores habent sed etiam afferunt orationi maiestatem aliquam
 non sine delectatione; nam et auctoritatem antiquitatis ha-
 bent et, quia intermissa sunt, gratiam novitati similem pa-
 rant. Sed opus est modo, ut neque crebra sint haec neque
 40 manifesta, quia nihil est odiosius affectatione, nec utique ab
 ultimis et iam oblitteratis repetita temporibus, qualia sunt
topper et *antegerio* et *exanclare* et *prosapia* et Saliorum
 carmina vix sacerdotibus suis satis intellecta. Sed illa mu-
 41 tari vetat religio et consecratis utendum est; oratio vero,
 cuius summa virtus est perspicuitas, quam sit vitiosa, si
 eget interprete. Ergo, ut novorum optima erunt maxime
 vetera, ita veterum maxime nova.

Similis circa auctoritatem ratio. Nam etiamsi po-
 42 test videri nihil peccare, qui utitur his verbis, quae summi
 auctores tradiderunt, multum tamen refert non solum, quid
 dixerint sed etiam quid persuaserint. Neque enim *tibur-*
chinabundum et *turchinabundum* iam in nobis quisquam
 ferat, licet Cato sit auctor, nec *hos lodices*, quanquam id

Pollioni placet, nec *gladiola*, atqui Messala dixit, nec *par-ricidatum*, quod in Caelio vix tolerabile videtur, nec *collos* mihi Calvus persuaserit; quae nec ipsi iam dicerent.

43 Superest igitur consuetudo; nam fuerit paene ridiculum malle sermonem, quo locuti sint homines, quam quo loquantur. Et sane quid est aliud *vetus sermo* quam vetus loquendi consuetudo? Sed huic ipsi necessarium est iudicium, constituendumque in primis id ipsum quid sit, quod
44 consuetudinem vocemus. Quae si ex eo, quod plures faciunt, nomen accipiat, periculosissimum dabit praeceptum, non orationi modo sed (quod maius est) vitae. Unde enim tantum boni, ut pluribus quae recta sunt placeant? Igitur ut velli et comam in gradus frangere et in balneis perpotare, quamlibet haec invaserint civitatem, non erit consuetudo, quia nihil horum caret reprehensione; at lavamur et tandemur et convivimus ex consuetudine: sic in loquendo, non si quid vitiose multis insederit, pro regula sermonis
45 accipiendum erit. Nam, ut transeam, quemadmodum vulgo imperiti loquantur; tota saepe theatra et omnem circi turbam exclamasse barbare scimus. Ergo consuetudinem sermonis vocabo consensum eruditorum, sicut vivendi consensum bonorum.

VII. Nunc, quoniam diximus, quae sit loquendi regula, dicendum, quae scribentibus custodienda, quod Graeci *ὀρθογραφία* vocant, nos recte scribendi scientiam nominemus. Cuius ars non in hoc posita est, ut noverimus, quibus quaeque syllaba litteris constet (nam id quidem infra grammatici officium est) sed totam, ut mea fert opinio, subtilitatem in dubiis habet. Ut longis syllabis omnibus apponere apicem ineptissimum est, quia plurimae natura ipsa verbi quod scribitur patent: sic interim necessarium, cum eadem littera alium atque alium intellectum, prout correpta vel producta est, facit, ut, *malus* arborem significet an
3 hominem non bonum, apice distinguitur; *palus* aliud priore syllaba longa aliud sequenti significat; et cum eadem littera nominativo casu brevis, ablativo longa est, utrum sequamur, plerumque hac nota monendi sumus. Similiter puta-

verunt illa quoque servanda discrimina, ut *ex* praepositionem, si verbum sequeretur *specto*, adiecta secundae syllabae *s* littera, si *pecto*, remota scriberemus. Illa quoque
5 servata est a multis differentia, ut *ad*, cum esset praepositio, *d* litteram, cum autem coniunctio, *t* acciperet; itemque *cum*, si tempus significaret, per *Q*, si comitem, per *C* ac duas sequentes scriberetur. Frigidiora his alia, ut *quid-*
6 *quid e* quartam haberet, ne interrogare bis videremur; et *quotidie* non *cotidie*, ut sit *quot diebus*. Verum haec iam etiam inter ipsas ineptias evanuerunt. Quaeri solet, in scri-
7 bendo praepositiones sonum, quem iunctae efficiunt, an quem separatae, observare conveniat: ut, cum dico *obtinuit*, secundam enim *b* litteram ratio poscit, aures magis audiunt *p*; et *immunis*, illud enim, quod veritas exigit, sequentis syl-
8 labae sono victum *m* gemina commutatur. Est et in divi-
9 dendis verbis observatio, mediam litteram consonantem priori an sequenti syllabae adiungas: *aruspex* enim, quia pars eius posterior a *spectando* est, *s* litteram tertiae dabit; *abstemius*, quia ex abstinentia *temeti* composita vox est, primae relinquet. Nam *K* quidem in nullis verbis utendum puto,
10 nisi quae significat, etiam ut sola ponatur. Hoc eo non omisi, quod quidam eam, quotiens *A* sequatur, necessariam credunt, cum sit *C* littera, quae ad omnes vocales vim suam perferat.

Verum orthographia quoque consuetudini servit, ideo-
11 que saepe mutata est. Nam illa vetustissima transeo tempora, quibus et pauciores litterae nec similes his nostris earum formae fuerunt et vis quoque diversa, sicut apud Graecos *O* litterae, quae interim longa ac brevis ut apud nos, interim pro syllaba quam nomine suo exprimit posita est; ut Latinis veteribus *D* plurimis in verbis adiectum ul-
12 timum, quod manifestum est etiam ex columna rostrata, quae est Duellio in foro posita; interim *G* quoque, ut in pulvini Solis, qui colitur iuxta aedem Quirini, *vesperug*, quod *vesperuginem* accipimus. De mutatione etiam litterarum,
13 de qua supra dixi, nihil repetere hic necesse est, fortasse enim sicut scribebant etiam loquebantur. Semivocales ge-
14 minare diu non fuit usitatissimi moris, atque e contrario

usque ad Accium et ultra porrectas syllabas geminis, ut
 15 dixi, vocalibus scripserunt. Diutius duravit, ut E I iun-
 gendis eadem ratione qua Graeci *ei* uterentur: ea casibus
 numerisque discreta est, ut Lucilius praecipit: *Iam pueri*
venere, E postremum facito atque I, Ut pueri plures fiant;
 ac deinceps idem: *Mendaci furique addes E, cum dare*
 16 *furei Iusseris.* Quod quidem cum supervacuum est, quia
 I tam longae quam brevis naturam habet, tum incommodum
 aliquando. Nam in iis, quae proximam ab ultima litteram
 E habebunt et I longa terminabuntur, illam rationem se-
 quentes utemur E gemina, qualia sunt haec *aurei, argen-*
 17 *tei* et his similia. Idque iis praecipue, qui ad lectionem
 instituentur, etiam impedimento erit; sicut in Graecis acci-
 dit adiectione *i* litterae, quam non solum dativis casibus in
 parte ultima ascribunt sed quibusdam etiam interponunt, ut
 in *ΑΙΙΣΤΗΙ*, quia etymologia ex divisione in tris sylla-
 18 bas facta desideret eam litteram. *Ae* syllabam, cuius se-
 cundam nunc E litteram ponimus, varie per A et I effere-
 bant; quidam semper ut Graeci, quidam singulariter tantum,
 cum in dativum vel genitivum casum incidissent, unde *pi-*
ctai vestis et *aquai* Vergilius amantissimus vetustatis car-
 19 minibus inseruit. In iisdem plurali numero E utebantur, *hi*
Syllae, Galbae. Est in hac quoque parte Lucilli praece-
 ptum, quod quia pluribus explicatur versibus, si quis pa-
 20 rum credet, apud ipsum in nono requirat. Quid? quod Ci-
 ceronis temporibus paulumque infra, fere quotiens S littera
 media vocalium longarum vel subiecta longis esset, gemi-
 nabatur, ut *caussae, cassus, divissiones?* quomodo et ipsum
 21 et Vergilium quoque scripsisse manus eorum docent. Atqui
 paulum superiores etiam illud, quod nos gemina S dicimus,
iussi, una dixerunt. Etiam *optimus maximus*, ut mediam
 I litteram, quae veteribus U fuerat, acciperent, C. primum
 22 Caesaris inscriptione traditur factum. *Here* nunc E littera
 terminamus, at veterum comicorum adhuc libris invenio *Heri*
ad me venit; quod idem in epistolis Augusti, quas sua manu
 23 scripsit aut emendavit, deprehenditur. Quid? non Cato Cen-
 sorius *dicam et faciam dicem et faciam* scripsit, eundem-
 que in ceteris, quae similiter cadunt, modum tenuit, quod

ex veteribus eius libris manifestum est et a Messala in libro
 de S littera positum? *Sibe et quase* scriptum in multorum
 24 libris est, sed an hoc voluerint auctores, nescio; T. Li-
 vium ita his usum ex Pediano comperi, qui et ipse eum
 sequebatur; haec nos I littera finimus. Quid dicam *vortices*
 25 et *vorsus* ceteraque ad eundem modum, quae primus Sci-
 pio Africanus in E litteram secundam vertisse dicitur? Nostri
 26 praeceptores *seruum ceruumque* U et O litteris scripserunt,
 quia subiecta sibi vocalis in unum sonum coalescere et con-
 fundi nequirit; nunc U gemina scribuntur ea ratione, quam
 reddidi; neutro sane modo vox, quam sentimus, efficitur.
 Nec inutiliter Claudius Aeolicam illam ad hos usus litteram
 adiecerat. Illud nunc melius, quod *cui* tribus, quas prae-
 27 posui, litteris enotamus; in quo pueris nobis ad pinguem
 sane sonum *q* et *u* et *o* et *i* utebantur, tantum ut ab illo
 qui distingueretur.

Quid? quae scribuntur aliter quam enuntiantur? Nam
 28 et *Gaius* C littera significatur, quae inversa mulierem de-
 clarat; quia tam *Gaias* esse vocitatas quam *Gaios* etiam ex
 nuptialibus sacris apparet. Nec *Gnaeus* eam litteram in prae-
 29 nominis nota accipit, quae sonat; et *clarissimos* et *Con-*
sules geminata eadem littera legimus; et *Subura*, cum tri-
 bus litteris notatur, C tertiam ostendit. Multa sunt generis
 huius; sed haec quoque vereor ne modum tam parvae quae-
 stionis excesserint.

Iudicium autem suum grammaticus interponat his omni-
 30 bus; nam hoc valere plurimum debet. Ego (nisi quod con-
 suetudo obtinuerit) sic scribendum quidque iudico, quomodo
 sonat. Hic enim est usus litterarum, ut custodiant voces
 31 et velut depositum reddant legentibus, itaque id exprimere
 debent quod dicturi sumus. Hae fere sunt emendate loquendi
 32 scribendique partes; duas reliquas significanter ornatique
 dicendi non equidem grammaticis aufero, sed cum mihi of-
 ficia rhetoris supersint, maiori operi reservo.

Sedet autem illa cogitatio, quosdam fore, qui haec
 33 quae diximus parva nimium et impedimenta quoque maius
 aliquid agentibus putent. Nec ipse ad extremam usque an-
 xietatem et ineptas cavillationes descendendum atque his

34 ingenia concidi et comminui credo. Sed nihil ex grammatica nocuerit, nisi quod supervacuum est. An ideo minor est M. Tullius orator, quod idem artis huius diligentissimus fuit et in filio (ut epistolis apparet) recte loquendi asper quoque exactor? aut vim C. Caesaris fregerunt editi de
35 analogia libri? aut ideo minus Messala nitidus, quia quosdam totos libellos non verbis modo singulis sed etiam litteris dedit? Non obstant hae disciplinae per illas euntibus sed circa illas haerentibus.

VIII. Superest lectio, in qua puer ut sciat, ubi suspendere spiritum debeat, quo loco versum distinguere, ubi claudatur sensus, unde incipiat, quando attollenda vel summittenda sit vox, quid, quoque flexu quid, lentius, celerius, concitatius, lenius dicendum: demonstrari nisi in
2 opere ipso non potest. Unum est igitur, quod in hac parte praecipiam: Ut omnia ista facere possit, intelligat. Sit autem in primis lectio virilis et cum suavitate quadam gravis, et non quidem prosae similis, quia et carmen est et se poetae canere testantur; non tamen in canticum dissoluta nec plasmate (ut nunc a plerisque fit) effeminata; de quo genere optime C. Caesarem praetextatum adhuc accepimus
3 dixisse: *Si cantas, male cantas; si legis, cantas*. Nec prosopopoeias, ut quibusdam placet, ad comicum morem pronuntiari velim; esse tamen flexum quandam, quo distin-
4 quantur ab iis, in quibus poeta persona sua utetur. Cetera admonitione magna egent, in primis, ut tenerae mentes tracturaeque altius, quidquid rudibus et omnium ignaris insederit, non modo quae diserta sed vel magis quae honesta sunt, discant.

5 Ideoque optime institutum est, ut ab Homero atque Vergilio lectio inciperet, quanquam ad intelligendas eorum virtutes firmiore iudicio opus est; sed huic rei superest tempus, neque enim semel legentur. Interim et sublimitate heroici carminis animus assurgat et ex magnitudine rerum
6 spiritum ducat et optimis imbuatur. Utiles tragoediae, alunt et lyrici; si tamen in his non auctores modo sed etiam partes operis elegeris, nam et Graeci licenter multa et Hora-

tium nolim in quibusdam interpretari. Elegia vero, utique qua amat, et hendecasyllabi, qui sunt commata Sotadeorum (nam de Sotadeis ne praecipendum quidem est) amoveantur, si fieri potest; si minus, certe ad firmiter aetatis robur reserventur. Comoediae, quae plurimum conferre ad elo-
7 quentiam potest, cum per omnes et personas et affectus eat, quem usum in pueris putem, paulo post suo loco dicam; nam cum mores in tuto fuerint, inter praecipua legenda erit. De Menandro loquor, nec tamen excluserim alios.

Nam Latini quoque auctores afferent utilitatis aliquid.
8 Sed pueris, quae maxime ingenium alant atque animum augeant, praelegenda; ceteris, quae ad eruditionem modo pertinent, longa aetas spatium dabit. Multum autem veteres etiam Latini conferunt, (quanquam plerique plus ingenio quam arte valuerunt) imprimis copiam verborum, quorum in tragoediis gravitas, in comoediis elegantia et quidam
9 velut ἀρτινισμὸς inveniri potest. Oeconomia quoque in his diligentior quam in plerisque novorum erit, qui omnium operum solam virtutem sententias putaverunt. Sanctitas certe et, ut sic dicam, virilitas ab iis petenda est, quando nos in omnia deliciarum vitia dicendi quoque ratione defluximus. Denique credamus summis oratoribus, qui veterum poemata
10 vel ad fidem causarum vel ad ornamentum eloquentiae assumunt. Nam praecipue quidem apud Ciceronem, frequenter
11 tamen apud Asinium etiam et ceteros, qui sunt proximi, vidimus Ennii, Accii, Pacuvii, Lucilli, Terentii, Caecillii et aliorum inseri versus, summa non eruditionis modo gratia sed etiam iucunditatis, cum poeticis voluptatibus aures a forensi asperitate respirant. Quibus accedit non medio-
12 eris utilitas, cum sententiis eorum velut quibusdam testimoniis, quae proponere, confirment. Verum priora illa ad pueros magis, haec sequentia ad robustiores pertinebunt, cum grammatices amor et usus lectionis non scholarum temporibus sed vitae spatio terminentur.

13 In praelegendo grammaticus et illa quidem minora praestare debet, ut partes orationis reddi sibi soluto versu desideret et pedum proprietates, quae adeo debent esse notae in carminibus, ut etiam in oratoria compositione de-

siderentur, deprehendatque, quae barbara, quae impropria,
 14 quae contra leges loquendi sint posita; non ut ex his uti-
 que improbentur poetae, quibus, quia plerumque servire
 metro coguntur, adeo ignoscitur, ut vitia ipsa aliis in car-
 mine appellationibus nominentur. *Metaplasmos* enim et *sche-*
matismos et *schemata*, ut dixi, vocamus, et laudem virtu-
 tis necessitati damus; sed ut commoneat artificialium et
 15 memoriam agitet. Id quoque inter prima rudimenta non in-
 utile demonstrare, quot quaeque verba modis intelligenda
 sint. Circa glossemata etiam, id est voces minus usitatas,
 16 non ultima eius professionis diligentia est. Enimvero iam
 maiore cura doceat tropos omnes, quibus praecipue non
 poema modo sed etiam oratio ornatur; schemata utraque.
 id est figuras, quaeque λέξεις quaeque διαβολαί vocantur,
 quorum ego sicut troporum tractatum in eum locum differo,
 17 quo mihi de ornatu orationis dicendum erit. Praecipue vero
 illa infigat animis, quae in oeconomia virtus, quae in de-
 core rerum, quid personae cuique convenerit, quid in sen-
 sibus laudandum, quid in verbis, ubi copia probabilis, ubi
 modus.

18 His accedit enarratio historiarum, diligens quidem illa
 non tamen usque ad supervacuum laborem occupata. Nam
 receptas aut certe claris auctoribus memoratas exposuisse
 satis est. Persequi quidem, quid quisque unquam vel con-
 temptissimorum hominum dixerit, aut nimiae miseriae aut
 inanis iactantiae est et detinet atque obruit ingenia me-
 19 lius aliis vacatura. Nam qui omnes etiam indignas lectione
 scidas excutit, anilibus quoque fabulis accommodare ope-
 ram potest. Atqui pleni sunt eiusmodi impedimentis gram-
 maticorum commentarii, vix ipsis qui composuerunt satis
 20 noti. Nam Didymo, quo nemo plura scripsit, accidisse
 compertum est, ut, cum historiae cuidam tanquam vanae
 repugnaret, ipsius proferretur liber, qui eam continebat.
 21 Quod evenit praecipue in fabulosis usque ad deridicula, quae-
 dam etiam pudenda; unde improbissimo cuique pleraque
 fingendi licentia est; adeo ut de libris totis et auctoribus,
 ut succurrit, mentiantur tuto, quia inveniri qui nunquam
 fuere non possunt. Nam in notioribus frequentissime de-

prehenduntur a curiosis. Ex quo mihi inter virtutes gram-
 matici habebitur aliqua nescire.

DE OFFICIO GRAMMATICI.

IX. Et finitae quidem sunt partes duae, quas haec
 professio pollicetur, id est ratio loquendi et enarratio au-
 ctorum, quarum illam *methodicem* hanc *historicem* vocant.
 Adiciamus tamen eorum curae quaedam dicendi primordia,
 quibus aetates nondum rhetorem capientes instituant. Igitur²
 Aesopi fabellas, quae fabulis nutricularum proxime succe-
 dunt, narrare sermone puro et nihil se supra modum ex-
 tollente, deinde eandem gracilitatem stilo exigere condi-
 scant; versus primo solvere, mox mutatis verbis interpretari,
 tum paraphrasi audacius vertere, qua et breviate quaedam
 et exornare salvo modo poetae sensu permittitur. Quod³
 opus etiam consummatis professoribus difficile qui commode
 tractaverit, cuicumque discendo sufficet. Sententiae quoque
 et chriae et ethologiae subiectis dictorum rationibus apud
 grammaticos scribantur, quia initium ex lectione ducunt;
 quorum omnium similis est ratio, forma diversa, quia sen-
 tentia universalis est vox, ethologia personis continetur.
 Chriarum plura genera traduntur: unum simile sententiae,⁴
 quod est positum in voce simplici, *Dixit ille*, aut, *Dicere*
solebat; alterum, quod est in respondendo, *Interrogatus*
ille, vel, *cum hoc ei dictum esset, respondit*; tertium huic
 non dissimile, *cum quis dixisset aliquid: vel fecisset*. Etiam⁵
 in ipsorum factis esse chriam putant, ut *Crates, cum in-*
doctum puerum vidisset, paedagogum eius percussit; et
 aliud paene par ei, quod tamen eodem nomine appellare
 non audent sed dicunt *χρειώδες*, ut *Milo, quem vitulum*
assueverat ferre, taurum ferebat. In his omnibus et de-
 clinatio per eosdem ducitur casus, et tam factorum quam
 dictorum ratio est. Narratiunculas a poetis celebratas no-⁶
 titiae causa non eloquentiae tractandas puto. Cetera maio-
 ris operis ac spiritus Latini rhetores relinquendo necessaria
 grammaticis fecerunt; Graeci magis operum suorum et onera
 et modum norunt.

AN ORATORI FUTURO NECESSARIA SIT PLURIUM ARTIUM
COGNITIO.

X. Haec de Grammaticae, quam brevissime potui, non ut omnia dicerem sectatus, quod infinitum erat, sed ut maxime necessaria; nunc de ceteris artibus, quibus instituendos, priusquam rhetori tradantur, pueros existimo, strictim subiungam, ut efficiatur orbis ille doctrinae, quam Graeci *ἑξωνκλον παιδείαν* vocant.

2 Nam iisdem fere annis aliarum quoque disciplinarum studia ingredienda sunt, quae, quia et ipsae artes sunt et esse perfectae sine orandi scientia possunt nec rursus ad efficiendum oratorem satis valent solae: an sint huic operi 3 necessariae, quaeritur. Nam quid, inquit, ad agendam causam dicendamve sententiam pertinet, scire, quemadmodum data linea constitui triangula aequis lateribus possint? Aut quo melius vel defendet reum vel reget consilia, qui 4 citharae sonos nominibus et spatiis distinxerit? Enumerent etiam fortasse multos quamlibet utiles foro, qui nec geometren audierint nec musicos nisi hac communi voluptate aurium intelligant. Quibus ego primum hoc respondeo, quod M. Cicero scripto ad Brutum libro frequentius testatur, non eum a nobis institui oratorem, qui sit aut fuerit, sed imaginem quandam concepisse nos animo perfecti illius et nulla 5 parte cessantis. Nam et sapientem formantes eum, qui sit futurus consummatus undique et, ut dicunt, mortalis quidam deus, non modo cognitione coelestium vel mortalium putant instruendum, sed per quaedam parva sane, si ipsa demum aestimes, ducunt sicut exquisitas interim ambiguitates: non quia *ceratinae* aut *crocodilinae* possint facere sapientem, sed quia illum ne in minimis quidem oporteat 6 falli. Similiter oratorem, qui debet esse sapiens, non geometres faciet aut musicus quaeque his alia subiungam, sed hae quoque artes, ut sit consummatus, iuvabunt. Nisi forte antidotos quidem atque alia, quae oculis aut vulneribus medentur, ex multis atque interim contrariis quoque inter se effectibus componi videmus, quorum ex diversis fit una illa mixtura, quae nulli eorum similis est, quibus constat, 7 sed proprias vires ex omnibus sumit; et muta animalia

mellis illum inimitabilem humanae rationi saporem vario florum ac sucorum genere perficiunt: nos mirabimur, si oratio, qua nihil praestantius homini dedit providentia, pluribus artibus egeat; quae, etiam cum se non ostendunt in dicendo nec proferunt, vim tamen occultam suggerunt et tacitae quoque sentiuntur. „Fuit aliquis sine his disertus:“ 8 at ego oratorem volo. „Non multum adiciunt:“ sed utique non erit totum, cui vel parva deerunt, et optimum quidem hoc esse conveniet; cuius etiamsi in arduo spes est, nos tamen praecipiamus omnia, ut saltem plura fiant. Sed cur deficiat animus? Natura enim perfectum oratorem esse non prohibet, turpiterque desperatur quidquid fieri potest.

DE MUSICE.

Atque ego vel iudicio veterum poteram esse conten-9 tus. Nam quis ignorat musicen (ut de hac primum loquar) tantum iam illis antiquis temporibus non studii modo verum etiam venerationis habuisse, ut iidem musici et vates et sapientes iudicarentur (mittam alios) Orpheus et Linus; quorum utrumque diis genitum, alterum vero, quia rudes quoque atque agrestes animos admiratione mulceret, non feras modo sed saxa etiam silvasque duxisse posteritatis memoriae traditum est. Itaque Timagenes auctor est, om-10 nium in litteris studiorum antiquissimam musicen exlitisse, et testimonio sunt clarissimi poetae, apud quos inter regalia convivia laudes heroum ac deorum ad citharam canebantur. Iopas vero ille Vergilii nonne *canit errantem lunam solisque labores* et cetera? Quibus certe palam confirmat auctor eminentissimus, musicen cum divinarum etiam rerum cognitione esse coniunctam. Quod si datur, erit etiam ora-11 tori necessaria. Siquidem (ut diximus) haec quoque pars, quae ab oratoribus relicta a philosophis est occupata, nostri operis fuit, ac sine omnium talium scientia non potest esse perfecta eloquentia. Atque claros nomine sapientiae 12 viros, nemo dubitaverit, studiosos musices fuisse; cum Pythagoras atque secuti acceptam sine dubio antiquitus opinionem vulgaverint, mundum ipsum ratione esse compositum, quam postea sit lyra imitata; nec illa modo con-

tenti dissimilium concordia, quam vocant *ἀρμονίαν*, sonum
 13 quoque his motibus dederint. Nam Plato, cum in aliis quibusdam tum praecipue in Timaeo, ne intelligi quidem nisi ab iis, qui hanc quoque partem disciplinae diligenter per-
 14 ipse Socrates iam senex institui lyra non erubescerat? Duces maximos et fidibus et tibiis cecinisse traditum et exercitus Lacedaemoniorum musicis accensos modis. Quid autem aliud in nostris legionibus cornua ac tubae faciunt; quorum concentus quanto est vehementior, tantum Romana in bellis
 15 gloria ceteris praestat? Non igitur frustra Plato civili viro, quem *πολιτικὸν* vocant, necessariam musicen credidit. Et eius sectae, quae aliis severissima aliis asperrima videtur, principes in hac fuere sententia, ut existimarent, sapientium aliquos nonnullam operam his studiis accommodaturos. Et Lycurgus, durissimarum Lacedaemoniis legum auctor,
 16 musices disciplinam probavit. Atque eam natura ipsa videtur ad tolerandos facilius labores velut muneri nobis dedisse, siquidem et remigem cantus hortatur; nec solum in iis operibus, in quibus plurium conatus praeeunte aliqua iucunda voce conspirat, sed etiam singulorum fatigatio
 17 quamlibet se rudi modulatione solatur. Laudem adhuc dicere artis pulcherrimae videor, nondum eam tamen oratori coniungere. Transeamus igitur id quoque, quod grammaticae quondam ac musice iunctae fuerunt. Siquidem Archytas atque Aristoxenus etiam subiectam grammaticen musicae putaverunt; et eosdem utriusque rei praeceptores fuisse cum Sophron ostendit, mimorum quidem scriptor sed quem Plato adeo probavit, ut suppositos capiti libros eius, cum more-
 18 retur, habuisse credatur, tum Eupolis, apud quem Prodamus et musicen et litteras docet; et Maricas, qui est Hyperbolus, *nihil se ex musice scire nisi litteras* confitetur. Aristophanes quoque non uno libro sic institui pueros antiquitus solitos esse demonstrat, et apud Menandrum in Hypobolimaeano senex, qui repositenti filium patri velut rationem impendiorum, quae in educationem contulerit, exponens: psaltis se et geometris multa dicit dedisse. Unde
 19 etiam ille mos, ut in conviviis post coenam circumferretur

lyra; cuius cum se imperitum Themistocles confessus esset, ut verbis Ciceronis utar, *est habitus indoctor*. Sed
 20 veterum quoque Romanorum epulis fides ac tibias adhibere moris fuit. Versus quoque Saliorum habent carmen. Quae cum omnia sint a Numa rege instituta, faciunt manifestum, ne illis quidem, qui rudes ac bellicosi videntur, curam musices, quantum illa recipiebat aetas, defuisse. De
 21 nique in proverbium usque Graecorum celebratum est, *Indoctos a Musis atque a Gratiis abesse*.

Verum quid ex ea proprie petat futurus orator, dis-
 22 seramus. Numeros musice duplices habet in vocibus et in corpore, utriusque enim rei aptus quidam modus desideratur. Vocis rationem Aristoxenus musicus dividit in *ἔνθεον* et *μέλος*, quorum alterum modulatione, alterum canore ac sonis constat. Num igitur non haec omnia oratori necessaria; quorum unum ad gestum, alterum ad collocationem verborum, tertium ad flexus vocis, qui sunt in agendo quoque plurimi, pertinet? Nisi forte in carminibus tantum et
 23 in canticis exigitur structura quaedam et inoffensa copulatio vocum, in agendo supervacuum est; aut non compositio et sonus in oratione quoque varie pro rerum modo adhibetur sicut in musice. Namque et voce et modulatione grandia
 24 elate, iucunda dulciter, moderata leniter canit, totaque arte consentit cum eorum quae dicuntur affectibus. Atqui in
 25 orando quoque intentio vocis, remissio, flexus pertinet ad movendos audientium affectus, aliaque et collocationis et vocis (ut eodem utar verbo) modulatione concitationem iudicis, alia misericordiam petimus; cum etiam organis, quibus sermo exprimi non potest, duci animos in diversum habitum sentiamus. Corporis quoque actus et decens motus,
 26 qui dicitur *εὐρυθμία*, et est necessarius nec aliunde peti potest, in quo pars actionis non minima consistit; qua de re sepositus nobis est locus. Age, non habebit imprimis
 27 curam vocis orator? Quid tam musices proprium? Sed ne haec quidem praesumenda pars est. Uno interim contenti simus exemplo C. Gracchi, praecipui suorum temporum oratoris, cui contionanti consistens post eum musicus fistula, quam *tonarion* vocant, modos, quibus deberet in-

28tendi, monstrabat. Haec ei cura inter turbidissimas actio-
nes vel terrenti optimates vel iam timenti profuit. Libet
propter quosdam imperitiores etiam *crassiore*, ut vocant,
29 *Musa* dubitationem huius utilitatis eximere. Nam poetas
certe legendos oratori futuro concesserint: num igitur hi
sine musice? ac si quis tam caecus animi est, ut de aliis
dubitet: illos certe, qui carmina ad lyram composuerunt.
Haec diutius forent dicenda, si hoc studium velut novum
30 praeciperem. Cum vero antiquitus usque a Chirone atque
Achille ad nostra tempora apud omnes, qui modo legitima
disciplinam non sint perosi, duraverit: non est committendum,
ut illa dubia faciam defensionis sollicitudine.

31 Quamvis autem satis iam ex ipsis, quibus sum modo
usus, exemplis credam esse manifestum, quae mihi et qua-
tenus musice placeat: apertius tamen profitendum puto, non
hanc a me praecipi, quae nunc in scenis effeminata et
impudicis modis fracta non ex parte minima, si quid in no-
bis virilis roboris manebat, excidit; sed qua laudes for-
tium canebantur, quaque ipsi fortes canebant; nec psal-
teria et spadicarum, etiam virginibus probis recusanda, sed
cognitionem rationis, quae ad movendos leniendosque af-
32 fectus plurimum valet. Nam et Pythagoran accipimus con-
citatos ad vim pudicae domui afferendam iuvenes, iussa
mutare in spondeum modos tibicina, composuisse; et Chry-
sippus etiam nutricum illi, quae adhibetur infantibus, alle-
33 ctationi suum quoddam carmen assignat. Est etiam non
inerudite ad declamandum ficta materia, in qua ponitur ti-
bicen, qui sacrificanti Phrygium occinerat, acto illo in in-
saniam et per praecipitia delato accusari, quod causa mor-
tis extiterit; quae si dici debet ab oratore nec dici citra
scientiam musices potest: quomodo non hanc quoque ar-
tem necessariam esse operi nostro vel iniqui consentient?

DE GEOMETRIA.

34 In geometria partem fatentur esse utilem teneris
aetatibus. Agitari namque animos et acui ingenia et ce-
leritatem percipiendi venire inde concedunt; sed prodesse
eam non ut ceteras artes, cum perceptae sint sed cum

discatur, existimant. Id vulgaris opinio est. Nec sine³⁵
causa summi viri etiam impensam huic scientiae operam
dederunt. Nam cum sit geometria divisa in numeros at-
que formas: numerorum quidem notitia non oratori modo
sed cuicumque saltem primis litteris erudito necessaria est.
In causis vero frequentissime versari solet; in quibus actor,
non dico, si circa summas trepidat sed si digitorum saltem
incerto aut indecoro gestu a computatione dissentit, iudi-
catur indoctus. Illa vero linearis ratio et ipsa quidem ca-³⁶
dit frequenter in causas, si de terminis mensurisque sint
lites; sed habet maiorem quandam aliam cum arte oratoria
cognitionem. Primum ordo est geometriae necessarius;³⁷
nonne et eloquentiae? Ex prioribus geometria probat inse-
quentia et certis incerta; nonne id in dicendo facimus?
Quid? illa propositarum quaestionum conclusio non fere
tota constat syllogismis? Propter quod plures invenias,
qui dialecticae similem quam qui rhetoricae fateantur hanc
artem. Verum et orator etiamsi raro non tamen nunquam
probat dialectice. Nam et syllogismis, si res poscet, ute-³⁸
tur et certe enthymemate, qui rhetoricus est syllogismus.
Denique probationum quae sunt potentissimae *ὑπομνημαὶ*
ἀποδείξεις vulgo dicuntur: quid autem magis oratio, quam
probationem petit? Falsa quoque veris similia geometria³⁹
ratione deprehendit. Fit hoc et in numeris per quasdam,
quas *ψευδογραφίας* vocant, quibus pueri ludere solebamus.
Sed alia maiora sunt. Nam quis non ita proponenti cre-
dat: Quorum locorum extremae lineae eandem mensuram
colligunt, eorum spatium quoque, quod his lineis contine-
tur, par sit necesse est? At id falsum est. Nam pluri-⁴⁰
mum refert, cuius sit formae ille circuitus; reprehensive
a geometris sunt historici, quia magnitudinem insularum sat-
tis significari navigationis ambitu crediderunt. Nam ut quae-
que forma perfectissima ita capacissima est. Ideoque illa⁴¹
circumcurrens linea si efficiet orbem, quae forma est in pla-
nis maxime perfecta, amplius spatium complectetur quam si
quadratum paribus oris efficiat. Rursus quadrata triangulis,
triangula ipsa plus aequis lateribus quam inaequalibus. Sed⁴²
alia forsitan obscuriora; nos facillimum etiam imperitis se-

quamur experimentum. Iugeri mensuram ducentos et quadraginta longitudinis pedes esse dimidioque in latitudinem patere, non fere quisquam est qui ignoret, et qui sit circuitus et quantum campi claudat colligere expeditum. At centeni et octogeni in quamque partem pedes idem spatium extremitatis sed multo amplius clausae quattuor lineis areae faciunt. Id si computare quem piget, brevioribus numeris idem discat. Nam deni in quadram pedes, quadraginta per oram, intra centum erunt. At si quinideni per latera, quini in fronte sint: ex illo, quod amplectuntur, quartam deducunt eodem circumductu. Si vero porrecti utrinque undeviceni singulis distent, non plures intus quadratos habebunt, quam per quot longitudo ducetur; quae circumibit autem linea, eiusdem spatii erit, cuius ea, quae centum continet. Ita quidquid formae quadrati detraxeris, amplitudini quoque peribit. Ergo etiam id fieri potest, ut maiore circuitu minor loci amplitudo cludatur. Haec in planis. Nam in collibus vallibusque etiam imperito patet plus soli esse quam coeli. Quid? quod se eadem geometria tollit ad rationem usque mundi? in qua, cum siderum certos constitutosque cursus numeris docet, discimus nihil esse inordinatum atque fortuitum; quod ipsum nonnunquam pertinere ad oratorem potest. An vero, cum Pericles Atheniensis solis obscuratione territos redditus eius rei causis metu liberavit; aut cum Sulpicius ille Gallus in exercitu L. Paulli de lunae defectione disseruit, ne velut prodigio divinitus facto militum animi terrentur, non videtur usus esse oratoris officio? Quod si Nicias in Sicilia scisset, non eodem confusus metu pulcherrimum Atheniensium exercitum prodidisset; sicut Dion, cum ad destruendam Dionysii tyrannidem venit, non est tali casu deterritus. Sint extra licet usus bellici, transeamusque, quod Archimedes unus obsidionem Syracusarum in longius traxit: illud utique iam proprium ad efficiendum quod intendimus, plurimas quaestiones, quibus difficilior alia ratione explicatio est, ut de ratione dividendi, de sectione in infinitum, de celeritate augenda, linearibus illis probationibus solvi solere: ut, si est oratori (quod proximus demonstrabit liber) de

omnibus rebus dicendum, nullo modo sine geometria esse possit orator.

DE PRIMA PRONUNTIATIONIS ET GESTUS INSTITUTIONE.

XI. Dandum aliquid comoedo quoque, dum eatenus, qua pronuntiandi scientiam futurus orator desiderat. Non enim puerum, quem in hoc instituimus, aut femineae vocis exilitate frangi volo aut seniliter tremere. Nec vitia ebrietatis effingat neque servili vernilitate imbuatur nec amoris, avaritiae, metus discat affectum; quae neque oratori sunt necessaria et mentem, praecipue in aetate prima teneram adhuc et rudem, inficiunt. Nam frequens imitatio transit in mores. Ne gestus quidem omnis ac motus a comoedis petendus est. Quanquam enim utrumque eorum ad quandam modum praestare debet orator; plurimum tamen aberit a scenico, nec vultu nec manu nec excursionibus nimius. Nam si qua in his ars est dicentium, ea prima est, ne ars esse videatur.

Quod est igitur huius doctoris officium? Imprimis vitia si qua sunt oris emendet, ut expressa sint verba, ut suis quaeque litterae sonis enuntientur. Quarundam enim vel exilitate vel pinguedine nimia laboramus, quasdam velut acriores parum efficimus et aliis non dissimilibus sed quasi hebetioribus permutamus. Quippe Rho litterae, quae Demosthenes quoque laboravit, Labda succedit (quarum vis est apud nos quoque); et cum C ac similiter G non valuerunt, in T ac D emolliuntur. Ne illas quidem circa S litteram delicias hic magister feret, nec verba in faucibus patietur audiri, nec oris inanitate resonare, nec, quod minime sermoni puro conveniat, simplicem vocis naturam pleniore quodam sono circumlinire, quod Graeci *καταπεπλασμένον* dicunt. Sic appellatur sonus tibiaram, quae praeculosis quibus clarescunt foraminibus, recto modo exitu graviolem spiritum reddunt.

Curabit etiam, ne extremae syllabae intercident; ut par sibi sermo sit; ut, quotiens exclamandum erit, lateris conatus sit ille non capitis; ut gestus ad vocem, vultus ad gestum accommodetur. Observandum erit etiam, ut recta

sit facies dicentis, ne labra distorqueantur, ne immodicus hiatus rictum discindat, ne supinus vultus, ne defecti in terram oculi, inclinata utrolibet cervix. Nam frons pluribus generibus peccat. Vidi multos, quorum supercilia ad singulos vocis conatus allevarentur, aliorum constricta, aliorum etiam dissidentia, cum alterum in verticem tenderent, altero paene oculus ipse premeretur. Infitam autem, ut mox dicemus, in his quoque rebus momentum est; et nihil potest placere quod non decet.

12 Debet etiam docere comoedus, quomodo narrandum, qua sit auctoritate suadendum, qua concitatione consurgat ira, qui flexus deceat miserationem. Quod ita optime faciet, si certos ex comoediis elegerit locos et ad hoc maxime idoneos, id est, actionibus similes. Iidem autem non ad pronuntiandum modo utilissimi verum ad augendam quoque eloquentiam maxime accommodati erunt. Et haec, dum infirma aetas maiora non capiet; ceterum, cum legere orationes oportebit, cum virtutes earum iam sentiet: tum mihi diligens aliquis ac peritus assistat, neque solum lectionem formet verum ediscere etiam electa ex his cogat et ea dicere stantem clare et quemadmodum agere oportebit, ut protinus pronuntiationem, vocem, memoriam exerceat.

15 Ne illos quidem reprehendendos puto, qui paulum etiam palaestricis vacaverunt. Non de his loquor, quibus pars vitae in oleo, pars in vino consumitur, qui corporum curam mentem obruerunt, hos enim abesse ab eo quem instituius quam longissime velim; sed nomen est idem iis, a quibus gestus motusque formantur: ut recta sint brachia, ne indoctae rusticaeve manus, ne status indecorus, ne qua in proferendis pedibus inscitia, ne caput oculique ab alia corporis inclinatione dissideant. Nam neque haec esse in parte pronuntiationis negaverit quisquam, neque ipsam pronuntiationem ab oratore secernet, et certe, quod facere oporteat, non indignandum est discere, cum praesertim haec chironomia, quae est, ut nomine ipso declaratur, *lex gestus*, et ab illis temporibus heroicis orta sit et a summis Graeciae viris atque ipso etiam Socrate probata, a Platone

quoque in parte civilium posita virtutum et Chrysippo in praeceptis de liberorum educatione compositis non omissa. Nam Lacedaemonios quidem etiam saltationem quandam tanquam ad bella quoque utilem habuisse inter exercitationes accepimus. Neque id veteribus Romanis dedecori fuit; argumentum est sacerdotum nomine ac religione durans ad hoc tempus saltatio, et illa in tertio Ciceronis de Oratorum libro verba Crassi, quibus praecipit, ut orator utatur *late- rum inclinatione forti ac virili, non a scena et histrionibus sed ab armis aut etiam a palaestra*; cuius disciplinae usus in nostram usque aetatem sine reprehensione descendit. A me tamen nec ultra pueriles annos retinebitur nec in his ipsis diu. Neque enim gestum oratoris componi ad similitudinem saltationis volo sed subesse aliquid ex hac exercitatione puerili, unde nos non id agentes furtim decor ille discentibus traditus prosequatur.

AN PLURA EODEM TEMPORE DOCERI PRIMA AETAS POSSIT.

XII. Quaeri solet, an, etiamsi discenda sint haec, eodem tempore tamen tradi omnia et percipi possint. Negant enim quidam, quia confundatur animus ac fatigetur tot disciplinis in diversum tendentibus, ad quas nec mens, nec corpus, nec dies ipse sufficiat, et si maxime patiat hoc aetas robustior, pueriles annos onerari non oporteat.

Sed non satis perspiciunt, quantum natura humani ingenii valeat; quae ita est agilis ac velox, sic in omnem partem, ut ita dixerim, spectat, ut ne possit quidem aliquid agere tantum unum, in plura vero non eodem die modo sed eodem temporis momento vim suam impendat. An vero citharoedi non simul et memoriae et sono vocis et plurimis flexibus serviunt, cum interim alios nervos dextra percurrunt, alios laeva trahunt, continent, praebent, ne pes quidem otiosus certam legem temporis servat, et haec pariter omnia? Quid? nos agendi subita necessitate deprehensi nonne alia dicimus, alia providemus, cum pariter inventio rerum, electio verborum, compositio, gestus, pronuntiatio, vultus, motusque desiderentur? Quae si velut sub uno conatu tam diversa parent simul, cur non pluri-

bus curis horas partiamur? cum praesertim reficiat animos ac reparet varietas ipsa, contraque sit aliquanto difficilius in labore uno perseverare. Ideo et stilus lectione requie-
 5 scit, et ipsius lectionis taedium vicibus levatur. Quamlibet multa egerimus, quodam tamen modo recentes sumus ad id quod incipimus. Quis non obtundi potest, si per totum diem cuiuscunque artis unum magistrum ferat? Mutatione recreabitur sicut in cibis, quorum diversitate reficitur
 6 stomachus et pluribus minore fastidio alitur. Aut dicant isti mihi, quae sit alia ratio discendi. Grammatico soli deserviamus, deinde geometrae tantum: omittamus interim quod didicimus; mox transeamus ad musicum: excidant priora; et cum Latinis studebimus litteris, non respiciamus ad Graecas; et, ut semel finiam, nihil faciamus nisi novissimum?
 7 Cur non idem suademus agricolis: ne arva simul et vineta et oleas et arbustum colant; ne pratis et pecoribus et hortis et alvearibus avibusque accommodent curam? Cur ipsi aliquid forensibus negotiis, aliquid desideris amicorum, aliquid rationibus domesticis, aliquid curae corporis, nonnihil voluptatibus cotidie damus? quarum nos una res quaelibet nihil intermittentes fatigaret. Adeo facilius est multa facere quam diu.

8 Illud quidem minime verendum est, ne laborem studiorum pueri difficilius tolerant, neque enim ulla aetas minus fatigatur. Mirum sit forsitan, sed experimentis deprehendas. Nam et dociliora sunt ingenia, priusquam obdurerunt. Id vel hoc argumento patet, quod intra biennium, quam verba recte formare potuerunt, quamvis nullo instante, omnia fere loquuntur; at noviciis nostris per quot annos sermo Latinus repugnat! Magis scias, si quem iam robustum instituere litteris coeperis, non sine causa dici *παιδομαθητῆς* eos, qui in sua quidque arte optime faciant.
 10 Et patientior est laboris natura pueris quam iuvenibus. Videlicet, ut corpora infantium nec casus, quo in terram totiens deferuntur, tam graviter afflicteret nec illa per manus et genua reptatio nec post breve tempus continui lusus et totius diei discursus, quia pondus illis abest nec sese ipsi gravant: sic animi quoque, credo, quia minore conatu

moventur nec suo nisu studiis insistunt sed formandos se tantummodo praestant, non similiter fatigantur. Praeterea
 11 secundum aliam aetatis illius facilitatem velut simplicius docentes sequuntur nec, quae iam egerint, metiuntur. Abest illis adhuc etiam laboris iudicium. Porro, ut frequenter experti sumus, minus afficit sensus fatigatio quam cogitatio.

Sed ne temporis quidem unquam plus erit, quia his
 12 aetatibus omnis in audiendo profectus est. Cum ad stilum secedet, cum generabit ipse aliquid atque componet: tum inchoare haec studia vel non vacabit vel non libebit. Ergo
 13 cum grammaticus totum occupare diem non possit nec debeat, ne discantis animum taedio avertat: quibus potius studiis haec temporum velut subsiciva donabimus? Nam nec
 14 ego comminui studentem in his partibus volo, nec moduletur aut musicis notis cantica excipiat, nec utique ad minutissima usque geometriae opera descendat, non comoedum in pronuntiando nec saltatorem in gestu facio; quae si omnia exigerem, suppeditabat tamen tempus. Longa est enim, quae discit, aetas, et ego non de tardis ingeniis loquor. Deni-
 15 que cur in his omnibus, quae discenda oratori futuro puto, eminuit Plato, qui non contentus disciplinis, quas praestare poterant Athenae, non Pythagoreorum, ad quos in Italiam navigaverat, Aegypti quoque sacerdotes adiit atque eorum arcana perdidicit?

Difficultatis patrocinia praeteximus segnitiae. Neque
 16 enim nobis operis amor est, nec, quia sit honesta ac reusque pulcherrima eloquentia, petitur ipsa, sed ad venale usum et sordidum lucrum accingimur. Dicant sine his in
 17 foro multi et acquirant, dum sit locupletior aliquis sordidae mercis negotiator et plus voci suae debeat praeco. Nec velim quidem lectorem dari mihi, quid studia referant computaturum. Qui vero imaginem ipsam eloquentiae divina
 18 quadam mente conceperit, quique illam (ut ait non ignobilis tragicus) reginam rerum orationem ponet ante oculos, fructumque non ex stipe advocationum sed ex animo suo et contemplatione ac scientia petet, perpetuum illum nec fortunae subiectum: facile persuadebit sibi, ut tempora, quae spectaculis, campo, tesseris, otiosis denique sermonibus,

ne dicam somno et conviviorum mora, coneruntur, geometrae potius ac musico impendat, quanto plus delectationis
 19 habiturus quam ex illis ineruditis voluptatibus. Dedit enim hoc providentia hominibus munus, ut honesta magis in-
 vent. Sed nos haec ipsa dulcedo longius duxit. Hactenus ergo de studiis, quibus, antequam maiora capiat, puer in-
 stituendus est; proximus liber velut novum sumet exordium et ad rhetoris officia transibit.

LIBER II.

Libro secundo haec continentur: Quando rhetori tradendus sit puer. De moribus et officiis praeceptoris. An protinus praeceptore opti-
 mo sit utendum. De primis apud rhetorem exercitationibus. De le-
 ctione oratorum et historicorum apud rhetorem. Qui primi legendi. De divisione et parenchiresi, de ediscendo. An secundum sui quis-
 que ingenii naturam docendus sit. De officio discipulorum. De uti-
 litate et ratione declamandi. An artis necessaria cognitio. Quare ineruditi ingeniosiores vulgo habeantur. Quis modus in arte. Divi-
 sio totius operis. Quid sit rhetorice et quis eius finis. An utilis. An ars. Ex quibus artibus. Natura an doctrina plus ei conferat. An virtus rhetorice. Quae materia eius.

QUANDO RHETORI TRADENDUS SIT PUER.

I. Tenuit consuetudo, quae cotidie magis invalescit, ut praeceptoribus eloquentiae, Latinis quidem semper sed etiam Graecis interim, discipuli serius quam ratio postulat, traderentur. Eius rei duplex causa est, quod et rhetores utique nostri suas partes omiserunt et grammatici
 2 alienas occupaverunt. Nam et illi declamare modo et scientiam declamandi ac facultatem tradere officii sui ducunt, idque intra deliberativas iudicialesque materias (nam cetera ut professione sua minora despiciunt); et hi non satis credunt exceperisse, quae relicta erant, (quo nomine gratia quoque iis habenda est) sed ad prosopopoeias usque ac suasorias, in quibus onus dicendi vel maximum est, irrumpunt.
 3 Hinc ergo accidit, ut, quae alterius artis prima erant opera, facta sint alterius novissima; et aetas altioribus iam disci-

plinis debita in schola minore subsidat ac rhetorice apud grammaticos exerceat. Ita, quod est maxime ridiculum, non ante ad declamandi magistrum mittendus videatur puer quam declamare sciat. Nos suum cuique professioni mo-
 4 dum demus. Et grammaticae (quam in Latinum transferentes *litteraturam* vocaverunt) fines suos norit, praesertim tantum ab hac appellationis suae paupertate, intra quam primi illi constitere, provecta; nam tenuis a fonte assumptis historicorum criticorumque viribus pleno iam satis alveo fluit, cum praeter rationem recte loquendi non parum alioqui copiosam prope omnium maximarum artium scientiam amplexa sit; et rhetorice, cui nomen vis eloquendi de-
 5 dit, officia sua non detrectet nec occupari gaudeat pertinentem ab ea laborem, quae, dum opere cedit, iam paene possessione depulsa est. Neque infitabor, aliquem ex iis, 6 qui grammaticen profiteantur, eousque scientiae progredi posse, ut ad haec quoque tradenda sufficiat; sed cum id aget, rhetoris officio fungetur non suo.

Nos porro quaerimus, quando iis, quae rhetorice prae-
 7 cipit, percipiendis puer maturus esse videatur. In quo quidem non id aestimandum, cuius quisque sit aetatis, sed quantum in studiis iam effecerit. Et ne diutius disseram; quando sit rhetori tradendus, sic optime finiri credo, *cum poterit*. Sed hoc ipsum ex superiore pendet quaestione. 8 Nam si grammatices munus usque ad suasorias prorogatur, tardius rhetore opus est. At si rhetor prima officia operis sui non recusat, a narrationibus statim et laudandi vituperandique opusculis cura eius desideratur. An ignoramus an-
 9 tiquis hoc fuisse ad augendam eloquentiam genus exercitationis, ut theses dicerent et communes locos et cetera extra complexum rerum personarumque, quibus verae fictaeque controversiae continentur? Ex quo palam est, quam turpiter deserat eam partem rhetorices institutio, quam et primam habuit et diu solam. Quid autem est ex iis, de
 10 quibus supra dixi, quod non cum in alia, quae sunt propria rhetorum, tum certe in illud iudiciale causae genus incidat? An non in foro narrandum est? qua in parte ne-
 11 scio an sit vel plurimum. Non laus ac vituperatio certa-

minibus illis frequenter inseritur? Non communes loci, sive qui sunt in vitia directi, quales legimus a Cicerone compositos; seu quibus quaestiones generaliter tractantur, quales sunt editi a Quinto quoque Hortensio: ut, *Silne parvis argumentis credendum*, et *pro testibus et in testes*, in 12 diis litium medullis versantur? Arma sunt haec quodammodo praeparanda semper, ut iis, cum res poscet, utaris. Quae qui pertinere ad orationem non putabit, is ne statuum quidem inchoari credet, cum eius membra fundentur. Neque hanc (ut aliqui putabunt) festinationem meam sic quisquam calumniatur, tanquam eum, qui sit rhetori tradendus, 13 abducendum protinus a Grammaticis putem. Dabuntur et illis tum quoque tempora sua, neque erit verendum, ne binis praeceptoribus oneretur puer. Non enim crescet sed dividetur, qui sub uno miscebatur, labor, et erit sui quisque operis magister utilior; quod adhuc obtinent Graeci, a Latinis omissum est, et fieri videtur excusate, quia sunt, qui labori isti successerint.

DE MORIBUS ET OFFICIIS PRAECEPTORIS.

II. Ergo cum ad eas in studiis vires pervenerit puer, ut, quae prima esse praecepta rhetorum diximus, mente consequi possit, tradendus eius artis magistris erit; quorum 2 in primis inspicere mores oportebit. Quod ego non idcirco potissimum in hac parte tractare sum aggressus, quia non in ceteris quoque doctoribus idem hoc examinandum quam diligentissime putem, sicut testatus sum libro priore; sed quod magis necessariam eius rei mentionem facit aetas ipsa 3 discentium. Nam et adulti fere pueri ad hos praeceptores transferuntur et apud eos iuvenes etiam facti perseverant; ideoque maior adhibenda tum cura est, ut et teneriores annos ab iniuria sanctitas docentis custodiat et ferociores a 4 licentia gravitas deterreat. Neque vero sat est summam praestare abstinentiam, nisi disciplinae severitate convenientium quoque ad se mores astrinxerit.

Sumat igitur ante omnia parentis erga discipulos suos animum, ac succedere se in eorum locum, a quibus sibi li- 5 beri tradantur, existimet. Ipse nec habeat vitia nec ferat.

Non austeritas eius tristis, non dissoluta sit comitas, ne inde odium hinc contemptus oriatur. Plurimus ei de honesto ac bono sermo sit; nam quo saepius monuerit, hoc rarius castigabit. Minime iracundus, nec tamen eorum, quae emendanda erunt, dissimulator; simplex in docendo; patiens laboris; assiduus potius quam immodicus. Interrogantibus libenter respondeat, non interrogantes percontetur ultro. In laudandis discipulorum dictionibus nec malignus nec effusus, quia res altera taedium laboris, altera securitatem parit. In 7 emendando, quae corrigenda erunt, non acerbus minimeque contumeliosus; nam id quidem multos a proposito studendi fugat, quod quidam sic obiurgant quasi oderint. Ipse aliquid 8 immo multa cotidie dicat, quae secum auditores referant. Licet enim satis exemplorum ad imitandum ex lectione suppeditet, tamen *viva illa*, ut dicitur, *vox* alit plenius praecipueque eius praeceptoris, quem discipuli, si modo recte sunt instituti, et amant et verentur. Vix autem dici potest, quanto libentius imitemur eos, quibus favemus.

Minime vero permittenda pueris, ut sit apud plerosque, 9 assurgendi exultandique in laudando licentia; quin etiam iuvenum modicum esse, cum audient, testimonium debet. Ita fiet, ut ex iudicio praeceptoris discipulus pendeat, atque id se dixisse recte, quod ab eo probabitur, credat. Illa vero 10 vitiosissima, quae iam *humanitas* vocatur, invicem qualiacunque laudandi, cum est indecora et theatralis et severe institutis scholis aliena, tum studiorum perniciosissima hostis. Supervacua enim videntur cura ac labor, parata, quidquid effuderint, laude. Vultum igitur praeceptoris intueri tam, 11 qui audiunt, debent, quam ipse qui dicit; ita enim probanda atque improbanda discernent; sic stilo facultas continget, auditione iudicium. At nunc praeconi atque succincti ad omnem 12 clausulam non exurgunt modo verum etiam excurrunt et cum indecora exultatione conclamant. Id mutuum est et ibi declamationis fortuna. Hinc tumor et vana de se persuasio usque adeo, ut illo condiscipulorum tumultu inflati, si parum a praeceptore laudentur, ipsi de illo male sentiant. Sed se 13 quoque praeceptores intente ac modeste audiri velint; non enim iudicio discipulorum dicere debet magister sed disci-

puli magistri. Quin, si fieri potest, intendendus animus in hoc quoque, ut perspiciat, quae quisque et quomodo laudet; et placere, quae bene dicet, non suo magis quam eorum nomine delectetur, qui recte iudicabunt.

- 14 Pueros adolescentibus permixtos sedere, non placet mihi. Nam etiamsi vir talis, qualem esse oportet studiis moribusque praepositum, modestam habere potest etiam iuventutem: tamen vel infirmitas a robustioribus separanda est, et carendum non solum crimine turpitudinis verum etiam suspicionem. Haec notanda breviter existimavi. Nam ut absit ab ultimis vitiis ipse praeceptor ac schola, ne praecipendum quidem credo. Ac si quis est, qui flagitia manifesta in eligendo filii praeceptore non vitet, iam hinc sciat, cetera quoque, quae ad utilitatem iuventutis componere conamur, esse sibi hac parte omissa supervacua.

AN PROTINUS PRAECEPTORE OPTIMO SIT UTENDUM.

III. Ne illorum quidem persuasio silentio transeunda est, qui, etiam cum idoneos rhetori pueros putaverant, non tamen continuo tradendos eminentissimo credunt sed apud minores aliquamdiu detinent: tanquam instituendis artibus magis sit apta mediocritas praeceptoris, cum ad intellectum atque ad imitationem facilius tum ad suscipiendas elementorum molestias minus superba. Qua in re mihi non arbitror diu laborandum, ut ostendam, quanto sit melius optimis imbui, quanta in eluendis, quae semel insederint, vitiis difficultas consequatur: cum geminatum onus succedentes premat et quidem dedocendi gravius ac prius quam docendi. Propter quod Timotheum, clarum in arte tiliarum, ferunt duplices ab iis, quos alius instituisset, solitum exigere mercedes, quam si rudes traderentur. Error tamen est in re duplex: unus, quod interim sufficere illos minores existimant, et, bono sane stomacho, contenti sunt; quae quanquam est ipsa reprehensione digna securitas, tamen esset utcumque tolerabilis, si eiusmodi praeceptores minus docerent non peius; alter ille etiam frequentior, quod eos, qui amplio rem dicendi facultatem sint consecuti, non putant ad minora descendere, idque interim fieri, quia fastidiant praestare hanc inferioribus cu-

ram, interim quia omnino non possint. Ego porro eum qui nolit in numero praecipientium non habeo, posse autem maxime, si velit, optimum quemque contendo; primum, quod eum, qui eloquentia ceteris praestet, illa quoque, per quae ad eloquentiam pervenitur, diligentissime percepisse credibile est; deinde, quia plurimum in praecipiendo valet ratio, quae doctissimo cuique planissima est; postremo, quia nemo sic in maioribus eminet, ut eum minora deficiant. Nisi forte Iovem quidem Phidias optime fecit, illa autem, quae in ornamentum operis eius accedunt, alius melius elaborasset; aut orator loqui nesciet; aut leviores morbos curare non poterit praestantissimus medicus.

Quid ergo? non est quaedam eloquentia maior, quam ut eam intellectu consequi puerilis infirmitas possit? Ego vero confiteor, disertum praeceptorem prudentem quoque et non ignarum docendi esse oportere, summittentem se ad mensuram discentis; ut velocissimus quisque, si forte iter cum parvulo faciat, det manum et gradum suum minuat nec procedat ultra, quam comes possit. Quid? si plerumque accidit, ut faciliora sint ad intelligendum et lucidiora multo, quae a doctissimo quoque dicuntur? Nam et prima est eloquentiae virtus perspicuitas, et quo quis ingenio minus valet, hoc se magis attollere et dilatari conatur; ut statura breves in digitos eriguntur et plura infirmi minantur. Nam tumidos et corruptos et tinnulos et quocumque alio cacozeliae genere peccantes, certum habeo, non virium sed infirmitatis vitio laborare, ut corpora non robore sed valetudine inflantur et recto itinere lassum plerumque devertant. Erit ergo etiam obscurior, quo quisque deterior.

Non excidit mihi, scripsisse me in libro priore, cum potiore in scholis eruditionem esse quam domi dicerem, libentius se prima studia tenerosque profectus ad imitationem condiscipulorum, quae facilius esset, erigere; quod a quibusdam sic accipi potest, tanquam haec, quam nunc tueor, sententia priori diversa sit. Id a me procul aberit; namque ea causa vel maxima est, cur optimo cuique praeceptori sit tradendus puer, quod apud eum discipuli quoque melius instituti aut dicent, quod inutile non sit imitari, aut, si quid

erraverint, statim corrigentur; at indoctus ille etiam prohibet fortasse vitiosa et placere audientibus iudicio suo coget. ¹²Sit ergo tam eloquentia quam moribus praestantissimus, qui ad Phoenicis Homerici exemplum dicere ac facere doceat.

DE PRIMIS APUD RHETOREM EXERCITATIONIBUS.

IV. Hinc iam, quas primas in docendo partes rhetorum putem, tradere incipiam, dilata parumper illa quae sola vulgo vocatur arte rhetorica. Ac mihi opportunus maxime videtur ingressus ab eo, cuius aliquid simile apud grammaticos puer ¹didicerit. Et quia narrationum, excepta qua in causis utimur, tres accepimus species, fabulam, quae versatur in tra-
goediis atque carminibus, non a veritate modo sed etiam a forma veritatis remota; argumentum, quod falsum sed vero simile comoediae fingunt; historiam, in qua est gestae rei expositio; grammaticis autem poeticas dedimus: apud rhetorem initium sit historica, tanto robustior quanto verior. ³Sed narrandi quidem quae nobis optima ratio videatur, tum demonstrabimus, cum de iudiciali parte dicemus. Interim admonere illud sat est, ut sit ea neque arida prorsus atque ieiuna, (nam quid opus erat tantum studiis laboris impendere, si res nudas atque inornatas indicare satis videretur?) neque rursus sinuosa et arcessitis descriptionibus, in quas ⁴plerique imitatione poeticae licentiae ducuntur, lasciviat. Vitium utrumque; peius tamen illud, quod ex inopia quam quod ex copia venit. Nam in pueris oratio perfecta nec exigi nec sperari potest; melior autem indoles laeta generosique ⁵cognatus et vel plura iusto concipiens interim spiritus. Nec unquam me in his discentis annis offendat, si quid super fuerit. Quin ipsis doctoribus hoc esse curae velim, ut teneras adhuc mentes more nutricum mollius alant et satiari velut quodam iucundioris disciplinae lacte patiantur. Erit illud plenius interim corpus, quod mox adulta aetas astringat. Hinc spes ⁶roboris. Maciem namque et infirmitatem in posterum minari solet protinus omnibus membris expressus infans. Audeat haec aetas plura et inveniat et inventis gaudeat, sint licet illa non satis sicca interim ac severa. Facile remedium est ⁷ubertatis; sterilia nullo labore vincuntur. Illa mihi in pueris

natura minimum spei dederit, in qua ingenium iudicio praesumitur. Materiam esse primum volo vel abundantiore atque ultra quam oporteat fusam. Multum inde decoquent anni, multum ratio limabit, aliquid velut usu ipso deteretur, sit modo unde excidi possit et quod exculpi; erit autem, si non ab initio tenuem nimium laminam duxerimus et quam caelatura altior rumpat. Quod me de his aetatibus sentire ⁸minus mirabitur, qui apud Ciceronem legerit: *Volo enim se efferat in adolescente fecunditas.*

Quapropter in primis evitandus et in pueris praecipue magister aridus, non minus quam teneris adhuc plantis siccum et sine humore ullo solum. Inde fiunt humiles statim et ⁹velut terram spectantes, qui nihil supra cotidianum sermonem attollere audeant. Macies illis pro sanitate et iudicii loco infirmitas est, et dum satis putant vitio carere, in id ipsum incidunt vitium, quod virtutibus carent. Quare mihi ne maturitas quidem ipsa festinet, nec musta in lacu statim austera sint; sic et annos ferent et vetustate proficient.

Nec illud quidem quod admoneamus indignum est, in- ¹⁰genia puerorum nimia interim emendationis severitate deficere; nam et desperant et dolent et novissime oderunt et, quod maxime nocet, dum omnia timent, nihil conantur. Quod ¹¹etiam rusticis notum est, qui frondibus teneris non putant adhibendam esse falcem, quia reformidare ferrum videntur et nondum cicatricem pati posse. Iucundus ergo tum ma- ¹²xime debet esse praeceptor, ut remedia, quae alioqui natura sunt aspera, molli manu leniantur; laudare aliqua, ferre quaedam, mutare etiam, reddita cur id fiat ratione, illuminare interponendo aliquid sui. Nonnunquam hoc quoque erit utile, ipsum totas dictare materias, quas et imitetur puer et interim tanquam suas amet. Et si tam negligens ei stilus ¹³fuerit, ut emendationem non recipiat: expertus sum prodesse, quotiens eandem materiam rursus a me tractatam scribere de integro iuberem, *posse enim eum adhuc me-* ¹⁴*lius*; quatenus nullo magis studia quam spe gaudent. Aliter ¹⁴autem alia aetas emendanda est, et pro modo virium et exigendum et corrigendum opus. Solebam ego dicere pueris aliquid ausis licentius aut laetius, *laudare illud me adhuc,*

venturum tempus, quo idem non permitterem; ita et ingenio gaudebant et iudicio non fallebantur.

- 15 Sed ut eo revertar, unde sum digressus: narrationes stilo componi quanta maxima possit adhibita diligentia volo. Nam ut primo, cum sermo instituitur, dicere quae audierint, utile est pueris ad loquendi facultatem; ideoque et retro agere expositionem et a media in utramque partem discurrere sane merito cogantur, sed ad gremium praeceptoris, et dum non possunt, et dum res ac verba connectere incipiunt, ut protinus memoriam firment: ita, cum iam formam rectae atque emendatae orationis accipient, extemporalis garrulitas nec expectata cogitatio et vix surgendi mora circulatoriae vere iactationis est. Hinc parentium imperitorum inane gaudium, ipsis vero contemptus operis et inverecunda frons et consuetudo pessime dicendi et malorum exercitatio et, quae magnos quoque profectus frequenter perdidit, arrogans de se persuasio innascitur.
- 17 Erit suum parandae facilitati tempus, nec a nobis negliger locus iste transibitur. Interim satis est, si puer omni cura et summo, quantum illa aetas capit, labore aliquid probabile scripserit; in hoc assuescat, huius sibi rei naturam faciat. Ille demum in id, quod quaerimus, aut ei proximum poterit evadere, qui ante discet recte dicere quam cito.
- 18 Narrationibus non inutiliter subiungitur opus destruendi confirmandique eas, quod *ἀνασκευή* et *κατασκευή* vocatur. Id porro non tantum in fabulosis et carmine traditis fieri potest verum etiam in ipsis annalium monumentis, ut, si quaeratur, *an sit credibile super caput Valerii pugnantis sedisse corvum, qui os oculosque hostis Galli rostro atque alis everberaret*, sit in utramque partem ingens ad dicendum materia; aut *de serpente, quo Scipio traditur genitus, et lupa Romuli et Egeria Numae*. Nam Graecis historiis plerumque poeticae similis licentia est. Saepe etiam quaeri solet de tempore, de loco quo gesta res dicitur, nonnunquam de persona quoque; sicut Livius frequentissime dubitat, et alii ab aliis historici dissentiant.
- 20 Inde paulatim ad maiora tendere incipiet, laudare

claros viros et vituperare improbos, quod non simplicis utilitatis opus est. Namque et ingenium exercetur multiplici variaque materia, et animus contemplatione recti pravique formatur, et multa inde cognitio rerum venit, et exemplis, quae sunt in omni genere causarum potentissima, iam tum instruitur, cum res poscet, usus. Hinc illa quoque exercitatio subitae comparationis, uter melior uterve deterior; quae quanquam versatur in ratione simili, tamen et duplicat materiam et virtutum vitiorumque non tantum naturam sed etiam modum tractat. Verum de ordine laudis contraque, quoniam tertia haec rhetorices pars est, praecipiemus suo tempore.

Communes loci (de his loquor, quibus citra per-22 sonas in ipsa vitia moris est perorare, ut in *adullerum, aleatorem, pelulantem*) ex mediis sunt iudiciis et, si reum adicias, accusationes; quanquam hi quoque ab illo generali tractatu ad quasdam deduci species solent, ut si ponatur *aduller caecus, aleator pauper, pelulans senex*. Habent autem nonnunquam etiam defensionem. Nam et pro *luxuria* et pro *amore* dicimus, et leno interim parasitusque defenditur sic, ut non homini patrocinemur sed crimini.

Theses autem, quae sumuntur ex rerum compara-24 tione, ut *rusticana vila an urbana potior; iurisperiti an militaris viri laus maior*, mire sunt ad exercitationem dicendi speciosae atque uberes, quae vel ad suadendi officium vel etiam ad iudiciorum disceptationem iuvant plurimum. Nam posterior ex praedictis locus in causa Murenae copiosissime a Cicerone tractatur. Sunt et illae paene totae ad deliberativum pertinentes genus, *ducendane uxor, petendine sint magistratus*. Namque et hae personis modo adiectis suasoriae erunt.

Solebant praeceptores mei neque inutiles et nobis etiam iucundo genere exercitationis praeparare nos coniecturalibus causis, cum quaerere atque exequi iuberent, *Cur armata apud Lacedaemonios Venus, et Quid ita crederetur Cupido puer atque volucer et sagittis ac face armatus, et similia*, in quibus scrutabamur voluntatem, cuius in controversiis frequens quaestio est, quod genus chriae videri potest.

27 Nam locos quidem, quales sunt de testibus, *semperne his credendum*, et de argumentis, *an habenda etiam parvis fides*, adeo manifestum est ad forenses actiones pertinere, ut quidam neque ignobiles in officiis civilibus scriptos eos memoriaeque diligentissime mandatos in promptu habuerint, ut quotiens esset occasio, extemporales eorum
28 dictiones his velut emblematis exornarentur. Quo quidem (neque enim eius rei iudicium differre sustineo) summam videbantur mihi infirmitatem de se confiteri. Nam quid hi possint in causis, quarum varia et nova semper est facies, proprium invenire; quomodo propositis ex parte adversa respondere, altercationibus velociter occurrere, testem rogare; qui etiam in his, quae sunt communia et in plurimis causis tractantur, vulgatissimos sensus verbis nisi tanto
29 ante praeparatis prosequi nequeant? Nec vero his, cum eadem iudiciis pluribus dicunt, aut fastidium moveant velut frigidi et repositi cibi, aut pudorem deprehensa totiens audientium memoria infelix supellex, quae sicut apud pauperes ambitiosos pluribus et diversis officiis conteratur?
30 Cum eo quidem quod vix ullus est tam communis locus, qui possit cohaerere cum causa nisi aliquo propriae quaestionis vinculo copulatus, appareatque eum non tam insertum quam applicitum; vel quod dissimilis est ceteris vel quod plerumque assumi etiam parum apte solet, non quia desideratur sed quia paratus est. Ut quidam sententiarum gratia verbosissimos locos arcessunt, cum ex locis debeat
32 nasci sententia. Ita sunt autem speciosa haec et utilia, si oriuntur ex causa; ceterum quamlibet pulchra elocutio, nisi ad victoriam tendit, utique supervacua sed interim etiam contraria est. Verum hactenus evagari satis fuerit.

33 Legum laus ac vituperatio iam maiores ac prope summis operibus suffecturas vires desiderant; quae quidem suasoriis an controversiis magis accommodata sit exercitatio, consuetudine et iure civitatum differt. Apud Graecos enim lator earum ad iudicem vocabatur, Romanis pro contione suadere ac dissuadere moris fuit. Utroque autem modo pauca de his et fere certa dicuntur. Nam et genera sunt tria, sacri,
34 publici, privati iuris. Quae divisio ad laudem magis spectat,

si quis eam per gradus augeat, quod lex, quod publica, quod ad religionem deum comparata sit. Ea quidem, de quibus quaeri solet, communia omnibus. Aut enim de iure dubitari
35 potest eius, qui rogat, ut de P. Clodii, qui non rite creatus tribunus arguebatur; aut de ipsius rogationis, quod est varium, sive non trino forte nundino promulgata sive non idoneo die, sive contra intercessionem vel auspicia aliudve quid, quod legitimis obstet, dicitur lata esse vel ferri, sive alicui manentium legum repugnare. Sed haec ad illas primas
36 exercitationes non pertinent, nam sunt hae citra complexum personarum, temporum, causarum. Reliqua eadem fere vero fictoque huiusmodi certamine tractantur. Nam vitium aut in
37 verbis aut in rebus est. In verbis quaeritur, an satis significant, an sit in iis aliquid ambiguum. In rebus, an lex sibi ipsa consentiat, an in praeteritum ferri debeat, an in singulos homines. Maxime vero commune est quaerere, an sit
38 honesta, an utilis. Nec ignoro, plures fieri a plerisque partes; sed nos iustum, pium, religiosum, ceteraque his similia honesto complectimur. Iusti tamen species non simpliciter excuti solent. Aut enim de re ipsa quaeritur, ut dignane poena vel praemio sit; aut de modo praemii poenaeve,
39 quia tam maior quam minor culpari potest. Utilitas quoque interim natura discernitur, interim tempore. Quaedam an obtineri possint, ambigi solet. Ne illud quidem ignorare oportet, leges aliquando totas aliquando ex parte reprehendi solere, cum exemplum rei utriusque nobis claris orationibus
40 praebeatur. Nec me fallit, eas quoque leges esse, quae non in perpetuum rogentur sed de honoribus aut imperiis, qualis Manilia fuit, de qua Ciceronis oratio est. Sed de his nihil hoc loco praecipere potest, constant enim propria rerum, de quibus agitur, non communi qualitate.

His fere veteres facultatem dicendi exercuerunt assumpta tamen a dialecticis argumentandi ratione. Nam fictas ad imitationem fori consiliorumque materias apud Graecos dicere circa Demetrium Phalerea institutum fere constat. An
42 ab ipso id genus exercitationis sit inventum, ut alio quoque libro sum confessus, parum comperi; sed ne hi quidem, qui hoc fortissime affirmant, ullo satis idoneo auctore nituntur.

Latinos vero dicendi praeceptores extremis L. Crassi temporibus coepisse Cicero auctor est; quorum insignis maxime Plotius fuit.

DE LECTIONE ORATORUM ET HISTORICORUM APUD RHETOREM.

V. Sed de ratione declamandi post paulum. Interim, quia prima rhetorices rudimenta tractamus, non omittendum videtur id quoque, ut moneam, quantum sit collaturus ad profectum discentium rhetor, si, quemadmodum a grammaticis exigitur poetarum enarratio; ita ipse quoque historiae atque etiam magis orationum lectione susceptos a se discipulos instruxerit; quod nos in paucis, quorum id aetas exigebat et parentes utile esse crediderant, servavimus. Ceterum sentientibus iam tum optima duae res impedimento fuerunt, quod et longa consuetudo aliter docendi fecerat legem, et robusti fere iuvenes nec hunc laborem desiderantes exemplum nostrum sequebantur. Nec tamen, etiamsi quid novi vel sero invenissem, praecipere in posterum puderet. Nunc vero scio id fieri apud Graecos sed magis per adiutores, quia non videntur tempora suffectura, si legentibus singulis praecire semper ipsi velint. Et hercule praelectio, quae in hoc adhibetur, ut facile atque distincte pueri scripta oculis sequantur, etiam illa, quae vim cuiusque verbi, si quod minus usitatum incidat, docet, multum infra rhetoris officium existimanda est. At demonstrare virtutes vel, si quando ita incidat, vitia, id professionis eius atque promissi, quo se magistrum eloquentiae pollicetur, maxime proprium est; eo quidem validius, quod non utique hunc laborem docentium postulo, ut ad gremium revocatis cuiusque eorum liberis lectione deserviant. Nam mihi cum facilius tum etiam multo videtur magis utile, facto silentio unum aliquem (quod ipsum imperari per vices optimum est) constituere lectorem, ut protinus pronuntiationi quoque assuescant; tum exposita causa, in quam scripta legetur oratio, (nam sic clarius quae dicentur intelligi poterunt) nihil otiosum pati, quodque in inventione quodque in elocutione annotandum erit; quae in prooemio conciliandi iudicis ratio; quae narrandi lux, brevi-

tas, fides; quod aliquando consilium et quam occulta calliditas (namque ea sola in hoc ars est, quae intelligi nisi ab artifice non possit); quanta deinceps in dividendo prudentia, quam subtilis et crebra argumentatio; quibus viribus inspiret, qua iucunditate permulceat; quanta in maledictis asperitas, in iocis urbanitas; ut denique dominetur in affectibus atque in pectora irrumpat animumque iudicum similem his, quae dicit, efficiat. Tum in ratione eloquendi, quod verbum proprium, ornatum, sublime; ubi amplificatio laudanda, quae virtus ei contraria, quid speciose translatum, quae figura verborum, quae levis et quadrata sed virilis tamen compositio.

Ne id quidem inutile, etiam corruptas aliquando et vitiosas orationes, quas tamen plerique iudiciorum pravitate mirantur, legi palam ostendique in his, quam multa impropria, obscura, tumida, humilia, sordida, lasciva, effeminata sint; quae non laudantur modo a plerisque sed, quod est peius, propter hoc ipsum, quod sunt prava, laudantur. Nam sermo rectus et secundum naturam enuntiatus nihil habere ex ingenio videtur, illa vero, quae utcumque deflexa sunt, tanquam exquisitiora miramur; non aliter quam distortis et quocumque modo prodigiosis corporibus apud quosdam maius est pretium quam his, quae nihil ex communi habitu boni perdiderunt. Atque etiam qui specie capiuntur, vulsis levissimisque et inustas comas acu comentibus et non suo colore nitidis plus esse formae putant, quam possit tribuere incorrupta natura; ut pulchritudo corporis venire videatur ex malis moribus.

Neque solum haec ipse debet docere praeceptor sed frequenter interrogare et iudicium discipulorum experiri. Sic audientibus securitas aberit nec, quae dicentur, superfluent aures, simulque ad id perducentur, quod ex hoc quaeritur, ut inveniant ipsi et intelligant. Nam quid aliud agimus docendo eos, quam ne docendi semper sint?

Hoc diligentiae genus ausim dicere plus collaturum discentibus quam omnes omnium artes, quae iuvant sine dubio multum; sed latiore quadam comprehensione per omnes quidem species rerum cotidie paene nascentium ire qui pos-

- 15 sunt? Sicut de re militari, quanquam sunt tradita quaedam praecepta communia, magis tamen proderit scire, qua ducum quisque ratione, in quali re, tempore, loco sit sapienter usus aut contra. Nam in omnibus fere minus valent praecepta quam experimenta. An vero declamabit quidem praecceptor, ut sit exemplo suis auditoribus; non plus contulerint lecti Cicero aut Demosthenes? Corrigetur palam, si quid in declamando discipulus erraverit; non potentius erit emendare orationem, quin immo etiam iucundius? Aliena enim vitia reprehendi quisque mavult quam sua. Nec deerant plura, quae dicerem; sed neminem haec utilitas fugit, atque utinam tam non pigeat facere istud quam non displicebit.
- 18 Quod si potuerit obtineri, non ita difficilis supererit quaestio, qui legendi sint incipientibus. Nam quidam illos minores, quia facillior intellectus videbatur, probaverunt; alii floridius genus, ut ad alenda primarum aetatum ingenia magis accommodatum. Ego optimos quidem et statim et semper sed tamen eorum candidissimum quemque et maxime expositum velim, ut Livium a pueris magis quam Sallustium; et hic historiae maior est auctor, ad quem tamen intelligendum iam profectu opus sit. Cicero, ut mihi quidem videtur, et iucundus incipientibus quoque et apertus est satis, nec prodesse tantum sed etiam amari potest, tum (quemadmodum Livius praecipit) ut quisque erit Ciceroni simillimus.
- 21 Duo autem genera maxime cavenda pueris puto: unum, ne quis eos antiquitatis nimius admirator in Gracchorum Catonisque et aliorum similium lectione durescere velit; fient enim horridi atque icini; nam neque vim eorum adhuc intellectu consequentur et elocutione, quae tum sine dubio erat optima sed nostris temporibus aliena est, contenti, quod est pessimum, similes sibi magnis viris videbuntur. Alterum, quod huic diversum est, ne recentis huius lasciviae flosculis capti voluptate prava deleniantur, ut praedulee illud genus et puerilibus ingeniis hoc gratius, quo propius est, adament.
- 23 Firmis autem iudiciis iamque extra periculum positis suaserim et antiquos legere, ex quibus si assumatur solida ac virilis ingenii vis, deterso rudis saeculi squalore, tum noster hic cultus clarius enitescet; et novos, quibus et ipsis multa

virtus adest. Neque enim nos tarditatis natura damnavit, sed dicendi mutavimus genus et ultra nobis quam oportebat indulsumus; ita non tam ingenio illi nos superarunt quam proposito. Multa ergo licebit eligere; sed curandum erit, ne iis, quibus permixta sunt, inquinentur. Quosdam vero etiam, quos totos imitari oporteat, et fuisse nuper et nunc esse, quidni libenter non modo concesserim verum etiam contenderim? Sed hi qui sint, non cuiuscunque est pronuntiare. Tutius circa priores vel erratur, ideoque hanc novorum distuli lectionem, ne imitatio iudicium antecederet.

DE DIVISIONE ET PARENCHIRESI.

VI. Fuit etiam in hoc diversum praecipientium propositum, quod eorum quidam materias, quas discipulis ad dicendum dabant, non contenti divisione dirigere latius dicendo prosequerantur, nec solum probationibus implebant sed etiam affectibus. Alii, cum primas modo lineas duxissent, post declamationes, quid omisisset quisque, tractabant; quosdam vero locos non minore cura, quam cum ad dicendum ipsi surgerent, excolebant. Utile utrumque, et ideo neutrum ab altero separo; sed si facere tantum alterum necesse sit, plus proderit demonstrasse rectam protinus viam quam revocare ab errore iam lapsos. Primum quia emendationem auribus modo accipiunt, divisionem vero ad cogitationem etiam et stilum perferunt; deinde quod libentius praecipientem audiunt quam reprehendentem. Si qui vero paulo sunt vivaciores, in his praesertim moribus, etiam irascuntur admonitioni et taciti repugnant. Neque ideo tamen minus vitia aperte coarguenda sunt. Habenda enim ratio ceterorum, qui recta esse, quae praecceptor non emendaverit, credent. Utraque autem ratio miscenda est et ita tractanda, ut ipsae res postulabunt. Namque incipientibus danda erit velut praeformata materia secundum cuiusque vires; at cum satis composuisse sese ad exemplum videbuntur, praevia quaedam demonstranda vestigia, quae persecuti iam suis viribus sine adminiculo progredi possint. Nonnunquam credi sibi ipsos oportebit, ne mala consuetudine semper alienum laborem sequendi nihil per se conari et quaerere sciant. Quod si satis

prudenter dicenda viderint, iam prope consummata fuerit praecipientis opera; at si quid erraverint adhuc, erunt ad ducem reducendi. Cui rei simile quiddam facientes aves cernimus, quae teneris infirmisque fetibus cibos ore suo collatos partiuntur; at cum visi sunt adulti, paulum egredi nidis et circumvolare sedem illam praecedentes ipsae docent, tum expertas vires libero coelo suaeque ipsorum fiduciae permittunt.

DE EDISCENDO.

VII. Illud ex consuetudine mutandum prorsus existimo in his, de quibus nunc disserimus, aetatibus, ne omnia, quae scripserint, ediscant et certa, ut moris est, die dicant; quod quidem maxime patres exigunt atque ita demum studere liberos suos, si quam frequentissime declamaverint, credunt, cum profectus praecipue diligentia constet. Nam ut scribere pueros plurimumque esse in hoc opere plane velim: sic ediscere electos ex orationibus vel historiis aliove quo genere dignorum ea cura voluminum locos, multo magis suadeam. Nam et exercebitur acrius memoria aliena complectendo quam sua; et qui erunt in difficiliore huius laboris genere versati, sine molestia, quae ipsi composuerint, iam familiaris animo suo affigent, et assuescent optimis semperque habebunt intra se, quod imitentur; et iam non sentientes formam orationis illam, quam mente penitus acceperint, expriment. Abundabunt autem copia verborum optimorum et compositione et figuris iam non quaesitis sed sponte et ex reposito velut thesauro se offerentibus. Accedit his et iucunda in sermone bene a quoque dictorum relatio et in causis utilis. Nam et plus auctoritatis afferunt ea, quae non praesentis gratia litis sunt comparata, et laudem saepe maiorem quam si nostra sint conciliant. Aliquando tamen permittendum, quae ipsi scripserint, dicere, ut laboris sui fructum etiam ex illa, quae maxime petitur, laude plurium capiant. Verum id quoque tum fieri oportebit, cum aliquid commodius elimaverint, ut eo velut praemio studii sui donentur ac se meruisse, ut dicerent, gaudeant.

AN SECUNDUM SUI QUISQUE INGENII NATURAM
DOCENDUS SIT.

VIII. Virtus praeceptoris haberi solet nec immerito diligenter in his, quos erudiendos susceperit, notare discrimina ingeniorum et, quo quemque natura maxime ferat, scire. Nam est in hoc incredibilis quaedam varietas nec pauciores animorum paene quam corporum formae. Quod intelligi etiam ex ipsis oratoribus potest, qui tantum inter se distant genere dicendi, ut nemo sit alteri similis, quamvis plurimi se ad eorum quos probabant imitationem composuerint. Utile deinde plerisque visum est ita quemque instituire, ut propria naturae bona doctrina foverent, et in id potissimum ingenia, quo tenderent, adiuvarentur; ut si quis palaestrae peritus, cum in aliquod plenum pueris gymnasium venerit, expertus eorum omni modo corpus animumque discernat, cui quisque certamini praeparandus sit: ita praeceptorem eloquentiae, cum sagaciter fuerit intutus, cuius ingenium presso limatoque genere dicendi, cuius acri, gravi, dulci, aspero, nitido, urbano maxime gaudeat, ita se commodaturum singulis, ut in eo, quo quisque eminet, provehatur; quod et adiuta cura natura magis evalescat, et, qui in diversa ducatur, neque in his, quibus minus aptus est, satis possit efficere et ea, in quae natus videtur, deserendo faciat infirmiora.

Quod mihi (libera enim vel contra receptas persuasio- nes rationem sequenti sententia est) in parte verum videtur. Nam proprietates ingeniorum dispicere prorsus necessarium est. In his quoque certum studiorum facere delectum nemo dissuaserit. Namque erit alius historiae magis idoneus alius compositus ad carmen alius utilis studio iuris, ut nonnulli rus fortasse mittendi. Sic discernet haec dicendi magister, quomodo palaestricus ille cursorem faciet aut pugilem aut luctatorem aliudve quid ex his, quae sunt sacrorum certaminum. Verum ei, qui foro destinabitur, non in unam partem aliquam sed in omnia, quae sunt eius operis, etiam si qua difficiliora discenti videbuntur, elaborandum est. Nam et omnino supervacua erat doctrina, si natura sufficeret. An quis ingenio corruptus ac tumidus, ut plerique sunt, inci-

derit, in hoc eum ire patiemur? aridum atque ieiunum non alemus et certe eum quasi vestiemus? Nam si quaedam detrahere necessarium est, cur non sit adicere concessum?

10 Neque ego contra naturam pugno. Non enim deserendum id bonum, si quod ingenitum est, existimo, sed augendum

11 addendumque quod cessat. An vero clarissimus ille praeceptor Isocrates, quem non magis libri bene dixisse quam discipuli bene docuisse testantur, cum de Ephoro atque Theopompo sic iudicaret, ut *alteri frenis alteri calcaribus opus esse* diceret, aut in illo lentiore tarditatem aut in illo paene praecipiti concitationem adiuvandam docendo existimavit, cum alterum alterius natura miscendum arbitraretur?

12 Imbecillis tamen ingenii sane sic obsequendum sit, ut tantum in id, quo vocat natura, ducantur. Ita enim, quod solum possunt, melius efficient. Si vero liberalior materia contigerit et in qua merito ad spem oratoris simus aggressi,

13 nulla dicendi virtus omittenda est. Nam licet sit aliquam in partem pronior, ut necesse est, ceteris tamen non repugnabit, atque ea cura paria faciet iis, in quibus eminebat; sicut ille (ne ab eodem exemplo recedamus) exercendi corpora peritus, non, si docendum pancratiasten susceperit, pugno ferire vel calce tantum aut nexus modo atque in his certos aliquos docebit, sed omnia quae sunt eius certaminis. Erit qui ex his aliqua non possit: in id maxime quod poterit com-

14 ponet. Nam sunt haec duo vitanda prorsus: unum ne temptes quod effici non possit, alterum ne ab eo, quod quis optime facit, in aliud, ad quod minus est idoneus, transferas. At si fuerit qui docebitur ille, quem adolescentes senem vidimus, Nicostratus: omnibus in eo docendi partibus similiter utetur, efficietque illum, qualis hic fuit, luctando pugnandoque, quorum utroque certamine iisdem die-

15 bus coronabatur, invictum. Et quanto id magis oratoris futuri magistro providendum erit? Non enim satis est dicere presse tantum aut subtiliter aut aspere, non magis quam phonasco acutis tantum aut mediis aut gravibus sonis aut horum etiam particulis excellere. Nam sicut cithara ita oratio perfecta non est, nisi ab imo ad summum omnibus intenta nervis consentiat.

DE OFFICIO DISCIPULORUM.

IX. Plura de officio docentium locutus discipulos id unum interim moneo, ut praeceptores suos non minus quam ipsa studia ament, et parentes esse non quidem corporum sed mentium credant. Multum haec pietas conferet studio; 2 *provident?* nam ita et libenter audient et dictis credent et esse similes concupiscent, in ipsos denique coetus scholarum laeti alacresque convenient, emendati non irascentur, laudati gaudebunt, ut sint carissimi, studio merebuntur. Nam ut illorum 3 *praecipuum* officium est docere, sic horum praebere se dociles; alioqui neutrum sine altero sufficit. Et sicut hominis ortus ex utroque gignentium confertur, et frustra sparseris semina, nisi illa praemollitus foverit sulcus: ita eloquentia coalescere nequit, nisi sociata tradentis accipientisque concordia. 4873

DE UTILITATE ET RATIONE DECLAMANDI.

X. In his primis operibus, quae non ipsa parva sunt sed maiorum quasi membra atque partes, bene instituto atque exercitato iam fere tempus appetet aggrediendi suasorias iudicialesque materias; quarum antequam viam ingrediatur, pauca mihi de ipsa ratione declamandi dicenda sunt, quae quidem ut ex omnibus novissime inventa ita multo est utilissima. Nam et cuncta illa, de quibus diximus, in se 2 fere continet, et veritati proximam imaginem reddit; ideoque ita est celebrata, ut plerisque videretur ad formandam eloquentiam vel sola sufficere. Neque enim virtus ulla perpetuae duntaxat orationis reperiri potest, quae non sit cum haec dicendi meditatione communis. Eo quidem res ista culpa 3 docentium recidit, ut inter praecipuas, quae corrumpent eloquentiam, causas licentia atque inscitia declamantium fuerit. Sed eo, quod natura bonum est, bene uti licet. Sint 4 ergo et ipsae materiae, quae fingentur, quam simillimae veritatis, et declamatio, in quantum maxime potest, imitetur eas actiones, in quarum exercitationem reperta est. Nam 5 *magos et pestilentiam et responsa et saeviores tragicis novercas* aliaque magis adhuc fabulosa frustra inter sponsiones et interdicta quaeremus. Quid ergo? Nunquam haec supra fidem et poetica, ut vere dixerim, themata iuvenibus

tractare permittamus, ut expatiantur et gaudeant materia et
 6 quasi in corpus eant? Erit optimum; sed certe sint grandia
 et tumida non stulta etiam et acrioribus oculis intuenti ridi-
 cula: ut, si iam cedendum est, impleat se declamator ali-
 quando, dum sciat, ut quadrupedes, cum viridi pabulo di-
 stentae sunt, sanguinis detractio curantur et sic ad cibos
 viribus conservandis idoneos redeunt: ita sibi quoque tenu-
 7 tendum, si esse sanus ac robustus volet. Alioqui tumor ille
 inanis primo cuiuscunque veri operis conatu deprehendetur.
 Totum autem declamandi opus qui diversum omni modo a
 forensibus causis existimant, hi profecto ne rationem qui-
 8 dem, qua ista exercitatio inventa sit, pervident. Nam si foro
 non praeparat: aut scenicae ostentationi aut furiosae voci-
 ferationi simillimum est. Quid enim attinet iudicem praeparare,
 qui nullus est; narrare, quod omnes sciant falsum;
 probationes adhibere causae, de qua nemo sit pronuntiaturus?
 Et haec quidem otiosa tantum; affici vero et ira vel
 luctu permovere, cuius est ludibrii, nisi quibusdam pugnae
 simulacris ad verum discrimen aciemque iustam consuesci-
 9 mus? Nihil ergo inter forense genus dicendi atque hoc de-
 clamatorium intererit? Si profectus gratia dicimus, nihil.
 Utinamque adici ad consuetudinem posset, ut nominibus ute-
 remur, et perplexae magis et longioris aliquando actus con-
 troversiae fingerentur, et verba in usu cotidiano posita minus
 timeremus, et iocos inserere moris esset; quae nos, quamli-
 10 bet per alia in scholis exercitati simus, tirones in foro in-
 veniunt. Si vero in ostentationem comparetur declamatio,
 sane paulum aliquid inclinare ad voluntatem audientium de-
 11 bemus. Nam et in iis actionibus, quae in aliqua sine dubio
 veritate versantur sed sunt ad popularem aptatae delectatio-
 nem, quales legimus panegyricos, totumque hoc demonstra-
 tivum genus, permittitur adhibere plus cultus omnemque
 12 artem, quae latere plerumque in iudiciis debet, non confiteri
 modo sed ostentare etiam hominibus in hoc advocatis. Quare
 declamatio, quoniam est iudiciorum consiliorumque imago,
 similis esse debet veritati; quoniam autem aliquid in se ha-
 13 bet ἐπιδεικτικόν, nonnihil sibi nitoris assumere. Quod fa-

ciunt actores comici, qui neque ita prorsus, ut nos vulgo
 loquimur, pronuntiant, quod esset sine arte, neque procul
 tamen a natura recedunt, quo vitio periret imitatio; sed mo-
 rem communis huius sermonis decore quodam scenico exor-
 nant. Sic quoque aliqua nos incommoda ex his, quas fin- 14
 xerimus, materiis consequentur, in eo praecipue, quod multa
 in his relinquuntur incerta, quae sumimus ut videtur, aetates,
 facultates, liberos, parentes, urbium ipsarum vires, iura,
 mores, alia his similia; aliquando etiam argumentum ex ipsis 15
 positionum vitiis ducimus. Sed haec suo quaeque loco.
 Quamvis enim omne propositum operis a nobis destinati eo
 spectet, ut orator instituat; tamen, ne quid studiosi requi-
 rant, etiam si quid erit, quod ad scholas pertineat proprie,
 in transitu non omitemus.

AN ARTIS NECESSARIA COGNITIO.

XI. Iam hinc ergo nobis inchoanda est ea pars artis,
 ex qua capere initium solent, qui priora omiserunt; quan-
 quam video quosdam in ipso statim limine obstaturos mihi,
 qui nihil egere huiusmodi praeceptis eloquentiam putent,
 sed natura sua et vulgari modo et scholarum exercitatione
 contenti rideant etiam diligentiam nostram, exemplo magni
 quoque nominis professorum, quorum aliquis, ut opinor, in-
 terrogatus, quid esset *σχῆμα* et *νόημα*, nescire se quidem
 sed, si ad rem pertineret, esse in sua declamatione re-
 spondit. Alius percontanti, *Theodoreus an Apollodoreus* 2
esset? Ego, inquit, parmularius sum. Nec sane potuit
 urbanus ex confessione inscitiae suae elabi. Porro hi, quia
 et beneficio ingenii praestantes sunt habiti et multa etiam
 memoria digna exclamaverunt, plurimos habent similes ne-
 gligentiae suae, paucissimos naturae. Igitur impetu dicere 3
 se et viribus uti gloriantur; neque enim opus esse proba-
 tione aut dispositione in rebus fictis, sed, cuius rei gratia
 plenum sit auditorium, sententiis grandibus, quarum optima
 quaeque a periculo petatur. Quin etiam in cogitando, nulla 4
 ratione adhibita aut tectum intuentes magnum aliquid, quod
 ultro se offerat, pluribus saepe diebus expectant, aut mur-
 mure incerto velut classico instincti concitatissimum corporis

motum non enuntiandis sed quaerendis verbis accommodant.
 5 Nonnulli certa sibi initia, priusquam sensum invenerint, de-
 stinant, quibus aliquid disertis subiungendum sit, eaque diu
 secum ipsi clareque meditati desperata connectendi facultate
 deserunt et ad alia deinceps atque inde alia non minus com-
 6 munita ac nota devertunt. Qui plurimum videntur habere
 rationis, non in causas tamen laborem suum sed in locos in-
 tendunt, atque in his non corpori prospiciunt sed abrupta
 7 quaedam, ut forte ad manum venire, iaculantur. Unde fit,
 ut dissoluta et ex diversis congesta oratio cohaerere non
 possit similisque sit puerorum commentariis, in quos ea,
 quae aliis declamantibus laudata sunt, regerunt. Magnas
 tamen sententias et res bonas, ita enim gloriari solent, eli-
 dunt; nam et barbari et servi; et si hoc sat est, nulla est
 ratio dicendi.

QUARE INERUDITI INGENIOSIORES VULGO
 HABEANTUR.

XII. Ne hoc quidem negaverim, sequi plerumque hanc
 opinionem, ut fortius dicere videantur indocti; primum vitio
 male iudicantium, qui maiorem habere vim credunt ea, quae
 non habent artem, ut effringere quam aperire, rumpere quam
 2 solvere, trahere quam ducere putant robustius. Nam et
 gladiator, qui armorum inscius in rixam ruit, et luctator, qui
 totius corporis nisu in id, quod semel invasit, incumbit, for-
 tior ab his vocatur; cum interim et hic frequenter suis viri-
 bus ipse prosternitur, et illum vehementis impetus excipit
 3 adversarii mollis articulus. Sed sunt in hac parte, quae im-
 peritos etiam naturaliter fallant; nam et divisio, cum pluri-
 mum valeat in causis, speciem virium minuit, et rudia politis
 4 maiora et sparsa compositis numerosiora creduntur. Est
 praeterea quaedam virtutum vitiorumque vicinia, qua male-
 dicus pro libero, temerarius pro forti, effusus pro copioso
 accipitur. Maledicit autem ineruditus apertius et saepius
 vel cum periculo suscepti litigatoris frequenter etiam suo.
 5 Afferit et ista res opinionem, quia libentissime homines au-
 diunt ea, quae dicere ipsi nolissent. Illud quoque alterum,
 quod est in elocutione ipsa, periculum, minus vitat conatur-

que perdit, unde evenit nonnunquam, ut aliquid grande
 inveniat, qui semper quaerit, quod nimium est; verum id et
 raro provenit, et certa vitia non pensat. Propter hoc quo- 6
 que interdum videntur indocti copiam habere maiorem, quod
 dicunt omnia; doctis est et electio et modus. His accedit,
 quod a cura docendi, quod intenderunt, recedunt. Itaque il-
 lud quaestionum et argumentorum apud corrupta iudicia fri-
 gus evitant nihilque aliud, quam quod vel pravis voluptatibus
 aures assistentium permulceat, quaerunt. Sententiae quoque 7
 ipsae, quas solas petunt, magis eminent, cum omnia circa
 illas sordida et abiecta sunt; ut lumina non *inter umbras*,
 quemadmodum Cicero dicit, sed plane in tenebris clariora
 sunt. Itaque ingeniosi vocentur, ut libet, dum tamen con-
 stet, contumeliose sic laudari disertum. Nihilominus confi- 8
 tendum est etiam detrahare doctrinam aliquid, ut limam ru-
 dibus et cotes hebetibus et vino vetustatem; sed vitia detra-
 hit, atque eo solo minus est, quod litterae perpolierunt, quo
 melius. Verum hi pronuntiatione quoque famam dicendi for- 9
 tius quaerunt. Nam et clamant ubique et omnia *levata*, ut
 ipsi vocant, *manu* emugiunt, multo discursu, anhelitu, iacta-
 tione gestus, motu capitis furentes. Iam collidere manus, 10
 terrae pedem incutere, femur, pectus, frontem caedere, mire
 ad pullatum circulum facit; cum ille eruditus, ut in oratione
 multa summittere, variare, disponere, ita etiam in pronun-
 tiando suum cuique eorum, quae dicit, colori accommodare
 actum sciat, et, si quid sit perpetua observatione dignum,
 modestus et esse et videri malit. At illi hanc *vim* appellant, 11
 quae est potius violentia; cum interim non actores modo
 aliquos invenias sed, quod est turpius, praeceptores etiam,
 qui brevem dicendi exercitationem consecuti, omitta ratione,
 ut tulit impetus, passim tumultuantur eosque, qui plus hono-
 ris litteris tribuerunt, ineptos et ieunos et trepidos et infir-
 mos, ut quodque verbum contumeliosissimum occurrit, ap-
 pellent. Verum illis quidem gratulemur sine labore, sine 12
 ratione, sine disciplina disertis; nos, quando et praecipendi
 munus iam pridem deprecati sumus et in foro quoque di-
 cendi, quia honestissimum finem putamus desinere, dum de-
 sideraremur; inquirendo scribendoque talia consolemur otium

nostrum, quae futura usui bonae mentis iuvenibus arbitramur, nobis certe sunt voluptati.

QUIS MODUS IN ARTE.

XIII. Nemo autem a me exigat id praeceptorum genus, quod est a plerisque scriptoribus artium traditum, ut quasi quasdam leges immutabili necessitate constrictas studiosis dicendi feram: utique prooemium et id quale, proxima huic narratio, quae lex deinde narrandi, propositio post hanc vel, ut quibusdam placuit, excursio, tum certus ordo quaestionum ceteraque, quae, velut si aliter facere fas non sit, quidam tanquam iussi sic sequuntur. Erat enim rhetorice res prorsus facilis ac parva, si uno et brevi praescripto contineretur; sed mutantur pleraque causis, temporibus, occasione, necessitate. Atque ideo res in oratore praecipua consilium est, quia varie et ad rerum momenta convertitur. Quid? si enim praecipias imperatori, quotiens aciem instruet, dirigat frontem, cornua utrinque promoveat, equites pro cornibus locet: erit haec quidem rectissima fortasse ratio, quotiens licebit; sed mutabitur natura loci, si mons occurret, si flumen obstabit, collibus, silvis, asperitate alia prohibebitur; mutabit hostium genus, mutabit praesentis condicio discriminis: nunc acie directa nunc cuneis, nunc auxiliis nunc legione pugnabitur, nonnunquam terga etiam dedisse simulata fuga proderit. Ita prooemium necessarium an supervacuum, breve an longius, ad iudicem omni sermone directo an aliquando averso per aliquam figuram dicendum sit, constricta an latius fusa narratio, continua an divisa, recta an ordine permutato, causae docebunt. Itemque de quaestionum ordine, cum in eadem controversia aliud alii parti prius quaeri frequenter expediat. Neque enim rogationibus plebisve scitis sancta sunt ista praecepta, sed hoc quidquid est utilitas excogitavit. Non negabo autem sic utile esse plerumque, alioqui nec scriberem; verum, si eadem illa nobis aliud suadebit utilitas, hanc relictis magistrorum auctoritatibus sequemur.

8 Equidem id maxime praecipiam ac repetens iterumque iterumque monebo: res duas in omni actu spectet ora-

tor, quid deceat et quid expediat. Expediit autem saepe mutare ex illo constituto traditoque ordine aliqua et interim decet, ut in statutis atque picturis videmus variari habitus, vultus, status. Nam recti quidem corporis vel minima gratia est; nempe enim adversa sit facies et demissa brachia et 9 iuncti pedes et a summis ad ima rigens opus. Flexus ille et, ut sic dixerim, motus dat actum quendam et affectum. Ideo nec ad unum modum formatae manus et in vultu mille species. Cursum habent quaedam et impetum, sedent alia vel 10 incumbunt; nuda haec, illa velata sunt, quaedam mixta ex utroque. Quid tam distortum et elaboratum, quam est ille discobolos Myronis? Si quis tamen, ut parum rectum, improbet opus: nonne ab intellectu artis abfuerit, in qua vel praecipue laudabilis est ipsa illa novitas ac difficultas? Quam 11 quidem gratiam et delectationem afferunt figurae, quaeque in sensibus quaeque in verbis sunt; mutant enim aliquid a recto atque hanc prae se virtutem ferunt, quod a consuetudine vulgari recesserunt. Habet in pictura speciem tota facies; 12 Apelles tamen imaginem Antigoni latere tantum altero ostendit, ut amissi oculi deformitas lateret. Quid? non in oratione operienda sunt quaedam, sive ostendi non debent sive exprimi pro dignitate non possunt? Ut fecit Timanthes, 13 opior, Cythnius in ea tabula, qua Coloten Teium vicit. Nam cum in Iphigeniae immolatione pinxisset tristem Calchantem, tristiorem Ulixen, addidisset Menelao, quem summum poterat ars efficere, maerorem: consumptis affectibus, non reperiens, quo digne modo patris vultum posset exprimere, velavit eius caput et suo cuique animo dedit aestimandum. Nonne huic simile est illud Sallustianum, *Nam de 14 Carthagine tacere satius puto quam parum dicere?* Propter quae mihi semper moris fuit, quam minime alligare me ad praecepta, quae καθολικά vocitant, id est (ut dicamus quomodo possumus) universalialia vel perpetualialia. Raro enim reperitur hoc genus, ut non labefactari parte aliqua et subrui possit. Sed de his plenius suo quidque loco tractabimus. Interim nolo se iuvenes satis instructos, si quem ex 15 his, qui breves plerumque circumferuntur, artis libellum ediderint, et velut decretis technicorum tutos putent. Multo

labore, assiduo studio, varia exercitatione, plurimis experi-
 16 ars dicendi. Sed adiuvatur his quoque, si tamen rectam
 viam, non unam orbitam monstrent: qua declinare qui credi-
 derit nefas, patiatur necesse est illam per funes ingredien-
 tium tarditatem. Itaque et stratum militari labore iter saepe
 17 tenebitur incendio, per parietem exhibimus. Late fustum opus
 est et multiplex et prope cotidie novum, et de quo nunquam
 dicta erunt omnia. Quae sint tamen tradita, quid ex his opti-
 mum, et si qua mutari, adici, detrahi, melius videbitur, di-
 cere experiar.

DIVISIO TOTIUS OPERIS.

XIV. Rhetoricen in Latinum transferentes tum ora-
 toriam tum oratricem nominaverunt. Quos equidem non
 fraudaverim debita laude, quod copiam Romani sermonis au-
 gere temptarint. Sed non omnia nos ducentes ex Graeco
 sequuntur sicut ne illos quidem, quotiens suis utique verbis
 2 signare nostra voluerunt. Et haec interpretatio non minus
 dura est quam illa Plauti *essentia* atque *entia*, sed ne pro-
 pria quidem; nam *oratoria* sic effertur ut *elocutoria*, *ora-*
trix ut *elocutrix*; illa autem, de qua loquimur, *rhetoricè*
 talis est qualis *eloquentia*, nec dubie apud Graecos quoque
 3 duplicem intellectum habet. Namque uno modo fit apposi-
 tum *ars rhetorica* ut *navis piratica*, altero nomen rei,
 qualis est *philosophia*, *amicitia*. Nos ipsam nunc volumus
 significare substantiam, ut grammaticè *litteratura* est, non
litteratrix quemadmodum *oratrix*, nec *litteratoria* quemad-
 4 modum *oratoria*; verum in rhetorice non fit. Ne pugne-
 mus igitur, cum praesertim plurimis alioqui Graecis sit uten-
 dum. Nam certe et *philosophos* et *musicos* et *geometras*
 dicam, nec vim afferam nominibus his indecora in Latinum
 sermonem mutatione. Denique, cum M. Tullius etiam ipsis
 librorum, quos hac de re primum scripserat, titulis Graeco
 nomine utatur: profecto non est verendum, ne temere videamur
 oratori maximo de nomine artis suae credidisse.

Igitur rhetorice (iam enim sine metu cavillationis ute-
 5 mur hac appellatione) sic, ut opinor, optime dividetur, ut de
 arte, de artifice, de opere dicamus. Ars erit, quae
 disciplina percipi debet; ea est bene dicendi scientia.
 Artifex est, qui percepit hanc artem, id est, orator,
 cuius est summa bene dicere; opus, quod efficitur ab arti-
 fice, id est, bona oratio. Haec omnia rursus diducuntur
 in species; sed illa sequentia suo loco, nunc quae de prima
 parte tractanda sunt, ordiar.

QUID SIT RHETORICE ET QUIS EIUS FINIS.

XV. Ante omnia, quid sit rhetorice. Quae finitur qui-
 dem varie sed quaestionem habet duplicem, aut enim de qua-
 litate ipsius rei aut de comprehensione verborum dissensio
 est. Prima atque praecipua opinionum circa hoc differentia,
 quod alii malos quoque viros posse oratores dici putant;
 alii, quorum nos sententiae accedimus, nomen hoc artemque,
 de qua loquimur, bonis demum tribui volunt. Eorum autem, 2
 qui dicendi facultatem a maiore ac magis expetenda vitae
 laude secernunt, quidam rhetoricen vim tantum, quidam
 scientiam sed non virtutem, quidam usum, quidam artem qui-
 dem sed a scientia et virtute disinctam, quidam etiam pra-
 vilitatem quandam artis, id est *κακοτεχνίαν*, nominaverunt. Hi 3
 fere aut in persuadendo aut in dicendo apte ad persuaden-
 dum positum orandi munus sunt arbitrati. Id enim fieri po-
 test ab eo quoque, qui vir bonus non sit. Est igitur frequen-
 tissimus finis, *rhetoricen esse vim persuadendi*. Quod ego
vim appello, plerique *potestatem*, nonnulli *facultatem* vo-
 cant; quae res ne quid afferat ambiguitatis, *vim* dico *δύναμιν*.
 Haec opinio originem ab Isocrate (si tamen revera Ars, 4
 quae circumfertur, eius est) duxit. Qui, cum longe sit a vo-
 luntate infamantium oratoris officia, finem artis temere com-
 prendit, dicens esse rhetoricen *persuadendi opificem*, id
 est *πειθοῦς δημιουργόν*; neque enim mihi permiserim ea-
 dem uti declinatione, qua Ennius M. Cethegum *Suadae me-*
dullam vocat. Apud Platonem quoque Gorgias in libro, qui 5
 nomine eius inscriptus est, idem fere dicit; sed hanc Plato
 illius opinionem vult accipi non suam. Cicero pluribus locis

scripsit, officium oratoris esse *dicere apposite ad persuadendum*. In rhetoricis etiam, quos sine dubio ipse non probat, finem facit *persuadere*. Verum et pecunia persuadet et gratia et auctoritas dicentis et dignitas, postremo aspectus etiam ipse sine voce, quo vel recordatio meritorum cuiusque vel facies aliqua miserabilis vel formae pulchritudo sententiam dictat. Nam et Manium Aquilium defendens Antonius, cum scissa veste cicatrices, quas is pro patria pectore adverso suscepisset, ostendit, non orationis habuit fiduciam sed oculis populi Romani vim attulit, quem illo ipso aspectu maxime motum in hoc, ut absolveret reum, creditum est. Servium quidem Galbam miseratione sola, qua non suos modo liberos parvulos in contione produxerat sed Gallum etiam Sulpicii filium suis ipse manibus circumtulera-
 7 tum esse, cum aliorum monumentis tum Catonis oratione testatum est. Et Phrynen non Hyperidis actione, quanquam admirabili, sed conspectu corporis, quod illa speciosissimum alioqui diducta nudaverat tunica, putant periculo liberatam. Quae si omnia persuadent, non est hic, de quo locuti sumus, idoneus finis. Ideoque diligentiores sunt visi sibi, qui, cum de rhetorice idem sentirent, existimaverunt eam *vim dicendo persuadendi*. Quem finem Gorgias in eodem, de quo supra diximus, libro, velut coactus a Socrate facit; a quo non dissentit Theodectes, sive ipsius id opus est, quod de rhetorice nomine eius inscribitur, sive, ut creditum est, Aristotelis, in quo est, finem esse rhetorices *ducere homines dicendo in id, quod actor velit*. Sed ne hoc quidem satis est comprehensum; persuadent enim dicendo vel ducunt in id quod volunt alii quoque, ut meretrices, adulatores, corruptores. At contra non persuadet semper orator; ut interim non sit proprius hic finis eius, interim sit communis cum his, qui ab oratore procul absunt. Atqui non multum ab hoc fine abest Apollodorus, dicens iudicialis orationis primum et super omnia esse *persuadere iudici et sententiam eius ducere in id, quod velit*; nam et ipse oratorem fortunae subiicit, ut, si non persuaserit, nomen suum retinere non possit. Quidam recesserunt ab eventu, sicut Aristoteles dicit: *rhetorice est vis inveniendi omnia in*

oratione persuasibilia. Qui finis et illud vitium, de quo supra diximus, habet et insuper, quod nihil nisi inventionem complectitur, quae sine elocutione non est oratio. Hermagorae, qui finem eius esse ait *persuasibiliter dicere*, et aliis, qui eandem sententiam non iisdem tantum verbis explicant ac finem esse demonstrant *dicere, quae oporteat, omnia ad persuadendum*, satis responsum est, cum persuadere non tantum oratoris esse convicimus. Addita sunt his alia varie. Quidam enim *circa res omnes*, quidam *circa civiles* modo versari rhetorices putaverunt; quorum verius utrum sit, in eo loco, qui huius quaestionis proprius est, dicam. Omnia subiecisse oratori videtur Aristoteles, cum dixit *vim esse videndi, quid in quaque re possit esse persuasibile*. Et Patrocles, qui non quidem adiicit *in quaque re*, sed nihil excipiendo idem ostendit, *vim enim vocat inveniendi, quod sit in oratione persuasibile*; qui fines et ipsi solam complectuntur inventionem. Quod vitium fugiens Diodorus *vim* putat *inveniendi et loquendi cum ornatu credibilia in omni oratione*. Sed cum eodem modo credibilia quoque persuasibilia etiam non orator inveniat, adiiciendo *in omni oratione* magis quam superiores concedit scelera quoque suadentibus pulcherrimae rei nomen. Gorgias apud Platone suadendi se artificem *in iudiciis et aliis coetibus esse ait, de iniustis quoque et iniustis tractare*; cui Socrates persuadendi non docendi concedit facultatem. Qui vero non omnia subiiciebant oratori, sollicitius ac verbosius, ut necesse erat, adhibuerunt discrimina; quorum fuit Ariston, Critolai Peripatetici discipulus, cuius hic finis est, *scientia videndi et agendi in quaestionibus civilibus per orationem popularis persuasionis*. Hic scientiam, quia Peripateticus est, non, ut Stoici, virtutis loco ponit; popularem autem comprehendendo persuasionem etiam contumeliosus est adversus artem orandi, quam nihil putat doctis persuasuram. Illud de omnibus, qui circa civiles demum quaestiones oratorem iudicant versari, dictum sit, excludi ab his plurima oratoris officia, illam certe laudativam totam, quae est rhetorices pars tertia. Cautius Theodorus Gadareus, ut iam ad eos veniamus, qui artem quidem esse eam sed non

virtutem putaverunt. Ita enim dicit (ut ipsis eorum verbis utar, qui haec ex Graeco transtulerunt): *Ars inventrix et indicatrix et nuntiatrice decenti ornatu secundum mentionem eius, quod in quoque potest sumi persuasibile, in materia civili.* Itemque Cornelius Celsus, qui finem rhetorices ait dicere persuasibiliter in dubia civili materia. Quibus sunt non dissimiles, qui ab aliis traduntur; qualis est ille, *Vis videndi et eloquendi de rebus civilibus subiectis sibi cum quadam persuasione et quodam corporis habitu* 22 *et eorum, quae dicet, pronuntiatione.* Mille alia, sed aut eadem aut ex eisdem composita; quibus item, cum de materia rhetorices dicendum erit, respondebimus. Quidam eam neque vim neque scientiam neque artem putaverunt, sed Critolaus *usum dicendi* (nam hoc *τροπή* significat), Athenaeus *fallendi artem.*

24 Perique autem, dum pauca ex Gorgia Platonis a prioribus imperite excerpta legere contenti neque hoc totum neque alia eius volumina evolvunt, in maximum errorem inciderunt, creduntque eum in hac esse opinione, ut rhetorice non artem sed *peritiam quandam gratiae ac voluntatis* existimet; et alio loco *civilitatis particulae simulacrum et quartam partem adulationis*, quod duas partes civilitatis corpori assignet, medicinam et quam interpretantur exercitatricem, duas animo, legalem atque iustitiam; adulationem autem medicinae vocet cocorum artificium, exercitatricis mangonum, qui colorem fucō et verum robur inani sagina mentiantur; legalis cavillatricem, iustitiae rhetorice.

26 Quae omnia sunt quidem scripta in hoc libro dictaque a Socrate, cuius persona videtur Plato significare quid sentiat; sed alii sunt eius sermones ad coarguendos, qui contra disputant, compositi, quos *ελεγκτικὸς* vocant, alii ad praecipientem, qui *δογματικοὶ* appellantur. Socrates autem seu Plato eam quidem, quae tum exercebatur, rhetorice talem putat, nam et dicit his verbis *τοῦτον τὸν τρόπον, ὃν ὑμεῖς πολιτεύσθε*, veram autem et honestam intelligit. Itaque disputatio illa contra Gorgian ita clauditur, *οὐκοῦν ἀνάγκη τὸν ῥητορικὸν δίκαιον εἶναι, τὸν δὲ δίκαιον βούλεσθαι δίκαια πράττειν;*

28 Ad quod ille quidem conticescit, sed sermonem suscipit

Polus juvenili calore inconsideratior, contra quem illa de simulaero et adulatione dicuntur. Tum Callicles adhuc concitator, qui tamen ad hanc perducitur clausulam, *τὸν μέλλοντα ὁρθῶς ῥητορικὸν εἶσεσθαι, δίκαιον ἄρα δεῖ εἶναι καὶ ἐπιστήμονα τῶν δικαίων;* ut appareat, Platoni non rhetorice videri malum sed eam veram nisi iusto ac bono non contingere. Ad-29 huc autem in Phaedro manifestius facit, hanc artem consummari citra iustitiae quoque scientiam non posse; cui opinioni nos quoque accedimus. An aliter defensionem Socratis et eorum, qui pro patria ceciderant, laudem scripsisset; quae certe sunt oratoris opera? Sed in illud hominum genus, 30 quod facilitate dicendi male utebatur, invecus est. Nam et Socrates inhonestam sibi credit orationem, quam ei Lysias reo composuerat; et tum maxime scribere litigatoribus, quae illi pro se ipsi dicerent, erat moris, atque ita iuri, quo non licebat pro altero agere, fraus adhibebatur. Doctores quo-31 que eius artis parum idonei Platoni videbantur, qui rhetorice a iustitia separarent et veris credibilia praeferrent; nam id quoque dicit in Phaedro. Consensisse autem illis superio-32 ribus videri potest etiam Cornelius Celsus, cuius haec verba sunt: *Orator simile tantum veri petit.* Deinde paulo post: *Non enim bona conscientia sed victoria litigantis est praemium.* Quae si vera essent, pessimorum hominum foret, haec tam perniciose nocentissimis moribus dare instrumenta et nequitiam praecipis adiuvare. Sed illi rationem opinionis suae viderint.

Nos autem ingressi formare perfectum oratorem, quem 33 in primis esse virum bonum volumus, ad eos, qui de hoc opere melius sentiunt, revertamur. Rhetorice autem quidam eandem *civilitatem* esse iudicaverunt; Cicero *scientiae civilis partem* vocat, civilis autem scientia idem quod sapientia est; quidam eandem philosophiam, quorum est Isocrates, Huic eius substantiae maxime conveniet definitio, *rhe-34 torice esse bene dicendi scientiam.* Nam et orationis omnes virtutes semel complectitur et protinus mores etiam oratoris, cum bene dicere non possit nisi bonus. Idem valet 35 Chrysippi finis ille ductus a Cleanthe *scientia recte dicendi.* Sunt plures eiusdem sed ad alias quaestiones magis

pertinent. Idem sentiret finis hoc modo comprehensus, *persuadere quod oporteat*, nisi quod artem ad exitum alligat.

36 At bene Areus *dicere secundum virtutem orationis*. Excludunt a rhetorice malos et illi, qui scientiam civilium officiorum eam putaverunt, si scientiam virtutem iudicant; sed anguste intra civiles quaestiones coercent. Albutius, non obscurus professor atque auctor, *scientiam bene dicendi* esse consentit sed exceptionibus peccat adiciendo *circa civiles quaestiones et credibiliter*; quarum utrique iam
37 responsum est. Probabilis et illi voluntatis, qui *recte sentire et dicere* rhetorices putaverunt.

Hi sunt fere fines maxime illustres et de quibus praecipue disputatur. Nam omnes quidem persequi neque attinet neque possum, cum pravum quoddam, ut arbitror, studium circa scriptores Artium extiterit, nihil eisdem verbis, quae prior aliquis occupasset, finiendi, quae ambitio procul aberit a me. Dicam enim non utique quae invenero sed quae placebunt, sicut hoc, rhetorice esse bene dicendi scientiam; cum reperto quod est optimum, qui quaerit aliud, peius velit.

His approbatis, simul manifestum est illud quoque, quem finem vel quid summum et ultimum habeat rhetorice, quod *τέλος* dicitur, ad quod omnis ars tendit; nam si est ipsa bene dicendi scientia, finis eius et summum est bene dicere.

AN UTILIS.

XVI. Sequitur quaestio, an utilis rhetorice. Nam quidam vehementer in eam invehi solent, et, quod sit indignissimum, in accusationem orationis utuntur orandi viribus:
2 Eloquentiam esse, quae poenis eripiat scelestos; cuius fraude damnentur interim boni; consilia ducantur in peius; nec seditiones modo turbaeque populares, sed bella etiam inexpugnabilia excitentur; cuius denique tum maximus sit usus,
3 cum pro falsis contra veritatem valet. Nam et Socrati obii-
ciunt comici, docere eum, quomodo peiorem causam meliorem faciat, et contra Tisiam et Gorgiam similia dicit polliceri
4 Plato. Et his adiciunt exempla Graecorum Romanorumque

et enumerant, qui perniciosi non singulis tantum sed rebus etiam publicis usi eloquentia turbaverint civitatum status vel everterint; eoque et Lacedaemoniorum civitate expulsam et Athenis quoque, ubi actor movere affectus vetabatur, velut recisam orandi potestatem.

Quo quidem modo nec duces erunt utiles nec magistratus 5 nec medicina nec denique ipsa sapientia. Nam et dux Flaminius et Gracchi, Saturnini, Glaucia gessere magistratus, et in medicis venena et in his, qui philosophorum nomine male utuntur, gravissima nonnunquam flagitia deprehensa sunt. Cibos aspernemur; attulerunt saepe valetudinis causas. Nun-6 quam tecta subeamus; super habitantes aliquando procumbunt. Non fabricetur militi gladius; potest uti eodem ferro latro. Quis nescit, ignes, aquas, sine quibus nulla sit vita, et (ne terrenis immorer) solem lunamque, praecipua siderum, aliquando et nocere?

Num igitur negabitur deformem Pyrrhi pacem caecus 7 ille Appius dicendi viribus diremisit? aut non divina M. Tullii eloquentia et, contra leges agrarias popularis fuit et Catilinae fregit audaciam et supplicationes, qui maximus honor victoribus bello ducibus datur, in toga meruit? Nonne 8 perterritos militum animos frequenter a metu revocat oratio et tot pugnandi pericula ineuntibus laudem vita potiore esse persuadet? Neque vero me Lacedaemonii atque Athenienses magis moverint quam populus Romanus, apud quem summa semper oratoribus dignitas fuit. Equidem nec urbium 9 conditores reor aliter effecturos fuisse, ut vaga illa multitudo coiret in populos, nisi docta voce commota; nec legum repertores sine summa vi orandi consecutos, ut se ipsi homines ad servitum juris astringerent. Quin ipsa vitae prae-10 cepta, etiamsi natura sunt honesta, plus tamen ad formandas mentes valent, quotiens pulchritudinem rerum claritas orationis illuminat. Quare, etiamsi in utramque partem valent arma facundiae, non est tamen aequum id haberi malum, quo bene uti licet.

Verum haec apud eos forsitan quaerantur, qui summam 11 rhetorices ad persuadendi vim retulerunt. Si vero est bene dicendi scientia, quem nos finem sequimur, ut sit orator

inprimis vir bonus: utilem certe esse eam confitendum est.
 12 Et hercule deus ille, parens rerum fabricatorque mundi,
 nullo magis hominem separavit a ceteris, quae quidem mor-
 13 talia essent, animalibus, quam dicendi facultate. Nam cor-
 pora quidem magnitudine, viribus, firmitate, patientia, velo-
 citate praestantiora in illis mutis videmus: eadem minus
 egere acquisitae extrinsecus opis. Nam et ingredi citius et
 pasci et tranare aquas citra docentem natura ipsa sciunt. Et
 14 pleraque contra frigus ex suo corpore vestiuntur, et arma
 iis ingenita quaedam et ex obvio fere victus, circa quae
 omnia multus hominibus labor est. Rationem igitur nobis
 praecipuam dedit eiusque nos socios esse cum diis immorta-
 15 libus voluit. Sed ipsa ratio neque tam nos iuaret neque
 tam esset in nobis manifesta, nisi, quae concepissemus
 mente, promere etiam loquendo possemus: quod magis de-
 esse ceteris animalibus quam intellectum et cogitationem
 16 quandam videmus. Nam et mollire cubilia et nidos texere et
 educare fetus et excludere quin etiam reponere in hiemem
 alimenta, opera quaedam nobis inimitabilia (qualia sunt ce-
 rarum ac mellis) efficere, nonnullius fortasse rationis est:
 sed quia carent sermone, quae id faciunt, muta atque irra-
 17 tionalia vocantur. Denique homines, quibus negata vox est,
 quantum adiuvat animus ille coelestis? Quare si nihil a
 diis oratione melius accepimus, quid tam dignum cultu ac
 labore ducamus, aut in quo malimus praestare hominibus,
 18 quam quo ipsi homines ceteris animalibus praestant; eo qui-
 dem magis, quod nulla in arte plenius labor gratiam refert?
 Id adeo manifestum erit, si cogitaverimus, unde et quousque
 iam provecta sit orandi facultas: et adhuc augeri potest.
 19 Nam ut omittam, defendere amicos, regere consiliis sena-
 tum, populum, exercitum in quae velit ducere, quam sit
 utile conveniatque bono viro: nonne pulchrum vel hoc ipsum
 est, ex communi intellectu verbisque, quibus utuntur omnes,
 tantum assequi laudis et gloriae, ut non loqui et orare sed,
 quod Pericli contigit, fulgurare ac tonare videaris?

AN ARS.

XVII. Finis non erit, si expatiari in parte hac et indul-

gere voluptati velim. Transeamus igitur ad eam quaestio-
 nem, quae sequitur, an rhetorice ars sit. Quod quidem²
 adeo ex his, qui praecepta dicendi tradiderunt, nemo dubi-
 tavit, ut etiam ipsis librorum titulis testatum sit, scriptos
 eos *de arte rhetorica*; Cicero vero etiam, quae *rhetorice*
 vocetur, esse *artificiosam eloquentiam* dicat. Quod non
 oratores tantum vindicarunt, ut studiis aliquid suis praesti-
 tisse videantur, sed cum his philosophi et Stoici et Peripa-
 tetici plerique consentiunt. Ac me dubitasse confiteor, an³
 hanc partem quaestionis tractandam putarem; nam quis est
 adeo non ab eruditione modo sed a sensu remotus hominis,
 ut fabricandi quidem et texendi et e luto vasa ducendi artem
 putet, rhetoricen autem, maximum ac pulcherrimum, ut
 supra diximus, opus, in tam sublime fastigium existimet
 sine arte venisse? Equidem illos, qui contra disputaverunt,⁴
 non tam id sensisse, quod dicerent, quam exercere ingenia
 materiae difficultate credo voluisse, sicut Polycraten, cum
 Busiridem laudaret et Clytaemnestram; quanquam is, quod
 his dissimile non est, composuisse orationem, quae est ha-
 bita contra Socraten, dicitur.

Quidam naturalem esse rhetoricen volunt et tamen⁵
 adiuvari exercitatione non diffitentur, ut in libris Ciceronis
 de Oratore dicit Antonius, *observationem* quandam esse non
 artem. Quod non ideo, ut pro vero accipiamus, est posi-⁶
 tum; sed ut Antonii persona servetur, qui dissimulator artis
 fuit. Hanc autem opinionem habuisse Lysias videtur. Cuius
 sententiae talis defensio est, quod indocti et barbari et servi,
 pro se cum loquuntur, aliquid dicant simile principio, nar-
 rent, probent, refutent, et (quod vim habeat epilogi) de-
 precentur. Deinde adiiciunt illas verborum cavillationes,⁷
 nihil, quod ex arte fiat, ante artem fuisse; atqui dixisse ho-
 mines pro se et in alios semper, doctores artis sero iam et
 circa Tisian et Coraca primum repertos, orationem igitur
 ante artem fuisse eoque artem non esse. Nos porro, quando⁸
 coeperit huius rei doctrina, non laboramus exquirere; quan-
 quam apud Homerum et praeceptorem Phoenicem cum agendi
 tum etiam loquendi et oratores plures et omne in tribus du-
 cubus orationis genus et certamina quoque proposita elo-

quentiae inter iuvenes invenimus, quin in caelatura clipei
 9 Achillis et lites sunt et actores. Illud enim admonere satis
 est, omnia, quae ars consummaverit, a natura initia duxisse.
 Aut tollatur medicina, quae ex observatione salubrium atque
 his contrariorum reperta est, et, ut quibusdam placet, tota
 constat experimentis; nam et vulnus deligavit aliquis, ante-
 quam haec ars esset, et febrem quiete et abstinentia, non
 quia rationem videbat, sed quia id valetudo ipsa coegerat,
 10 mitigavit. Nec fabrica sit ars, casas enim primi illi sine arte
 fecerunt; nec musica, cantatur ac saltatur per omnes gentes
 aliquo modo. Ita si rhetorice vocari debet sermo quicumque,
 11 fuisse eam, antequam esset ars, confitebor; si vero non,
 quisquis loquitur, orator est, et tum non tanquam oratores
 loquebantur: necesse est, oratorem factum arte nec ante
 artem fuisse, fateantur. Quo illud quoque excluditur, quod
 dicunt, non esse artis id, quod faciant qui non didicerint;
 12 dicere autem homines et qui non didicerint. Ad cuius rei
 confirmationem afferunt, Demaden, remigem, et Aeschinen,
 hypocriten, oratores fuisse. Falso; nam neque orator esse,
 qui non didicit, potest, et hos sero potius quam nunquam
 didicisse quis dixerit. Quanquam Aeschines ab initio sit
 versatus in litteris, quas pater eius etiam docebat; Demaden
 neque non didicisse certum sit, et continua dicendi exerci-
 tatio potuerit tantum, quantuscumque postea fuit, fecisse;
 13 nam id potentissimum discendi genus est. Sed et praestan-
 tiorem, si didicisset, futurum fuisse dicere licet; neque
 enim orationes scribere est ausus, ut eum multum valuisse
 14 in dicendo sciamus. Aristoteles, ut solet, quaerendi gratia
 quaedam subtilitatis suae argumenta excogitavit in Gryllo;
 sed idem et de arte rhetorica tris libros scripsit, et in eorum
 primo non artem solum eam fatetur sed ei particulam civili-
 15 tatis sicut dialectices, assignat. Multa Critolaus contra,
 multa Rhodius Athenodorus. Agnon quidem detraxit sibi in-
 scriptione ipsa fidem, qua rhetorices accusationem professus
 est. Nam de Epicuro, qui disciplinas omnes fugit, nihil miror.
 16 Hi complura dicunt sed ex paucis locis ducta; itaque
 potentissimis eorum breviter sed ex paucis locis ducta; itaque
 17 stio evadat. Prima his argumentatio ex materia est. Omnes

enim artes aiunt habere *materiam*, quod est verum; rheto-
 rices *nullam* esse *propriam*, quod esse falsum in sequen-
 tibus probabo. Altera est calumnia, nullam artem falsis as-
 1 sentiri opinionibus, quia constitui sine perceptione non pos-
 sit, quae semper vera sit; *rhetorice assentiri falsis*, non
 esse igitur artem. Ego, rhetorice nonnunquam dicere falsa
 19 pro veris, confitebor; sed non ideo in falsa quoque esse
 opinione concedam, quia longe diversum est, ipsi quid vi-
 deri et, ut alii videatur, efficere. Nam et imperator falsis
 utitur saepe, ut Hannibal, cum inclusus a Fabio, sarmentis
 circum cornua boum deligatis incensisque, per noctem in
 adversos montes agens armenta speciem hosti abeantis exer-
 citus dedit, sed illum fefellit; ipse, quid verum esset, non
 ignoravit. Nec vero Theopompus Lacedaemonius, cum per-
 20 mutato cum uxore habitu e custodia ut mulier evasit, falsam
 de se opinionem habuit sed custodibus praebuit. Item ora-
 tor, cum falso utitur pro vero, scit esse falsum eoque se
 pro vero uti; non ergo falsam habet ipse opinionem sed fallit
 alium. Nec Cicero, cum se tenebras offudisse iudicibus in
 21 causa Cluentii gloriatus est, nihil ipse vidit. Et pictor, cum
 vi artis suae efficit, ut quaedam eminere in opere, quaedam
 recessisse credamus, ipse ea plana esse non nescit. Aiunt
 22 etiam, *omnes artes habere finem aliquem propositum, ad
 quem tendant; hunc modo nullum esse in rhetorice, modo
 non praestari eum, qui promittatur*. Mentiuntur; nos enim
 esse finem iam ostendimus, et quis esset diximus. Praestabit
 23 hunc semper orator, semper enim bene dicet. Firmum au-
 tem hoc, quod opponitur, adversus eos fortasse sit, qui
 persuadere finem putaverunt. Noster orator arsque a nobis
 finita non sunt posita in eventu. Tendit quidem ad victoriam,
 qui dicit; sed cum bene dixit, etiamsi non vincat, id, quod
 arte continetur, effecit. Nam et gubernator vult salva nave
 24 in portum pervenire; si tamen tempestate fuerit abreptus,
 non ideo minus erit gubernator dicetque notum illud, *Dum
 clavum rectum teneam*. Et medicus sanitatem aegro pro-
 25 mittit; si tamen aut valetudinis vi aut intemperantia aegri
 aliove quo casu summa non contingit, dum ipse omnia secun-
 dum rationem fecerit, medicinae sine non excidet. Ita ora-

tori bene dixisse finis est. Nam est ars ea, ut post paulum
26 clarius ostendemus, in actu posita non in effectu. Ita falsum
erit illud quoque, quod dicitur, *artes scire, quando sint
finem consecutae; rhetoricen nescire*. Nam se quisque bene
dicere intelligit.

27 *Uti etiam vitii rhetoricen*, quod ars nulla faciat, cri-
minantur, quia et falsum dicat et affectus moveat. Quorum
neutrum est turpe, cum ex bona ratione proficiscitur, ideo-
que neutrum vitium. Nam et mendacium dicere etiam sa-
pienti aliquando concessum est, et affectus, si aliter ad
aequitatem perducere iudex non poterit, necessario movebit
28 orator. Imperiti enim iudicant et qui frequenter in hoc
ipsum fallendi sint, ne errent. Nam, si mihi sapientes iu-
dices dentur, sapientium contiones atque omne consilium;
nihil invidia valeat, nihil gratia, nihil opinio praesumpta fal-
sique testes: perquam sit exiguus eloquentiae locus et prope
29 in sola delectatione ponatur. Sin et audientium mobiles ani-
mi et tot malis obnoxia veritas: arte pugnandum est et adhi-
benda quae prosunt. Neque enim, qui recta via depulsus
est, reduci ad eam nisi alio flexu potest.

30 Plurima vero ex eo contra rhetoricen cavillatio est,
quod ex utraque causae parte dicatur. Inde haec: *nullam
esse artem contrariam sibi, rhetoricen esse contrariam
sibi; nullam artem destruere, quod effecerit, accidere hoc
rhetorices operi; item aut dicenda eam docere aut non
dicenda, itaque vel per hoc non esse artem, quod non di-
cenda praecipiat, vel per hoc, quod, cum dicenda prae-
31 ceperit, etiam contraria his doceat*. Quae omnia apparet
de ea rhetorice dici, quae sit a bono viro atque ab ipsa vir-
tute seiuncta; alioqui ubi iniusta causa est, ibi rhetorice non
est, adeo ut vix admirabili quodam casu possit accidere, ut
32 ex utraque parte orator, id est vir bonus, dicat. Tamen
quoniam hoc quoque in rerum naturam cadit, ut duos sapien-
tes aliquando iustae causae in diversum trahant, (quando
etiam pugnatos eos inter se, si ratio ita duxerit, credunt)
respondebo propositis, atque ita quidem, ut appareat, haec
adversus eos quoque frustra excogitata, qui malis moribus
33 nomen oratoris indulgeant. Nam rhetorice non est contraria

sibi. Causa enim cum causa, non illa secum ipsa componitur.
Nec, si pugnent inter se, qui idem didicerunt, idcirco ars,
quae utrique tradita est, non erit; alioqui nec armorum, quia
saepe gladiatores sub eodem magistro eruditi inter se com-
ponuntur; nec gubernandi, quia navalibus proeliis guber- 34
nator est gubernatori adversus; nec imperatoria, quia im-
perator cum imperatore contendit. Item non evertit opus
rhetorice, quod efficit. Neque enim positum a se argumen-
tum solvit orator sed ne rhetorice quidem, quia apud eos,
qui in persuadendo finem putant, aut si quis (ut dixi) casus
duos inter se bonos viros composuerit, verisimilia quaeren-
tur; non autem, si quid est altero credibilius, id ei contra-
rium est, quod fuit credibile. Nam ut candido candidus et 35
dulci dulcius non est adversum, ita nec probabili probabilius.
Neque praecipit unquam non dicenda nec dicendis contraria,
sed quae in quaque causa dicenda sint. Non semper autem 36
ei, etiamsi frequentissime, tuenda veritas erit; sed aliquando
exigit communis utilitas, ut etiam falsa defendat.

Ponuntur haec quoque in secundo Ciceronis de oratore
libro contradictiones: *artem earum rerum esse, quae scian-
tur; oratoris omnem actionem opinione, non scientia con-
tineri, quia et apud eos dicat, qui nesciant, et ipse dicat
aliquando, quod nesciat*. Ex his alterum, id est, an sciat 37
iudex, de quo dicatur, nihil ad oratoris artem; alteri re-
spondendum. *Ars earum rerum est, quae sciuntur*. Rhe-
torice ars est bene dicendi, bene autem dicere scit orator.
Sed nescit, an verum sit, quod dicit. Ne hi quidem, qui 38
ignem aut aquam aut quattuor elementa aut corpora insecu-
abilia esse, ex quibus res omnes initium duxerint, tradunt,
nec qui intervalla siderum et mensuras solis ac terrae colli-
gunt; disciplinam tamen suam artem vocant. Quodsi ratio
efficit, ut haec non opinari sed propter vim probationum
scire videantur: eadem ratio idem praestare oratori potest.
Sed an causa vera sit, nescit. Ne medicus quidem, an 39
dolorem capitis habeat, qui hoc se pati dicet; curabit tamen,
tanquam id verum sit, et erit ars medicina. Quid? quod
rhetorice non utique propositum habet semper vera dicendi
sed semper verisimilia, scit autem esse verisimilia quae

40 dicit? Adiciunt his, qui contra sentiunt, quod saepe, quae in aliis litibus impugnarunt actores causarum, eadem in aliis defendant. Quod non artis sed hominis est vitium. Haec sunt praecipua, quae contra rhetoricen dicantur; alia et minora et tamen ex his fontibus derivata.

41 Confirmatur autem esse artem eam breviter. Nam sive, ut Cleanthes voluit, ars est *potestas viam*, id est ordinem, *efficiens*: esse certe viam atque ordinem in bene dicendo nemo dubitaverit; sive ille ab omnibus fere probatus finis observatur, artem constare ex perceptionibus consentientibus et coexercitatis ad finem utilem vitae: iam ostendemus
42 nihil non horum in rhetorice inesse. Quid? quod et inspectione et exercitatione ut artes ceterae constat? Nec potest ars non esse, si est ars dialectice, quod fere constat, cum ab ea specie magis quam genere differat. Sed nec illa omit-
43 tendenda sunt, qua in re alius se inartificialiter alius artificialiter gerat, in ea esse artem; et in eo, quod, qui didicerit, melius faciat, quam qui non didicerit, esse artem. Atqui non solum doctus indoctum sed etiam doctior doctum in rhetorices opere superabit, neque essent aliter eius tam multa praecepta tamque magni, qui docerent; idque cum omnibus confitendum est tum nobis praecipue, qui rationem dicendi a bono viro non separamus.

EX QUIBUS ARTIBUS.

XVIII. Cum sint autem artium aliae positae in inspectione, id est cognitione et aestimatione rerum, qualis est astrologia, nullum exigens actum sed ipso rei, cuius studium habet, intellectu contenta, quae *θεωρητικὴ* vocatur; aliae in agendo, quarum in hoc finis est et ipso actu perficitur nihilque post actum operis relinquit, quae *πρακτικὴ* dicitur,
2 qualis saltatio est; aliae in effectum, quae operis, quod oculis subicitur, consummatione finem accipiunt, quam *ποιητικὴν* appellamus, qualis est pictura: fere iudicandum est, rhetoricen in actu consistere; hoc enim, quod est officii sui, perficit. Atque ita ab omnibus dictum est.

3 Mihi autem videtur etiam ex illis ceteris artibus multum assumere. Nam et potest aliquando ipsa res per se inspe-

ctione esse contenta. Erit enim rhetorice in oratore etiam tacente, et si desierit agere vel proposito vel aliquo casu impeditus: non magis desinet esse orator quam medicus, qui curandi fecerit finem. Nam est aliquis, ac nescio an maximus, etiam ex secretis studiis fructus ac tum pura voluptas litterarum, cum ab actu id est opere recesserunt et contemplatione sui fruuntur. Sed effectivae quoque aliquid simile scriptis orationibus vel historiis, quod ipsum opus in parte oratoria merito ponimus, consequetur. Si tamen una ex tribus artibus habenda sit: quia maximus eius usus actu continetur atque est in eo frequentissima, dicatur activa vel administrativa, nam et hoc eiusdem rei nomen est.

NATURA AN DOCTRINA PLUS EI CONFERAT.

XIX. Scio, quaeri etiam, naturane plus ad eloquentiam conferat an doctrina. Quod ad propositum quidem nostri operis nihil pertinet; neque enim consummatus orator nisi ex utroque fieri potest, plurimum tamen referre arbitror, quam esse in hoc loco quaestionem velimus. Nam si partim utlibet omnino alteram detrahas, natura etiam sine doctrina multum valebit, doctrina nulla esse sine natura poterit. Sin ex pari coeant: in mediocribus quidem utrisque maius adhuc credam naturae esse momentum, consummatos autem plus doctrinae debere quam naturae, putabo; sicut terrae nullam fertilitatem habenti nihil optimus agricola profuerit, e terra uberi utile aliquid etiam nullo colente nascetur, at in solo secundo plus cultor quam ipsa per se bonitas soli efficiet. Et, si Praxiteles signum aliquod ex molari lapide conatus esset exculpere, Parium marmor mallet rude; at si illud idem artifex expolisset, plus in manibus fuisset quam in marmore. Denique natura materia doctrinae est; haec fingit, illa fingitur. Nihil ars sine materia, materiae etiam sine arte pretium est, ars summa materia optima melior.

AN VIRTUS RHETORICE.

XX. Illa quaestio est maior: ex mediis artibus, quae neque laudari per se nec vituperari possunt sed utiles aut secus secundum mores utentium fiunt, habenda sit rhetorice,

an sit, ut compluribus etiam philosophorum placet, virtus.
 2 Equidem illud, quod in studiis dicendi plerique exercuerunt et exercent, aut nullam artem, quae ἀρετή nominatur, puto, (multos enim video sine ratione, sine litteris, qua vel impudentia vel fames duxit, ruentes) aut malam quasi artem, quam κανονετην dicimus. Nam et fuisse multos et esse nonnullos existimo, qui facultatem dicendi ad hominum perniciem converterint. *Μακροετην* quoque est quaedam, id est supervacua artis imitatio, quae nihil sane neque boni neque mali habeat, sed vanum laborem; qualis illius fuit, qui grana ciceris ex spatio distant missa, in acum continuo et sine frustratione inserebat, quem cum spectasset Alexander, donasse dicitur eiusdem leguminis modio, quod quidem
 4 praemium fuit illo opere dignissimum. His ego comparandos existimo, qui in declamationibus, quas esse veritati dissimillimas volunt, aetatem multo studio ac labore consumunt. Verum haec, quam instituere conamur et cuius imaginem animo concepimus, quae bono viro convenit quaeque est vere rhetorice, virtus erit.

5 Quod philosophi quidem multis et acutis conclusionibus colligunt, mihi vero etiam planiore hac proprieque nostra probatione videtur esse perspicuum. Ab illis haec dicuntur. Si consonare sibi in faciendis ac non faciendis virtus est, quae pars eius prudentia vocatur: eadem in dicendis ac non
 6 dicendis erit. Et si virtutes sunt, ad quas nobis etiam ante quam doceremur initia quaedam ac semina sunt concessa natura, ut ad iustitiam, cuius rusticis quoque ac barbaris apparet aliqua imago: nos certe sic esse ab initio formatos, ut possemus orare pro nobis, etiamsi non perfecte tamen ut inessent quaedam (ut dixi) semina eius facultatis, manifestum
 7 est. Non eadem autem natura est his artibus, quae a virtute sunt remotae. Itaque cum duo sint genera orationis, altera perpetua, quae rhetorice dicitur, altera concisa, quae dialectice; quas quidem Zeno adeo coniunxit, ut hanc compressae in pugnum manus, illam explicatae diceret similem: etiam disputatrix virtus erit. Adeo de hac, quae speciosior atque apertior tanto est, nihil dubitabitur.

8 Sed plenius hoc idem atque apertius intueri ex ipsis

operibus volo. Nam quid orator in laudando faciet nisi honestorum et turpium peritus? aut in suadendo nisi utilitate perspecta? aut in iudiciis, si iustitiae sit ignarus? Quid? non fortitudinem postulat res eadem, cum saepe contra turbulenta populi minas, saepe cum periculosa potentium offensa, nonnunquam, ut iudicio Miloniano, inter circumfusa militum arma dicendum sit; ut, si virtus non est, ne perfecta quidem esse possit oratio. Quodsi ea in quoque animalium
 9 est virtus, qua praestat cetera vel pleraque, ut in leone impetus, in equo velocitas; hominem porro ratione atque oratione excellere ceteris certum est: cur non tam in eloquentia quam in ratione virtutem eius esse credamus; recteque hoc apud Ciceronem dixerit Crassus: *Est enim eloquentia una quaedam de summis virtutibus*, et ipse Cicero sua persona
 10 cum ad Brutum in epistolis tum aliis etiam locis virtutem eam appellet? At prooemium aliquando ac narrationem dicet malus homo et argumenta, sic ut nihil sit in his requirendum. Nam et latro pugnabit acriter, virtus tamen erit fortitudo; et tormenta sine gemitu feret malus servus, tolerantia tamen doloris laude sua non carebit. Multa fiunt eadem sed aliter. Sufficiant igitur haec, quia de utilitate supra tractavimus.

QUAE MATERIA EIUS.

XXI. Materiam rhetorices quidam dixerunt esse *orationem*, qua in sententia ponitur apud Platonem Gorgias. Quae si ita accipitur, ut sermo quacunquē de re compositus dicatur oratio, non materia sed opus est, ut statuarii statua; nam et oratio efficitur arte sicut statua. Sin hac appellatione verba ipsa significari putamus, nihil haec sine rerum substantia faciunt. Quidam *argumenta persuasibilia*; quae et
 2 ipsa in parte sunt operis et arte fiunt et materia egent. Quidam *civiles quaestiones*; quorum opinio non qualitate sed modo erravit, est enim haec materia rhetorices sed non sola. Quidam, quia virtus sit rhetorice, materiam eius *totam vitam*
 3 vocant. Alii, quia non omnium virtutum materia sit tota vita sed pleraeque earum versentur in partibus, sicut iustitia, fortitudo, continentia propriis officiis et suo fine intelliguntur: rhetorice quoque dicunt in una aliqua parte ponentur.

dam, eique locum in ethice *negotialem* assignant id est *προσμητιζόν*.

4 Ego (neque id sine auctoribus) materiam esse rhetorices iudico omnes res quaecunque ei ad dicendum subiectae sint. Nam Socrates apud Platonem dicere Gorgiae videtur, non in verbis esse materiam sed in rebus. Et in Phaedro palam, non in iudiciis modo et contionibus sed in rebus etiam privatis ac domesticis rhetorices esse, demonstrat. Quo manifestum est hanc opinionem ipsius Platonis fuisse. Et Cicero quodam loco materiam rhetorices vocat res, quae subiectae sint ei, sed certas demum putat esse subiectas. Alio vero de omnibus rebus oratori dicendum arbitratur his quidem verbis: *Quanquam vis oratoris professioque ipsa bene dicendi hoc suscipere ac polliceri videatur, ut omni de re, quaecunque sit proposita, ornate ab eo copioseque dicatur.* Atque adhuc alibi: *Vero enim oratori, quae sunt in hominum vita, quandoquidem in ea versatur orator atque ea est ei subiecta materies, omnia quaesita, audita, lecta, disputata, tractata, agitata esse debent.*

7 Hanc autem, quam nos materiam vocamus, id est res subiectas, quidam modo infinitam modo non propriam rhetorices esse dixerunt, eamque artem *circumcurrentem* vocaverunt, quod in omni materia diceret. Cum quibus mihi minima pugna est. Nam de omni materia dicere eam fatentur; propriam habere materiam, quia multiplicem habeat, negant. Sed neque infinita est, etiamsi est multiplex; et aliae quoque artes minores habent multiplicem materiam, velut architectonicae, namque ea in omnibus, quae sunt aedificio utilia, versatur, et caelatura, quae auro, argento, aere, ferro opera efficit. Nam sculptura etiam lignum, ebur, marmor, vitrum, gemmas, praeterea quae supra dixi, complectitur. Neque protinus non est materia rhetorices, si in eadem versatur et alius. Nam si quaeram, quae sit materia statuarii, dicetur *aes*; si quaeram, quae sit excusoris, id est fabricae eius quam Graeci *χαλκευτικήν* vocant, similiter *aes* esse respondeant. Atqui plurimum statuis differunt vasa.

11 Nec medicina ideo non erit ars, quia unctio et exercitatio

cum palaestrica, ciborum vero qualitas etiam cum cocorum ei sit arte communis. Quod vero de bono, utili, iusto disserere philosophiae officium esse dicunt, non obstat. Nam cum philosophum dicunt, hoc accipi volunt virum bonum. Quare igitur oratorem, quem a bono viro non separo, in eadem materia versari mirer; cum praesertim primo libro iam ostenderim, philosophos omissam hanc ab oratoribus partem occupasse, quae rhetorices propria semper fuisset, ut illi potius in nostra materia versentur? Denique cum sit dialectices materia de rebus subiectis disputare, sit autem dialectice oratio concisa: cur non eadem perpetuae quoque materia videatur?

Solet a quibusdam et illud opponi: *Omnium igitur artium peritus erit orator, si de omnibus ei dicendum est.* Possem hic Ciceronis respondere verbis, apud quem hoc invenio: *Mea quidem sententia nemo esse poterit omni laude cumulatus orator, nisi erit omnium rerum magnarum atque artium scientiam consecutus;* sed mihi satis est eius esse oratorem rei, de qua dicet, non inscium. Neque enim omnes causas novit, et debet posse de omnibus dicere. De quibus ergo dicet? De quibus didicit. Similiter de artibus quoque, de quibus dicendum erit, interim discet; et de quibus didicerit, dicet. Quid ergo? non faber de fabrica melius aut de musicae musicus? Si nesciat orator, quid sit, de quo quaeratur, plane melius. Nam et litigator rusticus illiteratusque de causa sua melius, quam orator, qui nesciet, quid in lite sit; sed accepta a musico, a fabro, sicut a litigatore melius orator quam ipse, qui docuerit. Verum et faber, cum de fabrica, et musicus, cum de musica, si quid confirmationem desideraverit, dicet. Non quidem erit orator, sed faciet illud quasi orator, sicut cum vulnus imperitus deligabit, non erit medicus sed faciet ut medicus. An huiusmodi res neque in laudem neque in deliberationem neque in iudicium veniunt? Ergo cum de faciendo portu Ostiensi deliberatum est, non debuit dicere sententiam orator? atqui opus erat ratione architectorum. Livores et tumores in corpore cruditalis an veneni signa sint, non tractat orator? at est id ex ratione medicinae. Circa mensuras et numeros non ver-

sabitur? dicamus has geometriae esse partes. Equidem omnia fere credo posse casu aliquo venire in officium oratoris; quod si non accidet, non erunt ei subiecta.

- 20 Ita sic quoque recte diximus, materiam rhetorices esse omnes res ad dicendum ei subiectas; quod quidem probat etiam sermo communis. Nam cum aliquid, de quo dicamus, accepimus, positam nobis esse materiam
21 frequenter etiam praefatione testamur. Gorgias quidem adeo rhetori de omnibus rebus putavit esse dicendum, ut se in auditoriis interrogari pateretur, qua quisque de re vellet. Hermagoras quoque, dicendo materiam esse in causa et in
22 quaestionibus, omnes res subiectas erat complexus. Sed quaestiones si negat ad rhetoricen pertinere, dissentit a nobis; si autem ad rhetoricen pertinent, ab hoc quoque adiuvamur. Nihil est enim, quod non in causam aut quaestionem
23 cadat. Aristoteles tres faciendo partes orationis, iudicalem, deliberativam, demonstrativam, paene et ipse oratori subiecit omnia; nihil enim non in haec cadit.
- 24 Quaesitum a paucissimis et de instrumento est. Instrumentum voco, sine quo formari materia in id, quod velimus effici, opus non possit. Verum hoc ego non artem credo egere sed artificem. Neque enim scientia desiderat instrumentum, quae potest esse consummata, etiamsi nihil faciat, sed ille artifex, ut caelator caelum et pictor penicilla. Itaque haec in eum locum, quo de oratore dicturi sumus, differamus.

LIBER III.

Libro tertio haec continentur: Prooemium de scriptoribus artis rhetoricae. Quod initium rhetorices. Quae partes. Quae genera causarum. Quibus contineatur omnis ratio dicendi. Quid sit status. Unde ducatur. Quot et qui status. De laude et vituperatione. De suasoria et prosopopoeia. De partibus causarum iudicialium. De generibus earundem. Quid sit quaestio, ratio, indicatio, continens, et quatenus necessaria.

PROOEMIUM DE SCRIPTORIBUS ARTIS RHETORICAE.

I. Quoniam in libro secundo quaesitum est, quid esset rhetorice et quis finis eius; artem quoque esse eam et utilem et virtutem, ut vires nostrae tulerunt, ostendimus; materiamque ei res omnes, de quibus dicere oporteret, subiecimus: iam hinc, unde coeperit, quibus constet, quo quaeque in ea modo invenienda atque tractanda sint, exequar; intra quem modum plerique scriptores Artium constiterunt, adeo ut Apollodorus contentus solis iudicialibus fuerit. Nec sum 2 ignarus, hoc a me praecipue, quod hic liber inchoat, opus studiosos eius desiderasse, ut inquisitione opinionum, quae diversissimae fuerunt, longe difficillimum, ita nescio an minimae legentibus futurum voluptati; quippe quod prope nudam praeceptorum traditionem desideret. In ceteris enim 3 admiscere temptavimus aliquid nitoris, non iactandi ingenii gratia, namque in id eligi materia poterat uberior, sed ut hoc ipso alliceremus magis iuventutem ad cognitionem eorum, quae necessaria studiis arbitrabamur, si ducti iucunditate aliqua lectionis libentius discerent ea, quorum ne ieiuna atque arida traditio averteret animos et aures praesertim 4 dicit praecepta philosophiae carmine esse complexum; namque hac, ut est notum, similitudine utitur:

Ac veluti pueris absinthia taetra medentes

Cum dare conantur, prius oras pocula circum

Aspirant mellis dulci flavoque liquore,

et quae sequuntur. Sed nos veremur, ne parum hic liber 5 mellis et absinthii multum habere videatur, sitque salubrior

studiis quam dulcior. Quin etiam hoc timeo, ne ex eo minore gratiam ineat, quod pleraque non inventa per me sed ab aliis tradita continebit; habeat etiam quosdam, qui contra sentiant et adversentur, propterea quod plurimi auctores, quamvis eodem tenderent, diversas tamen vias muniverunt 6 atque in suam quisque induxit sequentes. Illi autem probant quaecumque ingressi sunt iter, nec facile inculcatas pueris persuasiones mutaveris, quia nemo non didicisse 7 vult quam discere. Est autem, ut procedente libro patebit, infinita dissensio auctorum, primo ad ea, quae rudia atque imperfecta adhuc erant, adiciantibus quod invenissent scriptoribus, mox, ut aliquid sui viderentur afferre, etiam recta mutantibus.

8 Nam primus post eos, quos poetae tradiderunt, movisse aliqua circa rhetoricen Empedocles dicitur. Artium autem scriptores antiquissimi Corax et Tisias Siculi, quos insecutus est vir eiusdem insulae Gorgias Leontinus, Empedocles, 9 ut traditur, discipulus. Is beneficio longissimae aetatis (nam centum et novem vixit annos) cum multis simul floruit, ideoque et illorum, de quibus supra dixi, fuit aemulus et ultra 10 Socraten usque duravit. Thrasymachus Chalcedonius cum hoc et Prodicus Cius et Abderites Protagoras, a quo decem milibus denariorum didicisse artem, quam edidit, Euathlus dicitur, et Hippias Eleus et, quem Palameden Plato appellat, Al 11 cidamas Elaites. Antiphon quoque et orationem primum omnium scripsit et nihilo minus Artem et ipse composuit et pro se dixisse optime est creditus; etiam Polycrates, a quo scriptam in Socraten diximus orationem, et Theodorus Byzantius 12 ex his et ipse, quos Plato appellat *λογοδαιδάλους*. Horum primi communes locos tractasse dicuntur Protagoras, Gorgias; affectus Prodicus et Hippias et idem Protagoras et Thrasymachus. Cicero in Bruto negat ante Periclea scriptum quidquam, quod ornatum oratorium habeat; eius aliqua ferri. Equidem non reperio quidquam tanta eloquentiae fama dignum; ideoque minus miror esse, qui nihil ab eo scriptum putent, haec autem, quae feruntur, ab aliis esse 13 composita. His successere multi, sed clarissimus Gorgiae auditorum Isocrates; quanquam de praeceptore eius inter

auctores non convenit, nos autem Aristoteli credimus. Hinc velut diversae secari coeperunt viae. Nam et Isocratis prae-14 stantissimi discipuli fuerunt in omni studiorum genere, eoque iam seniore (octavum enim et nonagesimum implevit annum) pomeridianis scholis Aristoteles praecipere artem oratoriam coepit, noto quidem illo (ut traditur) versu ex Philocteta frequenter usus: *Αισχρόν σιωπᾶν, Ἰσοκράτην ἐὼν λέγειν*, Turpe esse tacere et Isocraten pati dicere. Ars est utriusque, sed pluribus eam libris Aristoteles complexus est. Eodem tempore Theodectes fuit, de cuius opere supra dictum est. Theophrastus quoque Aristotelis discipulus de 15 rhetorice diligenter scripsit, atque hinc vel studiosius philosophi quam rhetores praecipueque Stoicorum ac Peripateticorum principes. Fecit deinde velut propriam Hermagoras 16 viam, quam plurimi sunt secuti; cui maxime par atque aemulus videtur Athenaeus fuisse. Multa post Apollonius Molon, multa Areus, multa Caecilius et Halicarnasseus Dionysius. Praecipue tamen in se converterunt studia Apollodorus Per-17 gamenus, qui praeceptor Apolloniae Caesaris Augusti fuit, et Theodorus Gadareus, qui se dici maluit Rhodium, quem studiose audisse, cum in eam insulam secessisset, dicitur Tiberius Caesar. Hi diversas opiniones tradiderunt, appella-18 tique inde *Apollodorei* ac *Theodorei* ad morem certas in philosophia sectas sequendi. Sed Apollodori praecepta magis ex discipulis cognoscas, quorum diligentissimus in tradendo fuit Latine Gajus Valgius, Graece Atticus. Nam ipsius sola videtur Ars edita ad Mattium, quia ceteras missa ad Domitium epistola non agnoscit. Plura scripsit Theodorus, cuius auditorem Hermagoran sunt qui viderint.

Romanorum primus (quantum ego quidem sciam) con-19 didit aliqua in hanc materiam M. Cato ille Censorius, post M. Antonius inchoavit; nam hoc solum opus eius atque id ipsum imperfectum manet. Secuti minus celebres; quorum memoriam, si quo loco res poscet, non omittam. Praeci-20 puum vero lumen sicut eloquentiae ita praeceptis quoque eius dedit, unicum apud nos specimen orandi docendique oratorias artes, M. Tullius; post quem tacere modestissimum foret, nisi et rhetoricos suos ipse adolescenti sibi elapsos

diceret, et in oratoriis haec minora, quae plerumque desiderantur, sciens omisisset. Scripsit de eadem materia non pauca Cornificius, aliqua Stertinius, nonnihil pater Gallo; accuratius vero priores [Gallione] Celsus et Laenas et aetatis nostrae Verginius, Plinius, Tullius. Sunt et hodie clari eiusdem operis auctores, qui si omnia complexi forent, consulissent labori meo; sed parco nominibus viventium; veniet eorum laudi suum tempus, ad posteros enim virtus durabit, non perveniet invidia.

22 Non tamen post tot ac tantos auctores pigebit meam quibusdam locis posuisse sententiam. Neque enim me cuiusquam sectae velut quadam superstitione imbutus addixi, et electuris quae volent facienda copia fuit, sicut ipse plurimum in unum confero inventa; ubicunque ingenio non erit locus, curae testimonium meruisse contentus.

QUOD INITIUM RHETORICES.

II. Nec diu nos moretur quaestio, quae rhetorices origo sit. Nam cui dubium est, quin sermonem ab ipsa rerum natura geniti protinus homines acceperint, (quod certe principium est eius rei) huic studium et incrementum dederit utilitas, summam ratio et exercitatio? Nec video, quare curam dicendi putent quidam inde coepisse, quod hi, qui in discrimen aliquod vocabantur, accuratius loqui defendendi sui gratia instituerint. Haec enim ut honestior causa, ita non utique prior est, cum praesertim accusatio praecedat defensionem; nisi quis dicet, etiam gladium fabricatum ab eo prius, qui ferrum in tutelam sui quam qui in perniciem alterius comparavit. Initium ergo dicendi dedit natura, initium artis observatio. Homines enim, sicuti in medicina, cum viderent alia salubria alia insalubria, ex observatione eorum effecerunt artem: ita, cum in dicendo alia utilia alia inutilia deprehenderent, notarunt ea ad imitandum vitandumque, et quaedam secundum rationem eorum adiecerunt ipsi quoque; haec confirmata sunt usu, tum quae sciebat quisque docuit.

4 Cicero quidem initium orandi conditoribus urbium ac legumlatoribus dedit, in quibus fuisse vim dicendi necesse est; cur tamen hanc primam originem putem, non video, cum sint ad-

huc quaedam vagae et sine urbibus ac sine legibus gentes, et tamen qui sunt in his nati et legationibus fungantur et acculent aliqua atque defendant et denique alium alio melius loqui credant.

QUAE PARTES.

III. Omnis autem orandi ratio, ut plurimi maximique auctores tradiderunt, quinque partibus constat, inventione, dispositione, elocutione, memoria, pronuntiatione sive actione, utroque enim modo dicitur. Omnis vero sermo, quo quidem voluntas aliqua enuntiatur, habeat necesse est rem et verba. Hic si est brevis et una conclusio finitus, nihil fortasse ultra desideret; at oratio longior plura exigit. Non tantum enim refert, quid et quo modo dicamus sed etiam quo loco; opus ergo est dispositione. Sed neque omnia, quae res postulat, dicere neque suo quaque loco poterimus, nisi adiuvante memoria; quapropter ea quoque pars quarta erit. Verum haec cuncta corripit ac propemodum perdit indecora vel voce vel gestu pronuntiatio. Huic quoque igitur tribuendus est necessario quintus locus.

Nec audiendi quidam, quorum est Albutius, qui tris modo primas esse partes volunt, quoniam memoria atque actio natura non arte contingant, (quarum nos praecepta suo loco dabimus) licet Thrasymachus quoque idem de actione crediderit. His adiecerunt quidam sextam partem, ita ut inventioni iudicium subnecterent, quia primum esset invenire deinde iudicare. Ego porro ne invenisse quidem credo eum, qui non iudicavit; neque enim contraria, communia, stulta invenisse dicitur quisquam sed non vitasse. Et Cicero quidem in Rhetoricis iudicium subiecit inventioni; mihi autem adeo tribus primis partibus videtur esse permixtum, (nam neque dispositio sine eo neque elocutio fuerit) ut pronuntiationem quoque vel plurimum ex eo mutuari putem. Quod hoc audacius dixerim, quod in Partitionibus oratoriis ad easdem, de quibus supra dictum est, quinque pervenit partes. Nam cum dupliciter primum divisisset, in inventionem atque elocutionem: res ac dispositionem inven-

- lioni, verba et pronuntiationem elocutioni dedit; quintam quoque constituit, communem ac velut custodem omnium, memoriam. Idem in Oratore quinque rebus constare eloquentiam dicit, in quibus postea scriptis certior eius sententia est. Non minus mihi cupidi novitatis alicuius videntur fuisse, qui adiecerunt ordinem, cum dispositionem dixissent; quasi aliud sit dispositio quam rerum ordine quam optimo collocatio. Dion inventionem modo et dispositionem tradidit sed utramque duplicem, rerum et verborum, ut sit elocutio inventionis, pronuntiatio dispositionis, his quinta pars memoria accedat; Theodori fere inventionem duplicem, rerum atque elocutionis, deinde tris ceteras partes.
- 9 Hermagoras iudicium, partitionem, ordinem, quaeque elocutionis sunt, subiicit *oekonomiae*, quae Graece appellata ex cura rerum domesticarum et hic per abusionem posita nomine Latino caret.
- 10 Est et circa hoc quaestio, quod memoriam in ordine partium quidam inventioni quidam dispositioni subiunxerunt; nobis quartus eius locus maxime placet. Non enim tantum inventa tenere, ut disponamus, nec disposita, ut eloquamur, sed etiam verbis formata memoriae mandare debemus. Hac enim omnia, quaecunque in orationem collata sunt, continentur.
- 11 Fuerunt etiam in hac opinione non pauci, ut has non rhetorices partes esse existimarent sed opera oratoris; eius enim esse invenire, disponere, eloqui et cetera. Quod si accipimus, nihil arti relinquimus. Nam bene dicere est oratoris, rhetorice tamen erit bene dicendi scientia; vel, ut alii putant, artificis est persuadere, vis autem persuadendi artis. Ita invenire quidem et disponere oratoris, inventio
- 13 autem et dispositio rhetorices propria videri potest. In eo plures dissenserunt, utrumne hae partes essent rhetorices an eiusdem opera an, ut Athenaeus credit, elementa, quae vocant *στοιχία*. Sed neque elementa recte quis dixerit, alioqui tantum initia erunt, ut mundi vel humor vel ignis vel materia vel corpora insecabilia; nec operum recte nomen accipient, quae non ab aliis perficiuntur sed aliud ipsa perficiunt. Partes igitur sunt. Nam cum sit ex his rhetorice,

fieri non potest, ut, cum totum ex partibus constet, non sint partes totius, ex quibus constat. Videntur autem mihi, qui haec opera dixerunt, eo quoque moti, quod in alia rursus divisione nollent in idem nomen incidere, partes enim rhetorices esse dicebant laudativam, deliberativam, iudiciale. Quae si partes sunt, materiae sunt potius quam artis. Namque in his singulis rhetorice tota est; quia et inventionem et dispositionem et elocutionem et memoriam et pronuntiationem quaecunque earum desiderat. Itaque quidam genera tria rhetorices dicere maluerunt, optime autem ii, quos secutus est Cicero, genera causarum.

QUAE GENERA CAUSARUM.

IV. Sed tria an plura sint, ambigitur. Nec dubie prope omnes utique summae apud antiquos auctoritatis scriptores Aristotelem secuti, qui nomine tantum alio *contionalem* pro deliberativa appellat, hac partitione contenti fuerunt. Verum et tum leviter est temptatum, cum apud Graecos quosdam tum apud Ciceronem in libris de Oratore, et nunc maximo temporum nostrorum auctore prope impulsus, ut non modo plura haec genera sed paene innumerabilia videantur. Nam si laudandi ac vituperandi officium in parte tertia ponimus: in quo genere versari videbimur, cum querimur, consolamur, mitigamus, concitamus, terremus, confirmamus, praecipimus, obscure dicta interpretamur, narramus, deprecamur, gratias agimus, gratulamur, obiurgamus, maledicimus, describimus, mandamus, renuntiamus, optamus, opinamur et plurima alia? ut mihi in illa vetere persuasione permanenti velut petenda sit venia, quaerendumque, quo moti priores rem tam late fusam tam breviter astrinxerint. Quos qui errasse putant, hoc secutos arbitrantur, quod in his fere versari tum oratores videbant; nam et laudes ac vituperationes scribebantur, et *ἐπιταξιῶν* dicere erat moris, et plurimum in consiliis ac iudiciis insumebatur operae, ut scriptores Artium pro solis comprehenderint frequentissima. Qui vero defendunt, tria faciunt genera auditorum: unum, quod ad delectationem conveniat, alterum, quod consilium accipiat, tertium, quod de causis indicet. Mihi cuncta rimanti et talis

quaedam ratio succurrit, quod omne orationis officium aut in
7 iudiciis est aut extra iudicia. Eorum, de quibus iudicio
quaeritur, manifestum est genus; ea, quae ad iudicem non
veniunt, aut praeteritum habent tempus, aut futurum; prae-
terita laudamus aut vituperamus, de futuris deliberamus.
8 Item omnia, de quibus dicendum est, aut certa sint necesse
est aut dubia. Certa, ut cuique est animus, laudat aut cul-
pat; ex dubiis partim nobis ipsis ad electionem sunt libera,
de his deliberatur; partim aliorum sententiae commissa, de
his lite contenditur.

9 Anaximenes iudicalem et contionalem generales par-
tes esse voluit, septem autem species: hortandi, dehor-
tandi, laudandi, vituperandi, accusandi, defendendi,
exquirendi, quod ἐξεταστικὸν dicit; quarum duae primae
deliberativi, duae sequentes demonstrativi, tres ultimae iudi-
10 cialis generis sunt partes. Protagoran transeo, qui interro-
gandi, respondendi, mandandi, precandi, quod εὐχολῆν
dixit, partes solas putat. Plato in Sophiste iudiciali et con-
tionali tertiam adiecit προσωμνητικὴν, quam sane permitta-
mus nobis dicere sermocinatricem; quae a forensi ratione
disiungitur et est accommodata privatis disputationibus, cuius
11 vis eadem profecto est quae dialecticae. Isocrates in omni
genere inesse laudem ac vituperationem existimavit.

Nobis et tutissimum est auctores plurimos sequi, et ita
12 videtur ratio dictare. Est igitur, ut dixi, unum genus, quo
laus ac vituperatio continetur, sed est appellatum a parte
meliore laudativum; idem alii demonstrativum vocant.
Utrumque nomen ex Graeco creditur fluxisse, nam ἐγκωμια-
13 στικὸν aut ἐπιδεικτικὸν dicunt. Sed mihi ἐπιδεικτικὸν non
tam demonstrationis vim habere quam ostentationis videtur
et multum ab illo ἐγκωμιαστικῷ differre; nam ut continet
laudativum in se genus, ita non intra hoc solum consistit.
14 An quisquam negaverit Panegyricos ἐπιδεικτικῶς esse?
Atqui formam suadendi habent et pleraque de utilitatibus
Graeciae loquuntur. Ut causarum quidem genera tria sint,
sed ea tum in negotiis tum in ostentatione posita. Nisi forte
non ex Graeco mutantur demonstrativum vocant, verum id
sequuntur, quod laus ac vituperatio quale sit quidque de-

monstrat. Alterum est deliberativum, tertium iudi- 15
ciale. Ceterae species in haec tria incident genera, nec in-
venietur ex his ulla, in qua non laudare ac vituperare, sua-
dere ac dissuadere, intendere quid vel depellere debeamus.
Illa quoque sunt communia, conciliare, narrare, docere,
augere, minuere, concitandis componendisve affectibus ani-
mos audientium fingere.

Ne his quidem accesserim, qui laudativam materiam 16
honestorum, deliberativam utilium, iudicalem iustorum
quaestione contineri putant, celeri magis ac rotunda usi di-
tributione quam vera. Stant enim quodammodo mutuis auxi-
liis omnia. Nam et in laude iustitia utilitasque tractatur et
in consiliis honestas, et raro iudicalem inveneris causam,
in cuius non parte aliquid eorum, quae supra diximus, re-
periatur.

QUIBUS CONTINEATUR OMNIS RATIO DICENDI.

V. Omnis autem oratio constat aut ex his, quae signi-
ficantur, aut et his, quae significant, id est rebus et ver-
bis. Facultas orandi consummatur natura, arte, exer-
citatione, cui partem quartam adiciunt quidam imitationis,
quam nos arti subiicimus. Tria sunt item, quae praestare 2
debeat orator, ut doceat, moveat, delectet. Haec enim
clarior divisio quam eorum, qui totum opus in res et in
affectus partiuntur. Non semper autem omnia in eam, quae
tractabitur, materiam cadent. Erunt enim quaedam remotae
ab affectibus, qui ut non ubique habent locum, ita quocun-
que irruerunt, plurimum valent. Praestantissimis auctoribus 3
placet, alia in rhetorice esse, quae probationem desiderent,
alia quae non desiderent, cum quibus ipse consentio. Qui-
dam vero, ut Celsus, de nulla re dicturum oratorem, nisi
de qua quaeratur, existimant, cui cum maxima pars scripto-
rum repugnat tum etiam ipsa partitio; nisi forte laudare,
quae constet esse honesta, et vituperare, quae ex confesso
sint turpia, non est oratoris officium.

Illud iam omnes fatentur, esse quaestiones in scripto 4
et in non scripto; in scripto de iure, in non scripto de
re. Illud rationale hoc legale genus Hermagoras atque eum

5 secuti vocant, id est *νομικὸν* et *λογικὸν*. Idem sentiunt, qui omnem quaestionem ponunt in *rebus* et in *verbis*.

Item convenit, quaestiones esse aut infinitas aut finitas. Infinitae sunt, quae remotis personis et temporibus et locis ceterisque similibus in utramque partem tractantur, quod Graeci *ῥέσις* dicunt, Cicero *propositum*, alii *quaestiones universales civiles*, alii *quaestiones philosopho convenientes*, Athenaeus *partem causae* appellat. Hoc genus Cicero scientia et actione distinguit, ut sit scientiae, *An providentia mundus regatur?* actionis, *An accedendum ad rempublicam administrandam?* Prius trium generum, an sit? quid sit? quale sit? omnia enim haec ignorari possunt; sequens duorum, quo modo adipiscamur? quo modo 7 utamur? Finitae autem sunt ex complexu rerum, personarum, temporum, ceterorumque; quae *ὑποθέσεις* a Graecis dicuntur, causae a nostris. In his omnis quaestio videtur 8 circa res personasque consistere. Amplior est semper infinita, inde enim finita descendit. Quod ut exemplo pateat, infinita est, *An uxor ducenda?* finita, *An Catoni ducenda?* ideoque esse suavior potest. Sed etiam remotae a personis propriis ad aliquid referri solent. Est enim simplex, *An respublica administranda?* refertur ad aliquid, *An in tyrannide administranda?* Sed hic quoque subest velut latens persona, tyrannus enim geminat quaestionem, subestque et temporis et qualitatis tacita vis; nondum tamen hoc proprie dixeris causam. Hae autem, quas infinitas voco, et generales appellantur; quod si est verum, finitae speciales erunt. In omni autem speciali utique inest generalis, ut 10 quae sit prior. Ac nescio an in causis quoque, quidquid in quaestionem venit qualitatis, generale sit. *Milo Clodium occidit, iure occidit insidiatorem;* nonne hoc quaeritur, *An sit ius insidiatorem occidendi?* Quid in coniecturis? non illa generalia, *An causa sceleris odium?* *cupiditas?* *An tormentis credendum?* *Testibus an argumentis maior fides habenda?* Nam finitione quidem comprehendi nihil non 11 in universum, certum erit. Quidam putant etiam eas thesis posse aliquando nominari, quae personis causisque contineantur, aliter tantummodo positas: ut causa sit, cum *Ore-*

stes accusatur: thesis, *An Orestes recte sit absolutus;* cuius generis est, *An Cato recte Marciam Hortensio tradiderit.* Hi thesin a causa sic distinguunt, ut illa sit spectativae partis, haec activae; illic enim veritatis tantum gratia disputari, hic negotium agi.

Quaquam inutiles quidam oratori putant universales 12 quaestiones, quia nihil prosit, quod constet, *ducendam esse uxorem vel administrandam rempublicam*, si quis vel aetate vel valetudine impediatur. Sed non omnibus eiusmodi quaestionibus sic occurri potest, ut illis, *sitne virtus finis?* *regaturne providentia mundus?* Quin etiam in his, 13 quae ad personam referuntur, ut non est satis generalem tractasse quaestionem, ita perveniri ad speciem nisi illa prius excussa non potest. Nam quomodo, *An sibi uxor ducenda sit*, deliberabit Cato, nisi constiterit, *uxores esse ducendas?* Et quomodo, *An ducere debeat Marciam*, quaeretur, nisi *Catoni ducenda uxor est?* Sunt tamen in 14 scripti nomine Hermagorae libri, qui confirmant illam opinionem, sive falsus est titulus sive alius hic Hermagoras fuit. Nam eiusdem esse quomodo possunt, qui de hac arte mirabiliter multa composuit, cum, sicut ex Ciceronis quoque rhetorico primo manifestum est, materiam rhetorices in thesis et causas diviserit? Quod reprehendit Cicero, ac thesin nihil ad oratorem pertinere contendit totumque hoc genus quaestiones ad philosophos refert. Sed me liberavit 15 respondendi verecundia, et quod ipse hos libros improbat, et quod in oratore atque his, quos de oratore scripsit, et Topicis praecipit, ut a propriis personis atque temporibus avocemus controversiam: *quia latius dicere liceat de genere quam de specie, et, quod in universo probatum sit, in parte probatum esse necesse sit.* Status autem in hoc 16 omne genus materiae iidem, qui in causas, cadunt. Adhuc adicitur, alias esse quaestiones in rebus ipsis, alias, quae ad aliquid referantur: illud, *An uxor ducenda?* hoc, *An seni ducenda?* illud, *An fortis?* hoc, *An fortior?* et similia.

Causam finit Apollodorus, ut interpretatione Valgii 17 discipuli eius utar, ita: *Causa est negotium omnibus suis*

partibus spectans ad quaestionem; aut: *Causa est negotium, cuius finis est controversia*. Ipsum deinde negotium sic finit: *Negotium est congregatio personarum, locorum, temporum, causarum, modorum, casuum, factorum, instrumentorum, sermonum, scriptorum et non scriptorum*.
 18 Causam nunc intelligamus *ὑπόθεσιν*, negotium *περίστασιν*. Sed et ipsam causam quidam similiter finierunt, ut Apollodorus negotium. Isocrates autem causam esse ait *quaestionem finitam civilem aut rerum controversiam in personarum finitarum complexu*; Cicero his verbis: *Causa certis personis, locis, temporibus, actionibus, negotiis cernitur, aut in omnibus aut in plerisque eorum*.

QUID SIT STATUS.

VI. Ergo cum omnis causa contineatur aliquo statu, priusquam dicere aggredior, quo modo genus quodque causae sit tractandum: id quod est commune omnibus, quid sit status et unde ducatur et quot et qui sint, intuendum puto. Quanquam id nonnulli ad iudiciales tantum pertinere materias putaverunt, quorum inscitiam, cum omnia
 2 tria genera fuero executus, res ipsa deprehendet. Quod nos *statum* id quidam *constitutionem* vocant, alii *quaestionem*, alii *quod ex quaestione appareat*, Theodorus *caput* id est *κεφάλαιον γενικώτατον*, ad quod referantur omnia. Quorum diversa appellatio, vis eadem est; nec interest discentium, quibus quidque nominibus appelletur, dum res
 3 ipsa manifesta sit. *Statum* Graeci *στάσις* vocant, quod nomen non primum ab Hermagora traditum putant, sed alii ab Naucratis, Isocratis discipulo, alii a Zopyro Glazomenio; quanquam videtur Aeschines quoque in oratione contra Ctesiphontem uti hoc verbo, cum a iudicibus petit, ne Demostheni permittant evagari sed eum dicere de ipso causae statu
 4 cogant. Quae appellatio dicitur ducta vel ex eo, quod ibi sit primus causae congressus, vel quod in hoc causa consistat. Et nominis quidem haec origo; nunc quid sit. *Statum* quidam dixerunt *primam causarum conflictionem*; quos
 5 recte sensisse, parum elocutos puto. Non enim est status prima conflictio, *fecisti, non feci*; sed quod ex prima con-

fictione nascitur, id est genus quaestionis, *fecisti, non feci, an fecerit? Hoc fecisti, non hoc feci, quid fecerit?* Quia ex his apparet, illud coniectura, hoc finitione quaerendum, atque in eo pars utraque insistit: erit quaestio coniecturalis vel finitivi status. Quid? si enim dicat quis, *sonus est duorum inter se corporum conflictio*: erret, ut opinor, non enim sonus est conflictio sed ex conflictione. Sed hoc levius; intelligitur enim utcumque dictum. Inde vero ingens male interpretantibus innatus est error, qui, quia primam conflictionem legerant, crediderunt statum semper ex prima quaestione ducendum; quod est vitiosissimum. Nam quaestio
 7 nulla non habet utique statum, constat enim ex intentione et depulsione; sed aliae sunt propriae causarum, de quibus ferenda sententia est, aliae adductae extrinsecus, aliquid tamen ad summam causae conferentes, velut auxilia quaedam, quo fit, ut in controversia una plures quaestiones esse
 8 dicantur. Harum porro plerumque levissima quaeque primo loco fungitur. Namque et illud frequens est, ut ea, quibus minus confidimus, cum tractata sunt, omittamus; interim sponte nostra velut donantes, interim ad ea, quae sunt potentiora, gradum ex his fecisse contenti. Simplex autem
 9 causa etiamsi varie defenditur, non potest habere plus uno, de quo pronuntietur, atque inde erit status causae, quod et orator praecipue sibi obtinendum et iudex spectandum maxime intelligit; in hoc enim causa consistet. Ceterum quaestionum possunt esse diversi. Quod ut brevissimo pateat
 10 exemplo: cum dicit reus, *Etiamsi feci, recte feci*, qualitatis utitur statu; cum adiicit, *sed non feci*, coniecturam movet. Semper autem firmiter est *non fecisse*, ideoque in eo statum esse iudicabo; quod dicerem, si mihi plus quam unum dicere non liceret. Recte igitur est appellata causarum
 11 prima conflictio non quaestionum. Nam et pro Rabirio Postumo Cicero primam partem orationis in hoc intendit, ut actionem competere equitem Romanum neget; secunda, nullam ad eum pecuniam pervenisse confirmat. *Statum* tamen in eo dicam fuisse, quod est potentius. Nec in causa Milo-
 12 nis circa primas quaestiones, quae sunt ante prooemium positae, iudicabo conflixisse causam; sed ubi totis viribus insi-

diator Clodius ideoque iure interfectus ostenditur. Et hoc est, quod ante omnia constituere in animo suo debeat orator, etiamsi pro causa plura dicturus est, quid maxime liquere iudici velit. Quod tamen, ut primum cogitandum, ita non utique primum dicendum erit.

UNDE DUCATUR.

- 13 Alii statum crediderunt primam eius, cum quo ageretur, deprecationem. Quam sententiam his verbis Cicero complectitur: *in quo primum insistit quasi ad repugnandum congressa defensio*. Unde rursus alia quaestio, an eum semper is faciat, qui respondet. Cui rei praecipue repugnat Cornelius Celsus dicens, non a depulsione sumi sed ab eo, qui propositionem suam confirmet; ut, si hominem occisum reus negat, status ab accusatore nascatur, quia is velit probare; si iure occisum reus dicit, translata probationis necessitate idem a reo fiat, et sit eius intentio. Cui non accedo equidem; nam est vero propius quod contra dicitur, nullam esse litem, si is, cum quo agatur, nihil respondeat, ideoque fieri statum a respondente. Mea tamen sententia varium id est, et accidit pro conditione causarum, quia et videri potest propositio aliquando statum facere, ut in coniecturalibus causis; utitur enim coniectura magis qui agit: (quo moti quidam eundem a reo *infertilem* esse dixerunt) et in syllogismo tota ratiocinatio ab eo est, qui intendit.
- 16 Sed quia videtur illis quoque necessitatem hos status exequendi facere qui negat, (is enim si dicat, *non feci*, coget adversarium coniectura uti; et si dicat, *non habes legem*, syllogismo) concedamus ex depulsione nasci statum. Nihilominus enim res eo revertetur, ut modo is qui agit, modo 17 is cum quo agitur, statum faciat. Sit enim accusatoris intentio, *Hominem occidisti*. Si neget reus, faciat statum qui negat. Quid si confitetur sed *iure a se adulterum* dicit *occisum*? nempe legem esse certum est quae permittat. Nisi aliquid accusator respondet, nulla lis est. *Non fuit*, inquit, *adulter*; ergo depulsio incipit esse actoris, ille statum faciet. Ita erit quidem status ex prima depulsione, sed 18 ea fiet ab accusatore non a reo. Quid? quod eadem quaestio

potest eundem vel accusatorem facere vel reum: *Qui artem ludicram exercuerit, in quattuordecim primis ordinibus ne sedeat*; qui se praetori in hortis ostenderat neque erat productus, sedit in quattuordecim ordinibus. Nempe intentio 19 est: *Artem ludicram exercuisti*; depulsio: *Non exercui artem ludicram*; quaestio: *Quid sit artem ludicram exercere?* Si accusabitur theatri lege, depulsio erit rei; si excitatus fuerit de spectaculis et aget iniuriarum, depulsio erit accusatoris. Frequentius tamen illud accidet, quod est 20 a plurimis traditum. Effugerunt has quaestiones qui dixerunt, statum esse id, quod appareat ex intentione et depulsione, ut *Fecisti*, *Non feci* aut *Recte feci*. Viderimus tamen, utrum id sit status an in eo status. Hermagoras statum vocat, per quem subiecta res intelligatur et ad quem probationes etiam partium referantur. Nostra opinio semper haec fuit: cum essent frequenter in causa diversi quaestionum status, in eo credere statum causae, quod esset in ea potentissimum et in quo maxime res verteretur. Id si quis *generalem quaestionem* vel *caput generale* dicere malet: cum hoc mihi non erit pugna, non magis, quam si aliud adhuc, quo idem intelligatur, eius rei nomen invenerit, quamquam tota volumina in hanc disputationem impendisse multos sciam; nobis statum dici placet. Sed cum in aliis omnibus 22 inter scriptores summa dissensio est, tum in hoc praecipue videtur mihi studium quoque diversa tradendi fuisse; adeo, nec quis numerus nec quae nomina, quive generales quive speciales sint status, convenit.

Ac primum Aristoteles elementa decem constituit, circa quae versari videatur omnis quaestio. *Ovōlov*, quam Plautus *essentiam* vocat, neque sane aliud est eius nomen Latinum; sed ea quaeritur, an sit? Qualitatem, cuius apertus intellectus est. Quantitatem, quae dupliciter a posterioribus divisa est, quam magnum et quam multum sit? Ad aliquid, unde ducta est translatio et comparatio. Post 24 haec Ubi et Quando; deinde Facere, Pati, Habere, quod est quasi armatum esse, vestitum esse. Novissime *ζεῖσθαι*, quod est compositum esse quodam modo, ut calere, stare, irasci. Sed ex his omnibus prima quattuor ad status perti-

- 25 nere, cetera ad quosdam locos argumentorum videntur. Alii novem elementa posuerunt, Personam, in qua de animo, corpore, extra positus quaeratur, quod pertinere ad coniecturae et qualitatis instrumenta video. Tempus, quod *χρόνον* vocant, ex quo quaestio, *an is, quem, dum addicta est, mater peperit, servus sit natus?* Locum, unde controversia videtur, *an fas fuerit tyrannum in templo occidere?* *An exulaverit, qui domi latuit?* Tempus iterum, quod *καιρόν* appellant; hanc autem videri volunt speciem illius temporis, ut aestatem vel hiemem; huic subiicitur *ille in pestilentia commissator*. Actum, id est *πράξιν*, quod eo referunt, *sciens commiserit an insciens? necessitate an casu?* et talia. Numerum, qui cadit in speciem quantitatis, *an Thrasybulo triginta praemia debeantur, quia tot tyrannos sustulerit?* Causam, cui plurimae subiacent lites, quotiens factum non negatur, sed quia iusta ratione sit factum, defenditur. *Τρόπον*, cum id, quod alio modo fieri licet, alio dicitur factum; hinc est *adulter loris caesus vel fame necatus*. Occasionem factorum, quod est apertius, quam ut vel interpretandum vel exemplo sit demonstrandum; 28 tamen *ἀφορμὰς ἔργων* vocant. Hi quoque nullam quaestionem extra haec putant. Quidam detrahunt duas partes, numerum et occasionem, et pro illo quem dixi actu subiiciunt res, id est *πράγματα*. Quae ne praeterisse viderer, satis habui attingere. Ceterum his nec status satis ostendi nec omnes contineri locos credo, quod apparebit diligentius legentibus, quae de utraque re dicam. Erunt enim plura multo, quam quae his elementis comprehenduntur.
- 29 Apud plures auctores legi, placuisse quibusdam, unum omnino statum esse coniecturalem. Sed quibus placuerit, neque illi tradiderunt neque ego usquam reperire potui. Rationem tamen hanc secuti dicuntur, quod res omnis signis colligeretur. Quo modo licet qualitatis quoque solum statum faciant, quia ubique, qualis sit cuiusque rei natura, quaeri potest. Sed utrocumque modo sequeretur summa confusio.
- 30 Neque interest, unum quis statum faciat an nullum, si omnes causae sunt condicionis eiusdem. Coniectura dicta est a coniectu, id est directione quadam rationis ad veritatem,

unde etiam somniorum atque omnium interpretes coniectores vocantur. Appellatum tamen est hoc genus varie, sicut sequentibus apparebit.

QUOT ET QUI STATUS.

Fuerunt, qui duos status facerent: Archedemus con-31 iecturalem et finitivum, exclusa qualitate, quia sic de ea quaeri existimabat, quid esset iniquum? quid iniustum? quid dicto audientem non esse? quod vocat *de eodem et alio*. Huic diversa sententia eorum fuit, qui duos quidem status 32 esse voluerunt sed unum infitiale, alterum iuridiciale. Infitalis est, quem dicimus coniecturalem, cui ab infitiando nomen alii in totum dederunt, alii in partem, quia accusatorem coniectura, reum infitiatione uti putaverunt. Iuridici-33 cialis est qui Graece dicitur *δικαιολογικός*. Sed quemadmodum ab Archedemo qualitas exclusa est, sic ab his repudiata finitio. Nam subiiciunt eam iuridicali, quaerendumque arbitratur, iustumne sit, sacrilegium appellari quod obiciatur, vel furtum vel amentiam. Qua in opinione Pamphilus fuit, 34 sed qualitatem in pluram partitus est; plurimi deinceps, mutatis tantum nominibus, in rem de qua constet, et in rem de qua non constet. Nam est verum; nec aliter fieri potest, quam ut aut certum sit factum esse quid aut non sit; si non est certum, coniectura sit, si certum est, reliqui status. Nam idem dicit Apollodorus, cum quaestionem aut in rebus 35 extra positus, quibus coniectura explicatur, aut in nostris opinionibus existimat positam, quorum illud *πραγματικόν* hoc *περὶ ἐννοίας* vocat; idem, qui *ἀπόληπτον* et *προληπτικόν* dicunt, id est dubium et praesumptum, quo significatur de quo liquet. Idem Theodorus, qui de eo, An sit et de 36 accidentibus ei, quod esse constat, id est *περὶ οὐσίας καὶ συμβεβηκότων*, existimat quaeri. Nam in his omnibus prius genus coniecturam habet, sequens reliqua. Sed haec reliqua Apollodorus duo vult esse, qualitatem et de nomine id est finitivam; Theodorus, quid, quale, quantum, ad aliquid. Sunt qui et de eodem et de alio modo qualitatem esse modo 37 finitionem velint. In duo et Posidonius dividit, vocem et res. In voce quaeri putat, an significet, quid, quam multa,

quo modo? in rebus coniecturam, quod κατ' αἰσθησιν vocat, et qualitatem, et finitionem, cui nomen dat κατ' ἔννοιαν, et ad aliquid. Unde et illa divisio est, alia esse scripta alia
 38 inscripta. Celsus Cornelius duos et ipse fecit status generales, an sit? quale sit? Priori subiecit finitionem, quia aequae quaeratur, an sit sacrilegus, qui nihil se sustulisse de templo dicit, et qui privatam pecuniam confitetur sustulisse. Qualitatem in rem et scriptum dividit. Scripto quatuor partes legales, exclusa translatione; quantitatem et
 39 mentis quaestionem coniecturae subiecit. Est etiam alia in duos dividendi status ratio, quae docet, aut de substantia controversiam esse, aut de qualitate; ipsam porro qualitatem
 40 aut in summo genere consistere aut in succedentibus. De substantia est coniectura. Quaestio enim tractatur rei, an facta sit? an fiat? an futura sit? interdum etiam mentis; idque melius, quam quod iis placuit, qui statum eundem facti nominaverunt, tanquam de praeterito tantum et tantum
 41 de facto quaeretur. Pars qualitatis, quae est de summo genere, raro in iudicium venit, quale est, *idne sit honestum, quod vulgo laudatur*; succedentium autem aliae de communi appellatione, ut *sitne sacrilegus, qui pecuniam privatam ex templo furatus est?* aut de re denominata, ubi et factum esse certum est nec dubitatur, quid sit, quod factum est. Cui subiacent omnes de honestis, iustis, utilibus
 42 quaestiones. His etiam ceteri status contineri dicuntur, quia et quantitas modo ad coniecturam referatur, ut *Maiorne sol quam terra?* modo ad qualitatem, *Quanta poena quempiam quantore praemio sit affici iustum?* et translatio versetur
 43 circa qualitatem, et definitio pars sit translationis; quin et contrariae leges et ratiocinativus status, id est syllogismos, et plerumque scripti et voluntatis aequo nitantur; (nisi quod hic tertius aliquando coniecturam accipit, quid senserit legis constitutor) ambiguitatem vero semper coniectura explicari necesse sit, quia, cum sit manifestum, verborum intellectum esse duplicem, de sola quaeritur voluntate.
 44 A plurimis tres sunt facti generales status, quibus et Cicero in Oratore utitur, et omnia, quae aut in controversiam aut in contentionem veniant, contineri putat, Sitne?

Quid sit? Quale sit? quorum nomina apertiora sunt, quam ut dicenda sint. Idem Patrocles sentit. Tris fecit et
 44 M. Antonius his quidem verbis: *Paucae res sunt, quibus ex rebus omnes orationes nascuntur, factum non factum, ius iniuria, bonum malum.* Sed quoniam, quod iure dicimur fecisse, non hunc solum intellectum habet, ut lege, sed illum quoque, ut iuste fecisse videamur: secuti Antonium apertius voluerunt eosdem status distinguere. Itaque dixerunt coniecturalem, legalem, iuridicalem; qui et Verginio placent. Horum deinde fecerunt species, ita ut legali subii-
 46 cerent finitionem et alios, qui ex scripto ducuntur; legum contrariarum, quae ἀντινομία dicitur; et scripti et sententiae vel voluntatis, id est κατὰ θετόν καὶ διάνοιαν; et μετάληψιν, quam nos variae translative, transumptivae, transpositivae vocamus; συλλογισμόν, quem accipimus ratiocinativum vel collectivum; ambiguitatis, quae ἀμφιβολία nominatur; quos posui, quia et ipsi a plerisque status appellantur, cum quibusdam legales potius quaestiones eas dici placuerit.

Quatuor fecit Athenaeus, προτροπικὴν στάσιν vel
 47 παρορμητικὴν, id est exhortativum, qui suasoriae est proprius; συντελικὴν, qua coniecturam significari magis ex his, quae sequuntur, quam ex ipso nomine apparet; μεταλλατικὴν, ea finitio est, mutatione enim nominis constat; iuridicalem, eadem appellatione Graeca qua ceteri usus. Nam est, ut dixi, multa in nominibus differentia. Sunt qui ὑπαλ-
 48 λατικὴν translationem esse existiment, secuti hanc mutationis significationem. Fecerunt alii totidem status sed alios, An sit? Quid sit? Quale sit? Quantum sit? ut Caecilius et Theon. Aristoteles in rhetoricis, An sit, Quale, Quan-
 49 tum, et Quam multum sit? quaerendum putat. Quodam tamen loco finitionis quoque vim intelligit, quod dicit quaedam sic defendi, *Sustuli, sed non furtum feci; Percussi, sed non iniuriam feci.* Posuerat et Cicero in libris rhetoricis,
 50 facti, nominis, generis, actionis; ut in facto coniectura, in nomine finitio, in genere qualitas, in actione ius intelligeretur. Iuri subiecerat translationem. Verum hic legales quoque quaestiones alio loco tractat ut species actionis.

Fuerunt qui facerent quinque, coniecturam, finitio-
 51

nem, qualitatem, quantitatem, ad aliquid. Theodorus quoque, ut dixi, iisdem generalibus capitibus utitur, An sit? Quid sit? Quale sit? Quantum sit? Ad aliquid. Hoc ultimum maxime in comparativo genere versari putat, quoniam melius ac peius, maius et minus nisi alio relata non intelliguntur. Sed in illas quoque translativas, ut supra significavi, quaestiones incidit, An huic ius agendi sit? vel, facere aliquid conveniat? An contra hunc? An hoc tempore? 52 An sic? omnia enim ista referri ad aliquid necesse est. Alii sex status putant, coniecturam, quam *γένεσιν* vocant; et qualitatem; et proprietatem, id est *ιδιότητα*, quo verbo finitio ostenditur; et quantitatem, quam *ἀξίαν* dicunt; et comparisonem; et translationem, cuius adhuc novum nomen inventum est *μετάστασις*; novum, inquam, in statu, alioqui ab 54 Hermagora inter species iuridiciales usitatum. Aliis septem esse placuit; a quibus nec translatio nec quantitas nec comparatio recepta est, sed in horum trium locum subditae 55 quattuor legales adiectaeque tribus illis rationalibus. Alii pervenerunt usque ad octo, translatione ad septem superiores adiecta. A quibusdam deinde divisa ratio est, et status *rationales* appellarunt, quaestiones (quemadmodum supra dixi) *legales*, ut in illis de re in his de scripto quaereretur. Quidam in diversum hos status esse, illas quaestiones maluerunt. Sed alii rationales tres putaverunt, An sit? Quid sit? 56 Quale sit? Hermagoras solus quattuor, coniecturam, proprietatem, translationem, qualitatem, quam per accidentia, id est *κατὰ συμβεβηκός*, vocat, hac interpretatione, An illi accidat viro bono esse, vel malo? Hanc ita dividit, de appetendis et fugiendis, quae est pars deliberativa; de persona, ea ostenditur laudativa; negotialem, quam *πραγματικὴν* vocat, in qua de rebus ipsis quaeritur, remoto personarum complexu, ut, Sitne liber qui est in assertione? An divitiae superbiam pariant? An iustum quid, an bonum sit? Iuridicialem, in qua fere eadem sed certis destinatisque personis quaerantur: An ille iuste hoc fecerit, vel bene? 58 Nec me fallit, in primo Ciceronis rhetorico aliam esse loci negotialis interpretationem, cum ita scriptum sit: *Negotialis est, in qua, quid iuris ex civili more et aequitate sit,*

consideratur; cui diligentiae praeesse apud nos iuriconsulti existimantur. Sed quod ipsius de his libris iudicium 59 fuerit, supra dixi. Sunt enim velut regestae in hos commentarios, quos adolescens deduxerat, scholae, et si qua est in his culpa, tradentis est; sive eum movit id, quod Hermagoras prima in hoc loco posuit exempla ex quaestionibus iuris; sive quod Graeci *πραγματικούς* vocant iuris interpretes. Sed Cicero quidem his pulcherrimos illos de Oratore substituit, ideoque culpari, tanquam falsa praecipiat, non potest. Nos ad Hermagoran. Translationem hic primus omnium tradidit, quanquam semina eius quaedam citra nomen ipsum apud Aristotelen reperiuntur. Legales autem 61 quaestiones has fecit, scripti et voluntatis, (quam ipse vocat *κατὰ ῥητὸν καὶ ὑπεξαίρεσιν*, id est dictum et exceptionem, quorum prius ei cum omnibus commune est, exceptionis nomen minus usitatum) *ratiocinativum*, ambiguitatis, legum contrariarum. Albutius, eadem divisione usus, de- 62 trahit translationem, subiiciens eam iuridiciali. In legalibus quoque quaestionibus nullum putat esse, qui dicatur *ratiocinativus*. Scio plura inventuros adhuc, qui legere antiquos studiosius volent, sed ne haec quoque excesserint modum vereor.

Ipsae me paulum in alia, quam prius habuerim, opinione 63 nunc esse confiteor. Et fortasse tutissimum erat famae modo studentem, nihil ex eo mutare, quod multis annis non sensissem modo verum etiam approbassem. Sed non sustineo esse 64 conscius mihi dissimulati (in eo praesertim opere, quod ad bonorum iuvenum aliquam utilitatem componimus) in ulla parte iudicii mei. Nam et Hippocrates, clarus arte medicinae, videtur honestissime fecisse, quod quosdam errores suos, ne posteri errarent, confessus est; et M. Tullius non dubitavit aliquos iam editos libros aliis postea scriptis ipse damnare, sicut Catulum atque Lucillum et hos ipsos, de quibus modo sum locutus, artis rhetoricae. Etenim super- 65 vacuus foret in studiis longior labor, si nihil liceret melius invenire praeteritis. Neque tamen quidquam ex his, quae tum praecepi, supervacuum fuit; ad easdem enim particulas haec quoque, quae nunc praecipiam, revertentur; ita ne-

minem didicisse poeniteat, colligere tantum eadem ac dispo-
nere paulo significantius conor. Omnibus autem satisfactum
volo, non me hoc serius demonstrare aliis, quam mihi ipse
66 persuaserim. Secundum plurimos auctores servabam tres
rationales status, coniecturam, qualitatem, finitionem, unum
legalem. Hi mihi status generales erant. Legalem in has
quinque species partiebar, scripti et voluntatis, legum
67 trariarum, collectivum, ambiguitatis, translationis. Nunc
quartum ex generalibus intelligo posse removeri; sufficit
enim prima divisio, qua diximus alios rationales alios legales
esse; ita non erit status sed quaestionum genus; alioqui et
68 rationalis status esset. Ex iis etiam, quos speciales voca-
bam, removi translationem; frequenter quidem (sicut omnes
qui me secuti sunt meminisse possunt) testatus et in ipsis
etiam illis sermonibus me nolente vulgatis hoc tamen com-
plexus, vix in ulla controversia translationis statum posse
reperiri, ut non et alius in eadem recte dici videretur, ideo-
69 que a quibusdam eum exclusum. Neque ignoro multa trans-
ferri, cum in omnibus fere causis, in quibus cecidisse quis
formula dicitur, hae sint quaestiones, an huic, an cum hoc,
an hac lege, an apud hunc, an hoc tempore liceat agere?
70 et si qua sunt talia. Sed personae, tempora, actiones cete-
raque propter aliquam causam transferuntur; ita non est in
translatione quaestio sed in eo, propter quod transferuntur:
Non debes apud praetorem petere fideicommissum sed
apud consules, maior enim praetoria cognitione summa
est. Quaeritur, an maior summa sit? facti controversia
71 est. *Non licet tibi agere mecum, cognitor enim fieri non*
potuisti: iudicatio, an potuerit? Non debuisti interdicare
sed petere: an recte interdictum sit, ambigitur. Quae
72 omnia succedunt legitimis quaestionibus. An non praescri-
ptiones (etiam in quibus maxime videtur manifesta translatio)
easdem omnes species habent, quas eae leges, quibus agi-
tur, ut aut de nomine aut scripto et sententia vel ratiocina-
tione quaeratur? Deinde status ex quaestione oritur; trans-
latio non habet quaestionem, de qua contendit orator sed
73 propter quam contendit. Hoc apertius, *Occidisti hominem,*
Non occidi; quaestio, *An occiderit?* status, coniectura.

Non est tale, *Habeo ius actionis, Non habes;* ut sit quae-
stio, *an habeat?* et inde status. Accipiat enim actionem
necne, ad eventum pertinet, non ad causam, et ad id, quod
pronuntiat iudex, non id, propter quod pronuntiat. Hoc illi 74
simile est, *Puniendus es, Non sum;* videbit iudex, *an*
puniendus sit? Sed non hic erit quaestio nec hic status.
Ubi ergo? *Puniendus es, hominem occidisti; Non occidi:*
An occiderit? Honorandus sum, Non es; num statum ha-
bet? non, ut puto. *Honorandus sum, quia tyrannum oc-*
sidi; Non occidisti, quaestio et status. Similiter, *Non recte* 75
agis, Recte ago non habet statum. Ubi est ergo? *Non*
recte agis ignominiosus. Quaeritur, *An ignominiosus sit?*
aut, *An agere ignominioso liceat?* quaestiones et status.
Ergo translativum genus causae ut comparativum et mutuae
accusationis. At enim simile est illi „*Habeo ius, non ha-* 76
bes“ „*Occidisti, Recte occidi.*“ Non nego, sed nec haec
res statum facit. Non enim sunt hae propositiones, (alioqui
causa non explicabitur) sed cum suis rationibus. *Scelus*
commisit Horatius, sororem enim occidit. Non commisit,
debit enim occidere eam, quae hostis mortem maerebat.
Quaestio, *An haec iusta causa?* ita qualitas. Et similiter 77
in translatione, *Non habes ius abdicandi, quia ignomi-*
nioso non est actio. Habeo ius, quia abdicatio actio non
est. Quaeritur, *Quid sit actio:* finiemus; *Non licet abdi-*
care filium, syllogismos. Item cetera per omnes et ratio-
nales et legales status. Nec ignoro fuisse quosdam, qui 78
translationem in rationali quoque genere ponerent hoc modo,
Hominem occidi, iussus ab imperatore. Dona templi co-
genti tyranno dedi. Deserui tempestatibus, fluminibus,
valetudine impeditus, id est, non per me stetit sed per
illud. A quibus etiam liberius dissentio. Non enim actio 79
transfertur sed causa facti, quod accidit paene in omni de-
fensione. Deinde is, qui tali utitur patrocinio, non recedit
a forma qualitatis, dicit enim, se culpa vacare; ut magis
qualitatis duplex ratio facienda sit, altera qua et factum de-
fenditur, altera qua tantum reus.

Credendum est igitur his, quorum auctoritatem secutus 80
est Cicero, tria esse, quae in omni disputatione quaerantur,

- an sit, quid sit, quale sit? quod ipsa nobis etiam natura praescribit. Nam primum oportet subesse aliquid, de quo ambigitur; quod, quid sit aut quale sit, certe non potest aestimari, nisi prius esse constiterit, ideoque ea prima
- 81 **quaestio.** Sed non statim, quod esse manifestum est, etiam quid sit, apparet. Hoc quoque constituto novissima qualitas superest, neque his exploratis aliud est ultra. His infinitae quaestiones, his finitae continentur; horum aliqua in demonstrativa, deliberativa, iudiciali materia utique tractantur.
- 82 Haec rursus iudiciales causas et rationali parte et legali continent; neque enim ulla iuris disceptatio nisi finitione, qualitate, coniectura potest explicari.
- 83 Sed instituentibus rudes non erit inutilis latius primo fusa ratio et, si non statim rectissima lineam tensam, facilior tamen et apertior via. Discant igitur ante omnia, quadripartitam in omnibus causis esse rationem, quam primam intueri debeat, qui acturus est. Nam, ut a defensore potissimum incipiam, longe fortissima tuendi se ratio est, si quod obicitur negari potest; proxima, si non id, quod obicitur, factum esse dicatur; tertia honestissima, qua recte factum defenditur. Quibus si deficiamus, ultima quidem sed iam sola superest salus aliquo iuris adiutorio elabendi ex crimine, quod neque negari neque defendi potest, ut
- 84 non videatur iure actio intendi. Hinc illae quaestiones sive actiones sive translationes. Sunt enim quaedam non laudabilia non natura sed iure concessa, ut in XII tabulis debitoris corpus inter creditores dividi licuit, quam legem mos publicus repudiavit; et aliquid aequum sed prohibitum
- 85 iure, ut libertas testamentorum. Accusatori nihilo plura intuenta sunt quam ut probet factum esse, hoc esse factum, non recte factum, iure se intendere. Ita circa species eadem lis omnis versabitur translatis tantum aliquando partibus, ut in causis, quibus de praemio agitur, recte factum petitur probat.
- 86 Haec quattuor veluti proposita formaeque actionis, quae tum generales status vocabam, in duo (ut ostendi) genera discedunt rationale et legale. Rationale simplicius est, quia ipsius tantum naturae contemplatione constat. Itaque

in eo satis est ostendisse coniecturam, finitionem, qualitatem. Legalium plures sint species necesse est, propterea quod 87 multae sunt leges et varias habent formas. Alia est cuius verbis nitimur, alia cuius voluntate, alias nobis, cum ipsi nullam habeamus, adiungimus, alias inter se comparamus, alias in diversum interpretamur. Sic nascuntur haec velut simulacra 88 ex illis tribus, interim simplicia interim et mixta propriam tamen faciem ostendentia, ut scripti et voluntatis, quae sine dubio aut qualitate aut coniectura continentur; et syllogismos, qui est maxime qualitatis; et leges contrariae, quae iisdem, quibus scriptum et voluntas, constant; et ἀμφιβολία, quae semper coniectura explicatur. Finitio quoque utriusque 89 generi, quodque rerum quodque scripti contemplatione constat, communis est. Haec omnia, etiamsi in illos tres status veniunt: tamen, quia (ut dixi) habent aliquid velut proprium, videntur demonstranda discentibus, et permittendum ea dicere vel status legales vel quaestiones vel capita quaedam minora; dum sciant, nihil ne in his quidem praeter tria, quae praediximus, quaeri. At Quantum? et Quam multum? et Ad 90 aliquid et, ut nonnulli putaverunt, comparativus non eandem rationem habent; sunt enim haec non ad varietatem iuris sed ad solam rationem referenda, ideoque semper in parte aut coniecturae aut qualitatis ponenda sunt, ut Qua mente? et Quo tempore? et Quo loco?

Sed de singulis dicemus quaestionibus, cum tractare 91 praecepta divisionis coeperimus. Hoc inter omnes convenit, in causis simplicibus singulos status esse causarum, quaestionum autem, quae velut subiacent his et ad illud, quo iudicium continetur, referuntur, saepe in unam cadere plures posse; (etiam credo aliquando dubitari, quo statu sit utendum, cum adversus unam intentionem plura opponuntur; et sicut in colore dicitur narrationis, eum esse optimum, quem actor optime tueatur: ita hic quoque posse dici, cum statum esse faciendum, in quo tuendo plurimum adhibere virium possit orator; ideoque pro Milone aliud Ciceroni agenti 93 placuit aliud Bruto, cum exercitationis gratia componeret orationem, cum ille iure tanquam insidiatorem occisum et tamen non Milonis consilio dixerit, ille etiam gloriatus sit oc-

94 ciso malo cive) in coniunctis vero posse et duos et tris inveniri vel diversos, ut si quis aliud se non fecisse aliud recte fecisse defendat; vel generis eiusdem, ut si quis duo crimina
 95 neget. Quod accidit etiam, si de una re quaeratur aliqua sed eam plures petant, vel eodem iure ut proximitatis vel diverso, ut cum hic testamento ille proximitate nitetur. Quotiens autem aliud alii petitori opponitur, dissimiles esse status
 96 necesse est, ut in illa controversia: *Testamenta legibus facta rata sint. Intestatorum parentium liberi heredes sint. Abdicatus ne quid de bonis patris capiat. Nothus ante legitimus natus legitimus filius sit, post legitimus natus tantum civis. In adoptionem dare liceat. In adoptionem dato redire in familiam liceat, si pater naturalis sine liberis decesserit.* Qui ex duobus legitimis alterum in adoptionem dederat alterum abdicaverat, sustulit nothum; instituto herede abdicato decessit. Tres omnes de bonis contendunt. Nothum, qui non sit legitimus, Graeci vocant; Latinum rei nomen, ut Cato quoque in oratione quadam testatus est, non habemus ideoque utimur peregrino.
 98 Sed ad propositum. Heredi scripto opponitur lex, *Abdicatus ne quid de bonis patris capiat*; fit status scripti et voluntatis, *an ullo modo capere possit? an ex voluntate patris? an heres scriptus?* Notho duplex fit quaestio, quod post legitimus natus sit et quod non sit ante legitimus natus. Prior syllogismon habet, *an pro non natis sint habendi, qui a familia sunt alienati?* Altera et scripti et voluntatis. Non esse enim hunc natum ante legitimum convenit, sed voluntate legis se tuebitur, quam dicet talem fuisse, ut legitimus esset nothus tunc natus, cum alius legitimus in
 100 domo non esset. Scriptum quoque legis excludet dicens, *Non utique, si postea legitimus natus non sit, notho nocere*; uteturque hoc argumento: *Finge solum natum nothum, cuius condicionis erit? Tantum civis? atqui non erit post legitimum natus. Filius? atqui non erit ante legitimus natus. Quare si verbis legis stari non potest,*
 101 *voluntate standum est.* Nec quemquam turbet, quod ex una lege duo status fiant: duplex est, ita vim duarum habet. Redire in familiam volenti dicitur ab altero primum, *Ut tibi*

redire liceat; heres sum. Idem status, qui in petitione abdicati; quaeritur enim, *an possit esse heres abdicatus.* Obiicitur communiter a duobus, *Redire tibi in familiam*
 102 *non licet, non enim pater sine liberis decessit.* Sed in hoc propria quisque eorum quaestione nitetur. Alter enim dicit, abdicatum quoque inter liberos esse, et argumentum ducet ex ipsa, qua repellitur, lege; supervacuum enim fuisse prohiberi patris bonis abdicatum, si esset numero alienorum; nunc quia filii iure futurus fuerit intestati heres, oppositam esse legem, quae tamen non id efficiat, ne filius sit sed ne heres. Status finitivus, *Quid sit filius?* Rursus nothus eis-
 103 dem colligit argumentis, non sine liberis patrem decessisse, quibus in petitione usus est, ut probaret esse se filium. Nisi forte et hic finitionem movet, *An liberi sint etiam non legitimi?* Cadent ergo in unam controversiam vel specialiter duo legitimi status scripti et voluntatis et syllogismos et praeterea finitio, vel tres illi, qui natura soli sunt, coniectura in scripto et voluntate, qualitas in syllogismo, et, quae per se est aperta, finitio.

Causa quoque et indicatio et continens est in omni genere causarum. Nihil enim dicitur, cui non insit ratio et quod iudicium referatur et quod rem maxime contineat. Sed quia magis haec variantur in litibus et fere tradita sunt ab iis, qui de iudicialibus causis aliqua composuerunt, in illam partem differantur. Nunc, quia in tria genera causas divisi, ordinem sequar.

DE LAUDE ET VITUPERATIONE.

VII. Ac potissimum incipiam ab ea, quae constat laude ac vituperatione. Quod genus videtur Aristoteles atque eum secutus Theophrastus a parte negotiali, hoc est *πραγματικῆ*, removisse totamque ad solos auditores relegasse, et id eius nominis, quod ab ostentatione ducitur, proprium est. Sed mos Romanus etiam negotiis hoc munus inseruit.
 2 Nam et funebres laudationes pendent frequenter ex aliquo publico officio atque ex senatusconsulto magistratibus saepe mandantur, et laudare testem vel contra pertinet ad momentum iudiciorum, et ipsis etiam reis dare laudatores licet, et

editi in *competitores*, in *L. Pisonem*, in *Clodium et Curionem* libri vituperationem continent et tamen in Senatu loco sunt habiti sententiae. Neque infitias eo, quasdam esse ex hoc genere materias ad solam compositas ostentationem, ut laudes deorum virorumque, quos priora tempora tulerunt. Quo solvitur quaestio supra tractata, manifestumque est errare eos, qui nunquam oratorem dicturum nisi de re dubia putaverunt. An laudes Capitolini Iovis, perpetua sacri certaminis materia, vel dubiae sunt vel non oratorio genere tractantur?

Ut desiderat autem laus, quae negotiis adhibetur, probationem: sic etiam illa, quae ostentationi componitur, habet interim aliquam speciem probationis; ut qui Romulum Martis filium educatumque a lupa dicat, in argumentum coelestis ortus utatur his, quod abiectus in profluentem non potuerit extingui, quod omnia sic egerit, ut genitum praeside bellorum deo incredibile non esset, quod ipsum quoque coelo receptum temporis eius homines non dubitaverint. Quaedam vero etiam in defensionis speciem cadent, ut si in laude Herculis permutatum cum regina Lydiae habitum et impetrata, ut traditur, pensa orator excuset. Sed proprium laudis est res amplificare et ornare.

Quae materia praecipue quidem in deos et homines cadit, est tamen et aliorum animalium etiam carentium anima. Verum in deis generaliter primum maiestatem ipsius eorum naturae venerabimur, deinde proprie vim cuiusque et inventa, quae utile aliquid hominibus attulerint. Vis ostenditur, ut in Iove regendorum omnium, in Marte belli, in Neptuno maris; inventa, ut artium in Minerva, Mercurio litterarum, medicinae Apolline, Cerere frugum, Libero vini. Tum si qua ab his acta vetustas tradidit, commemoranda. Addunt etiam diis honorem parentes, ut si quis sit filius Iovis; addit antiquitas, ut his, qui sunt ex Chao; progenies quoque, ut Apollo ac Diana Latonae. Laudandum in quibusdam, quod geniti immortales, quibusdam, quod immortalitatem virtute sint consecuti; quod pietas principis nostri praesentium quoque temporum decus fecit.

10 Magis est varia laus hominum. Nam primum dividi-

tur in tempora, quodque ante eos fuit quoque ipsi vixerunt; in his autem, qui fato sunt functi, etiam quod est insecutum. Ante hominem patria ac parentes maioresque erunt, quorum duplex tractatus est: aut enim respondisse nobilitati pulchrum erit aut humiliter genus illustrasse factis. Illa quoque interim ex eo, quod ante ipsum fuit, tempore trahentur, quae responsis vel auguriis futuram claritatem promiserunt, ut eum, qui ex Thetide natus esset, maiorem patre suo futurum cecinisse dicuntur oracula. Ipsius vero laus hominis ex animo et corpore et extra positus peti debet. Et corporis quidem fortuitarumque cum levior tum non uno modo tractanda est. Nam et pulchritudinem interim roburque prosequimur honore verborum, ut Homerus in Agamemnone atque Achille. Interim confert admirationi multum etiam infirmitas, ut cum idem Tydea parvum sed bellatorem dicit fuisse. Fortuna vero tum dignitatem affert, ut in regibus principibusque, (namque est haec materia ostendendae virtutis uberior) tum quo minores opes fuerunt, maiorem bene factis gloriam parit. Sed omnia, quae extra nos bona sunt quaeque hominibus forte obtigerunt, non ideo laudantur, quod habuerit quis ea, sed quod his honeste sit usus. Nam divitiae et potentia et gratia, cum plurimum virium dent in utramque partem, certissimum faciunt morum experimentum, aut enim meliores propter haec aut peiores sumus. Animi semper vera laus, sed non una per hoc opus via ducitur. Namque alias aetatis gradus gestarumque rerum ordinem sequi speciosius fuit, ut in primis annis laudaretur indoles, tum disciplinae, post hoc operum id est factorum dictorumque contextus; alias in species virtutum dividere laudem, fortitudinis, iustitiae, continentiae ceterarumque, ac singulis assignare, quae secundum quamque earum gesta erunt. Ultra sit autem harum via utilior, cum materia deliberabimus, dum sciamus gratiora esse audientibus, quae solus quis aut primus aut certe cum paucis fecisse dicitur, si quid praeterea supra spem aut expectationem, praecipue quod aliena potius causa quam sua. Tempus, quod finem hominis insequitur, non semper tractare contingit; non solum quod

viventes aliquando laudamus, sed quod rara haec occasio est, ut referri possint divini honores et decreta et publice 18 statuae constitutae. Inter quae numeraverim ingeniorum monumenta, quae saeculis probarentur. Nam quidam, sicut Menander, iustiora posteriorum quam suae aetatis iudicia sunt consecuti. Afferunt laudem liberi parentibus, urbes conditoribus, leges latoribus, artes inventoribus nec non instituta quoque auctoribus, uti a Numa traditum deos colere, a Publicola fasces populo summittere.

19 Qui omnis etiam in vituperatione ordo constabit, tantum in diversum. Nam et turpitudine generis opprobrio multis fuit, et quosdam claritas ipsa notiores circa vitia et invisos magis fecit, et in quibusdam, ut in Paride traditum est, praedicta pernicies, et corporis ac fortunae quibusdam mala contemptum, sicut Thersitae, adquisiere, quibusdam bona vitiis corrupta odium attulerunt, ut Nirea imbellem, Plisthenen impudicum a poetis accepimus. Et animi 20 totidem vitia, quot virtutes sunt, nec minus quam in laudibus duplici ratione tractantur. Et post mortem adiecta quibusdam ignominia est, ut Maelio, cuius domus solo aequata, Marcoque Manlio, cuius praenomen a familia in posterum exemptum est. Et parentes malorum odimus. Et est 21 conditoribus urbium infame, contraxisse aliquam perniciosam ceteris gentem, qualis est primus Iudaicae superstitionis auctor; et Gracchorum leges invisae; et si quod est exemplum deforme posteris traditum, quale libidinosus vir Perses 22 in muliere Samia instituere ausus dicitur primus. Sed in viventibus quoque iudicia hominum velut argumenta sunt morum, et honos aut ignominia veram esse laudem vel vituperationem probat.

23 Interesse tamen Aristoteles putat, ubi quidque laudetur aut vituperetur. Nam plurimum refert, qui sint audientium mores, quae publice recepta persuasio, ut illa maxime quae probant esse in eo, qui laudabitur, credant, aut in eo, contra quem dicemus, ea quae oderunt. Ita non dubium erit 24 iudicium, quod orationem praecesserit. Ipsorum etiam permiscenda laus semper, nam id benivolos facit; quotiens autem fieri poterit, cum materiae utilitate iungenda. Minus

Lacedaemone studia litterarum quam Athenis honores merebuntur, plus patientia ac fortitudo. Rupto vivere quibusdam honestum, aliis cura legum. Frugalitas apud Sybaritas forsitan odio foret, veteribus Romanis summum luxuria crimen. Eadem in singulis differentia. Maxime favet iudex, 25 qui sibi dicentem assentiri putat. Idem praecipit illud quoque, (quod mox Cornelius Celsus prope supra modum invasit) quia sit quaedam virtutibus ac vitiis vicinitas, utendum proxima derivatione verborum, ut pro temerario fortem, pro prodigo liberalem, pro avaro parcum vocemus; quae eadem etiam contra valent. Quod quidem orator, id est vir bonus, nunquam faciet, nisi forte communi utilitate ducetur.

Laudantur autem urbes similiter atque homines. Nam 26 pro parente est conditor, et multum auctoritatis affert virtustas, ut his, qui terra dicuntur orti; et virtutes ac vitia circa res gestas eadem quae in singulis, illa propria, quae ex loci positione ac munitione sunt. Cives illis ut hominibus liberi decori.

Est laus et operum, in quibus honor, utilitas, pulchritudo, auctor spectari solet. Honor ut in templis, utilitas ut in muris, pulchritudo vel auctor utrobique. Est et 27 locorum, qualis Siciliae apud Ciceronem, in quibus similiter speciem et utilitatem intuemur; speciem maritimis, planis, amoenis; utilitatem salubribus, fertilibus. Erit et dictorum honestorum factorumque laus generalis, erit et rerum omnis modi. Nam et somni et mortis scriptae laudes 28 et quorundam a medicis ciborum.

Itaque, ut non consensi hoc laudativum genus circa solam versari honesti quaestionem, sic qualitate maxime contineri puto; quanquam tres status omnes cadere in hoc opus possint, hisque usum C. Caesarem in vituperando Catone notaverit Cicero. Totum autem habet aliquid simile suasoriis, quia plerumque eadem illic suaderi hic laudari solent.

DE SUASORIA ET PROSOPOPOEIA.

VIII. Deliberativas quoque miror a quibusdam sola utilitate finitas. Ac si quid in his unum sequi oporteret,

potior fuisset apud me Ciceronis sententia, qui hoc materiae genus dignitate maxime contineri putat. Nec dubito, quin hi, qui sunt in illa priore sententia, secundum opinionem pulcherrimam ne utile quidem, nisi quod honestum esset, existimarint. Et est haec ratio verissima, si consilium contingat semper bonorum atque sapientium. Verum apud imperitos, apud quos frequenter dicenda sententia est, populumque praecipue, qui ex pluribus constat indoctis, discernenda sunt haec et secundum communes magis intellectus loquendum. Sunt enim multi, qui etiam, quae credunt honesta, non tamen satis eadem utilia quoque existiment, et quae turpia esse dubitare non possunt, utilitatis specie ducti probent, ut foedus Numantinum iugumque Caudinum. Ne qualitatibus quidem statu, in quo et honestorum et utilium quaestio est, complecti eas satis est. Nam frequenter in his etiam coniecturae locus est, nonnunquam tractatur aliqua finitio, aliquando etiam legales possunt incidere tractatus, in privata maxime consilia, si quando ambigitur an liceat. De coniectura paulo post pluribus. Interim est definitio apud Demosthenem, *De Halonnesum Philippus, an reddat?* apud Ciceronem in Philippicis, *Quid sit tumultus?* Quid? non illa similis iudicialium quaestio de statua Servii Sulpicii, *an his demum ponenda sit, qui in legatione ferro sunt interempti?* Ergo pars deliberativa, quae eadem suasoria dicitur, de tempore futuro consultat, quaerit etiam de praeterito. Officiis constat duobus suadendi ac dissuadendi.

Prooemio, quale est in iudicialibus, non ubique eget, quia conciliatus est ei quisque, quem consultit. Initium tamen quodcumque debet habere aliquam prooemii speciem; neque enim abrupte nec unde libuit incipiendum, quia est aliquid in omni materia naturaliter primum. In senatu et utique in contionibus eadem ratio quae apud iudices, acquirendae sibi plerumque eorum, apud quos dicendum sit, benevolentiae. Nec mirum, cum etiam in Panegyricis petatur audientium favor, ubi emolumentum non in utilitate aliqua sed in sola laude consistit. Aristoteles quidem nec sine causa putat et a nostra et ab eius, qui dissentiet, persona,

duci frequenter in consiliis exordium, quasi mutantibus hoc nobis a iudiciali genere, nonnunquam etiam, ut minor res maiore videatur; in demonstrativis vero prooemia esse maxime libera existimat. Nam et longe a materia duci, ut in Helenae laude Isocrates fecerit; et ex aliqua rei vicinia, ut idem in Panegyrico, cum queritur plus honoris corporum quam animorum virtutibus dari; et Gorgias in Olympico laudans eos, qui primi tales instituerint conventus. Quos secutus videlicet C. Sallustius in bello Iugurthino et Catilinae nihil ad historiam pertinentibus principiis orsus est. Sed nunc ad suasoriam, in qua, etiam cum prooemio utimur, brevior tamen et velut quodam capite tantum et initio debemus esse contenti. Narrationem vero nunquam exigit privata deliberatio, eius duntaxat rei, de qua dicenda sententia est; quia nemo ignorat id de quo consultit. Extrinsecus possunt pertinentia ad deliberationem multa narrari. In contionibus saepe est etiam illa, quae ordinem rei docet, necessaria. Affectus ut quae maxime postulat. Nam et concitanda et lenienda frequenter est ira, et ad metum, cupiditatem, odium, conciliationem, impellendi animi. Nonnunquam etiam movenda miseratio, sive, ut auxilium obsessis feratur, suadere oportebit, sive sociae civitatis eversionem deflebitur. Valet autem in consiliis auctoritas plurimum. Nam et prudentissimus esse haberique et optimus debet, qui sententiae suae de utilibus atque honestis credere omnes velit. In iudiciis enim vulgo fas habetur indulgere aliquid studio suo; consilia nemo est qui neget secundum mores dari.

Graecorum quidem plurimi omne hoc officium contionale esse indicaverunt et in sola reipublicae administratione posuerunt. Quin et Cicero in hac maxime parte versatur. Ideoque suasoris de pace, bello, copiis, operibus, vectigalibus haec duo esse praecipue nota voluit, vires civitatis et mores, ut ex natura cum ipsarum rerum tum audientium ratio suadendi duceretur. Nobis maior iure videtur varietas, nam et consultantium et consiliorum plurima sunt genera.

Quare in in suadendo et dissuadendo tria primum spe-

- ctanda erunt, quid sit de quo deliberetur, qui
 16 sint qui deliberent, qui sit qui suadeat. Rem, de
 qua deliberatur, aut certum est posse fieri aut incertum.
 Si incertum, haec erit quaestio sola aut potentissima; saepe
 enim accidet, ut prius dicamus, ne si possit quidem fieri,
 esse faciendum, deinde, fieri non posse. Cum autem de
 hoc quaeritur, coniectura est: *An Isthmos intercidi, an
 siccari palus Pomptina, an portus fieri Ostiae possit?*
 17 *An Alexander terras ultra Oceanum sit inventurus?* Sed
 in his quoque, quae constabit posse fieri, coniectura ali-
 quando erit, si quaeretur, *An utique futurum sit, ut Cartha-
 ginem superent Romani; ut redeat Hannibal, si Scipio
 exercitum in Africam transtulerit; ut seruent fidem Samni-
 tes, si Romani arma deposuerint?* Quaedam et fieri posse
 et futura esse credibile est, sed aut alio tempore aut alio
 loco aut alio modo.
- 18 Ubi coniecturae non erit locus, alia sunt intuenda. Et
 primum aut propter ipsam rem, de qua sententiae rogan-
 tur, consultabitur, aut propter alias intervenientes extrin-
 secus causas. Propter ipsam deliberant Patres conscripti,
 19 *an stipendium militi constituent?* Haec materia simplex
 erit. Accedunt causae aut faciendi, ut deliberant P. C.,
An Fabios dedant Gallis bellum minitantibus? aut non fa-
 ciendi. Deliberat C. Caesar, *An perseveret in Germaniam
 ire, cum milites passim testamenta facerent?* Hae suaso-
 20 riae duplices sunt. Nam et illic causa deliberandi est, quod
 bellum Galli minitentur; esse tamen potest quaestio, *De-
 dendine fuerint etiam citra hanc denuntiationem, qui contra
 fas, cum legati missi essent, proelium inierint, regemque, ad
 21 quem mandata acceperant, trucidarint?* et hic nihil Caes-
 sar sine dubio deliberaret nisi propter hanc militum per-
 turbationem; est tamen locus quaerendi, *An citra hunc
 quoque casum penetrandum in Germaniam fuerit?* Sem-
 per autem de eo prius loquemur, de quo deliberari etiam
 detractis sequentibus possit.
- 22 Partes suadendi quidam putaverunt honestum, utile,
 necessarium. Ego non inveno huic tertiae locum. Quan-
 talibet enim vis ingruat, aliquid fortasse pati necesse erit,

nihil facere; de faciendo autem deliberatur. Quodsi hanc²³
 vocant necessitatem, in quam homines graviorum metu co-
 guntur, utilitatis erit quaestio; ut si obsessi et impares et
 aqua ciboque defecti de facienda ad hostem deditione de-
 liberent et dicatur, *necesse est*; nempe sequitur, ut hoc
 subiiciatur, *alioqui pereundum est*: ita propter id ipsum non
 est necesse, quia perire potius licet. Denique non fece-
 runt Saguntini nec in rate Opitergina circumventi. Igitur²⁴
 in his quoque causis aut de sola utilitate ambigetur, aut
 quaestio inter utile atque honestum consistet. At enim si
 quis liberos procreare volet, necesse habet ducere uxorem.
 Quis dubitat? sed ei, qui pater vult fieri, liqueat necesse
 est, uxorem esse ducendam. Itaque mihi ne consilium qui-²⁵
 dem videtur, ubi necessitas est, non magis quam ubi con-
 stat, quid fieri non possit. Omnis enim deliberatio de du-
 biis est. Melius igitur, qui tertiam partem dixerunt *δυνατόν*,
 quod nostri *possibile* nominant, quae ut dura videatur ap-
 pellatio, tamen sola est. Quas partes non omnes in omnem²⁶
 cadere suasoriam manifestius est, quam ut docendum sit.
 Tamen apud plerosque earum numerus augetur, a quibus
 ponuntur et partes, quae species sunt partium. Nam fas,
 iustum, pium, aequum, mansuetum quoque (sic enim sunt
 interpretati τὸ ἡμέτερον) et si qua adhuc adicere quis eius-
 dem generis velit, subiici possunt honestati. An sit autem²⁷
 facile, magnum, iucundum, sine periculo, ad quaestionem
 pertinet utilitatis. Qui loci oriuntur ex contradictione: *Est
 quidem utile sed difficile, parvum, iniucundum, periculo-
 sum*. Tamen quibusdam videtur esse nonnunquam de iu-²⁸
 cunditate sola consultatio, ut si de aedificando theatro, in-
 stituendis ludis deliberetur. Sed neminem adeo solum
 luxu puto, ut nihil in causa suadendi sequatur praeter vo-
 luptatem. Praecedat enim semper aliquid necesse est, ut²⁹
 in ludis honor deorum, in theatro non inutilis laborum re-
 missio, deformis et incommoda turbae, si id non sit, con-
 flictatio, et nihilominus eadem illa religio, cum theatrum
 veluti quoddam illius sacri templum vocabimus. Saepe vero³⁰
 et utilitatem despiciendam esse dicimus, ut honesta faciamus,
 ut cum illis *Opiterginis damus consilium, ne se hostibus*

dedant, quanquam perituri sint, nisi fecerint; et utilia honestis praeferimus, ut cum suademus, ut bello Punico
 31 *servi armentur.* Sed neque hic plane concedendum est, esse id inhonestum, liberos enim natura omnes et eisdem constare elementis et fortasse antiquis etiam nobilibus ortos, dici potest; et illic, ubi manifestum periculum est, opponenda alia, ut crudelius etiam perituros affirmemus, si se dediderint, sive hostis non servaverit fidem, sive Caesar
 32 vicerit, quod esse vero similis. Haec autem, quae tantum inter se pugnant, plerumque nominibus deflecti solent. Nam et utilitas ipsa expugnatur ab his, qui dicunt, non solum potiora esse honesta quam utilia sed ne utilia quidem esse, quae non sint honesta; et contra, quod nos honestum, illi vanum, ambitiosum, stolidum, verbis quam re probabilius
 33 vocant. Nec tantum inutilibus comparantur utilia sed inter se quoque ipsa, ut si ex duobus eligamus, in altero quid sit magis, in altero quid sit minus. Crescit hoc adhuc. Nam interim triplices etiam suasoriae incidunt: ut cum Pompeius deliberabat, Parthos an Africam an Aegyptum peteret. Ita non tantum, utrum melius sed quid sit optimum,
 34 quaeritur, itemque contra. Nec unquam incidet in hoc genere materiae dubitatio rei, quae undique secundum nos sit. Nam ubi contradictioni locus non est, quae potest esse causa dubitandi? Ita fere omnis suasoria nihil est aliud quam comparatio, videndumque, quid consecuturi simus et per quid; ut aestimari possit, plus in eo quod petimus sit com-
 35 modi, an vero in eo per quod petimus incommodi. Est utilitatis et in tempore quaestio, *expedit sed non nunc;* et in loco, *non hic;* et in persona, *non nobis, non contra hos;* et in genere agendi, *non sic;* et in modo, *non in tantum.*
 Sed personam saepius decoris gratia intuemur, quae
 36 et in nobis et in his, qui deliberant, spectanda est. Itaque quamvis exempla plurimum in consiliis possint, quia facillime ad consentiendum homines ducuntur experimentis: refert tamen, quorum auctoritas et quibus adhibeatur. Diversi
 37 sunt enim deliberantium animi, duplex condicio. Nam consultant aut plures aut singuli; sed in utrisque differentia, quia et in pluribus multum interest, *senatus sit an populus,*

Romani an Fidenates, Graeci an barbari, et in singulis, *Catonis petendos honores suadeamus an C. Mario, de ratione belli Scipio prior an Fabius deliberet.* Proinde in-
 38 tuenda sexus, dignitas, aetas. Sed mores praecipue discrimen dabunt. Et honesta quidem honestis suadere facillimum est; si vero apud turpes recta obtinere conabimur, ne videamur exprobrare diversam vitae sectam, cavendum. Et
 39 animus deliberantis non ipsa honesti natura, quam ille non respicit, permovendus, sed laude, vulgi opinione, et si parum proficiet haec vanitas, secutura ex his utilitate, aliquanto vero magis obiciendo aliquos, si diversa fecerint, metus. Namque praeter id, quod his levissimi cuius-
 40 que animus facillime terretur, nescio an etiam naturaliter apud plurimos plus valeat malorum timor quam spes bonorum, sicut facilius eisdem turpium quam honestorum intel-
 41 lectus est. Aliquando bonis quoque suadentur parum decora, dantur parum bonis consilia, in quibus ipsorum qui consulunt spectatur utilitas. Nec me fallit, quae statim cogitatio subire possit legentem: Hoc ergo praecipis? et hoc fas putas? Poterat me liberare Cicero, qui ita scribit
 42 ad Brutum, praepositis plurimis, quae honeste suaderi Caesari possint: *Simne bonus vir, si haec suadeam? Minime. Suasoris enim finis est utilitas eius, cui quisque suadet. At recta sunt. Quis negat? sed non est semper rectis in suadendo locus.* Sed quia est altior quaestio nec tantum ad suasorias pertinet, destinatus est mihi hic locus
 43 duodecimo, qui summus futurus est, libro. Nec ego quidquam fieri turpiter velim. Verum interim haec vel ad scholarum exercitationes pertinere credantur, nam et iniquorum ratio noscenda est, ut melius aequa tueamur. Interim si
 44 quis bono inhonesta suadebit: meminerit non suadere tantquam inhonesta, ut quidam declamatores Sextum Pompeium ad piraticam, propter hoc ipsum, quod turpis et crudelis sit, impellunt; sed dandus illis deformibus color idque etiam apud malos. Neque enim quisquam est tam malus, ut videri velit. Sic Catilina apud Sallustium loquitur, ut rem scele-
 45 ratissimam non malitia sed indignatione videatur audere. Sic Atrous apud Varium: — *Iam fero (inquit) infandissima,*

Iam facere cogor. Quanto magis eis, quibus curae fama
 46 fuit, conservandus est hic velut ambitus? Quare et, cum
Ciceroni dabimus consilium, ut *Antonium roget*, vel etiam
 ut *Philippicas* (ita vitam pollicente eo) *exurat*, non cupi-
 ditatem lucis allegabimus, (haec enim si valet in animo eius,
 taentibus quoque nobis valet) sed, ut reipublicae se servet,
 47 hortabimur. Hac illi opus est occasione, ne eum talium
 precum pudeat. Et *C. Caesari suadentes regnum* affirma-
 bimus, stare iam rempublicam nisi uno regente non posse.
 Nam qui de re nefaria deliberat, id solum quaerit, quomodo
 48 quam minimum peccare videatur. Multum refert etiam, quae
 sit persona suadentis; quia, antea vita si illustris fuit aut
 clarius genus aut aetas aut fortuna affert expectationem:
 providendum est, ne, quae dicuntur, ab eo, qui dicit, dissent-
 tiant. At his contraria summiorem quendam modum pos-
 tulant. Nam quae in aliis libertas est, in aliis licentia vo-
 catur, et quibusdam sufficit auctoritas, quosdam ratio ipsa
 aegre tuetur.

49 Ideoque longe mihi difficillimae videntur prosopo-
 poeiae, in quibus ad reliquum suasoriae laborem accedit
 etiam personae difficultas. Namque idem illud aliter Caesar
 aliter Cicero aliter Cato suadere debet. Utilissima vero
 haec exercitatio, vel quod duplicis est operis, vel quod
 poetis quoque aut historiarum futuris scriptoribus plurimum
 50 confert. Verum et oratoribus necessaria. Nam sunt multae
 a Graecis Latinisque compositae orationes, quibus alii ute-
 rentur, ad quorum condicionem vitamque aptanda, quae di-
 cebantur, fuerunt. An eodem modo cogitavit aut eandem
 personam induit Cicero, cum scriberet Cn. Pompeio et cum
 T. Ampio ceterisque; ac non uniuscuiusque eorum fortunam,
 dignitatem, res gestas intuitus omnium, quibus vocem dabat,
 etiam imaginem expressit? ut melius quidem sed tamen ipsi
 51 dicere viderentur. Neque enim minus vitiosa est oratio, si
 ab homine quam si ab re, cui accomodari debuit, dissidet;
 ideoque Lysias optime videtur in iis, quae scribebat indoctis,
 servasse veritatis fidem. Enimvero praecipue declamatoribus
 considerandum est, quid cuique personae conveniat, qui
 paucissimas controversias ita dicunt ut advocati, plerumque

fili, parentes, divites, senes, asperi, lenes, avari, denique
 superstitiosi, timidi, derisores fiunt; ut vix comoediarum
 actoribus plures habitus in pronuntiando concipiendi sint
 quam his in dicendo. Quae omnia possunt videri prosopo- 52
 poeiae, quam ego suasoriis subieci, quia nullo modo ab his
 quam personam distat. Quanquam haec aliquando etiam in
 controversias ducitur, quae ex historiis compositae certis
 agentium nominibus continentur. Neque ignoro, plerumque 53
 exercitationis gratia poni et poeticas et historicas, ut *Priami*
verba apud Achillem aut *Sullae dictaturam deponentis in*
contione. Sed haec in partem cedent trium generum, in
 quae causas divisimus. Nam et rogare, indicare, rationem
 reddere et alia, de quibus supra dictum est, varie atque ut
 res tulit in materia iudiciali, deliberativa, demonstrativa,
 solemus. Frequentissime vero in his utimur ficta persona- 54
 rum, quas ipsi substituimus, oratione, ut apud Ciceronem
 pro Caelio Clodium et caecus Appius et Clodius frater, ille
 in castigationem hic in exhortationem vitiorum compositus,
 alloquitur.

Solent in scholis fingi materiae ad deliberandum simi- 55
 liores controversiis ex utroque genere commixtae, ut cum
 apud C. Caesarem consultatio de poena Theodoti ponitur.
 Constat enim accusatione et defensione causa eius, quod est
 iudicialium proprium. Permixa tamen est et utilitatis ratio: 56
An pro Caesare fuerit occidi Pompeium? An timendum
a rege bellum, si Theodotus sit occisus? An id minime
opportunitum hoc tempore et periculosum et certe longum
sit futurum? Quaeritur et de honesto: *Deceatne Caesarem* 57
ultio Pompeii? An sit verendum, ne peiorem faciat sua-
rum partium causam, si Pompeium indignum morte fa-
teatur? Quod genus accidere etiam veritati potest. 58

Non simplex autem circa suasorias error in plerisque
 declamatoribus fuit, qui dicendi genus in his diversum
 atque in totum illi iudiciali contrarium esse existimaverunt.
 Nam et principia abrupta et concitata semper orationem et
 in verbis *effusiores*, ut ipsi vocant, *cultum* affectaverunt,
 et earum breviores utique commentarios quam legalis mate-
 riae facere elaborarunt. Ego porro ut prooemio video non 59

utique opus esse suasoriis, propter quas dixi supra causas, ita cur initio furioso sit exclamandum, non intelligo; cum proposita consultatione rogatus sententiam, si modo est sanus, non quiritet sed quam maxime potest civili et humano 60 ingressu mereri assensum deliberantis velit. Cur autem torrens et utique aequaliter concitata sit in ea dicentis oratio, cum vel praecipue moderationem consilia desiderent? Neque ego negaverim, saepius subsidere in controversiis impetum dicendi prooemio, narratione, argumentis; quae si detrahas, id fere supererit, quo suasoriae constant, verum id quoque 61 aequalius erit non tumultuosius atque turbidius. Verborum autem magnificentia non validius est affectanda suasorias declamantibus sed contingit magis; nam et personae fere magnae fingentibus placent, regum, principum, senatus, populi et res ampliores; ita cum verba rebus aptentur, ipso 62 materiae nitore clarescunt. Alia veri consilii ratio est, ideoque Theophrastus quam maxime remotum ab omni affectione in deliberativo genere voluit esse sermonem, secutus in hoc auctoritatem praeceptoris sui, quanquam dissentire ab eo 63 non timide solet. Namque Aristoteles idoneam maxime ad scribendum demonstrativam proximamque ab ea iudicalem putavit, videlicet quoniam prior illa tota esset ostentationis, haec secunda egeret artis, vel ad fallendum, si ita popo- 64 scisset utilitas, consilia fide prudentiaque constarent. Quibus in demonstrativa consentio, nam et omnes alii scriptores idem tradiderunt; in iudiciis autem consiliisque secundum condicionem ipsius, quae tractabitur, rei accommodandam 65 dicendi credo rationem. Nam et Philippicas Demosthenis iisdem quibus habitas in iudiciis orationes video eminere virtutibus, et Ciceronis sententiae et contiones non minus clarum, quam est in accusationibus ac defensionibus, eloquentiae lumen ostendunt. Dicit tamen idem de suasoria hoc modo: *Tota autem oratio simplex et gravis et senten-* 66 *tis debet ornatiores esse quam verbis.* Usus exemplorum nulli materiae magis convenire merito fere omnes consentiunt, cum plerumque videantur respondere futura praeteritis, habeaturque experimentum velut quoddam rationis testi- 67 monium. Brevitas quoque aut copia non materiae genere

sed modo constat. Nam ut in consiliis plerumque simplicior quaestio est, ita saepe in causis minor. Quae omnia vera esse sciet, si quis non orationes modo sed historias etiam, namque in his contiones atque sententiae plerumque suadendi ac dissuadendi funguntur officio, legere maluerit quam in commentariis rhetorum consenescere. Inveniet enim nec 68 in consiliis abrupta initia et concitatius saepe in iudiciis dictum et verba apta rebus in utroque genere et breviores aliquando causarum orationes quam sententiarum. Ne illa 69 quidem in his vitia deprehendet, quibus quidam declamatores laborant, quod et contra sententibus inhumane conviciantur et ita plerumque dicunt, tanquam ab his qui deliberant utique dissentiant, ideoque obiurgantibus similiores sunt quam suadentibus. Haec adolescentes sibi scripta sciant, ne aliter 70 quam dicturi sunt exerceri velint et in desuescendis morentur. Ceterum, cum advocari coeperint in consilia amicorum, dicere sententiam in senatu, suadere, si quid consulat princeps: quod praeeptis fortasse non credunt, usu docebuntur.

DE PARTIBUS CAUSARUM IUDICIALIUM.

IX. Nunc de iudicali genere, quod est praecipue multiplex sed officiis constat duobus intentionis ac depulsionis. Cuius partes, ut plurimis auctoribus placuit, quinque sunt: prooemium, narratio, probatio, refutatio, peroratio. His adiecerunt quidam partitionem, propositionem, excessum; quarum priores duae probationi succedunt. Nam 2 proponere quidem, quae sis probaturus, necesse est, sed et concludere; cur igitur si illa pars causae est, non et haec sit? Partitio vero dispositionis est species, ipsa dispositio pars rhetorices et per omnes materias totumque earum corpus aequaliter fusa, sicut inventio, elocutio. Ideoque eam 3 non orationis totius partem unam esse credendum est sed quaestionum etiam singularum. Quae est enim quaestio, in qua non promittere possit orator, quid primo, quid secundo, quid tertio sit loco dicturus; quod est proprium partitionis. Quam ergo ridiculum est, quaestionem quidem speciem esse probationis; partitionem autem, quae sit species quaestionis, partem totius orationis vocari? Egressio vero vel, quod usi- 4

tatius esse coepit, excessus, sive est extra causam, non potest esse pars causae; sive est in causa, adiutorium vel ornamentum partium est earum, ex quibus egreditur. Nam si, quidquid in causa est, pars causae vocabitur: cur non argumentum, similitudo, locus communis, affectus, exempla, partes vocentur? Tamen nec his assentior, qui detrahunt refutationem, tanquam probationi subiectam, ut Aristoteles; haec enim est, quae constituat, illa, quae destruat. Hoc quoque idem aliquatenus novat, quod prooemio non narrationem subiungit sed propositionem. Verum id facit, quia propositio ei genus, narratio species videtur, et hac non semper, illa semper et ubique credit opus esse.

6 Verum ex his quas constitui partibus non, ut quidque primum dicendum, ita primum cogitandum est; sed ante omnia intueri oportet, quod sit genus causae? quid in ea quaeratur? quae prosint, quae noceant? deinde quid confirmandum sit ac refellendum? tum quo modo narrandum?

7 Expositio enim probationum est praeparatio, nec esse utilis potest, nisi prius constituerit, quid debeat de probatione promittere. Postremo intuendum, quemadmodum iudex sit conciliandus. Neque enim nisi totis causae partibus diligenter inspectis scire possumus, qualem nobis facere animum cognoscentis expediat, severum an mitem, concitatum an remissum, adversum gratiae an obnoxium.

8 Neque ideo tamen eos probaverim, qui scribendum quoque prooemium novissime putant. Nam ut conferri materia omnem et, quid cuique sit opus, constare decet, antequam dicere aut scribere ordiamur: ita incipiendum ab his, quae prima sunt. Nam nec pingere quisquam aut fingere coepit a pedibus, nec denique ars ulla consummatur ibi, unde ordiendum est. Quid fiet alioqui, si spatium componendi orationem stilo non fuerit? nonne nos haec inversa consuetudo deceperit? Inspicienda igitur materia est, quo praecepimus ordine; scribenda, quo dicemus.

DE GENERIBUS EARUNDEM.

X. Ceterum causa omnis, in qua pars altera agentis est altera recusantis, aut unius rei controversia constat aut

plurium. Haec simplex dicitur, illa coniuncta. Una controversia est per se furti, per se adulterii. Plures aut eiusdem generis, ut in pecuniis repetundis, aut diversi, ut si quis sacrilegii et homicidii simul accusetur. Quod nunc in publicis iudiciis non accidit, quoniam praetor certa lege sortitur, principum autem et senatus cognitionibus frequens est et populi fuit; privata quoque iudicia saepe unum iudicem habere multis et diversis formulis solent. Nec aliae species erunt, etiamsi unus a duobus duntaxat eandem rem atque ex eadem causa petet aut duo ab uno aut plures a pluribus, quod accidere in hereditariis litibus interim scimus; quia quamvis in multis personis causa tamen una est, nisi si condicio personarum quaestiones variaverit.

Diversum his tertium genus, quod dicitur comparativum; cuius rei tractatus in parte causae frequens est, ut cum apud centumviros post alia quaeritur et hoc, uter dignior hereditate sit? Rarum est autem, ut in foro iudicia propter id solum constituantur, sicut divinationes, quae fiunt de accusatore constituendo, et nonnunquam inter delatores, uter praemium meruerit? Adiecerunt quidam numero 4 mutua accusationem, quae ἀντικατηγορία vocatur, aliis videlicet succedere hanc quoque comparativo generi existimantibus, cui similis erit petitionum invicem diversarum, quod accidit vel frequentissime. Id si et ipsum vocari debet ἀντικατηγορία: (nam proprio caret nomine) duo genera erunt eius, alterum quo litigatores idem crimen invicem intentant, alterum quo aliud atque aliud. Cui et petitionum condicio par est.

Cum apparuerit genus causae, tum intuebimur, negeturne factum, quod intenditur, an defendatur, an alio nomine appelletur, an a genere actionis repellatur; unde sunt status.

QUID SIT QUAESTIO, RATIO, IUDICATIO, CONTINENS ET QUATENUS NECESSARIA.

XI. His inventis, intuendum deinceps Hermagorae videtur, quid sit quaestio, ratio, iudicatio, continens, vel, ut alii vocant, firmamentum. Quaestio latius intelligitur omnis, de qua in utramque partem vel in plures partes dici

2 credibiliter potest. In iudiciali autem materia dupliciter accipienda est: altero modo, quo dicimus multas quaestiones habere controversiam, quo etiam minores omnes complectimur, altero, quo significamus summam illam, in qua causa vertitur; de hac nunc loquor, ex qua nascitur status, An factum sit? Quid factum sit? An recte factum sit? Has Hermagoras et Apollodorus et alii plurimi scriptores proprie quaestiones vocant, Theodorus, ut dixi, *capita generalia*, sicut illas minores aut ex illis pendentes *specialia*. Nam et quaestionem ex quaestione nasci et speciem in species dividendi convenit. Hanc igitur quaestionem veluti principalem vocant *ἐν γένει*. Ratio autem est, qua id, quod factum esse constat, defenditur. Et cur non utamur eodem, quo sunt uti omnes fere, exemplo? *Orestes matrem occidit*, hoc constat; dicit *se iuste fecisse*: status erit qualitatis; quaestio, *An iuste fecerit?* ratio, *Quod Clytaemnestra maritum suum, patrem Orestis, occidit*; hoc *αἴτιον* dicitur. *Κρινομένων* autem iudicatio, *An oportuerit vel nocentem matrem a filio occidi?* Quidam dividerunt *αἴτιον* et *αἴτιαν*, ut esset altera, propter quam iudicium constitutum est, ut occisa Clytaemnestra; altera, qua factum defenditur, ut occisus Agamemnon. Sed tanta est circa verba dissensio, ut alii *αἴτιαν* causam iudicii, *αἴτιον* autem facti vocent, alii eadem in contrarium vertant. Latinorum quidam haec *initium* et *rationem* vocaverunt, quidam utrumque eodem nomine 6 appellant. Causa quoque ex causa, id est *αἴτιον* ἐξ *αἴτιου*, nasci videtur, quale est: *Occidit Agamemnonem Clytaemnestra, quia ille filiam communem immolaverat et captivam pellicem adducebat*. Iidem putant, et sub una quaestione plures esse rationes, ut si Orestes et alteram afferat causas matris necatae, *quod responsis sit impulsus*; quot autem causas faciendi totidem iudicationes, nam et haec erit 7 iudicatio, *An responsis parere debuerit?* Sed et una causa plures habere quaestiones et iudicationes (ut ego arbitror) potest, ut in eo, qui, cum adulteram deprehensam occidisset, adulterum, qui tum effugerat, postea in foro occidit. Causa enim est una, *adulter fuit*; quaestiones et iudicationes, *an illo tempore, an illo loco licuerit occidere?* Sed

sicut, cum sint plures quaestiones omnesque suos status habeant, causae tamen status unus sit, ad quem referuntur omnia: ita iudicatio maxime propria, de qua pronuntiat. *Συνηχθόν* autem (quod, ut dixi, *continens* alii, *firmamentum* alii putant, Cicero *firmissimam argumentationem defensoris et potentissimam ad iudicationem*) quibusdam id videtur esse, post quod nihil quaeritur, quibusdam id quod ad iudicationem firmissimum affertur. Causa facti non in omnes controversias cadit. Nam quae fuerit causa faciendi, ubi factum negatur? At ubi causa tractetur, negant eodem loco esse iudicationem quo quaestionem. Idque et in Rhetoricis Cicero et in Partitionibus dicit. Nam in coniectura est 11 quaestio ex illo: *Factum, non factum, an factum sit?* Ibi ergo iudicatio, ubi quaestio, quia in eadem re prima quaestio et extrema disceptatio. At in qualitate, *Matrem Orestes occidit: recte; non recte; an recte occiderit?* quaestio nec statim iudicatio. Quando ergo? *Illa patrem meum occiderat; sed non ideo tu matrem debuisti occidere; An debuerit?* hic iudicatio. Firmamentum autem verbis ipsius 12 ponam: *si velit Orestes dicere eiusmodi animum matris suae in patrem suum, in se ipsum ac sorores, in regnum, in famam generis et familiae, ut ab ea poenas liberi potissimum sui petere debuerint*. Utuntur alii et talibus exemplis: 13 *Qui bona paterna consumpserit, ne contionetur; in opera publica consumpsit*; quaestio: *an, quisquis consumpserit, prohibendus sit?* iudicatio, *An, qui sic?* Vel, ut in causa 14 militis Arrunti, qui Lusium tribunum vim sibi inferentem interfecit, quaestio: *An iure fecerit?* ratio: *quod is vim afferebat*; iudicatio: *An indemnatum, an Tribunum a milite occidi oportuerit?* Alterius etiam status quaestionem, alterius 15 iudicationem putant. Quaestio qualitatis: *An recte Clodius insidias fecerit?* Iudicatio coniecturalis, *An Clodius rem dimitti, quae non sit propria quaestionis, et de ea iudicari. A quibus multum dissentio. Nam et illa quaestio: An omnes, qui paterna bona consumpserint, contione sint prohibendi?* habeat oportet suam iudicationem. Ergo non alia quaestio alia iudicatio erit, sed plures quaestiones et

17 plures iudicationes. Quid? non in causa Milonis ipsa coniectura refertur ad qualitatem? nam si est insidiatus Clodius, sequitur, ut recte sit occisus. Cum vero in aliquam rem missa causa recessum est a quaestione, quae erat: et hic constituta quaestio, ubi iudicatio est.

18 Paulum in his secum etiam Cicero dissentit. Nam in Rhetoricis (quemadmodum supra dixi) Hermagoran est secutus; in Topicis ex statu effectam contentionem *κονόμενον* existimat, idque Trebatio, qui iuris erat consultus, alludens *qua de re agitur* appellat; quibus id continetur, *continencia, quasi firmamenta defensionis, quibus sublatis defensio*
19 *nulla sit*; at in Partitionibus oratoriis firmamentum, quod opponitur defensionis; quia continens, quod primum sit, ab accusatore dicatur, ratio a reo, ex rationis et firmamenti quaestione disceptatio sit iudicationum.

Verius igitur et brevius hi, qui statum et continens et iudicationem esse voluerunt; continens autem id esse, quo
20 sublato lis esse non possit. Hoc mihi videntur utramque causam complexi, et quod Orestes matrem et quod Clytaemnestra Agamemnonem occiderit. Idem iudicationem et statum consentire semper existimarunt, neque enim aliud eorum rationi conveniens fuisset.

21 Verum haec affectata subtilitas circa nomina rerum ambitiose laborat, a nobis in hoc assumpta solum, ne parum diligenter inquisisse de opere, quod aggressi sumus, videmur; simplicius autem instituenti non est necesse per tam
22 minutas rerum particulas rationem docendi concidere. Quo vitio multi quidem laborarunt, praecipue tamen Hermagoras, vir alioqui subtilis et in plurimis admirandus, tantum diligentiae nimium sollicitae, ut ipsa eius reprehensio laude aliqua
23 non indigna sit. Haec autem brevior et vel ideo lucidior multo via neque discentem per ambages fatigabit nec corpus orationis in parva momenta ducendo consumet. Nam qui viderit, quid sit, quod in controversiam veniat, quid in eo et per quae velit efficere pars diversa, quid nostra, quod in primis est intuendum: nihil eorum ignorare, de quibus supra
24 diximus, poterit. Neque est fere quisquam modo non stultus atque ab omni prorsus usu dicendi remotus, quin sciat, et

quid litem faciat, (quod ab illis *causa* vel *continens* dicitur) et quae sit inter litigantes quaestio, et de quo iudicari oporteat; quae omnia idem sunt. Nam et de eo quaestio est, quod in controversiam venit, et de eo iudicatur, de quo quaestio est. Sed non perpetuo intendimus in haec animum
25 et cupiditate laudis utcumque acquirendae vel dicendi voluptate evagamur, quando uberius semper extra causam materia est; quia in controversia pauca sunt, extra omnia; et hic dicitur de his, quae accepimus, illic, de quibus volumus. Nec tam hoc praecipuum est, ut quaestionem, continens,
26 iudicationem inveniamus (nam id quidem facile est), quam ut intueamur semper, aut certe si digressi fuerimus, saltem respiciamus, ne plausum affectantibus arma excidant. Theodori schola, ut dixi, omnia refert ad *capita*. His plura in-
27 telliguntur: uno modo summa quaestio item ut status, altero ceterae quae ad summam referuntur, tertio propositio cum affirmatione; ut dicimus, *Caput rei est*, apud Menandrum *κεφάλαιόν ἐστιν*. In universum autem, quidquid probandum est, erit *caput*; sed id maius aut minus.

Et quoniam, quae de his erant a scriptoribus Artium
28 tradita, verbosius etiam quam necesse erat exposuimus, praeterea, quae partes sint iudicialium causarum, supra dictum est: proximus liber a prima id est exordio incipiet.

LIBER IV.

Libro quarto haec continentur: Prooemium. De exordio. De narratione. De egressionem. De propositione. De partitione.

PROOEMIUM.

Perfecto, Marcelle Victori, operis tibi dedicati tertio libro et iam quarta fere laboris parte transacta, nova insuper mihi diligentiae causa et altior sollicitudo, quale iudicium hominum emereret, accessit. Adhuc enim velut studia inter nos conferebamus, et si parum nostra institutio probaretur a ceteris, contenti fore domestico usu videbamur, ut tui meique filii formare disciplinam satis putarem. Cum 2

vero mihi Domitianus Augustus sororis suae nepotum delegerit curam, non satis honorem iudiciorum coelestium intelligam, nisi ex hoc oneris quoque magnitudinem metiar.

3 Quis enim mihi aut mores excolendi sit modus, ut eos non immerito probaverit sanctissimus censor? aut studia, ne fellisse in his videar principem ut in omnibus ita in eloquentia quoque eminentissimum? Quodsi nemo miratur, poetas maximos saepe fecisse, ut non solum initiis operum suorum Musas invocarent sed provecti quoque longius, cum ad aliquem graviolem venissent locum, repeterent vota et velut

5 nova precatione uterentur: mihi quoque profecto poterit ignosci, si, quod initio, quo primum hanc materiam inchoavi, non feceram, nunc omnes in auxilium deos ipsumque in primis, quo neque praesentius aliud nec studiis magis propitium numen est, invocem; ut, quantum nobis expectationis adiecit, tantum ingenii aspiret, dexterque ac volens assit et me, qualem esse credidit, faciat.

6 Cuius mihi religionis non haec sola ratio, quae maxima est; sed alioqui sic procedit ipsum opus, ut maiora praeteritis ac magis ardua sint, quae ingredior. Sequitur enim, ut iudicialium causarum, quae sunt maxime variae ac multiplices, ordo explicetur: quod prooemii sit officium, quae ratio narrandi, quae probationum fides, seu proposita confirmamus sive contra dicta dissolvimus, quanta vis in perorando, seu reficienda brevi repetitione rerum memoria est iudicis sive affectus (quod est longe potentissimum) commo-

7 vendi. De quibus partibus singulis quidam separatim scribere maluerunt velut onus totius corporis veriti, et sic quoque complures de unaquaque earum libros ediderunt; quas ego omnes ausus contexere prope infinitum laborem prospicio et ipsa cogitatione suscepti muneris fatigor. Sed durandum est, quia coepimus, et si viribus deficiemus, animo tamen perseverandum.

DE EXORDIO.

I. Quod principium Latine vel exordium dicitur, maiore quadam ratione Graeci videntur προοίμιον nominasse: quia a nostris initium modo significatur, illi satis clare par-

tem hanc esse ante ingressum rei, de qua dicendum sit, ostendunt. Nam sive propterea, quod οἴμη cantus est, et 2 citharoedi pauca illa, quae, antequam legitimum certamen inchoent, emerendi favoris gratia canunt, prooemium cognominaverunt, oratores quoque ea, quae, priusquam causam exordiantur, ad conciliandos sibi iudicum animos prae loquuntur, eadem appellatione signarunt; sive, quod οἴμων iidem 3 Graeci *viam* appellant, id quod ante ingressum rei ponitur sic vocare est institutum: certe prooemium est, quod apud iudicem dici, priusquam causam cognoverit, possit; vitioseque in scholis facimus, quod exordio semper sic utimur, quasi causam iudex iam noverit. Cuius rei licentia ex hoc 4 est, quod ante declamationem illa velut imago litis exponitur. Sed in foro quoque contingere istud principiorum genus secundis actionibus potest; primis quidem raro unquam, nisi forte apud eum, cui res iam aliunde nota sit, dicimus.

Causa principii nulla alia est, quam ut auditorem, 5 quo sit nobis in ceteris partibus accommodatior, praeparemus. Id fieri tribus maxime rebus, inter auctores plurimos constat, si benivololum, attentum, docilem fecerimus; non quia ista non per totam actionem sint custodienda, sed quia initiis praecipue necessaria, per quae in animum iudicis, ut procedere ultra possimus, admittimus.

Benivolentiam aut a personis ducimus aut a causis 6 accipimus. Sed personarum non est, ut plerique crediderunt, triplex ratio, ex litigatore et adversario et iudice. Nam exordium duci nonnunquam etiam ab actore causae 7 solet. Quanquam enim pauciora de se ipso dicit et parcius: plurimum tamen ad omnia momenti est in hoc positum, si vir bonus creditur. Sic enim contingit, ut non studium advocati videatur afferre sed paene testis fidem. Quare in primis existimetur venisse ad agendum ductus officio vel cognationis vel amicitiae maximeque, si fieri poterit, reipublicae aut alicuius certe non mediocris exempli. Quod sine dubio multo magis ipsis litigatoribus faciendum est, ut ad agendum magna atque honesta ratione aut etiam necessitate accessisse videantur. Sed ut praecipua in hoc dicentis au- 8 ctoritas, si omnis in subeundo negotio suspicio sordium aut

odiorum aut ambitionis abfuerit: ita quaedam in his quoque commendatio tacita, si nos infirmos, imparatos, impares agentium contra ingenis dixerimus, qualia sunt pleraque Messa-
 9 lae prooemia. Est enim naturalis favor pro laborantibus, et iudex religiosus libentissime patronum audit, quem iustitiae suae minime timet. Inde illa veterum circa occultandam eloquentiam simulatio multum ab hac nostrorum temporum
 10 iactatione diversa. Vitandum etiam, ne contumeliosi, maligni, superbi, maledici in quemquam hominem ordinemve videamur, praecipueque eorum, qui laedi nisi adversa iudi-
 11 cum voluntate non possunt. Nam in iudicem ne quid dicatur non modo palam sed ne quod omnino intelligi possit, stultum erat monere, nisi fieret. Etiam partis adversae patronus dabit exordio materiam, interim cum honore, si eloquentiam eius et gratiam nos timere fingendo, ut ea suspecta sint iudici, fecerimus, interim per contumeliam; sed hoc perquam raro, ut Asinius pro Urbiniae heredibus Labienum adversarii patronum inter argumenta causae malae posuit.
 12 Negat haec esse prooemia Cornelius Celsus, quia sint extralitem. Sed ego cum auctoritate summorum oratorum magis ducor, tum pertinere ad causam puto, quidquid ad dicentem pertinet, cum sit naturale, ut iudices iis, quos libentius au-
 13 diunt, etiam facilius credant. Ipsius autem litigatoris persona tractanda varie est. Nam tum dignitas eius allegatur, tum commendatur infirmitas. Nonnunquam contingit relatio meritorum, de quibus verecundius dicendum erit sua quam aliena laudanti; multo magis sexus, aetas, condicio, ut in feminis, senibus, pupillis, liberos, parentes, coniuges al-
 14 legantibus. Nam sola rectum quoque iudicem inclinat miseratio. Degustanda tamen haec prooemio, non consumenda. Adversarii vero persona prope iisdem omnibus sed e contrario ductis impugnari solet. Nam et potentes sequitur invidia et humiles abiectosque contemptus et turpes ac nocentes odium, quae tria sunt ad alienandos iudicum animos
 15 potentissima. Neque haec dicere sat est, quod datur etiam imperitis; pleraque augenda aut minuenda, ut expediet. Hoc enim oratoris est, illa causae.
 16 Iudicem conciliabimus nobis non tantum laudando

eum, quod et fieri cum modo debet et est tamen parti utriusque commune; sed si laudem eius ad utilitatem causae nostrae coniunxerimus, ut allegemus pro honestis dignitatem illi suam, pro humilibus iustitiam, pro infelicibus misericordiam, pro laesis severitatem et similiter cetera. Mores quo-
 17 que, si fieri potest, iudicis velim nosse. Nam prout asperi, lenes, iucundi, graves, duri, remissi erunt: aut assumere in causam naturas eorum, qua competent, aut mitigare, qua repugnabunt, oportebit. Accidit autem interim hoc quoque,
 18 ut aut nobis inimicus aut adversariis sit amicus, qui iudicat; quae res utrique parti tractanda est ac nescio an etiam ei magis, in quam videatur propensior. Est enim nonnunquam pravus hic ambitus, adversus amicos aut pro his, quibuscum similitates gerant, pronuntiandi faciendique iniuste, ne fecisse videantur. Fuerunt etiam quidam rerum suarum iudi-
 19 ces. Nam et in libris Observationum a Septimio editis affuisse Ciceronem tali causae invenio, et ego pro regina Berenice apud ipsam eam causam dixi. Similis hic quoque superioribus ratio est. Adversarius enim fiduciam partis suae iactat, patronus timet cognoscentis verecundiam. Praeterea
 20 detrahenda vel confirmanda opinio, si quam praecipue domo videbitur iudex attulisse. Metus etiam nonnunquam est amovendus, ut Cicero pro Milone, ne arma Pompeii disposita contra se putarent, laboravit; nonnunquam adhibendus, ut idem in Verrem facit. Sed adhibendi modus alter ille fre-
 21 quens et favorabilis: *ne male sentiat populus Romanus, ne iudicia transferantur*; alter autem asper et rarus, quo minatur corruptis accusationem, et id quidem in consilio ampliore utcumque tutius; nam et mali inhihentur et boni gaudent; apud singulos vero nunquam suaserim, nisi defecerint omnia. Quod si necessitas exigit, non erit iam ex
 22 arte oratoria, non magis quam appellare, etiamsi id quoque saepe utile est, aut, antequam pronuntiet, reum facere; nam et minari et deferre etiam non orator potest.

Si causa conciliandi nobis iudicis materiam dabit, ex
 23 hac potissimum aliqua in usum principii, quae maxime favorabilia videbuntur, decerpi oportebit. Quo in loco Verginius fallitur, qui Theodoro placere tradit, ut ex singulis

24 quaestionibus singuli sensus in prooemium conferantur. Nam ille non hoc dicit, sed ad potentissimas quaestiones iudicem praeparandum; in quo vitii nihil erat, nisi in universum id praeciperet, quod nec omnis quaestio patitur nec omnis causa desiderat. Nam protinus a petitore primo loco, dum ignota iudici lis est, quomodo ex quaestionibus ducemus sententias? nimirum res erunt indicandae prius. Demus aliquas; (nam id exiget ratio nonnunquam) etiamne potentissimas omnes, id est totam causam? sic erit in prooemio peracta
 25 narratio. Quid vero? si, ut frequenter accidit, paulo est durior causa: non benivolentia iudicis petenda ex aliis partibus erit, sed non ante conciliato eius animo nuda quaestio-
 26 num committetur asperitas? Quae si recte semper initio dicendi tractarentur: nihil prooemio opus esset. Aliqua ergo nonnunquam, quae erunt ad conciliandum nobis iudicem potentissima, non inutiliter interim ex quaestionibus in exordio locabuntur. Quae sint porro in causis favorabilia, enumerare non est necesse, quoniam et manifesta erunt, cognita cuiusque controversiae condicione, et omnia colligi in tanta
 27 litium varietate non possunt. Ut autem haec invenire et angere, ita quod laedit aut omnino repellere aut certe minuire, ex causa est. Miseratio quoque aliquando ex eadem
 28 venit, sive quid passi sumus grave sive passuri. Neque enim sum in hac opinione, qua quidam, ut eo distare prooemium ab epilogo credam, quod in hoc praeterita in illo futura dicantur; sed quod in ingressu parcius et modestius praetemptanda sit iudicis misericordia, in epilogo vero liceat totos effundere affectus et fictam orationem induere personis et defunctos excitare et pignora reorum producere; quae
 29 minus in exordiis sunt usitata. Sed haec, quae supra dixi, non movere tantum, verum ex diverso amoliri quoque prooemio opus est. Ut autem nostrum miserabilem, si vincamur, exitum: ita adversariorum superbum, si vicerint, utile est
 30 credi. Sed ex his quoque, quae non sunt personarum nec causarum, verum adiuncta personis et causis, duci prooemia solent. Personis applicantur non pignora modo, de quibus supra dixi, sed propinquitates, amicitiae, interim regiones etiam civitatesque, et si quid aliud eius quem defendimus

casu laedi potest. Ad causam extra pertinent tempus, unde
 31 principium pro Caelio; locus, unde pro Deiotaro; habitus, unde pro Milone; opinio, unde in Verrem; deinceps, ne omnia enumerem, infamia iudiciorum, expectatio vulgi; nihil enim horum in causa est, ad causam tamen pertinent. Adii-
 32 cit Theophrastus ab oratione principium, quale videtur esse Demosthenis pro Ctesiphonte, ut sibi dicere suo potius arbitrio liceat rogantis quam eo modo, quem actione accusator praescripserit. Fiducia ipsa solet opinione arrogantiae la-
 33 borare.

Faciunt favorem et illa paene communia non tamen omittenda, vel ideo ne occupentur, optare, abominari, rogare, sollicitum agere; quia plerumque attentum iudicem facit, si res agi videtur nova, magna, atrox, pertinens ad exemplum, praecipue tamen, si iudex aut sua vice aut reipublicae commovetur, cuius animus spe, metu, admonitione, precibus, vanitate denique, si id profuturum credimus, agitandus est. Sunt et illa excitandis ad audiendum non
 34 inutilia, si nos neque diu moraturos neque extra causam dicturos existiment. Docilem sine dubio et haec ipsa praestat attentio; sed et illud, si breviter et dilucide summam rei, de qua cognoscere debeat, indicaverimus, quod Homerus atque Vergilius operum suorum principiis faciunt. Nam is eius
 35 rei modus est, ut propositioni similior sit quam expositioni; nec quomodo quidque sit actum sed de quibus dicturus sit orator, ostendat. Nec video, quod huius rei possit apud oratores reperiri melius exemplum quam Ciceronis pro A. Cluentio: *Animadverti, iudices, omnem accusatoris oratio- 36 nem in duas divisam esse partes; quarum altera mihi inniti et magnopere confidere videbatur invidia iam inveterata iudicii Iuniani, altera tantummodo consuetudinis causa timide et diffidenter attingere rationem veneficii criminum, qua de re lege est haec quaestio constituta.* Id tamen totum respondententi facilius est quam proponenti, quia hic admonendus iudex illic docendus est. Nec me
 37 quanquam magni auctores in hoc duxerint, ut non semper facere attentum ac docilem iudicem velim; non quia nesciam, id quod ab illis dicitur, esse pro mala causa, qualis ea sit,

non intelligi; verum quia istud non negligentia iudicis con-
 38 tingit sed errore. Dixit enim adversarius et fortasse persua-
 sit; nobis opus est eius diversa opinione, quae mutari non
 potest, nisi illum fecerimus ad ea quae dicemus docilem et
 intentum. Quid ergo est? Imminuenda quaedam et levanda
 et quasi contemnenda esse, consentio, ad remittendam in-
 tentionem iudicis, quam adversario praestat, ut fecit pro
 39 Ligario Cicero. Quid enim agebat aliud ironia illa, quam
 ut Caesar minus in rem tanquam non novam intenderet?
 Quid pro Caelio, quam ut res expectatione minor videretur?
 Verum ex his, quae proposuimus, aliud in alio genere
 40 causae desiderari palam est. Genera porro causarum plu-
 rimi quinque fecerunt, honestum, humile, dubium vel anceps,
 admirabile, obscurum: id est *ἔνδοξον, ἄδοξον, ἀμπίδοξον, πα-*
ράδοξον, δυσπαρακολούθητον. Quibusdam recte videtur adiici
 41 turpe, quod alii humili, alii admirabili subiiciunt. Admirabile
 autem vocant, quod est praeter opinionem hominum constitu-
 tum. In ancipiti maxime benivolum iudicem, in obscuro doci-
 lem, in humili attentum parere debemus. Nam honestum qui-
 dem ad conciliationem satis per se valet, admirabili et turpi
 42 remediis opus est. Eo quidam exordium in duas dividunt par-
 tes, *principium et insinuationem*, ut sit in principiis recta
 benivolentiae et attentionis postulatio, quae esse in turpi
 causae genere non possit; insinuatio surrepat animis, ma-
 xime ubi frons causae non satis honesta est, vel quia res
 sit improba vel quia hominibus parum probetur; aut si facie
 quoque ipsa premitur vel invidiosa consistentis ex diverso
 43 patroni aut patris vel miserabili senis, caeci, infantis. Et
 quidem quibus adversus haec modis sit medendum, verbo-
 sius tradunt materiasque sibi ipsi fingunt et ad morem actio-
 num proseguuntur; sed haec, cum oriuntur ex causis, quarum
 species consequi omnes non possumus, nisi generaliter com-
 44 prehendantur, in infinitum sunt extrahendae. Quare singulis
 consilium ex propria ratione nascetur. Illud in universum
 praeceperim, ut ab his, quae laedunt, ad ea, quae prosunt,
 refugiamus. Si causa laborabimus, persona subveniat; si
 personā, causa; si nihil, quod nos adiuvet, erit, quaeramus,
 quid adversarium laedat; nam ut optabile est, plus favoris

mereri: sic proximum, odii minus. In his, quae negari non 45
 potuerint, elaborandum, ut aut minora, quam dictum est,
 aut alia mente facta, aut nihil ad praesentem quaestionem
 pertinere, aut emendari posse poenitentia, aut satis iam pu-
 nita videantur. Ideoque agere advocato quam litigatori
 facilius, quia et laudat sine arrogantiae crimine et aliquando
 utiliter etiam reprehendere potest. Nam se quoque moveri 46
 interim finget, ut pro Rabirio Postumo Cicero, dum aditum
 sibi ad aures faciat et auctoritatem induat vera sentientis,
 quo magis credatur vel defendenti eadem vel neganti. Ideo-
 que hoc primum intuemur, litigatoris an advocati persona
 sit utendum, quotiens utrumque fieri potest; nam in schola
 liberum est, in foro rarum, ut sit idoneus suae rei quisque
 defensor. Declamaturus autem maxime positus in affectibus 47
 causas propriis personis debet induere. Hi sunt enim, qui
 mandari non possunt, nec eadem vi perfertur alieni animi,
 qua sui, motus. His etiam de causis insinuatione videtur 48
 opus esse, si adversarii actio iudicum animos occupavit, si
 dicendum apud fatigatos est; quorum alterum promittendo
 nostras probationes et adversas eludendo vitabimus, alterum
 et spe brevitatis et his, quibus attentum fieri iudicem docui-
 mus. Et urbanitas opportuna reficit animos et undecunque 49
 petita iudicis voluptas levat taedium. Non inutilis etiam est
 ratio occupandi, quae videntur obstare, ut Cicero dicit,
Scire se mirari quosdam, quod is, qui per tot annos de-
fenderit multos, laeserit neminem, ad accusandum Ver-
rem descenderit; inde ostendit, hanc ipsam esse sociorum
defensionem; quod schema *πρόληψις* dicitur. Id cum sit 50
 utile aliquando, nunc a declamatoribus quibusdam paene
 semper assumitur, qui fas non putant nisi a contrario in-
 cipere.

Negat Apollodorum secuti, tris esse, de quibus su-
 pra diximus, praeparandi iudicis partes; sed multas species
 enumerant, ut ex moribus iudicis, ex opinionibus ad cau-
 sam extra pertinentibus, ex opinione de ipsa causa, quae
 sunt prope infinitae; cum his, ex quibus omnes controver-
 siae constant, personis, factis, dictis, causis, temporibus,
 locis, occasionibus, ceteris. Quas veras esse fateor, sed in 51

haec genera recidere. Nam si iudicem benivolum, attentum, docilem habeo: quid amplius debeam optare, non reperio; cum metus ipse, qui maxime videtur esse extra haec, et attentum iudicem faciat et ab adverso favore deterreat.

52 Verum quoniam non est satis demonstrare discentibus, quae sint in ratione proemii, sed dicendum etiam, quomodo perfici facillime possint: hoc adiicio, ut dicturus intueatur, quid, apud quem, pro quo, contra quem, quo tempore, quo loco, quo rerum statu, qua vulgi fama dicendum sit, quid iudicem sentire credibile sit, antequam incipimus, tum quid desideremus aut deprecemur. Ipsa illum natura eo ducet, ut
53 sciat, quid primum dicendum sit. At nunc omne, quo coeperunt, prooemium putant, et, ut quidque succurrit, utique si aliqua sententia blandiatur, exordium. Multa autem sine dubio sunt et aliis partibus causae communia; nihil tamen in quaque melius dicitur, quam quod aequè bene dici alibi non
54 possit. Multum gratiae exordium est, quod ab actione diversae partis materiam trahit; hoc ipso, quod non compositum domi sed ibi atque ex re natum et facilitate famam ingenii auget et facie simplicis sumptique ex proximo sermonis fidem quoque acquirit; adeo ut, etiamsi reliqua scripta atque elaborata sint, tamen plerumque videatur tota extemporalis oratio, cuius initium nihil praeparati habuisse manifestum est. Frequentissime vero prooemium decebit et sententiarum et compositionis et vocis et vultus modestia, adeo ut in genere causae etiam indubitabili fiducia se ipsa nimium exerere non debeat. Odit enim index fere litigantis securitatem, cumque ius suum intelligat, tacitus reverentiam postulat. Nec minus diligenter, ne suspecti simus ulla parte, vitandum; propter quod minime ostentari debet in principiis cura, quia videtur ars omnis dicentis contra iudicem adhiberi. Sed ipsum istud evitare summae artis est. Nam id sine dubio ab omnibus et quidem optime praeceptum est; verum aliquatenus temporum condicione mutatur, quia iam quibusdam in iudiciis maximeque capitalibus aut apud centumviros ipsi iudices exigunt sollicitas et accuratas actiones, contempnuntque se, nisi in dicendo etiam diligentia appareat,
58 credunt, nec doceri tantum sed etiam delectari volunt. Et

est difficilis huius rei moderatio, quae tamen temperari ita potest, ut videamur accurate non callide dicere. Ex praeceptis veteribus manet, ne quod insolens verbum, ne audacius translatum, ne aut ab obsoleta vetustate aut poetica licentia sumptum in principio deprehendatur. Nondum enim
59 recepti sumus, et custodit nos recens audientium intentio; magis conciliatis animis et iam calentibus haec libertas fertur, maximeque cum in locos fuerimus ingressi, quorum naturalis ubertas licentiam verbi notari circumfuso nitore non patitur. Nec argumentis autem nec locis nec narrationi si
60 milis esse in prooemio debet oratio, neque tamen deducta semper atque circumlata sed saepe simplici atque illaboratae similis, nec verbis vultuque nimia promittens. Dissimulata enim et, ut Graeci dicunt, ἀνεπιπαρος actio melius saepe surrepit. Sed haec prout formari animum iudicum expedit. Turbari memoria vel continuandi verba facultate destitui
61 nusquam turpius, cum vitiosum prooemium possit videri cicatricosa facies, et pessimus certe gubernator, qui navem, dum portu egreditur, impegit. Modus principii pro causa.
62 Nam brevius simplices, longius perplexae suspectaeque et infames desiderant. Ridendi vero, qui velut legem prooemii omnibus dederunt, ut intra quattuor sensus terminarentur. Nec minus evitanda est immodica eius longitudo, ne in caput excrevisse videatur, et quo praeparare debet fatiget. Sermonem a persona iudicis aversum, quae ἀποστροφή
63 dicitur, quidam in totum a prooemio summovent, nonnulla quidem in hanc persuasionem ratione ducti. Nam prorsus esse hoc magis secundum naturam confitendum est, ut eos alloquamur potissimum, quos conciliare nobis studemus. Interim tamen et est prooemio necessarius sensus aliquis, et
64 hic acrior fit atque vehementior ad personam directus alterius. Quod si accidat, quo iure aut qua tanta superstitione prohibemur dare per hanc figuram sententiae vires? Neque
65 enim istud scriptores Artium, quia non liceat, sed quia non putent utile, vetant. Ita si vincet utilitas, propter eandem causam facere debebimus, propter quam vetamur. Et De-
66 mosthenes autem ad Aeschinen orationem in prooemio convertit, et M. Tullius, cum pro aliis quibusdam, ad quos ei

- 67 visum est, tum pro Ligario ad Tiberonem; nam erat multo futura languidior, si esset aliter figurata. Quod facilius cognoscet, si quis illam totam partem vehementissimam, cuius haec forma est, *Habes igitur, Tubero, quod est accusatori maxime optandum*, et cetera, convertat ad iudicem; tum enim vere aversa videatur oratio et languere vis omnis, dicentibus nobis *Habet igitur Tubero, quod est accusatori maxime optandum*. Illo enim modo pressit atque institit, hoc tantum indicasset. Quod idem in Demosthene, si flexum illum mutaveris, accidet. [Quid? non Sallustius directo ad Ciceronem, in quem ipsum dicebat, usus est principio, et quidem protinus: *Graviter et iniquo animo maledicta tua paterer, Marce Tulli?* sicut Cicero fecerat in Catilinam: 69 *Quousque tandem abutere?*] Ac, ne quis apostrophen miretur, idem Cicero pro Scauro ambitus reo, quae causa est in commentariis, (nam bis eundem defendit) prosopopoeia loquentis pro reo utitur; pro Rabirio vero Postumo eodemque Scauro reo repetundarum etiam exemplis; pro 70 Cluentio (ut modo ostendi) partitione. Non tamen haec, quia possunt bene aliquando fieri, passim facienda sunt, sed quotiens praeceptum vicerit ratio; quomodo et similitudine, dum brevi, et translatione atque aliis tropis (quae omnia cauti illi ac diligentes prohibent) utemur interim, nisi cui divina illa pro Ligario ironia, de qua paulo ante dixeram, 71 displicet. Alia exordiorum vitia verius tradiderunt. Quod in plures causas accommodari potest, vulgare dicitur; id minus favorabile aliquando tamen non inutiliter assumimus, magnis saepe oratoribus non evitatum. Quo et adversarius uti potest, commune appellatur; quod adversarius in suam utilitatem deflectere potest, commutabile; quod causae non cohaeret, separatum; quod aliunde trahitur, translatum; praeterea quod longum, quod contra praecepta est; quorum pleraque non principii modo sunt vitia sed totius orationis. 72 Haec de prooemio, quotiens erit eius usus, non semper autem est; nam et supervacuum aliquando est, si sit praeparatus satis etiam sine hoc iudex, aut si res praeparatione non egeat. Aristoteles quidem in totum id necessarium apud bonos iudices negat. Aliquando tamen uti nec si

velimus eo licet, cum iudex occupatus, cum angusta sunt tempora, cum maior potestas ab ipsa re cogit incipere. Contra quae est interim prooemii vis etiam non in exordio. 73 Nam iudices et in narratione nonnunquam et in argumentis, ut attendant et ut faveant, rogamus, quo Prodicus velut dormitantes eos excitari putabat; quale est: *Tum C. Varenus, 74 qui a familia Anchariana occisus est. Hoc, quaeso, iudices, diligenter attendite*. Utique si multiplex causa est, sua quibusque partibus danda praefatio est, ut *Audite nunc reliqua*, et *Transeo nunc illuc*. Sed in ipsis etiam probationibus multa funguntur prooemii vice, ut facit Cicero pro Cluentio, dicturus contra censores; pro Murena, cum se Servio excusat. Verum id frequentius est, quam ut exemplis confirmandum sit.

Quotiens autem prooemio fuerimus usi, tum, sive ad 76 expositionem transibimus sive protinus ad probationem, id debet in principio postremum esse, cui commodissime iungi initium sequentium poterit. Illa vero frigida et puerilis 77 est in scholis affectatio, ut ipse transitus efficiat aliquam utique sententiam, et huius velut praestigiae plausum petat, ut Ovidius lascivire in Metamorphosin solet, quem tamen excusare necessitas potest res diversissimas in speciem unius corporis colligentem. Oratori vero quid est necesse surri- 78 pere hanc transgressionem et iudicem fallere, qui, ut ordini rerum animum intendat, etiam commonendus est? Peribit enim prima pars expositionis, si iudex narrari nondum sciet. Quapropter, ut non abrupte cadere in narrationem ita non 79 obscure transcendere, est optimum. Si vero longior sequitur ac perplexa magis expositio, ad eam ipsam praeparandus erit iudex, ut Cicero saepius sed et hoc loco fecit: *Paulo longius exordium rei demonstrandae repelam, quod, quaeso, iudices, ne moleste patiamini; principiis enim cognitatis multo facilius extrema intelligetis*. Haec fere sunt mihi de exordio comperta.

DE NARRATIONE.

II. Maxime naturale est et fieri frequentissime debet, ut praeparato per haec, quae supra dicta sunt, iudice, res,

2 de qua pronuntiaturus est, indicetur. Haec est narratio. In qua sciens transcurram subtiles nimium divisiones quorundam plura eius genera facientium. Non enim solam volunt esse illam negotii, de quo apud iudices quaeritur, expositionem sed personae, ut *M. Lollius Palicanus, humili loco, Picens, loquax magis quam facundus*; loci, ut *Oppidum est in Hellesponto Lampsacum, iudices*; temporis ut

*Vere novo, gelidus canis cum montibus humor
Liquitur;*

causarum, quibus historici frequentissime utuntur, cum exponunt, unde bellum, seditio, pestilentia. Praeter haec alias perfectas alias imperfectas vocant; quod quis ignorat? Adiiciunt, expositionem et praeteritorum esse temporum, quae est frequentissima; et praesentium, qualis est Ciceronis de discursu amicorum Chrysogoni, postquam est nominatus; et futurorum, quae solis dari vaticinantibus potest; nam ὑπο-
4 τῶπιος non est habenda narratio. Sed nos potioribus vacemus.

Plerique semper narrandum putaverunt, quod falsum esse pluribus coarguitur. Sunt enim ante omnia quaedam tam breves causae, ut propositionem potius habeant
5 quam narrationem. Id accidit aliquando utrique parti, cum vel nulla expositio est, vel de re constat de iure quaeritur, ut apud centumviros, *Filius an frater debeat esse intestatae heres? Pubertas annis an corporis habitu aestimetur?* Aut cum est quidem in re narrationi locus sed aut ante iudici
6 nota sunt omnia aut priore loco recte exposita. Accidit aliquando alteri et saepius ab actore, vel quia satis est proponere vel quia sic magis expedit. Satis est dixisse, *Certam creditam pecuniam peto ex stipulatione; Legatum peto ex testamento.* Diversae partis expositio est, cur ea non
7 debeantur. Et satis est actori et magis expedit sic indicare: *Dico ab Horatio sororem suam intersectam.* Namque et propositione iudex crimen omne cognoscit, et ordo et causa facti
8 pro adversario magis est. Reus contra tunc narrationem subtrahet, cum id, quod obiicitur, neque negari neque excusari poterit, sed in sola iuris quaestione consistet; ut in eo, qui, cum pecuniam privatam ex aede sacra surripuerit, sacrilegii

reus est, confessio verecundior quam expositio: *Non negamus de templo pecuniam esse sublatam, calumniatur tamen accusator actione sacrilegii, cum privata fuerit non sacra; vos autem de hoc cognoscetis, an sacrilegium sit admissum.*

Sed ut has aliquando non narrandi causas puto: sic ab
9 illis dissentio, qui non existimant esse narrationem, cum reus quod obiicitur tantum negat; in qua est opinione Cornelius Celsus, qui condicionis huius esse arbitratur plerasque caedis causas et omnes ambitus ac repetundarum. Non
10 enim putat esse narrationem, nisi quae summam criminis, de quo iudicium est, continet, deinde fatetur ipse, pro Rabirio Postumo narrasse Ciceronem; atque ille et negavit pervenisse ad Rabirium pecuniam, qua de re erat quaestio constituta, et in hac narratione nihil de crimine exposuit. Ego autem magnos alioqui secutus auctores, duas esse in
11 iudiciis narrationum species existimo, alteram ipsius causae alteram rerum ad causam pertinentium expositionem. *Non*
12 *occidi hominem*, nulla narratio est; convenit; sed erit aliqua et interim etiam longa contra argumenta eius criminis de antea vita, de causis, propter quas innocens in periculum deducatur, aliis, quibus incredibile id, quod obiicitur, fiat. Neque enim accusator tantum hoc dicit, *occidisti*; sed,
13 quibus id probet, narrat. Ut in tragoediis, cum Teucer Ulixen reum facit Aiacis occisi dicens: *Inventum eum in solitudine iuxta exanime corpus inimici cum gladio cruento*: non id modo Ulixes respondet, non esse a se id facinus admissum, sed sibi nullas cum Aiace inimicitias fuisse, de laude inter ipsos certatum; deinde subiungit, quomodo in eam solitudinem venerit, iacentem exanimem sit conspicatus, gladium e vulnere extraxerit. His subtexitur argumentatio. Sed ne illud quidem sine narratione est, dicente accusatore,
14 *Fuisti in eo loco, in quo tuus inimicus occisus est: Non fui*; dicendum enim, ubi fuerit. Quare ambitus quoque causae et repetundarum hoc etiam plures huiusmodi narrationes habere poterunt, quo plura crimina; in quibus ipsa quidem neganda sunt, sed argumentis expositione contraria resistendum et interdum singulis interdum universis. An reus
15 ambitus male narrabit, quos parentes habuerit, quemadmo-

- dum ipse vixerit, quibus meritis fretus ad petitionem descendit? Aut qui repetundarum crimine insimulabitur, non et anteactam vitam, et quibus de causis provinciam universam vel accusatorem aut testem offenderit, non inutiliter exponet? Quae si narratio non est, ne illa quidem Ciceronis pro Cluentio prima, cuius est initium: *A. Cluentius Habitus*. Nihil enim hic de beneficio sed de causis, quibus ei mater inimica sit, dicit. Illae quoque sunt pertinentes ad causam sed non ipsius causae narrationes: vel exempli gratia ut in Verrem de L. Domitio, qui pastorem, quod is aprum, quem ipsi muneri obtulerat, exceptum esse a se venabulo confessus esset, in crucem sustulit; vel discutiendi alicuius extrinsecus criminis, ut pro Rabirio Postumo: *Nam ut ventum Alexandriam est, iudices, haec una ratio a rege proposita Postumo est servandae pecuniae, si curationem et quasi dispensationem regiam suscepisset*; vel augendi, ut describitur iter Verris.
- 19 Ficta interim narratio introduci solet vel ad concitandos iudices ut pro Roscio circa Chrysogonum, cuius paulo ante habui mentionem; vel ad resolvendos aliqua urbanitate, ut pro Cluentio circa fratres Cepasios; interdum per digressionem decoris gratia, qualis rursus in Verrem de Proserpina [*In his quondam locis mater filiam quaesisse dicitur.*] Quae omnia eo pertinent, ut appareat, non utique non narrare eum qui negat, sed illud ipsum narrare quod negat.
- 20 Ne hoc quidem simpliciter accipiendum, quod est a me positum, esse supervacuum narrationem rei, quam iudex noverit; quod sic intelligi volo, si non modo, quid factum sit, sciet, sed ita factum etiam, ut nobis expedit, opinabitur. Neque enim narratio in hoc reperta est, ut tantum cognoscat iudex, sed aliquanto magis, ut consentiat. Quare, etiamsi non erit docendus sed aliquo modo afficiendus, narrabimus cum praeparatione quadam: *scire quidem eum in summam, quid acti sit, tamen rationem quoque facti cuiusque cognoscere ne gravetur*. Interim propter aliquem in consilium adhibitum nos repetere illa simulemus, interim, ut rei, quae ex adverso proponatur, iniquitatem omnes etiam

circumstantes intelligant. In quo genere plurimis figuris erit varianda expositio ad effugiendum taedium nota audientis, sicut *Meministi*, et *Fortasse supervacuum fuerit hic commorari*; *Sed quid ego diutius, cum tu optime noris; illud quale sit, tu scias?* et his similia. Alioqui, si apud iudicem, cui nota causa est, narratio semper videtur supervacua, potest videri non semper esse etiam ipsa actio necessaria.

Alterum est, de quo frequentius quaeritur, an sit utique narratio prooemio subiicienda; quod qui opinantur, non possunt videri nulla ratione ducti. Nam cum prooemium idcirco comparatum sit, ut iudex ad rem accipiendam fiat conciliator, docilior, intentior; et probatio nisi causa prius cognita non possit adhiberi: protinus iudex notitia rerum instruendus videtur. Sed hoc quoque interim mutat condicio causarum; nisi forte M. Tullius in oratione pulcherrima, quam pro Milone scriptam reliquit, male distulisse narrationem videtur tribus praepositis quaestionibus; aut profuisset exponere, quomodo insidias Miloni fecisset Clodius, si reum, qui a se hominem occisum fateretur, defendi omnino fas non fuisset, aut si iam praedicio senatus damnatus esset Milo, aut si Cn. Pompeius, qui propter aliquam gratiam iudicium etiam militibus armatis clauserat, tanquam adversus ei timeretur. Ergo hae quoque quaestiones vim prooemii obtinebant, cum omnes iudicem praepararent. Sed pro Vareno quoque postea narravit quam obiecta diluit. Quod fiet utiliter, quotiens non repellendum tantum erit crimen sed etiam transferendum, ut prius his defensis velut initium sit alium culpandi narratio, ut in armorum ratione antiquior cavendi quam ictum inferendi cura est. Erunt quaedam causae (neque id raro) crimine quidem, de quo cognitio est, faciles ad diluendum sed multis anteactae vitae flagitiis et gravibus oneratae; quae prius amovenda sunt, ut propitius iudex defensionem ipsius negotii, cuius propria quaestio est, audiat: ut, si defendendus sit M. Caelius, nonne optime patronus occurrat prius conviciis luxuriae, petulantiae, impudicitiae quam beneficii, in quibus solis omnis Ciceronis versatur oratio; tum deinde narret de bonis Pallae

totamque de vi explicet causam, quae est ipsius actione de-
 28 fensa? Sed nos ducit scholarum consuetudo, in quibus certa
 quaedam ponuntur, quae themata dicimus, praeter quae nihil
 est diluendum. Ideoque narratio prooemio semper subiungi-
 tur. Inde libertas declamatoribus, ut etiam secundo partis
 29 suae loco narrare videantur. Nam cum pro petitore dicunt
 et expositione, tanquam priores agant, uti solent, et contra-
 dictione, tanquam respondeant; idque fit recte. Nam cum
 sit declamatio forensium actionum meditatio, cur non in
 utrumque protinus locum se exerceat? Cuius rationis ignari
 ex more, cui assuerunt, nihil in foro putant esse mutandum.
 30 Sed in scholasticis quoque nonnunquam evenit, ut pro nar-
 ratione sit propositio. Nam quid exponet, quae zelotypum
 malae tractationis accusat, aut qui Cynicum apud censores
 reum de moribus facit; cum totum crimen uno verbo in qual-
 ibet actionis parte posito satis indicetur? Sed haec hactenus.
 31 Nunc, quae sit narrandi ratio, subiungam. Narratio
 est rei factae aut ut factae utilis ad persuadendum expositio,
 vel (ut Apollodorus finit) oratio docens auditorem, quid in
 controversia sit. Eam plerique scriptores, maxime qui sunt
 ab Isocrate, volunt esse lucidam, brevem, verisimilem. Ne-
 que enim refert, an pro lucida perspicuam, pro verisimili
 32 probabilem credibilemve dicamus. Eadem nobis placet di-
 visio; quanquam et Aristoteles ab Isocrate parte in una dis-
 senserit praeceptum brevitatis irridens, tanquam necesse sit,
 longam esse aut brevem expositionem, nec liceat ire per
 medium, Theodori quoque solum relinquunt ultimam par-
 tem, quia nec breviter utique nec dilucide semper sit utile
 33 exponere. Quo diligentius distinguenda sunt singula, ut,
 quid quoque loco prosit, ostendam. Narratio est aut tota pro
 nobis aut tota pro adversariis aut mixta ex utrisque. Si erit
 tota pro nobis, contenti simus his tribus partibus, per
 quas efficitur, quo facilius iudex intelligat, meminert,
 34 credat. Nec quisquam reprehensione dignum putet, quod
 proposuerim, eam, quae sit tota pro nobis, debere esse
 verisimilem, cum vera sit. Sunt enim plurima vera quidem
 sed parum credibilia, sicut falsa quoque frequenter verisi-
 milia. Quare non minus laborandum est, ut iudex, quae

vere dicimus quam quae fingimus, credat. Sunt quidem hae, 35
 quas supra retuli, virtutes aliarum quoque partium. Nam
 et per totam actionem vitanda est obscuritas et modus ubique
 custodiendus, et credibilia esse omnia oportet quae dicuntur.
 Maxime tamen haec in ea parte custodienda sunt, quae prima
 iudicem docet; in qua si acciderit, ut aut non intelligat aut
 non meminerit aut non credat, frustra in reliquis laborabimus.
 Erit autem narratio aperta atque dilucida, si fuerit pri- 36
 mum exposita verbis propriis et significantibus et non sor-
 didis quidem non tamen exquisitis et ab usu remotis; tum
 distincta rebus, personis, temporibus, locis, causis, ipsa
 etiam pronuntiatione in hoc accommodata, ut iudex, quae
 dicuntur, quam facillime accipiat. Quae quidem virtus negli- 37
 gitur a plurimis, qui ad clamorem dispositae vel etiam forte
 circumfusae multitudinis compositi non ferunt illud intentionis
 silentium nec sibi deserti videntur, nisi omnia tumultu et vo-
 ciferatione concusserint; rem indicare sermonis cotidiani et
 in quemcumque etiam indoctorum cadentis existimant; cum
 interim, quod tanquam facile contemnunt, nescias, prae-
 stare minus velint an possint. Neque enim aliud in eloquen- 38
 tia, cuncta experti, difficilius reperient quam id, quod se
 fuisse dicturos omnes putant, postquam audierunt, quia non
 bona iudicant esse illa sed vera. Tum autem optime dicit
 orator, cum videtur vere dicere. At nunc, velut campum 39
 nacti expositionis, hic potissimum et vocem flectunt et cer-
 vicem reponunt et brachium in latus iactant totoque et rerum
 et verborum et compositionis genere lasciviunt; deinde,
 quod sit monstro simile, placet actio, causa non intelligitur.
 Verum haec omittamus, ne minus gratiae praecipiendo recta
 quam offensae reprehendendo prava mereamur. Brevis erit 40
 narratio ante omnia, si inde coeperimus rem exponere, unde
 ad iudicem pertinet; deinde, si nihil extra causam dixerimus;
 tum etiam, si reciderimus omnia, quibus sublatis neque co-
 gnitioni quidquam neque utilitati detrahatur. Solet enim 41
 quaedam esse partium brevitatis, quae longam tamen efficit
 summam. *In portum veni, navem prospexi, quanti vehe-
 ret interrogavi, de pretio convenit, conscendi, sublatae
 sunt ancorae, solvimus oram, profecti sumus.* Nihil ho-

rum dici celerius potest, sed sufficit dicere *e portu navigavi*.
 Et quotiens exitus rei satis ostendit priora, debemus hoc
 42 esse contenti, quo reliqua intelliguntur. Quare, cum dicere
 liceat, *Est mihi filius iuvenis*, omnia illa supervacua: *Cu-
 pidus ego liberorum uxorem duxi, natum filium sustuli,
 educavi, in adolescentiam perduxi*. Ideoque Graecorum
 aliqui aliud circumcisam expositionem id est σύντομον, aliud
 brevem putaverunt; quod illa supervacuis careret, haec
 43 posset aliquid ex necessariis desiderare. Nos autem brevi-
 tatem in hoc ponimus, non ut minus sed ne plus dicatur
 quam oporteat. Nam iterationes quidem et ταυτολογίας et
 περισσολογίας, quas in narratione vitandas quidam scriptores
 Artium tradiderunt, transeo; sunt enim haec vitia non tantum
 44 brevitatis gratia refugienda. Non minus autem cavenda erit,
 quae nimium corripientes omnia sequitur, obscuritas, satius-
 que est aliquid narrationi superesse quam deesse. Nam su-
 pervacua cum taedio dicuntur, necessaria cum periculo sub-
 45 trahuntur. Quare vitanda est etiam illa Sallustiana, quan-
 quam in ipso virtutis locum obtinet, brevitatis et abruptum
 sermonis genus, quod otiosum fortasse lectorem minus fallat,
 audientem transvolat, nec dum repetatur expectat; cum prae-
 sertim lector non fere sit nisi eruditus, iudicem rura ple-
 rumque in decurias mittant de eo pronuntiatum, quod intel-
 46 lexerit; ut fortasse ubicunque, in narratione tamen prae-
 cipue, media haec tenenda sit via dicendi, quantum opus
 47 est, quantum sat est. Quantum opus est autem non ita
 accipi solum volo, quantum ad indicandum sufficit, quia et
 non inornata debet esse brevitatis, alioqui sit indocta; nam
 et fallit voluptas et minus longa quae delectant videntur, ut
 amoenum ac molle iter, etiamsi est spatii amplioris, minus
 47 fatigat quam durum aridumque compendium. Neque mihi un-
 quam tanta fuerit cura brevitatis, ut non ea, quae credibilem
 faciunt expositionem, inseri velim. Simplex enim et undique
 praecisa non tam narratio vocari potest quam confessio.
 Sunt porro multae condicionem ipsa rei longae narrationes,
 quibus extrema (ut praecepi) prooemii parte ad intentionem
 praeparandus est iudex; deinde curandum, ut omni arte vel
 48 ex spatio eius detrahamus aliquid vel ex taedio. Ut minus

longa sit, efficiemus quae poterimus differendo, non tamen
 sine mentione eorum, quae differemus: *Quas causas occi-
 dendendi habuerit, quos assumpserit conscios, quemadmodum
 disposuerit insidias, probationis loco dicam*. Quaedam 49
 vero ex ordine praetermittenda, quale est apud Ciceronem:
*Moritur Fulcinius; nulla enim, quae sunt in re, quia re-
 mota sunt a causa, praetermittam*. Et partitio taedium
 levat: *Dicam, quae acta sint ante ipsum rei contractum,
 dicam, quae in re ipsa, dicam, quae postea*. Ita tres po- 50
 tius modicae narrationes videbuntur quam una longa. In-
 terim expediet expositiones brevi interfatione distinguere:
*Audistis, quae ante acta sunt, accipite nunc, quae inse-
 quantur*. Reficietur enim iudex priorum sine et se velut ad
 novum rursus initium praeparabit. Si tamen adhibitis quoque 51
 his artibus in longum exierit ordo rerum, erit non inutilis in
 extrema parte commonitio; quod Cicero etiam in brevi nar-
 ratione fecit: *Adhuc, Caesar, Q. Ligarius culpa caret;
 domo est egressus non modo nullum ad bellum sed ne ad
 minimam quidem belli suspicionem* et cetera.

Credibilis autem erit narratio ante omnia, si prius 52
 consuluerimus nostrum animum, ne quid naturae dicamus ad-
 versum; deinde si causas ac rationes factis praeposuerimus,
 non omnibus sed de quibus quaeritur; si personas conve-
 nientes his, quae facta credi volumus, constituerimus, ut
 furti reum cupidum, adulterii libidinosum, homicidii teme-
 rarium, vel contra, si defendemus; praeterea loca et tem-
 53 pora et his similia. Est autem quidam etiam ductus rei cre-
 dibilis, qualis in comoediis etiam et in mimis. Aliqua enim
 naturaliter sequuntur et cohaerent, ut, si priora bene narra-
 veris, iudex ipse, quod postea sis narraturus, expectet. Ne 54
 illud quidem fuerit inutile, semina quaedam probationum
 spargere, verum sic, ut narrationem esse meminerimus non
 probationem. Nonnunquam tamen etiam argumento aliquo
 confirmabimus, quod proposuerimus, sed simplici et brevi,
 ut in beneficiis: *Sanus bibit, statim concidit, livor ac tu-
 mor confesim est insecurus*. Hoc faciunt et illae praepara- 55
 tiones, cum reus dicitur robustus, armatus contra infirmos,
 inermes, securos. Omnia denique, quae probatione tracta-

turi sumus, personam, causam, locum, tempus, instrumen-
 56 tum, occasionem, narratione delibabimus. Aliquando, si
 destituti fuerimus his, etiam fatebimur: *Vix esse credibile
 sed verum et hoc maius habendum scelus, nescire nos quo-*
 57 *modo factum sit aut quare, mirari sed probaturos.* Opti-
 mae vero praeparationes erunt, quae latuerint, ut a Cice-
 rone sunt quidem utilissime praedicta omnia, per quae Miloni
 Clodius non Clodio Milo insidiatus esse videatur; plurimum
 tamen facit illa callidissima simplicitatis imitatio: *Milo au-*
tem, cum in senatu fuisset eo die, quoad senatus est di-
missus, domum venit, calceos et vestimenta mutavit, pau-
lisper, dum se uxor, ut fit, comparat, commoratus est.
 58 Quam nihil festinato, nihil praeparato fecisse videtur Milo!
 Quod non solum rebus ipsis vir eloquentissimus, quibus
 moras et lentum profectionis ordinem ducit, sed verbis etiam
 vulgaribus et cotidianis et arte occulta consecutus est; quae
 si aliter dicta essent, strepitu ipsum iudicem ad custodien-
 59 dum patronum excitassent. Frigere videntur ista plerisque;
 sed hoc manifestum est, quomodo iudicem fefellerit, quod
 vix a lectore deprehenditur. Haec sunt, quae credibilem fa-
 60 ciant expositionem. Nam id quidem, ne qua contraria aut
 sibi repugnantia in narratione dicamus, si cui praecipendum
 est, is reliqua frustra docetur; etiamsi quidam scriptores
 Artium hoc quoque tanquam occultum et a se prudenter eru-
 tum tradunt.

61 His tribus narrandi virtutibus adiciunt quidam magni-
 ficentiam, quam *μεγαλοπρέπειαν* vocant, quae neque in
 omnes causas cadit (nam quid in plerisque iudiciis privatis,
 de certa credita, locato et conducto, interdictis habere loci
 potest supra modum se tollens oratio?) neque semper est
 62 utilis, velut proximo exemplo Miloniano patet. Et memi-
 nerimus multas esse causas, in quibus confitendum, excu-
 sandum, summittendum sit, quod exponimus; quibus omnibus
 aliena est illa magnificentiae virtus. Quare non magis pro-
 prium narrationis est magnifice dicere quam miserabiliter, in-
 vidiose, graviter, dulciter, urbane; quae, cum suo quaeque
 loco sint laudabilia, non sunt huic parti proprie assignata et
 velut dedita.

Illa quoque ut narrationi apta ita cum ceteris partibus 63
 communis est virtus, quam Theodectes huic uni proprie
 dedit; non enim magnificam modo vult esse verum etiam
 iucundam expositionem. Sunt qui adiciant his evidentiam,
 quae *ἐνάργεια* Graece vocatur. Neque ego quemquam dece- 64
 perim, ut dissimulem, Ciceroni quoque plures partes pla-
 cere. Nam, praeterquam planam et brevem et credibilem
 vult esse evidentem, moratam, cum dignitate. Sed in ora-
 tione morata debent esse omnia cum dignitate, quae pote-
 runt. Evidentia in narratione, quantum ego intelligo, est
 quidem magna virtus, cum, quid veri, non dicendum sed
 quodammodo etiam ostendendum est; sed subitici perspicui-
 tati potest, quam quidam etiam contrariam interim putave-
 runt, quia in quibusdam causis obscuranda veritas esset;
 quod est ridiculum. Nam qui obscurare vult, narrat falsa 65
 pro veris, et in his quae narrat debet laborare, ut videantur
 quam evidentissima.

Et quatenus etiam forte quadam pervenimus ad diffici- 66
 lius narrationum genus, iam de his loquamur, in quibus res
 contra nos erit, quo loco nonnulli praetereundam narra-
 tionem putaverunt. Et sane nihil est facilius, nisi prorsus
 totam causam omnino non agere. Sed si aliqua iusta ratione
 huiusmodi susceperis litem: cuius artis est, malam esse
 causam silentio confiteri? nisi forte tam hebes futurus est
 iudex, ut secundum id pronuntiet, quod sciet narrare te no-
 luisse. Neque infitias eo, in narratione, ut aliqua neganda 67
 aliqua adficienda aliqua mutanda, sic aliqua etiam tacenda;
 sed tacenda, quae tacere oportebit et liberum erit. Quod
 fit nonnunquam brevitatis quoque gratia, quale illud est:
Respondit, quae ei visum est. Distinguamus igitur genera 68
 causarum. Namque, in quibus non de culpa quaeretur sed
 de actione, etiamsi erunt contra nos themata, confiteri nobis
 licebit: *Pecuniam de templo sustulit sed privatam, ideo
 quae sacrilegus non est. Virginem rapuit, non tamen optio
 patri dabitur. Ingenuum stupravit et stupratus se suspen-* 69
dit, non tamen ideo stuprator capite ut causa mortis pu-
nietur, sed decem milia, quae poena stupratori consti-
tuta est, dabit. Verum in his quoque confessionibus est

aliquid, quod ex invidia, quam expositio adversarii fecit, detrahi possit, cum etiam servi nostri de peccatis suis melius loquantur. Quaedam enim quasi non narrantes mitigabimus: *Non quidem, ut adversarius dicit, consilium furti in templum attulit, nec diu captavit eius rei tempus; sed occasione et absentia custodum corruptus et pecunia, quae nimium in animis hominum potest, victus est. Quid refert? peccavit et fur est, et nihil attinet id defendere, cuius poenam non recusamus.* Interim quasi damnemus ipsi: *Vis te dicam vino impulsus? errore lapsus? nocte deceptus? vera sunt ista fortasse; tu tamen ingenium stuprasti, solve decem milia.* Nonnunquam propositione praemuniri potest causa, deinde exponi. Contraria sunt omnia tribus filiis, qui in mortem patris coniurarant: sortiti nocte singuli per ordinem cum ferro cubiculum intrarunt patre dormiente; cum occidere eum nemo potuisset, excitato omnia indicarunt. Si tamen pater, qui divisit patrimonium et reos parricidii defendit, sic agat: *Quod contra legem sufficit, parricidium obicitur iuvenibus, quorum pater vivit atque etiam liberis suis adest. Ordinem rei narrare quid necesse est, cum ad legem nihil pertineat? sed si confessionem culpa meae exigitis: fui pater durus et patrimonii, quod iam melius ab his administrari poterat, tenax custos; deinde subicitur: Stimulatos ab iis, quorum indulgentiores parentes erant, semper tamen habuisse eum animum, qui sit eventu deprehensus, ut occidere patrem non possent. Neque enim iureiurando opus fuisse, si alioqui hoc mentis habuissent, nec sorte, nisi quod se quisque eximi voluerit: omnia haec qualiacunque placidioribus animis accipientur illa brevi primae propositionis defensione mollita. At cum quaeritur, An factum sit? vel, Quale factum sit? licet omnia contra nos sint: quomodo tamen evitare expositionem salva causae ratione possumus? Narravit accusator neque ita ut, quae essent acta, tantum indicaret; sed adiecit invidiam, rem verbis exasperavit, accesserunt probationes, peroratio incendit et plenos irae reliquit. Expectat naturaliter iudex, quid narretur a nobis. Si nihil exponimus: illa esse, quae adversarius dixit, et talia, qualia dixit, credat necesse est.*

Quid ergo? eadem exponemus? Si de qualitate agitur, cuius tum demum quaestio est, cum de re constat, eadem sed non eodem modo; alias causas, aliam mentem, aliam rationem dabo. Verbis elevare quaedam licebit; luxuria liberalitatis, avaritia parsimoniae, negligentia simplicitatis nomine lenietur. Vultu denique, voce, habitu vel favoris aliquid vel miserationis merebor. Solet nonnunquam movere lacrimas ipsa confessio. Atque ego libenter interrogem, sint illa defensuri, quae non narraverint, necne? Nam si neque defenderint neque narraverint, tota causa prodetur; at si defensuri sunt: proponere certe plerumque id, quod confirmaturi sumus, oportet. Cur ergo non exponamus, quod et dilui potest, et, ut hoc contingat, utique indicandum est? Aut quid inter probationem et narrationem interest, nisi quod narratio est probationis continua propositio, rursus probatio narrationi congruens confirmatio? Videamus ergo, num haec expositio longior demum debeat esse, et paulo verbosior praeparatione et quibusdam argumentis, (argumentis dico, non argumentatione), cui tamen plurimum confert frequens affirmatio: *Effecturos nos, quod dicimus; non posse vim rerum ostendi prima expositione; expectent et opiniones suas differant et bene sperent.* Denique utique narrandum est, quidquid aliter, quam adversarius exposuit, narrari potest; aut etiam prooemia sunt in his causis supervacua, quae quid magis agunt, quam ut cognitioni rerum accommodatiorem iudicem faciant? Atque constabit, nusquam esse eorum maiorem usum, quam ubi animus iudicis ab aliqua contra nos insita opinione flectendus est. Coniecturales autem causae, in quibus de facto quaeritur, non tam saepe rei, de qua iudicium est, quam eorum, per quae res colligenda est, expositionem habent. Quae, cum accusator suspiciose narret, reus levare suspicionem debeat, aliter ab hoc atque ab illo ad iudicem perferri oportet. Quaedam argumenta turba valent, diducta leviora sunt. Id quidem non eo pertinet, ut quaeratur, an narrandum sed quomodo narrandum sit? Nam et congerere plurima expositione quis prohibet, si id utile est causae, et promittere: sed et dividere narrationem et probationes subiungere par-

83 tibus atque ita transire ad sequentia? Nam ne his quidem accedo, qui semper eo putant ordine, quo quid actum sit, esse narrandum; sed eo malo narrare, quo expedit. Quod fieri plurimis figuris licet. Nam et aliquando nobis excidisse simulamus, cum quid utiliore loco reducimus; et interim nos redditorios reliquum ordinem testamur, quia sic futura sit
84 causa lucidior; interim re exposita, subiungimus causas, quae antecesserunt. Neque enim est una lex defensionis certumque praescriptum; pro re, pro tempore intuenda, quae prosint, atque ut erit vulnus, ita vel curandum protinus vel, si
85 curatio differri potest, interim deligandum. Nec saepius narrare duxerim nefas, quod Cicero pro Cluentio fecit; estque non concessum modo sed aliquando etiam necessarium, ut in causis repetundarum omnibusque, quae simplices non sunt. Amentis est enim, superstitione praeceptorum contra ratio-
86 nem causae trahi. Narrationem ideo ante probationes ponere est institutum, ne iudex, qua de re dicatur, ignoret. Cur igitur, si singula probanda aut refellenda erunt, non singula etiam narrentur? Me certe, quantacunque nostris experimentis habenda est fides, fecisse hoc in foro, quotiens ita desiderabat utilitas, probantibus et eruditis et his, qui iudicabant, scio; et (quod non arroganter dixerim, quia sunt plurimi, quibuscum egi, qui me refellere possint, si mentior)
87 fere ponendae a me causae officium exigebatur. Neque ideo tamen non id saepius facere oportebit, ut rerum ordinem sequamur. Quaedam vero etiam turpiter convertuntur, ut si peperisse narres, deinde concepisse; apertum testamentum, deinde signatum; in quibus si id, quod posterius est, dixeris, de priore tacere optimum; palam est enim praecessisse.
88 Sunt quaedam et falsae expositiones, quarum in foro duplex genus est: alterum, quod instrumentis adiuuatur, ut P. Clodius fiducia testium, qua nocte incestum Romae commiserat, Interamnae se fuisse dicebat; alterum, quod est tuendum dicentis ingenio. Id interim ad solam verecundiam pertinet, unde etiam mihi videtur dici color; interim ad
89 quaestionem. Sed utrumcunque erit, prima sit curarum, ut id quod fingemus fieri possit; deinde, ut et personae et loco et tempori congruat et credibilem rationem et ordinem ha-

beat, si contigerit, etiam verae alicui rei cohaereat aut argumento, quod sit in causa, confirmetur. Nam quae tota extra rem petita sunt, mentiendi licentiam produunt. Curan-90 dum praecipue, (quod fingentibus frequenter excidit) ne qua inter se pugnent, quaedam enim partibus blandiuntur sed in summam non consentiunt; praeterea, ne iis, quae vera esse constabit, adversa sint; in schola etiam, ne color extra 91 themata quaeratur. Utrobique autem orator meminisse debet actione tota, quid finxerit, quoniam solent excidere, quae falsa sunt; verumque est illud, quod vulgo dicitur, mendacem memorem esse oportere. Sciamus autem, si de nostro 92 facto quaeratur, unum nobis aliquid esse dicendum; si de alieno, mittere in plura suspensiones licere. Est tamen quibusdam scholasticis controversiis, in quibus ponitur, aliquem non respondere quod interrogatur, libertas omnia enumerandi, quae responderi potuissent. Fingenda vero memine-93 rimus ea, quae non cadant in testem. Sunt autem haec, quae a nostro dicuntur animo, cuius ipsi tantum conscii sumus; item quod a defunctis, nec hoc enim est qui neget; itemque ab eo cui idem expedit, is enim non negabit; ab adversario quoque, quia non est habiturus in negando fidem. Somnio-94 rum et superstitionum colores ipsa iam facilitate auctoritatem perdiderunt. Non est autem satis in narratione uti coloribus, nisi per totam actionem consentiant, cum praesertim quorundam probatio sola sit in asseveratione et perseverantia: ut 95 ille *parasitus, qui ter abdicatum a divite iuvenem et absolutum tanquam suum filium asserit*, habebit quidem colorem, quo dicat, et paupertatem sibi causam exponendi fuisse, et ideo a se parasiti personam esse susceptam, quia in illa domo filium haberet; et ideo illum ter innocentem abdicatum, quia filius abdicantis non esset. Nisi tamen in omni-96 bus verbis et amorem patrium atque hunc quidem ardentissimum ostenderit, et odium divitis et metum pro iuvene, quem periculose mansurum in illa domo, in qua tam invisus sit, sciat: suspicio subiecti petitoris non carebit. Evenit ali-97 quando in scholasticis controversiis, quod in foro an possit accidere dubito, ut eodem colore utraque pars utatur, deinde eum pro se quaeque defendat, ut in illa controversia: *Uxor* 98

marito dixit, appellatam se de stupro a privigno et sibi constitutum tempus et locum; eadem contra filius detulit de noverca, edito tantum alio tempore ac loco; pater in eo, quem uxor praedixerat, filium invenit, tum in eo, quem filius, uxorem; illam repudiavit, qua tacente filium abdicat. Nihil dici potest pro iuvene, quod non idem sit pro noverca. Ponentur tamen etiam communia; deinde ex personarum comparatione et indicii ordine et silentio repudiat argumenta ducentur. Ne illud quidem ignorare oportet, quaedam esse, quae colorem non recipiant sed tantum defendenda sint, qualis est ille *dives, qui statuat pauperis inimici flagellis cecidit* et reus est iniuriarum; nam factum eius modestum esse nemo dixerit, fortasse, ut sit tutum, obtinebit.

101 Quodsi pars expositionis pro nobis, pars contra nos erit: miscenda sit an separanda narratio, cum ipsa condicione causae deliberandum est. Nam si plura sunt, quae nocent: quae prosunt, obruuntur. Itaque tunc dividere optimum erit, et his, quae partem nostram adiuvabunt, expositis et confirmatis, adversus reliqua uti remediis, de quibus supra dictum est. Si plura proderunt: etiam coniungere licebit, ut, quae obstant, in mediis velut auxiliis nostris posita minus habeant virium. Quae tamen non erunt nuda ponenda, sed ut et nostra aliqua argumentatione firmemus, et diversa cur credibilia non sint, adiiciamus; quia, nisi distinxerimus, verendum est, ne bona nostra permixtis malis inquinentur.

103 Illa quoque de narratione praecipitur, ne qua ex ea fiat excursio, ne avertatur a iudice sermo, ne alienae personae vocem demus, ne argumentemur, adiiciunt quidam etiam, ne utamur affectibus; quorum pleraque sunt frequentissime custodienda, imo nunquam, nisi ratio coegerit, mutanda. Ut sit expositio perspicua et brevis, nihil quidem tam raro poterit habere rationem quam excursio; nec unquam debeat esse nisi brevis et talis, ut vi quadam videamur affectus velut recto itinere depulsi, qualis est Ciceronis circa nuptias Sasiae: *O mulieris scelus incredibile et praeter hanc unam in omni vita inauditum! O libidinem effrenatam et indomitam! O audaciam singularem! nonne*

timuisse, si minus vim deorum hominumque famam, at illam ipsam noctem facesque illas nuptiales! non limen cubiculi! non cubile filiae! non parietes denique ipsos, superiorum testes nuptiarum! Sermo vero aversus a iudice et brevius indicat interim et coarguit magis, quae de re idem, quod in prooemio dixeram, sentio, sicut de prosopoeia quoque; quae tamen non Servius modo Sulpicius utitur pro Aufidia: *Somnone te languidum an gravi lethargo putem oppressum?* sed M. quoque Tullius circa nauarchos, (nam ea quoque rei expositio est) *Ut adeas, tantum dabis, et reliqua.* Quid? pro Cluentio, Staieni Bulbique colloquium nonne ad celeritatem plurimum et ad fidem confert? Quae ne fecisse inobservantia quadam videatur, quanquam hoc in illo credibile non est, in Partitionibus praecipit, ut habeat narratio suavitatem, admirationes, expectationes, exitus inopinatos, colloquia personarum, omnes affectus. Argumenta, ut dixi, nunquam; argumentum ponemus aliquando; quod facit pro Ligario Cicero, cum dicit, sic eum provinciae praefuisse, ut illi pacem esse expediret. Inseremus expositioni et brevem, cum res poscet, defensionem et rationem factorum. Neque enim narrandum est tanquam testi sed tanquam patrono. Rei ordo per se talis est: *Q. Ligarius legatus C. Considio profectus.* Quid ergo M. Tullius? *Q. enim, inquit, Ligarius, cum esset nulla belli suspicio, legatus in Africam cum C. Considio profectus est.* Et alibi: *Non modo ad bellum sed ne ad minimam quidem suspicionem belli.* Et cum esset indicaturo satis, *Q. Ligarius nullo se implicari negotio passus est: adiecit, domum spectans, ad suos redire cupiens.* Ita, quod exponebat, et ratione fecit credibile et affectu quoque implevit. Quo magis miror eos, qui non putant utendum in narratione affectibus. Qui si hoc dicunt, non diu neque ut in epilogo: mecum sentiunt; effugiendae sunt enim morae. Ceterum cur ego iudicem nolim, dum eum doceo, etiam movere? Cur quod in summa parte sum actionis petiturus, non in primo statim rerum ingressu, si fieri potest, consequar? cum praesertim etiam in probationibus faciliorem sim animus eius habiturus occupatum vel ira vel miseratione. An non M. Tul-

Ilius circa verbera civis Romani omnes brevissime movet affectus, non solum condicione ipsius, loco iniuriae, genere verberum, sed animi quoque commendatione? Summum enim virum ostendit, qui, cum virgis caederetur, non ingemuerit, non rogaverit; sed tantum civem Romanum esse se cum in-
 114 vidia caedentis et fiducia iuris clamaverit. Quid? Philodami casum nonne cum per totam expositionem incendit invidia, tum in supplicio ipso lacrimis implevit, cum flentes non tam narraret quam ostenderet, patrem de morte filii, filium de
 115 patris? Quid ulli epilogi possunt magis habere miserabile? Serum est enim advocare his rebus affectum in peroratione, quas securus narraveris; assuevit illis iudex iamque eas sine motu mentis accipit, quibus commotus novis non est, et difficile est nobis mutare animi habitum semel constitutum.
 116 Ego vero (neque enim dissimulabo iudicium meum, quamquam id, quod sum dicturus, exemplis magis quam praeceptis ullis continetur) narrationem, ut si ullam partem orationis, omni qua potest gratia et venere exornandam puto. Sed plurimum refert, quae sit natura eius rei, quam exponere
 117 mus. In parvis ergo, quales sunt fere privatae, sit ille pressus et velut applicitus rei cultus; in verbis summa diligentia; quae in locis impetu feruntur et circumiectae orationis copia latent, hic expressa et, ut vult Zeno, *sensu tincta* esse debent; compositio dissimulata quidem sed tamen
 118 quam iucundissima; figurae non illae poeticae et contra rationem loquendi auctoritate veterum receptae, (nam debet esse quam purissimus sermo) sed quae varietate taedium effugiant et mutationibus animum levent; ne in eundem casum, similem compositionem, pares elocutionum tractus incidamus. Caret enim ceteris lenociniis expositio et, nisi
 119 commendetur hac venustate, iaceat necesse est. Nec in ulla parte intentior est iudex, eoque nihil recte dictum perit. Praeterea nescio quomodo etiam credit facilius, quae audi-
 120 denti iucunda sunt, et voluptate ad fidem ducitur. Ubi vero maior res erit: et atrociam invidiose et tristitia miserabiliter dicere decebit; non ut consumantur affectus sed ut tamen velut primis lineis designentur et plane, qualis futura sit
 121 imago rei, statim appareat. Ne sententia quidem velut fati-

gatum intentione stomachum iudicis reficere dissuaserim, maxime quidem brevi interiectione, qualis est illa: *Fecerunt servi Milonis, quod suos quisque servos in tali re facere voluisset*; interim paulo liberiore, qualis est illa: *Nubit genero socrus, nullis auspiciis, nullis auctoribus, funestis ominibus omnium*. Quod cum sit factum his quoque tem-
 122 poribus, quibus omnis ad utilitatem potius quam ad ostentationem componebatur oratio, et erant adhuc severiora iudicia: quanto nunc faciendum magis, cum in ipsa capitis aut fortunarum pericula irrupit voluptas? cui hominum desiderio quantum dari debeat, alio loco dicam. Interim aliquid indulgendum esse confiteor. Multum confert adiecta veris
 123 credibilis rerum imago, quae velut in rem praesentem perducere audientes videtur, qualis est illa M. Caelii in Antonium descriptio: *Namque ipsum offendunt temulento sopore profligatum, totis praecordiis stertentem, ructuosos spiritus geminare, praeclarasque contubernales ab omnibus spondis transversas incubare et reliquas circumiacere passim*. Quae tamen exanimatae terrore, hostium adventu
 124 percepto, excitare Antonium conabantur, nomen inclamabant, frustra a cervicibus tollebant, blandius alia ad aurem invocabat, vehementius etiam nonnulla feriebat; quarum cum omnium vocem tactumque noscicaret, proximae cuiusque collum amplexu petebat, neque dormire excitatus neque vigilare ebrius poterat, sed semisomno sopore inter manus centurionum concubinarumque iactabatur. Nihil his neque credibilius fingi neque vehementius exprobrari neque manifestius ostendi potest.

Neque illud quidem praeteribo, quantam afferat fidem
 125 expositioni narrantis auctoritas; quam mereri debemus ante omnia quidem vita sed et ipso genere orationis, quod quo fuerit gravius ac sanctius, hoc plus habeat necesse est in affirmando ponderis quoque. Effugienda igitur in hac prae-
 126 cipue parte omnis calliditatis suspicio, neque enim se usquam custodit magis iudex; nihil videatur fictum, nihil sollicitum; omnia potius a causa quam ab oratore profecta credantur. At hoc pati non possumus, et perire artem putamus, nisi ap-
 127 paret, cum desinat ars esse, si apparet. Pendemus ex laude

atque hanc laboris nostri ducimus summam. Ita, quae circumstantibus ostentare volumus, iudicibus prodimus.

- 128 Est quaedam repetita narratio, quae ἐπιδηγήσις dicitur, sane res declamatoria magis quam forensis ideo autem reperta, ut, quia narratio brevis esse debet, fusius et ornatus res possit exponi; quod fit vel invidiae gratia vel miseratio- nis. Id enim raro faciendum iudico neque sic unquam, ut totus ordo repetatur: licet enim per partes idem consequi. Ceterum, qui uti ἐπιδηγήσει volet, narrationis loco rem stringat et contentus indicare, quod factum sit, quo sit modo factum, plenius se loco suo expositurum esse promittat.
- 129 Initium narrationis quidam utique faciendum a persona putant, eamque, si nostra sit, ornandam, si aliena, infamandam statim. Hoc sane frequentissimum est, quia personae sunt, inter quas litigatur. Sed haec quoque interim cum suis accidentibus ponendae, cum id profuturum est: ut *A. Cluentius fuit pater huiusce, iudices, homo non solum municipii Larinatis, ex quo erat, sed regionis illius et vicinitatis virtute, existimatione, nobilitate princeps*; interim sine his:
- 131 ut *Q. enim Ligarius cum esset*; frequenter vero et a re, sicut pro Tullio Cicero: *Fundum habet in agro Thurino M. Tullius patrum*; Demosthenes pro Ctesiphonte: *Τοῦ γὰρ*
- 132 *Φωκικοῦ συστάντος πολέμου*. De fine narrationis cum iis contentio est, qui perducere expositionem volunt eo, unde quaestio oritur: *His rebus ita gestis, P. Dolabella praetor interdixit, ut est consuetudo, de vi, hominibus armatis, sine ulla exceptione, tantum ut, unde deiecisset, restitueret; deinde restituisset se dixit. Sponsio facta est; hac de sponsione vobis iudicandum est*. Id a petitore semper fieri potest, a defensore non semper.

DE EGRESSIONE.

III. Ordine ipso narrationem sequitur confirmatio. Probanda sunt enim, quae propter hoc exposuimus. Sed priusquam ingrediar hanc partem, pauca mihi de quorundam opinione dicenda sunt. Plerisque moris est, prolato rerum ordine, protinus utique in aliquem laetum aut plausibilem locum quam maxime possint favorabiliter excurrere. Quod

quidem natum ab ostentatione declamatoria iam in forum venit, postquam agere causas non ad utilitatem litigatorum sed ad patronorum iactationem repertum est; ne, si pressae illi, qualis saepius desideratur, narrationis gracilitati coniuncta argumentorum pugnacitas fuerit, dilatis diutius dicendi voluptatibus oratio refrigescat. In quo vitium illud est, quod sine discrimine causarum atque utilitatis hoc, tanquam semper expediat aut etiam necesse sit, faciunt; eoque sumptas ex his partibus, quarum alius erat locus, sententias in hanc congerunt, ut plurima aut iterum dicenda sint aut, quia alieno loco dicta sunt, dici suo non possint. Ego autem confiteor, hoc expatiendi genus non modo narrationi sed etiam quaestionibus, vel universis vel interim singulis, opportune posse subiungi, cum res postulat aut certe permittit, atque eo vel maxime illustrari ornarique orationem; sed si cohaeret et sequitur, non si per vim cuneatur et, quae natura iuncta erant, distrahit. Nihil enim tam est consequens quam narrationi probatio, nisi excursus ille vel quasi finis narrationis vel quasi initium probationis est. Erit ergo illi nonnunquam locus, ut, si expositio circa finem atrox fuerit, prosequamur eam velut erumpente protinus indignatione. Quod tamen ita fieri oportebit, si res dubitationem non habebit. Alioqui prius est, quod obiicias, verum efficere quam magnum, quia criminibus invidia pro reo est, priusquam probabitur; difficillima est enim gravissimi cuiusque sceleris fides. Idem fieri non inutiliter potest, ut, si merita in adversarium aliqua exposueris, in ingratum inveharis; aut, si varietatem criminum narratione demonstraveris, quantum ob ea periculum intentetur, ostendas. Verum haec breviter omnia. Iudex enim, ordine audito, festinat ad probationem et quamprimum certus esse sententiae cupit. Praeterea cavendum est, ne ipsa expositio vanescat, aversis in aliud animis et inani mora fatigatis.

Sed ut non semper est necessaria post narrationem illa procursio, ita frequenter utilis ante quaestionem praeparatio, utique si prima specie minus erit favorabilis, si legem asperam ac poenarias actiones tuebimur. Est hic locus velut sequentis exordii ad conciliandum probationibus nostris iu-

dicem, mitigandum, concitandum. Quod liberius hic et ve-
 10 hementius fieri potest, quia iudici causa iam nota est. Hic
 igitur velut fomentis, si quid erit asperum, praemolliemus,
 quo facilius aures iudicum quae post proposituri erimus ad-
 mittant, ne iustum oderint. Nihil enim facile persuadetur
 11 invitis. Quo loco tamen iudicis quoque noscenda natura
 est, iuri magis an aequo sit appositus; proinde enim magis
 aut minus erit hoc necessarium. Ceterum res eadem et
 post quaestionem perorationis vice fungitur.

12 Hanc partem *παρέβασις* vocant Graeci, Latini egres-
 sum vel egressionem. Sed haec sunt plures, ut dixi,
 quae per totam causam varios habent excursus, ut laus ho-
 minum locorumque, ut descriptio regionum, expositio qua-
 13 rundam rerum gestarum, ut laetitia fabularum. Quo ex ge-
 nere est in orationibus contra Verrem compositis Siciliae
 laus, Proserpinae raptus; pro C. Cornelio popularis illa vir-
 tutum Cn. Pompeii commemoratio, in quam ille divinus ora-
 tor, velut nomine ipso ducis cursus dicendi teneretur, abru-
 14 pto, quem inchoaverat, sermone devertit. Ac totum *παρέ-
 βασις* est, ut mea quidem fert opinio, alicuius rei sed
 ad utilitatem causae pertinentis extra ordinem
 excurrens tractatio. Quapropter non video, cur hunc
 ei potissimum locum assignent, qui rerum ordinem sequitur;
 non magis quam illud, cur hoc nomen ita demum proprium
 putent, si aliquid in digressu sit exponendum, cum tot modis
 15 a recto itinere declinet oratio. Nam quidquid dicitur prae-
 ter illas quinque, quas fecimus, partes, egressio est. indi-
 gnatio, miseratio, invidia, convicium, excusatio, conciliatio,
 maledictorum refutatio. Similia his, quae non sunt in quae-
 stione, omnis amplificatio, minutio, omne affectus genus; at-
 que ea maxime iucundam et ornatam faciunt orationem, de
 luxuria, de avaritia, de religione, de officiis; quae cum
 sint argumentis subiecta similibus rerum, quia cohaerent,
 16 egredi non videntur. Et plurima sunt, quae rebus nihil se-
 cum cohaerentibus inseruntur, quibus iudex reficitur, admo-
 netur, placatur, rogatur, laudatur. Innumerabilia sunt haec,
 quorum alia sic praeparata afferimus, quaedam ex occasione
 vel ex necessitate ducimus, si quid nobis agentibus novi ac-

cidit, interpellatio, interventus alicuius, tumultus. Unde Ci-
 17 ceroni quoque in prooemio, cum diceret pro Milone, digredi
 fuit necesse, ut ipsa oratione, qua usus est, patet. Potest
 autem paulo longius exire, qui praeparat aliquid ante quae-
 stionem et qui finitae probationi vel commendationem adii-
 cit. At qui ex media erumpit, cito ad id redire debet, unde
 devertit.

DE PROPOSITIONE.

IV. Sunt qui narrationi propositionem subiungant
 tanquam partem iudicialis materiae, cui opinioni respondi-
 mus. Mihi autem propositio videtur omnis confirmationis
 initium, quod non modo in ostendenda quaestione principali
 sed nonnunquam etiam in singulis argumentis poni solet ma-
 ximeque in his, quae *ἐπιχειρήματα* vocantur. Sed nunc de
 priore loquimur. Ea non semper uti necesse est. Aliquando 2
 enim sine propositione quoque satis manifestum est, quid in
 quaestione versetur, utique si narratio ibi finem habet, ubi
 initium quaestio; adeo, ut aliquando subiungatur expositioni,
 quae solet in argumentis esse summa collectio: *Haec, sicut
 exposui, ita gesta sunt, iudices; insidiator superatus est,
 vi victa vis vel potius oppressa virtute audacia est.* Non- 3
 nunquam vero valde utilis est, ubi res defendi non potest et
 de fine quaeritur, ut pro eo, qui pecuniam privatam de tem-
 plo sustulit: *Sacrilegii agitur, de sacrilegio cognoscitis;*
 ut iudex intelligat, id unum esse officii sui, quaerere, an id,
 quod obiicitur, sacrilegium sit. Item in causis obscuris aut 4
 multiplicibus; nec semper propter hoc solum, ut sit causa
 lucidior, sed aliquando etiam, ut magis moveat. Movet au-
 tem, si protinus subtexantur aliqua, quae prosint. *Lex aperte
 scripta est, ut peregrinus, qui murum ascenderit, morte
 mulletur; peregrinum te esse certum est; quin ascenderis
 murum, non quaeritur; quid superest, nisi ut te puniri
 oporteat?* Haec enim propositio confessionem adversarii
 premit et quodammodo iudicandi moram tollit, nec indicat
 quaestionem iudici sed adiuvat.

Sunt autem propositiones et simplices et duplices vel 5
 multiplices, quod accidit non uno modo. Nam et plura cri-

mina iunguntur, ut cum *Socrates accusatus est, quod corrumperet inventum et novas superstitiones introduceret*; et singula ex pluribus colliguntur, ut cum *legatio male gesta obiicitur Aeschini, quod mentitus sit, quod nihil ex mandatis fecerit, quod moratus sit, quod munera accepit*. Recusatio quoque plures interim propositiones habet, ut contra petitionem pecuniae: *Male petitis, procuratorem enim tibi esse non licuit; sed neque illi, cuius nomine litigas, habere procuratorem; sed neque est heres eius, a quo accepisse mutuum dicor; sed nec ipsi debui*. Multiplicari haec in quantum libet possunt, sed rem ostendisse satis est. Hae si ponantur singulae, subiectis probationibus, plures sunt propositiones; si coniungantur, in partitionem cadunt.

8 Est et nuda propositio, qualis fere in coniecturalibus: *Caedis ago; furtum obiicio*; est ratione subiecta, ut *Maestatem minuit C. Cornelius, nam codicem tribunus plebis ipse pro contione legit*. Praeter haec utimur propositione aut nostra, ut *Adulterium obiicio*; aut adversarii, ut *Adulterii mecum agitur*; aut communi, ut *Inter me et adversarium quaestio est, uter sit intestato propior*. Nonnunquam diversas quoque iungimus: *Ego hoc dico, adversarius hoc*.

9 Habet interim vim propositionis, etiamsi per se non est propositio, cum exposito rerum ordine subiicimus: *De his cognoscitis*; ut sit haec commonitio iudicis, quo se ad quaestionem acrius intendat et velut quodam tactu resuscitatus finem esse narrationis, initium probationis intelligat, et, nobis confirmationem ingredientibus, ipse quoque quodammodo novum audiendi sumat exordium.

DE PARTITIONE.

V. Partitio est nostrarum aut adversarii propositionum aut utrarumque ordine collocata enumeratio. Hac quidam utendum semper putant, quod ea fiat causa lucidior et iudex attentior ac docilior, si scierit, et de quo dicimus et de quo dicturi postea simus. Rursus quidam periculosum id oratori arbitrantur duabus ex causis: quod nonnunquam et

excidere soleant, quae promisimus, et, si qua in partiendo praeterimus, occurrere; quod quidem nemini accidet, nisi qui plane vel nullo fuerit ingenio vel ad agendum nihil cogitati praemeditatique detulerit. Alioqui quae tam manifesta et lucida est ratio quam rectae partitionis? Sequitur enim naturam ducem, adeo quoque, ut memoriae id maximum sit auxilium via dicendi non decedere. Quapropter ne illos quidem probaverim, qui partitionem vetant ultra tres propositiones extendere. Quae sine dubio, si nimium sit multiplex, fugiet memoriam iudicis et turbabit intentionem; hoc tamen numero velut lege non est alliganda, cum possit causa plures desiderare. Alia sunt magis, propter quae partitione non semper sit utendum: primum, quia pleraque gratiora sunt, si inventa subito nec domo allata sed inter dicendum ex re ipsa nata videantur, unde illa non iniucunda schemata, *Paene excidit mihi*, et *Fugerat me*, et *Recte admones*. Propositis enim probationibus omnis in reliquum gratia novitatis praecerpitur. Interim vero etiam fallendus est iudex et variis artibus subeundus, ut aliud agi quam quod petimus putet. Nam est nonnunquam dura propositio, quod iudex si providit, non aliter praeformidat, quam qui ferrum medici prius, quam curetur, aspexit; at si, re non ante proposita, securum ac nulla denuntiatione in se conversum intrarit oratio: efficiet, quod promittenti non crederetur. Interim refugienda non modo distinctio quaestionum est sed omnino tractatio; affectibus turbandus et ab intentione auferendus auditor. Non enim solum oratoris est docere, sed plus eloquentia circa movendum valet. Cui rei contraria est maxime tenuis illa et scrupulose in partes secta divisionis diligentia eo tempore, quo cognoscenti iudicium conamur auferre. Quid? quod interim, quae per se levia sunt et infirma, turba valent? Ideoque congerenda sunt potius et velut eruptione pugnandum; quod tamen rarum esse debet et ex necessitate demum, cum hoc ipsum, quod dissimile rationi est, coegerit ratio. Praeter haec in omni partitione est utique aliquid potentissimum, quod cum audit iudex, cetera tanquam supervacua gravari solet. Itaque si plura vel obiicienda sunt vel diluenda: et utilis et iucunda partitio est, ut, quod quaque de re dicturi sumus,

ordine appareat; at si unum crimen varie defendemus, super-
 9 vacua. Ut si illa partiamur, *Dicam, non talem esse hunc,*
quem tueor, reum, ut in eo credibile videri possit homi-
cidium; dicam, occidendi causam huic non fuisse; di-
cam, hunc eo tempore, quo homo occisus est, trans mare
fuisse: omnia, quae ante id, quod ultimum est, exequeris,
 10 inania videri necesse est. Festinat enim iudex ad id, quod
 potentissimum est, et velut obligatum promisso patronum,
 si est patientior, tacitus appellat; si vel occupatus vel in
 aliqua potestate vel etiam si moribus incompressus, cum con-
 11 vicio efflagitat. Itaque non defuerunt, qui Ciceronis illam
 pro Cluentio partitionem improbarent, qua se dicturum esse
 promisit *primum, neminem maioribus criminibus, gravio-*
ribus testibus, in iudicium vocatum quam Oppianicum;
deinde, praecudicia esse facta ab ipsis iudicibus, a qui-
bis condemnatus sit; postremo, iudicium pecunia tem-
ptatum non pro Cluentio sed contra Cluentium; quia, si
 probari posset, quod est tertium, nihil necesse fuerit dicere
 12 priora. Rursus nemo tam erit iniustus aut stultus, quin eum
 fateatur optime pro Murena esse partitum: *Intelligo, iudices,*
tris totius accusationis fuisse partes, et earum unam in
reprehensione vitae, alteram in contentione dignitatis, ter-
tiam in criminibus ambitus esse versatam. Nam sic et
 ostendit lucidissime causam et nihil fecit altero supervacuum.
 13 De illo quoque genere defensionis plerique dubitant: *Si*
occidi, recte feci; sed non occidi; quo enim prius perti-
 nere, si sequens firmum sit? haec invicem obstare, et utro-
 que utentibus in neutro haberi fidem. Quod sane in parte
 14 utendum. At si quid in eo, quod est fortius, timebimus:
 utraque probatione nitentur. Alius enim alio moveri solet,
 et qui factum putavit, iustum credere potest; qui tanquam
 iusto non movebitur, factum fortasse non credet. Ut certa
 manus uno telo possit esse contenta: incerta plura spar-
 15 genda sunt, ut sit et fortunae locus. Egregie vero Cicero
 pro Milone insidiatorem primum Clodium ostendit, tum addi-
 dit ex abundanti, etiamsi id non fuisset, talem tamen civem
 cum summa virtute interfectoris et gloria necari potuisse.

Neque illum tamen ordinem, de quo prius dixi, damnaverim; 16
 quia quaedam, etiamsi ipsa sunt dura, in id tamen valent, ut
 ea molliant, quae sequuntur. Nec omnino sine ratione est,
 quod vulgo dicitur: *Iniquum petendum, ut aequum feras.*
 Quod tamen nemo sic accipiat, ut omnia credat audendum. 17
 Recte enim Graeci praecipiant, *Non temptanda, quae effici*
omnino non possint. Sed quotiens hac, de qua loquor, du-
 plici defensione utemur: id laborandum est, ut in illam par-
 tem sequentem fides ex priore ducatur. Potest enim videri,
 qui tuto etiam confessurus fuit, mentiendi causam in negando
 non habere.

Et illud utique faciendum est, ut, quotiens suspicabimur 18
 iudici aliam probationem desiderari, quam de qua loquimur,
 promittamus nos plene et statim de eo satis esse facturos;
 praecipueque si de pudore agitur. Frequenter autem acci- 19
 dit, ut causa parum verecunda iure tuta sit; de quo ne inviti
 iudices audiant et adversi, frequentius sunt admonendi, *secu-*
turam defensionem probitatis et dignitatis; expectent pau-
lum et agi ordine sinant. Quaedam interim nos invitatis li- 20
 tigantibus simulandum est dicere, quod Cicero pro Cluentio
 facit circa iudiciariam legem; nonnunquam, quasi interpelle-
 mur ab his, subsistere; saepe avertenda ad ipsos oratio;
 hortandi, ut sinant nos uti nostro consilio. Ita surrepetur
 animo iudicis, et, dum sperat probationem pudoris, asperio-
 ribus illis minus repugnabit. Quae cum receperit, etiam 21
 verecundiae defensionem facilius erit. Sic utraque res invicem
 iuvabit, eritque iudex circa ius nostrum spe modestiae at-
 tentior, circa modestiam iuris probatione proclivior.

Sed ut non semper necessaria aut utilis etiam partitio 22
 est: ita opportune adhibita plurimum orationi lucis et gratiae
 confert. Neque enim solum id efficit, ut clariora fiant, quae
 dicuntur, rebus velut ex turba extractis et in conspectu iudi-
 cum positis; sed reficit quoque audientem certo singularum
 partium fine, non aliter quam facientibus iter multum detra-
 hunt fatigationis notata inscriptis lapidibus spatia. Nam et 23
 exhausti laboris nosse mensuram voluptati est, et hortatur
 ad reliqua fortius exequenda scire, quantum supersit. Nihil
 enim longum videri necesse est, in quo, quid ultimum sit,

24 certum est. Nec immerito multum ex diligentia partiendi tulit laudis Q. Hortensius, cuius tamen divisionem in digitos diductam nonnunquam Cicero leviter eludit. Nam est suus et in gestu modus, et vitanda, ut quae maxime, concisa nimium
25 et velut articulosa partitio. Nam et auctoritati plurimum detrahunt minuta illa nec iam membra sed frusta, et huius gloriae cupidi, quo subtilius et copiosius divisisse videantur, et supervacua assumunt et, quae natura singularia sunt, seant, nec tam plura faciunt quam minora; deinde cum fecerunt mille particulas, in eandem incidunt obscuritatem, contra quam partitio inventa est.

26 Et divisa autem et simplex propositio, quotiens utiliter adhiberi potest, primum debet esse aperta atque lucida, (nam quid sit turpius, quam id esse obscurum ipsum, quod in eum solum adhibetur usum, ne sint cetera obscura?) tum brevis nec ullo supervacuo onerata verbo. Non enim, quid dicamus, sed, de quo dicturi sumus, ostendimus. Obtinendum etiam, ne quid in ea desit, ne quid supersit. Superest autem sic fere, cum aut in species partimur, quod in genera partiri sit satis, aut genere posito subiicitur species; ut si dicam de virtute, iustitia, continentia, cum iustitia atque continentia
28 virtutis sint species. Partitio prima est, quid sit, de quo conveniat; quid, de quo ambigatur. In eo, quod convenit, quid adversarius fateatur, quid nos; in eo, de quo ambigatur, quae nostrae propositiones, quae partis adversae. Pessimum vero, non eodem ordine exequi, quo quidque proposueris.

LIBER V.

Libro quinto haec continentur: De probationibus inartificialibus. De praeiudiciis. De rumore. De tormentis. De tabulis. De iureiurando. De testibus. De probatione artificiali. De signis. De argumentis. De exemplis. De usu argumentorum. De refutatione. Quibus constet epichirema. Et quibus refellatur modis. De usu epichirematos et enthymematos.

DE PROBATIONIBUS INARTIFICIALIBUS.

Prooemium. Fuerunt et clari quidem auctores, quibus solum videretur oratoris officium docere; namque et affectus duplici ratione excludendos putabant, primum quia vitium esset omnis animi perturbatio, deinde quia iudicem a veritate pelli misericordia, gratia similibusque non oporteret, et voluptatem audientium petere, cum vincendi tantum gratia diceretur, non modo agentis supervacuum sed vix etiam viro dignum arbitrabantur; plures vero, qui nec ab illis sine dubio partibus rationem orandi summovent, hoc tamen proprium atque praecipuum crederent opus, sua confirmare et, quae ex adverso proponerentur, refutare. Utrumcunque est, 3 (neque enim hoc loco meam interpono sententiam) hic erit liber illorum opinione maxime necessarius, quia toto haec sola tractantur; quibus sane et ea, quae de iudicialibus causis iam dicta sunt, serviunt. Nam neque prooemii neque 4 narrationis est alius usus, quam ut iudicem huic praeparent; et status nosse atque ea, de quibus supra scripsimus, intueri, supervacuum foret, nisi ad hanc perveniremus. De 5 nique ex quinque, quas iudicialis materiae fecimus, partibus, quaecunque alia potest aliquando necessaria causae non esse; his nulla est, cui probatione opus non sit. Eius praecepta sic optime divisuri videmur, ut prius, quae in commune ad omnes quaestiones pertinent, ostendamus; deinde, quae in quoque causae genere propria sint, exequamur.

I. Ac prima quidem illa partitio ab Aristotele tradita consensum fere omnium meruit, alias esse probationes, quas extra dicendi rationem acciperet orator; alias, quas ex causa traheret ipse et quodam modo gigneret. Ideoque illas ἀπέχ-

vovus, id est inartificiales; [has ἐντέχνους, id est artificiales.] vocaverunt. Ex illo priore genere sunt praeiudicia, rumores, tormenta, tabulae, iusiurandum, testes, in quibus pars maxima contentionum forensium consistit. Sed ut ipsa per se carent arte: ita summis eloquentiae viribus et allevanda sunt plerumque et refellenda. Quare mihi videntur magnopere damnandi, qui totum hoc genus a praeceptis removerunt. Nec tamen in animo est, omnia, quae aut pro his aut contra dici solent, complecti. Non enim communes locos tradere destinamus, quod esset operis infiniti, sed viam quandam atque rationem. Quibus demonstratis, non modo in exequendo suas quisque vires debet adhibere sed etiam inveniendi similia, ut quaeque condicio litium poscet. Neque enim de omnibus causis dicere quisquam potest saltem praeteritis, ut taceam de futuris.

DE PRAEIVDICIIIS.

II. Iam praeiudiciorum vis omnis tribus in generibus versatur: rebus, quae aliquando ex paribus causis sunt iudicatae, quae exempla rectius dicuntur, ut de rescissis patrum testamentis vel contra filios confirmatis; iudiciis ad ipsam causam pertinentibus, unde etiam nomen ductum est, qualia in Oppianicum facta dicuntur et a senatu adversus Milonem; aut cum de eadem causa pronuntiatum est, ut in reis deportatis et assertione secunda et partibus centumviralium, quae in duas hastas divisae sunt. Confirmantur praecipue duobus: auctoritate eorum, qui pronuntiaverunt, et similitudine rerum, de quibus quaeritur; refelluntur autem raro per contumeliam iudicum, nisi forte manifesta in his culpa erit. Vult enim cognoscentium quisque, firmam esse alterius sententiam, et ipse pronuntiaturus; nec libenter exemplum, quod in se fortasse recidat, facit. Confugiendum ergo est in duobus superioribus, si res feret, ad aliquam dissimilitudinem causae; vix autem ulla est per omnia alteri similis. Si id non continget aut eadem causa erit: actionum incusanda negligentia aut de infirmitate personarum querendum, contra quas erit indicatum, aut de gratia, quae testes corruerit, aut de invidia aut de ignorantia,

aut inveniendum, quod causae postea accesserit. Quorum si nihil erit: licet tamen dicere multos iudiciorum casus ad inique pronuntiandum valere ideoque damnatum Rutilium, absolutos Clodium atque Catilinam. Rogandi etiam iudices, ut rem potius intueantur ipsam, quam iuriurando alieno suum donent. Adversus consulta autem senatus et decreta principum vel magistratum remedium nullum est, nisi aut inventa quantulacunque causae differentia aut aliqua vel eorundem vel eiusdem potestatis hominum posterior constitutio, quae sit priori contraria; quae si deerunt, lis non erit.

DE FAMA ATQUE RUMORE.

III. Famam atque rumores pars altera consensum civitatis et velut publicum testimonium vocat, altera sermonem sine ullo certo auctore dispersum, cui malignitas initium dederit, incrementum credulitas; quod nulli non etiam innocentissimo possit accidere fraude inimicorum falsa vulgantium. Exempla utrinque non deerunt.

DE TORMENTIS.

IV. Sicut in tormentis quoque, qui est locus frequentissimus, cum pars altera quaestionem vera fatendi necessitatem vocet, altera saepe etiam causam falsa dicendi, quod aliis patientia facile mendacium faciat aliis infirmitas necessarium. Quid attinet de his plura? Plenae sunt orationes veterum ac novorum. Quaedam tamen in hac parte erunt propria cuiusque litis. Nam sive de habenda quaestione agatur: plurimum intererit, quis et quem postulet aut offerat et in quem et ex qua causa; sive iam erit habita: quis ei praefuerit, quis et quomodo sit tortus, incredibilia dixerit an inter se constantia, perseveraverit in eo, quod coeperat, an aliquid dolore mutarit, prima parte quaestionis an procedente cruciatus. Quae utrinque tam infinita sunt quam ipsa rerum varietas.

DE TABULIS.

V. Contra tabulas quoque saepe dicendum est, cum eas non solum refelli sed etiam accusari sciamus esse usi-

tatum. Cum sit autem in his aut scelus signatorum aut ignorantia: tutius ac facilius id, quod secundo loco diximus, tractatur, quo pauciores rei fiunt. Sed hoc ipsum argumenta ex causa trahit, si forte aut incredibile est, id actum esse, quod tabulae continent, aut, quod frequentius evenit, aliis probationibus aequae inartificialibus solvitur; si aut is, in quem signatum est, aut aliquis signator dicitur abfuisse vel prius esse defunctus; si tempora non congruunt; si vel antecedentia vel insequentia tabulis repugnant. Inspectio etiam ipsa saepe falsum deprehendit.

DE IUREIURANDO.

VI. Iusiurandum litigatores aut offerunt suum aut non recipiunt oblatum; aut ab adversario exigunt aut recusant, cum ab ipsis exigatur. Offerre suum sine illa conditione, ut vel adversarius iuret, fere improbum est. Qui tamen id faciet: aut vita se tuebitur, ut eum non sit credibile peieraturum; aut ipsa vi religionis, in qua plus fidei consequetur, si id egerit, ut non cupide ad hoc descendere sed ne hoc quidem recusare videatur; aut, si causa patietur, modo litis, propter quam devoturus se ipse non fuerit; aut praeter alia causae instrumenta adicit ex abundantia hanc quoque conscientiae suae fiduciam. Qui non recipiet: et iniquam condicionem et a multis contemni iurisiurandi metum dicet, cum etiam philosophi quidam sint reperti, qui deos agere rerum humanarum curam negant; eum vero, qui nullo deferente iurare sit paratus, et ipsum velle de causa sua pronuntiare et, quam id, quod offert, leve ac facile credat, ostendere. At is, qui defert, alioqui agere modeste videtur, cum litis adversarium iudicem faciat, et eum, cuius cognitio est, onere liberat, qui profecto alieno iureiurando stari quam suo mavult. Quo difficilior recusatio est, nisi forte res est ea, quam credibile sit notam ipsi non esse. Quae excusatio si deerit: hoc unum relinquetur, ut invidiam sibi quaeri ab adversario dicat atque id agi, ut in causa, in qua vincere non possit, queri possit. Itaque hominem quidem malum occupaturum hanc condicionem fuisse, se autem probare malle, quae affirmet, quam dubium cuiquam relin-

quere, an peierarit. Sed nobis adolescentibus seniores in agendo facti praecipere solebant, ne unquam iusiurandum deferremus, sicut neque optio iudicis adversario esset permittenda nec ex advocatis partis adversae iudex eligendus; nam, si dicere contraria turpe advocato videretur, certe turpius habendum, facere quod noceat.

DE TESTIBUS.

VII. Maximus tamen patronis circa testimonia sudor est. Ea dicuntur aut per tabulas aut a praesentibus. Simplicior contra tabulas pugna. Nam et minus obstitisse videtur pudor inter paucos signatores, et pro diffidentia permittitur absentia. Si reprehensionem non capit ipsa persona: infamare signatores licet. Tacita praeterea quaedam cogitatio refragatur his omnibus, quod nemo per tabulas dat testimonium nisi sua voluntate; quo ipso non esse amicum ei se, contra quem dicit, fatetur. Neque tamen protinus cesserit orator, quo minus et amicus pro amico et inimicus contra inimicum possit verum, si integra sit ei fides, dicere. Sed late locus uterque tractatur.

Cum praesentibus vero ingens dimicatio est, ideoque velut duplici contra eos proque iis acie confligitur actionum et interrogationum. In actionibus primum generaliter pro testibus atque in testes dici solet. Est hic communis locus, cum pars altera nullam firmiorem probationem esse contendit, quam quae sit hominum scientia nixa; altera ad detrahendam illis fidem omnia, per quae fieri soleant falsa testimonia, enumerat. Sequens ratio est, cum specialiter quidem sed tamen multos pariter invadere patroni solent. Nam et gentium simul universarum elevata testimonia ab oratoribus scimus et tota genera testimoniorum: ut de auditionibus; non enim ipsos esse testes sed iniuratorum afferre voces; ut in causis repetundarum, qui se reo numerasse pecunias iurant, litigatorum non testium habendos loco. Interim adversus singulos dirigitur actio; quod insectationis genus et permixtum defensionem legimus in orationibus plurimis et separatim editum, sicut in Vatinius testem. Totum igitur executiam locum, quando universam institutionem aggressi sumus. Sufficiebant

alioqui libri duo a Domitio Afro in hanc rem compositi, quem adolescentulus senem colui, ut non lecta mihi tantum ea sed pleraque ex ipso sint cognita. Is verissime praecepit, primum esse in hac parte officium oratoris, ut totam causam familiariter norit; quod sine dubio ad omnia pertinet. Quomodo contingat, explicabimus, cum ad destinatum huic parti locum venerimus. Ea res suggeret materiam interrogationi et veluti tela ad manum sumministrabit; eadem docebit, ad quae iudicis animus actione sit praeparandus. Debet enim vel fieri vel detrahi testibus fides oratione perpetua, quia sic quisque dictis movetur, ut est ad credendum vel non credendum ante formatus.

9 Et quoniam duo genera sunt testium, aut voluntariorum aut eorum, quibus in iudiciis publicis lege denuntiatur, quorum altero pars utraque utitur, alterum accusatoribus tantum concessum est: separemus officium dantis testes et refellentis.

10 Qui voluntarium producit, scire, quid is dicturus sit, potest; ideoque faciliorem videtur in rogando habere rationem. Sed haec quoque pars acumen ac vigilantiam poscit, providendumque, ne timidus, ne inconstans, ne imprudens testis sit; turbantur enim et a patronis diversae partis inducuntur in laqueos et plus deprehensi nocent quam firmi et interriti profuissent. Multum igitur domi ante versandi, variis percontationibus, quales haberi ab adversario possint, explorandi sunt. Sic fit, ut aut constent sibi aut, si quid titubaverint, opportuna rursus eius, a quo producti sunt, interrogatione velut in gradum reponantur. In his quoque adhuc, qui constiterint sibi, vitandae sunt insidiae; nam frequenter subitici ab adversario solent et omnia profutura polliciti diversa respondent et auctoritatem habent non arguentium illa
13 sed confitentium. Explorandum igitur, quas causas laedendi adversarium afferant; nec id sat est inimicos fuisse, sed an desierint, an per hoc ipsum reconciliari velint, ne corrupti sint, ne poenitentia propositum mutaverint. Quod cum in iis quoque, qui ea, quae dicturi videntur, re vera sciunt, necessarium est praecavere: multo magis in iis, qui se dictu-
14 ros, quae falsa sunt, pollicentur. Nam et frequentior eorum

poenitentia est et promissum suspectius et, si perseverarint, reprehensio facillior.

Eorum vero, quibus denuntiatur, pars testium est 15 quae reum laedere velit, pars quae nolit, idque interim scit accusator interim nescit. Fingamus in praesentia scire; in utroque tamen genere summis artibus interrogantis opus est. Nam si habet testem cupidum laedendi, cavere debet hoc 16 ipsum, ne cupiditas eius appareat; nec statim de eo, quod in iudicium venit, rogare, sed aliquo circuitu ad id pervenire, ut illi, quod maxime dicere voluit, videatur expressum; nec nimium instare interrogationi, ne omnia respondendo testis fidem suam minuat; sed in tantum evocare eum, quantum sumere ex uno satis sit. At in eo, qui verum invitus 17 dicturus est, prima felicitas interrogantis extorquere, quod is noluerit. Hoc non alio modo fieri potest, quam longius interrogatione repetita. Respondebit enim, quae nocere causae non arbitrabitur; ex pluribus deinde, quae confessus erit, eo perducetur, ut, quod dicere non vult, negare non possit. Nam, ut in oratione sparsa plerumque colligimus ar- 18 gumenta, quae per se nihil reum aggravare videantur, congregatione deinde eorum factum convincimus: ita huiusmodi testis multa de anteactis, multa de insecutis, loco, tempore, persona, ceteris est interrogandus, ut in aliquod responsum incidat, post quod illi vel fateri, quae volumus, necesse sit, vel iis, quae iam dixerit, repugnare. Id si non contingit: 19 reliquum erit, ut eum nolle dicere manifestum sit; protrahendusque, ut in aliquo, quod vel extra causam sit, deprehendatur; tenendus etiam diutius, ut omnia ac plura, quam res desiderat, pro reo dicendo suspectus iudici fiat; quo non minus nocebit, quam si vera in reum dixisset. At, si, quod 20 secundo loco diximus, nesciet actor, quid propositi testis attulerit: paulatim, et, ut dicitur, pedetentim interrogando experietur animum eius et ad id responsum, quod eliciendum erit, per gradus ducet. Sed, quia nonnunquam sunt haec quo- 21 que testium artes, ut primo ad voluntatem respondeant, quo maiore fide diversa postea dicant: est oratoris, suspectum testem, dum prodest, dimittere.

Patronorum in parte expeditior in parte difficilior inter- 22

rogatio est. Difficilior hoc, quod raro unquam possunt ante iudicium scire, quid testis dicturus sit; expeditior, quod, cum interrogandus est, sciunt, quid dixerit. Itaque, quod in eo incertum est, cura et inquisitione opus est, quis reum premat, quas et quibus ex causis inimicitias habeat; eaque in oratione praedicenda atque amolienda sunt, sive odio conflatos testes sive invidia sive gratia sive pecunia videri volumus. Et si deficietur numero pars diversa, paucitatem; si abundabit, conspiracyonem; si humiles producet, vilitatem; si potentes, gratiam oportebit incessere. Plus tamen proderit causas, propter quas reum laedant, exponere; quae sunt variae et pro condicione cuiusque litis aut litigatoris. Nam contra illa, quae supra diximus, simili ratione responderi locis communibus solet; quia et in paucis atque humilibus accusator simplicitate gloriari potest, quod neminem praeter eos, qui possint scire, quaesierit; et multos atque honestos commendare aliquanto est facilius. Verum interim et singulos ut exornare ita destruere contingit, aut recitatis in actione aut nominatis testibus. Quod iis temporibus, quibus testis non post finitas actiones rogabatur, et facilius et frequentius fuit. Quid autem in quemque testium dicendum sit, sumi nisi ex ipsorum personis non potest.

26 Reliquae interrogandi sunt partes. Qua in re primum est nosse testem. Nam timidus terreri, stultus decipi, iracundus concitari, ambitiosus inflari, longus protrahi potest; prudens vero et constans vel tanquam inimicus et pervicax dimittendus statim vel non interrogatione sed brevi interlocutione patroni refutandus est aut aliquo, si continget, urbane dicto refrigerandus aut, si quid in eius vitam dici poterit, infamia criminum destruendus. Probos quosdam et verecundos non aspere incessere profuit; nam saepe, qui adversus insectantem pugnat, modestia mitigatur. Omnis autem interrogatio aut in causa est aut extra causam. In causa, sicut accusatori praecepimus, patronus quoque altius et, unde nihil suspecti sit, repetita percontatione, priora sequentibus applicando saepe eo perducit homines, ut in-
28 vitis quod prosit extorqueat. Eius rei sine dubio neque disciplina ulla in scholis neque exercitatio traditur, et naturali

magis acumine aut usu contingit haec virtus. Si quod tamen exemplum ad imitationem demonstrandum sit: solum est, quod ex dialogis Socraticorum maximeque Platonis duci potest; in quibus adeo scitae sunt interrogationes, ut, cum plerisque bene respondeatur, res tamen ad id, quod volunt efficere, perveniat. Illud fortuna interim praestat, ut aliquid, 29 quod inter se parum consentiat, a teste dicatur; interim, quod saepius evenit, ut testis testi diversa dicat. Acuta autem interrogatio ad hoc, quod casu fieri solet, etiam ratione perducatur. Extra causam quoque multa, quae prosint, rogari 30 solent, de vita testium aliorum, de sua quisque, si turpitudine, si humilitas, si amicitia accusatoris, si inimicitiae cum reo, in quibus aut dicant aliquid, quod prosit, aut in mendacio vel cupiditate laedendi deprehendantur. Sed in primis inter-
31 rogatio debet esse circumspecta, quia multa contra patronos venuste testis saepe respondet, eique praecipue vulgo favetur; tum verbis quam maxime ex medio sumptis, ut, qui rogatur, (is autem est saepius imperitus) intelligat, aut ne intelligere se neget, quod interrogantis non leve frigus est. Illae vero pessimae artes, testem subornatum in subsellia 32 adversarii mittere, ut inde excitatus plus noceat vel dicendo contra reum, cum quo sederit, vel, cum adiuvisse testimonio videbitur, faciendo ex industria multa immodeste atque intemperanter, per quae non a se dictis tantum detrahat fidem sed ceteris quoque, qui profuerant, auferat auctoritatem; quorum mentionem habui, non ut fierent sed ut vitarentur.

Saepe inter se collidi solent inde testatio hinc testes; locus utrinque; haec enim se pars iureiurando, illa consensu signantium tuetur. Saepe inter testes et argumenta quaesi-
33 tum est. Inde scientiam in testibus et religionem, ingenia esse in argumentis dicitur; hinc testem gratia, metu, pecunia, ira, odio, amicitia, ambitu fieri; argumenta ex natura duci, in his iudicem sibi, in illis alii credere. Communia haec 34 pluribus causis, multumque iactata sunt et semper tamen iactabuntur. Aliquando utrinque sunt testes, et quaestio sequitur ex ipsis, Utri meliores viri? ex causis, Utri magis credibilia dixerint? ex litigatoribus, Utri gratia magis valuerint? His adicere si qui volet ea, quae divina testimonia vocant, 35

ex responsis, oraculis, omnibus: duplicem sciat esse eorum tractatum, generalem alterum, in quo inter Stoicos et Epicuri sectam secutos pugna perpetua est, *regaturne providentia mundus*; specialem alterum circa partes divinationis, 36 ut quaeque in quaestionem cadit. Aliter enim oraculorum aliter aruspicum, augurum, coniectorum, mathematicorum fides confirmari aut refelli potest, cum sit rerum ipsarum ratio diversa. Circa eiusmodi quoque instrumenta firmanda vel destruenda multum habet operis oratio, si quae sint voces per vinum, somnum, dementiam emissae, vel excepta parvulorum indicia, quos pars altera nihil fingere, altera 37 nihil iudicare dictura est. Nec tantum praestari hoc genus potenter, sed etiam, ubi non est, desiderari solet: Pecuniam dedisti; quis numeravit? ubi? unde? Venenum arguis; ubi emi? a quo? quanti? per quem dedi? quo conscio? Quae fere omnia pro Cluentio Cicero in crimine veneficii excutit. Haec de inartificialibus quam brevissime potui.

DE PROBATIONE ARTIFICIALI.

VIII. Pars altera probationum, quae est tota in arte constatque rebus ad faciendam fidem appositis, plerumque aut omnino negligitur aut levissime attingitur ab his, qui argumenta velut horrida et confragosa vitantes amoenioribus locis desident, neque aliter quam ii, qui traduntur a poetis gustu cuiusdam apud Lotophagos graminis et Sirenum cantu deleniti voluptatem saluti praetulisse, dum laudis falsam imaginem persequuntur, ipsa, propter quam dicitur, 2 victoria cedunt. Atqui cetera, quae continuo magis orationis tractu decurrunt, in auxilium atque ornamentum argumentorum comparantur, nervisque illis, quibus causa continetur, adiiciunt inducti super corporis speciem: ut, si forte quid factum ira vel metu vel cupiditate dicatur, latius, quae cuiusque affectus natura sit, prosequamur. Iisdem laudamus, incusamus, augemus, minuiimus, describimus, deterremus, 3 querimus, consolamur, hortamur. Sed horum esse opera in rebus aut certis, aut de quibus tanquam certis loquimur, potest. Nec abnuerim esse aliquid in delectatione, multum

vero in commovendis affectibus; sed haec ipsa plus valent, cum se didicisse iudex putat, quod consequi nisi argumentatione aliaque fide rerum non possumus.

Quorum priusquam partiamur species, indicandum est, 4 esse quaedam in omni probationum genere communia. Nam neque ulla quaestio est, quae non sit aut in re aut in persona; neque esse argumentorum loci possunt nisi in iis, quae rebus aut personis accidunt, eaque aut per se in- 5 spici solent aut ad aliud referri; nec ulla confirmatio nisi aut ex consequentibus aut ex repugnantibus, et haec necesse est aut ex praeterito tempore aut ex coniuncto aut ex sequenti petere; nec ulla res probari nisi ex alia potest, eaque sit oportet aut maior aut par aut minor. Argu- 6 menta vero reperiuntur aut in quaestionibus, quae etiam separatae a complexu rerum personarumque spectari per se possint; aut in ipsa causa, cum invenitur aliquid in ea non ex communi ratione ductum sed eius iudicii, de quo cognoscitur, proprium. Probationum praeterea omnium aliae sunt necessariae aliae credibiles aliae non repugnantes. Et ad- 7 huc omnium probationum quadruplex ratio est, ut vel quia est aliquid, aliud non sit, ut: Dies est, nox non est; vel quia est aliquid, et aliud sit: Sol est supra terram, dies est; vel quia aliquid non est, aliud sit: Nox non est, dies est; vel quia aliquid non est, nec aliud sit: Non est rationalis, nec homo est. His in universum praedictis partes subiiciam.

DE SIGNIS.

IX. Omnis igitur probatio artificialis constat aut signis aut argumentis aut exemplis. Nec ignoro plerisque videri signa partem argumentorum. Quae mihi separandi ratio haec fuit prima, quod sunt paene ex illis inartificialibus; cruenta enim vestis et clamor et livor et talia sunt instrumenta, qualia tabulae, rumores, testes; nec inveniuntur ab oratore sed ad eum cum ipsa causa deferuntur; altera, 2 quod signa, sive indubitata sunt, non sunt argumenta; quia, ubi illa sunt, quaestio non est: argumento autem, nisi in re

controversa, locus esse non potest; sive dubia, non sunt argumenta sed ipsa argumentis egent.

- 3 Dividuntur autem in has duas primas species, quod eorum alia sunt, ut dixi, quae necessaria sunt quaeque aliter habere se non possunt, quae Graeci vocant *τεκμήρια*, *ἀλυστα σημεῖα*, quae mihi vix pertinere ad praecepta artis videntur; nam ubi est signum insolubile, ibi ne lis quidem
- 4 est. Id autem accidit, cum quid aut necesse est fieri factumve esse, aut omnino non potest fieri vel esse factum; quo in causis posito non est lis facti. Hoc genus per omnia
- 5 tempora perpendi solet. Nam et coisse eam cum viro, quae peperit, quod est praeteriti; et fluctus esse, cum magna vis venti in mare incubuit, quod coniuncti; et eum mori, cuius cor est vulneratum, quod futuri, necesse est. Nec fieri potest, ut ibi messis sit, ubi satum non est; ut quis Romae sit, cum est Athenis; ut sit ferro vulneratus, qui sine cicatrice
- 6 est. Sed quaedam et retrorsum idem valent, ut vivere hominem qui spirat, et spirare qui vivit. Quaedam in contrarium non recurrunt; nec enim, quia movetur qui ingreditur,
- 7 idcirco qui movetur ingreditur. Quare potest et coisse cum viro, quae non peperit; et non esse ventus in mari, cum est fluctus; neque utique cor eius vulneratum esse, qui perit. Ac similiter satum fuisse potest, ubi non fuit messis; nec fuisse Romae, qui non fuit Athenis; nec fuisse ferro vulneratus, qui habet cicatricem.
- 8 Alia sunt signa non necessaria, quae *εἰκότα* Graeci vocant; quae etiamsi ad tollendam dubitationem sola non
- 9 sufficiunt, tamen adiuta ceteris plurimum valent. Signum vocant, ut dixi, *σημεῖον*, quanquam id quidam indicium quidam vestigium nominaverunt, per quod alia res intelligitur, ut per sanguinem caedes. At, quia sanguis vel ex hostia respersisse vestem potest vel e naribus profluxisse: non utique, qui vestem cruentam habuerit, homicidium fecerit.
- 10 Sed ut per se non sufficit: ita ceteris adiunctum testimonii loco ducitur, si inimicus, si minatus ante, si eodem loco fuit; quibus signum cum accessit, efficit, ut, quae suspecta
- 11 erant, certa videantur. Alioqui sunt quaedam signa utriusque parti communia, ut livores, umores (nam videri possunt

et veneficii et crudelitatis) et vulnus in pectore sua manu et aliena perisse dicentibus, in quo est. Haec proinde firma habentur atque extrinsecus adjuvantur.

Eorum autem, quae signa sunt quidem sed non sint necessaria, genus Hermagoras putat, non esse virginem Atalantam, quia cum iuvenibus per silvas vagetur. Quod si receperimus, vereor, ne omnia quae ex facto ducuntur, signa faciamus. Eadem tamen ratione qua signa tractantur. Nec mihi videntur Areopagitae, cum damnaverint

13 puerum coturnicum oculos eruentem, aliud iudicasse, quam id signum esse perniciosissimae mentis multisque malo futurae, si adolevisset. Unde Spurii Maelii Marciique Manlii popularitas signum affectati regni est existimatum. Sed ve-

14 reor, ne longe nimium nos ducat haec via. Nam si est signum adulterae lavari cum viris: erit et convivere cum adolescentibus, deinde etiam familiariter alicuius amicitia uti; aut fortasse corpus vulsum, fractum incessum, vestem muliebrem dixerit mollis et parum viri signa, si cui (cum signum id proprie sit, quod ex eo, de quo quaeritur, natum sub oculos venit) ut sanguis a caede, ita illa ex impudicitia

15 fluere videantur. Ea quoque quae, quia plerumque observata sunt, vulgo signa creduntur, ut prognostica. Vento rubet aurea Phoebe et Cornix plena pluviam vocat improba voce, si causas ex qualitate coeli trahunt, sane ita appellantur. Nam si vento rubet luna: signum venti

16 est rubor. Et si, ut idem poeta colligit, densatus et laxatus aer facit, ut sit inde ille avium concentus: idem sentiemus. Sunt autem signa etiam parva magnorum, ut vel haec ipsa cornix; nam maiora minorum esse, nemo miratur.

DE ARGUMENTIS.

X. Nunc de argumentis. Hoc enim nomine complectimur omnia, quae Graeci *ἐνθυμήματα*, *ἐπιχειρήματα*, *ἀποδείξεις* vocant, quanquam apud illos est aliqua horum nominum differentia, etiamsi vis eodem fere tendit. Nam *enthymema* (quod nos *commentum* sane aut *commentationem* interpretemur, quia aliter non possumus, Graeco melius uti) unum intellectum habet, quo omnia mente concepta signi-

ficat; sed nunc non de eo loquimur; alterum, quo senten-
 2 tiam cum ratione; tertium, quo certam quandam argumenti
 conclusionem vel ex consequentibus vel ex repugnantibus;
 quanquam de hoc parum convenit. Sunt enim, qui illud
 prius *epichirema* dicant, pluresque invenies in ea opinione,
 ut id demum, quod pugna constat, enthymema accipi velint,
 3 et ideo illud Cornificius *contrarium* appellat. Hunc alii
rhetoricum syllogismum, alii *imperfectum syllogismum* vo-
 caverunt, quia nec distinctis nec totidem partibus concludere-
 4 retur; quod sane non utique ab oratore desideratur. *Epi-*
chirema Valgius *aggressionem* vocat; Celsus autem iudicat,
 non nostram administrationem sed ipsam rem quam
 aggredimur, id est argumentum, quo aliquid probaturi sumus,
 etiamsi nondum verbis explanatum iam tamen mente con-
 5 ceptum, *epichirema* dici. Aliis videtur, non destinatam vel
 inchoatam sed perfectam probationem hoc nomen accipere,
 et ultimam speciem; ideoque propria eius appellatio et ma-
 xime in usu est posita; quae significatur certa quaedam sen-
 tentiae comprehensio, quae ex tribus minimum partibus con-
 6 stat. Quidam *epichirema rationem* appellarunt; Cicero
 melius *rationem*, quamquam et ille nomen hoc duxisse
 magis a syllogismo videtur. Nam et statum syllogisticum
rationem appellat, exemplisque utitur philosophorum.
 Et quoniam est quaedam inter syllogismum et *epichirema*
 7 vicinitas: potest videri hoc nomine recte abusus. *Ἀπο-*
δείξις est evidens probatio, ideoque apud Geometras *ποκα-*
μινα ἀποδείξις dicuntur. Hanc et ab *epichiremate* Caeci-
 lius putat differre solo genere conclusionis et esse apodixin
 imperfectum *epichirema* eadem causa, qua diximus enthymema
 syllogismo distare. Nam et *epichirema* syllogismi
 pars est. Quidam inesse *epichiremati* apodixin putant et esse
 8 partem eius confirmantem. Utrumque autem quamquam di-
 versi auctores eodem modo finiunt, scilicet rationem per ea,
 quae certa sunt, incertis fidem non dubiam afferentem; quae
 natura est omnium argumentorum, neque enim certa incertis
 declarantur. Haec omnia generaliter *πίστεις* appellant, quod
 etiamsi propria interpretatione dicere *fidem* possumus, aper-
 tius tamen *probationem* interpretabimur. Sed argumen-

tum quoque plura significat. Nam et fabulae ad actum sce- 9
 narum compositae argumenta dicuntur, et orationum Cicero-
 nis velut thema ipse exponens Pedianus, *Argumentum*,
 inquit, *tale est*; et ipse Cicero ad Brutum ita scribit: *Veri-*
tus fortasse, ne nos in Catonem nostrum transferremus
illius mali quid, etsi argumentum simile non erat. Quo
 apparet, omnem ad scribendum destinatam materiam ita ap-
 pellari. Nec mirum, cum id inter opifices quoque vulgatum 10
 sit, unde Vergilius, *Argumentum ingens*; vulgoque paulo
 numerosius opus dicitur argumentosum. Sed nunc de eo
 dicendum argumento est, quod probationem, indicium, fidem,
 aggressionem eiusdem rei nomina facit, parum distincte, ut
 arbitrator. Nam probatio et fides efficitur non tantum per 11
 haec, quae sunt rationis, sed etiam per inartificialia. Signum
 autem, quod ille indicium vocat, ab argumentis iam separavi.
 Ergo, cum sit argumentum ratio probationem prae-
 stans, qua colligitur aliud per aliud, et quae,
 quod est dubium, per id, quod dubium non est,
 confirmat: necesse est esse aliquid in causa, quod proba-
 12 tionem non egeat. Alioqui nihil erit, quo probemus, nisi fuerit,
 quod aut sit verum aut videatur, ex quo dubiis fides fiat.
 Pro certis autem habemus primum, quae sensibus percipiuntur,
 ut quae videmus, audimus, qualia sunt signa; deinde ea,
 in quae communi opinione consensum est, *deos esse, prae-*
standam pietatem parentibus; praeterea, quae legibus cauta 13
 sunt, quae persuasionem etiamsi non omnium hominum eius
 tamen civitatis aut gentis, in qua res agitur, in mores rece-
 pta sunt, ut pleraque in iure non legibus sed moribus con-
 stant; si quid inter utramque partem convenit, si quid pro-
 batum est, denique cuicumque adversarius non contradicit.
 Sic enim fiet argumentum, *Cum providentia mundus rega-*
tur, administranda est respublica; ut administranda res-
 publica sit, si liquebit mundum providentia regi. Debet 15
 etiam nota esse recte argumenta tractaturo vis et natura
 omnium rerum, et quid quaeque earum efficiat; hinc enim
 sunt, quae *εἰκότα* dicuntur. *Credibilem* autem genera sunt 16
 tria: unum firmissimum, quia fere accidit, ut *Liberos a pa-*
rentibus amari; alterum velut propensius, *Eum, qui recte*

- valeat, in crastinum perventurum; tertium tantum non repugnans, In domo furtum factum ab eo, qui domi fuit.*
- 17 Ideoque Aristoteles in secundo de Arte Rhetorica libro diligentissime est executus, quid cuique rei et quid cuique homini soleret accidere, et quas res quosque homines quibus rebus aut hominibus vel conciliasset vel alienasset ipsa natura: ut, divitias quid sequatur aut ambitum aut superstitionem, quid boni probent, quid mali petant, quid milites, quid rustici, quo quaeque modo res vitari vel appeti soleat.
- 18 Verum hoc exequi mitto; non enim longum tantum sed etiam impossibile aut potius infinitum est praeterea positum in communi omnium intellectu. Si quis tamen desideraverit: a quo peteret, ostendi. Omnia autem credibilia, in quibus pars maxima consistit argumentationis, ex huiusmodi fontibus fluunt: *An credibile sit, a filio patrem occisum, incestum cum filia commissum?* et contra *veneficium in noverca, adulterium in luxurioso;* illa quoque, *An scelus palam factum? An falsum propter exiguam summam?* quia suos quidque horum velut mores habet; plerumque tamen, non semper, alioqui indubitata essent, non argumenta.
- 20 Executiamus nunc argumentorum locos; quanquam quibusdam hi quoque, de quibus supra dixi, videntur. Locos appello non, ut vulgo nunc intelliguntur, in luxuriam et adulterium et similia; sed sedes argumentorum, in quibus latent, ex quibus sunt petenda. Nam, ut in terra non omni generantur omnia, nec avem aut feram reperias, ubi quaeque nasci aut morari soleat ignarus, et piscium quoque genera alia planis gaudent alia saxosis, regionibus etiam litoribusque discreta sunt, nec helopem nostro mari aut scarum ducas: ita non omne argumentum undique venit ideoque non passim quaerendum est. Multus alioqui error est; exhausto labore, quod non ratione scrutabimur, non poterimus invenire nisi casu. At si scierimus, ubi quodque nascatur: cum ad locum ventum erit, facile, quod in eo est, pervidebimus.
- 23 In primis igitur argumenta a persona ducenda sunt; cum, ut dixi, sit divisio, ut omnia in haec duo partiamur, res atque personas, ut causa, tempus, locus, occasio, in-

strumentum, modus et cetera, rerum sint accidentia. Personis autem non quidquid accidit exequendum mihi est, ut plerique fecerunt, sed unde argumenta sumi possunt. Ea porro sunt, genus: nam similes parentibus ac maioribus suis plerumque creduntur, et nonnunquam ad honeste turpiterque vivendum inde causae fluunt; natio: nam et gentibus proprii mores sunt, nec idem in Barbaro, Romano, Graeco probabile est; patria, quia similiter etiam civitatum leges, instituta, opiniones habent differentiam; sexus, ut latrocinium facilius in viro, veneficium in femina credas; aetas, quia aliud aliis annis magis convenit; educatio et disciplina, quoniam refert, a quibus et quo quisque modo sit institutus; habitus corporis: ducitur enim frequenter in argumentum species libidinis, robor petulantiae, his contraria in diversum; fortuna: neque enim idem credibile est in divite ac paupere, propinquis, amicis, clientibus abundante et his omnibus destituto; condicionis etiam distantia: nam clarus an obscurus, magistratus an privatus, pater an filius, civis an peregrinus, liber an servus, maritus an coelebs, parens liberorum an orbus sit, plurimum distat; animi natura: etenim avaritia, iracundia, misericordia, crudelitas, severitas aliaque his similia afferunt frequenter fidem aut detrahunt; sicut victus: luxuriosus an frugi an sordidus, quaeritur; studia quoque: nam rusticus, forensis, negotiator, miles, navigator, medicus aliud atque aliud efficiunt. Intuendum etiam, quid affectet quisque, locuples videri an disertus, iustus an potens. Spectantur ante acta dictaque. Ex praeteritis enim aestimari solent praesentia. His adiciunt quidam commotionem; hanc accipi volunt temporarium animi motum, sicut iram, pavorem; consilia autem et praesentis et praeteriti et futuri temporis; quae mihi, etiamsi personis accidunt, per se referenda tamen ad illam partem argumentorum videntur, quam ex causis ducimus; sicut habitus quidam animi, quo tractatur, amicus an inimicus. Ponunt in persona et nomen; quod quidem ei accidere necesse est, sed in argumentum raro cadit, nisi cum aut ex causa datum est, ut *Sapiens, Magnus, Pius;* aut et ipsum alicuius cogitationis attulit causam, ut *Lentulo* coniurationis, quod libris Sibyllinis aruspici-

cumque responsis dominatio dari tribus Cornelliis dicebatur, seque eum tertium esse credebat post Sullam Cinnamque, 31 quia et ipse Cornelius erat. Nam et illud apud Euripidem frigidum sane, quod nomen Polynicis, ut argumentum morum, frater inaccessit. Iocorum tamen ex eo frequens materia, qua Cicero in Verrem non semel usus est. Haec fere circa personas sunt aut his similia. Neque enim complecti omnia vel hac in parte vel in ceteris possumus, contenti rationem quaesituris ostendere.

32 Nunc ad res transeo, in quibus maxime sunt personis iuncta, quae agimus, ideoque prima tractanda. In omnibus porro, quae fiunt, quaeritur aut Quare? aut Ubi? aut 33 Quando? aut Quomodo? aut Per quae facta sunt? Ducuntur igitur argumenta ex causis factorum vel futurorum; quarum materiam, quam ἕλην alii, εἰδύναμιν alii nominaverunt, in duo genera sed quaternas utriusque dividunt species. Nam fere versatur ratio faciendi circa bonorum adeptionem, incrementum, conservationem, usum; aut malorum evitacionem, liberationem, imminutionem, tolerantiam; quae et in deliberando 34 plurimum valent. Sed has causas habent recta, prava contra ex falsis opinionibus veniunt. Nam est his initium ex iis, quae credunt bona aut mala, inde errores existunt et pessimi affectus, in quibus sunt ira, odium, invidia, cupiditas, spes, ambitus, audacia, metus, cetera generis eiusdem. Accedunt aliquando fortuita, ebrietas, ignorantia, quae interim ad veniam valent, interim ad probationem criminis, ut si quis, dum 35 alii insidiatur, alium dicitur interemisse. Causae porro non ad convincendum modo, quod obiicitur, sed ad defendendum quoque exeuti solent, cum quis se recte fecisse id est honesta causa, contendit; qua de re latius in tertio libro 36 dictum est. Finitionis quoque quaestiones ex causis interim pendunt, *An tyrannicida, qui tyrannum, a quo deprehensus in adulterio fuerat, occidit? An sacrilegus, qui, ut hostes urbe expelleret, arma templo affixa detraxit?* Ducuntur 37 argumenta et ex loco. Spectatur enim ad fidem probationis, montanus an planus, maritimus an mediterraneus, consitus an incultus, frequens an desertus, propinquus an remotus, opportunus consiliis an adversus; quam partem vi-

demus vehementissime pro Milone tractasse Ciceronem. Et 38 haec quidem ac similia ad coniecturam frequentius pertinent sed interim ad ius quoque: privatus an publicus, sacer an profanus, noster an alienus; ut in persona, magistratus, pater, peregrinus. Hinc enim quaestiones oriuntur: *Privatam 39 pecuniam sustulisti; verum quia de templo, non furtum sed sacrilegium est. Occidisti adulterum, quod lex permittit; sed quia in lupanari, caedes est. Iniuriam fecisti; sed quia magistratui, maiestatis actio est.* Vel contra: *Li- 40 cuit, quia pater eram, quia magistratus.* Sed circa facti controversiam argumenta praestant, circa iuris lites materiam quaestionum. Ad qualitatem quoque frequenter pertinet locus, neque enim idem ubique aut licet aut decorum est; quin etiam, in qua quidque civitate quaeratur, interest, moribus enim et legibus distant. Ad commendationem quoque et in- 41 vidiam valet. Nam et Ajax apud Ovidium: *Agimus, inquit, ante rates causam, et mecum confertur Ulixes?* Et Miloni inter cetera obiectum est, quod Clodius in monumentis ab eo maiorum suorum esset occisus. Ad suadendi momenta 42 idem valet, sicut tempus, cuius tractatum subiungam. Eius autem, ut alio loco iam dixi, duplex significatio est. Generaliter enim et specialiter accipitur. Prius illud est: nunc, olim, sub Alexandro, cum apud Ilium pugnatum est; denique praeteritum, instans, futurum. Hoc sequens habet et constituta discrimina: aestate, hieme, noctu, interdiu; et fortuita: in pestilentia, in bello, in convivio. Latinorum quidam satis 43 significari putaverunt, si illud generale tempus, hoc speciale tempora vocarent. Quorum utrorumque ratio et in consiliis quidem et in illo demonstrativo genere versatur sed in iudiciis frequentissima est. Nam et iuris quaestiones facit et 44 qualitatem distinguit et ad coniecturam plurimum confert: ut cum interim probationes inexpugnabiles afferat, quales sunt, si dicatur (ut supra posui) signator, qui ante diem tabularum decessit; aut commisisse aliquid, vel cum infans esset vel cum omnino natus non esset; praeter id, quod 45 omnia facile argumenta aut ex iis, quae ante rem facta sunt, aut ex coniunctis rei aut insequentibus ducuntur. Ex antecedentibus: *Mortem minatus es, noctu existi, proficiscen-*

tem antecessisti; causae quoque factorum praeteriti sunt
 46 temporis. Secundum tempus subtilius quidam, quam necesse
 erat, diviserunt, ut esset iuncti *Sonus auditus est*; adhaeren-
 tis *Clamor sublatus est*. Insequentis sunt illa *Latuisti, pro-*
fugisti; Livores et tumores apparuerunt. Iisdem temporum
 gradibus defensor utetur ad detrahendam ei, quod obiicitur,
 47 fidem. In his omnis factorum dictorumque ratio versatur,
 sed dupliciter. Nam fiunt quaedam, quia aliud postea futu-
 rum est; quaedam, quia aliud ante factum est: ut, cum obi-
 icitur reo lenocinii, quod speciosam adulterii damnatam
 quandam emerit; aut parricidii reo luxurioso, quod dixerit
 patri, *Non amplius me obiurgabis*. Nam et ille, non quia
 emit, leno est, sed, quia leno erat, emit; nec hic, quia sic
 erat locutus, occidit, sed, quia erat occisurus, sic locutus est.
 48 Casus autem, qui et ipse praestat argumentis locum, sine du-
 bio est ex insequentibus, sed quadam proprietate distinguitur,
 ut si dicam: *Melior dux Scipio quam Hannibal; vicit Han-*
nibalem. Bonus gubernator; nunquam fecit naufragium.
Bonus agricola; magnos sustulit fructus. Et contra: *Sum-*
ptuosus fuit; patrimonium exhausit. Turpiter vixit; omni-
 49 *bus invisus est.* Intuendae sunt praecipueque in coniecturis
 et facultates; credibilis est enim occisos a pluribus pau-
 ciores, a firmioribus imbecilliores, a vigilantibus dormientes,
 a praeparatis inopinantes. Quorum contraria in diversum
 50 valent. Haec et in deliberando intuemur, et in iudiciis ad
 duas res solemus referre, *an voluerit quis, an potuerit*;
 nam et voluntatem spes facit. Hinc illa apud Ciceronem
 coniectura, *Insidiatus est Clodius Miloni, non Milo Clodio;*
ille cum servis robustis hic cum mulierum comitatu, ille in
equo hic in rheda, ille expeditus hic penula irretitus.
 51 Facultati autem licet instrumentum coniungere; sunt
 enim in parte facultatis et copiae. Sed ex instrumento ali-
 quando etiam signa nascuntur, ut spiculum in corpore inven-
 52 tum. His adicitur modus, quem *τρόπον* dicunt, quo quaer-
 ritur, quemadmodum quid sit factum. Idque tum ad qualita-
 tem scriptumque pertinet, ut si negemus, *adulterum veneno*
licuisse occidere sed ferro oportuisse; tum ad coniecturas

quoque, ut si dicam, *bona mente factum, ideo palam; ma-*
la, ideo ex insidiis, nocte, in solitudine.

In rebus autem omnibus, de quarum vi ac natura quae- 53
 ritur, quasque etiam citra complexum personarum ceterorum-
 que, ex quibus fit causa, per se intueri possumus, tria sine
 dubio rursus spectanda sunt, *An sit, Quid sit, Quale sit.*
 Sed, quia sunt quidam loci argumentorum his omnibus com-
 munes, dividi haec tria genera non possunt, ideoque locis
 potius, ut in quosque incurrent, subiicienda sunt. Ducuntur 54
 ergo argumenta ex finitione seu fine; nam utroque modo
 traditur. Eius duplex ratio est; aut enim simpliciter quaerit-
 ur, sitne hoc virtus; aut praecedente finitione, quid sit vir-
 tus. Ita aut universam vim verbi complectamur, ut *Rheto-*
rice est bene dicendi scientia; aut per partes, ut *Rhetorice*
est recte inveniendi et disponendi et eloquendi cum firma
memoria et cum dignitate actionis scientia. Praeterea 55
 finimus aut vi, sicut superiora, aut *ἐπιμολογία*, ut si *assi-*
duum ab aere dando, et *locupletem* a locorum, *pecuniosum*
 a pecorum copia. Finitioni subiecta maxime videntur ge-
 nus, species, differens, proprium. Ex his omnibus 56
 argumenta ducuntur. Genus ad probandam speciem mini-
 mum valet, plurimum ad refellendam. Itaque non, quia est
 arbor, platanus est, at quod non est arbor, utique platanus
 non est; vel quod non est virtus, utique non potest esse ius-
 titia. Itaque a genere perveniendum ad ultimam speciem:
 ut *Homo est animal*, non est satis, id enim genus est; *mor-*
tale, etiamsi est species, cum aliis tamen communis finitio;
rationalis, nihil supererit ad demonstrandum id quod velis.
 Contra species firmam probationem habet generis, infirmam 57
 refutationem. Nam, quod iustitia est, utique virtus est; quod
 non est iustitia, potest esse virtus, si est fortitudo, constan-
 tia, continentia. Nunquam itaque tolletur a specie genus,
 nisi ut omnes species, quae sunt generi subiectae, praemo-
 veantur: hoc modo, *Quod neque mortale est neque immor-*
tale, animal non est. His adiciunt propria et differen- 58
 tia. Propriis confirmatur finitio, differentibus solvitur. Pro-
 prium autem est aut quod soli accedit, ut homini sermo, risus;
 aut quidquid utique accedit sed non soli, ut igni calcifere.

Et sunt eiusdem rei plura propria, ut ipsius ignis lucere, calere. Itaque, quodcumque proprium deerit, solvit finitionem; 59 non utique, quodcumque erit, confirmat. Saepissime autem, quid sit proprium cuiusque, quaeritur: ut, si per *ἐτυμολογίαν* dicatur, *Tyrannicidae proprium est tyrannum occidere*, negemus; non enim, si traditum sibi eum carnifex occiderit, 60 tyrannicida dicatur, nec si imprudens vel invitus. Quod autem proprium non erit, differens erit, ut aliud est servum esse aliud servire; qualis esse in addictis quaestio solet: *Qui servus est, si manumittatur, fit libertinus, non idem* 61 *addictus*; et plura, de quibus alio loco. Illud quoque differens vocant, cum, genere in species diducto, species ipsa discernitur. *Animal* genus, *Mortale* species, *Terrenum* vel *Bipes* differens; nondum enim proprium est sed iam differt a marino vel quadripede; quod non tam ad argumentum pertinet quam ad diligentem finitionis comprehensionem. 62 Cicero genus et speciem, quam eandem formam vocat, a finitione deducit et iis, quae ad aliquid sunt, subiicit: ut, si is, cui argentum omne legatum est, petat signatum quoque, utatur genere; at si quis, cum legatum sit ei, quae viro materfamilias esset, neget deberi ei, quae in manum non convenerit, specie; quoniam duae formae sint matrimonio- 63 rum. Divisione autem adiuvari finitionem docet, eamque differre a partitione, quod haec sit totius in partes, illa generis in formas. Partes incertas esse, ut *Quibus constet respublica*; formas certas, ut *Quot sint species rerum-publicarum*, quas tris accepimus, quae populi, quae paucorum, quae unius potestate regerentur. Et ille quidem non his exemplis utitur, quia scribens ad Trebatium ex iure ducere ea maluit; ego apertiora posui. Propria vero ad coniecturae quoque pertinent partem: ut, quia proprium est boni recte facere, iracundi verbis [excandescere], esse credantur aut contra. Nam ut quaedam in quibusdam utique non sunt: et ratio, quamvis ita ex diverso, eadem est. 64 65 Divisio et ad probandum simili via valet et ad refellendum. Probationi interim satis est unum habere, hoc modo, *Ut sit civis, aut natus sit oportet aut factus*; utrum- 66 que tollendum est, *Nec natus nec factus est*. Fit hoc et

multiplex, idque est argumentorum genus ex remotione, quo modo efficitur totum falsum, modo id, quod relinquitur, verum. Totum falsum est hoc modo, *Pecuniam credidisse te dicis; aut habuisti ipse aut ab aliquo accepisti aut invenisti aut surripuisti. Si neque domi habuisti neque ab aliquo accepisti nec cetera: non credidisti*. Reliquum fit verum sic, *Hic servus, quem tibi vindicas, aut verna tuus est* 67 *aut emptus aut donatus aut testamento relictus aut ex hoste captus aut alienus*; deinde remotis prioribus supererit alienus. Periculosum et cum cura intuendum genus, quia, si in proponendo unum quodlibet omiserimus, cum risu quoque tota res solvitur. Tutius, quod Cicero pro Caecina facit, 68 cum interrogat, *Si haec actio non sit, quae sit?* simul enim remouentur omnia. Vel cum duo ponentur inter se contraria, quorum tenuisse utrumlibet sufficiat, quale Ciceronis est, *Unum quidem certe, nemo erit tam inimicus Cluentio, qui mihi non concedat; si constet corruptum illud esse iudicium, aut ab Habito aut ab Oppianico esse corruptum; si doceo non ab Habito, vinco ab Oppianico; si ostendo ab Oppianico, purgo Habito*. Fit etiam ex duobus, quo- 69 rum necesse est alterum verum, eligendi adversario potestas, efficiturque, ut, utrum elegerit, noceat. Facit hoc Cicero pro Oppio: *Utrum, cum Cottam appetisset, an cum ipse sese conaretur occidere, telum e manibus ereptum est?* et pro Vareno: *Optio vobis datur, utrum velitis casu illo itinere Varenum usum esse an huius persuasum et inductu*. Deinde utraque facit accusatori contraria. Interim 70 duo ita proponuntur, ut utrumlibet electum idem efficiat, quale est, *Philosophandum est, etiamsi non est philosophandum*. Et illud vulgatum, *Quo schema, si intelligitur? quo, si non intelligitur?* Et, *Mentietur in tormentis, qui dolorem pati potest; mentietur, qui non potest*.

Ut sunt autem tria tempora: ita ordo rerum tribus mo- 71 mentis consertus est; habent enim omnia initium, incrementum, summam, ut iurgium deinde caedes et strages. Est ergo hic quoque argumentorum locus invicem probantium. Nam et ex initiis summa colligitur, quale est, *Non possum togam praetextam sperare, cum exordium pullum*

videam; et contra, non dominationis causa Sullam arma
72 sumpsisse, argumentum est dictatura deposita. Similiter ex
incremento in utramque partem ducitur rei ratio cum in con-
iectura tum etiam in tractatu aequitatis, An ad initium summa
referenda sit? id est, An ei caedes imputanda sit, a quo iur-
gium coepit?

73 Est argumentorum locus ex similibus: *Si continen-
tia virtus, utique et abstinentia; Si fidem debet tutor, et
procurator.* Hoc est ex eo genere, quod *ἐπαγωγήν* Graeci
vocant, Cicero inductionem. Ex dissimilibus: *Non, si
laetitia bonum, et voluptas; Non, quod mulieri, idem pu-
pillo.* Ex contrariis: *Frugalitas bonum, luxuria enim
malum; Si malorum causa bellum est, erit emendatio pax;
Si veniam meretur, qui imprudens nocuit: non meretur
74 praemium, qui imprudens profuit.* Ex pugnantibus: *Qui
est sapiens, stultus non est.* Ex consequentibus sive
adiunctis: *Si bonum iustitia est, recte iudicandum; Si
malum perfidia, non est fallendum.* Idem retro. Nec sunt
his dissimilia ideoque huic loco subiicienda, cum et ipsa
naturaliter congruant: *Quod quis non habuit, non perdidit;
Quem quis amat, sciens non laedit; Quem quis heredem
suum esse voluit, carum habuit, habet, habebit.* Sed cum
75 sint indubitata, vim habent paene signorum insolubilium. Sed
haec consequentia dico, *ἀκόλουθα*; est enim consequens
sapientiae bonitas; illa sequentia, *παρεπόμενα*, quae pō-
stea facta sunt aut futura. Nec sum de nominibus anxius;
vocet enim, ut voluerit quisque, dum vis rerum ipsa mani-
76 festa sit, appareatque hoc temporis, illud esse naturae. Ita-
que non dubito haec quoque consequentia, quamvis ex prio-
ribus dent argumentum ad ea quae sequuntur, quorum duas
quidam species esse voluerunt: Actionis, ut pro Oppio, *Quos
educere invitos in provinciam non potuit, eos invitos re-
tinere qui potuit?* Temporis, in Verrem, *Si finem Praetoris
edicto afferunt Kalendae Ian., cur non initium quoque
77 edicti nascatur a Kalendis Ian.?* Quod utrumque exem-
plum tale est, ut idem in diversum, si retro agas, valeat.
Consequens enim est, eos, qui inviti duci non potuerint, in-
78 vitos non potuisse retineri. Illa quoque, quae ex rebus mu-

tuam confirmationem praestantibus ducuntur (quae proprii
generis videri quidam volunt et vocant *ἐκ τῶν πρὸς ἄλληλα*,
Cicero ex rebus sub eandem rationem venientibus) fortiter
consequentibus iunxerim: *Si portorium Rhodiis locare ho-
nestum est, et Hermocreonti conducere, et Quod discere
honestum, et docere.* Unde illa non hac ratione dicta sed 79
efficiens idem Domitii Afri sententia est pulchra: *Ego ac-
cusavi, vos damnastis.* Est invicem consequens et quod
ex diversis idem ostendit; ut, qui mundum nasci dicit, per hoc
ipsum et deficere significet, quia deficit omne quod nascitur.

Simillima est his argumentatio, qua colligi solent ex 80
his, quae faciunt, ea, quae efficiuntur, aut contra, quod ge-
nus a causis vocant. Haec interim necessario fiunt, in-
terim plerumque sed non necessario. Nam corpus in lumine
utique umbram facit, et umbra, ubicunque est, ibi esse cor-
pus ostendit. Alia sunt, ut dixi, non necessaria, vel utrin- 81
que vel ex altera parte: *Sol colorat; non utique, qui est
coloratus, a sole est. Iter pulverulentum facit; sed neque
omne iter pulverem movet, nec, quisquis est pulverulentus,
ex itinere est.* Quae utique fiunt, et talia sunt: *Si sapien- 82
tia bonum virum facit, bonus vir est utique sapiens; ideo-
que Boni est honeste facere, mali turpiter; et Qui honeste
faciunt, boni, qui turpiter, mali iudicantur; recte. At,
Exercitatio plerumque robustum corpus facit; sed non,
quisquis est robustus, exercitatus, nec, quisquis exerci-
tatus, robustus; nec, quia Fortitudo praestat, ne mortem
timeamus, quisquis mortem non timuerit, vir fortis erit
existimandus; nec, si capitis dolorem facit, inutilis ho-
minibus sol est.* Haec ad hortativum maxime genus pertinent: 83
*Virtus facit laudem, sequenda igitur; at voluptas infamiam,
fugienda igitur.* Recte autem monemur, causas non
utique ab ultimo esse repetendas, ut *Medea, Utinam ne in 84
nemore Pelio*; quasi vero id eam fecerit miseram aut nocen-
tem, quod illic ceciderit abiegnata ad terram trabes; et
*Philocteta Paridi, Si impar esses tibi, ego nunc non essem
miser*; quo modo pervenire quolibet retro causas legentibus
licet. Illud his adificere ridiculum putarem, nisi eo Cicero 85
uteretur, quod coniugatum vocant, ut *Eos, qui rem iu-*

stam faciunt, iuste facere; quod certe non eget probatione;
 86 *Quod compascuum est, compascere licere.* Quidam haec, quae vel ex causis vel ex efficientibus diximus, alieno nomine vocant ἐξέβασις id est exitus. Nam nec hic aliud tractatur, quam quid ex quoque eveniat.

Apposita vel comparativa dicuntur, quae minora ex maioribus, maiora ex minoribus, paria ex paribus probant. Confirmatur coniectura ex maiore, *Si quis sacrilegium facit, faciet et furtum;* ex minore, *Qui facile ac palam mentitur, peierabit;* ex pari, *Qui ob rem iudicandam pecuniam accepit, et ob dicendum falsum testimonium accipiet.* Iuris confirmatio huiusmodi est: ex maiore, *Si aduulterum occidere licet, et loris caedere;* ex minore, *Si furem nocturnum occidere licet, quid latronem?* ex pari, *Quae poena adversus interfectorem patris iusta est, eadem adversus matris;* quorum omnium tractatus versatur in syllogismis.

89 Illa magis finitionibus aut qualitatibus prosunt, *Si robur corporibus bonum est, non minus sanitas;* *Si furtum scelus, magis sacrilegium;* *Si abstinentia virtus, et continentia;* *Si mundus providentia regitur, administranda respublica;* *Si domus aedificari sine ratione non potest, quid agenda*

90 *si navalium cura et armorum?* Ac mihi quidem sufficeret hoc genus, sed in species secatur. Nam ex pluribus ad unum et ex uno ad plura, (unde est *Quod semel, et saepius*) et ex parte ad totum et ex genere ad speciem, et ex eo quod continet ad id quod continetur, aut ex difficilioribus ad faciliora et ex longe positis ad propiora et ad omnia, quae

91 contra haec sunt, eadem ratione argumenta ducuntur. Sunt enim et haec maiora et minora aut certe vim similem obtinent, quae si persequamur, nullus erit ea concidendi modus. Infinita est enim rerum comparatio, iucundiora, graviora, magis necessaria, honestiora, utiliora. Sed mittamus plura,

92 ne in eam ipsam, quam vito, loquacitatem incidam. Exemplorum quoque ad haec infinitus est numerus, sed paucissima attingam. Ex maiore pro Caecina, *Quod exercitus armatos movet, id advocationem non videbitur movisse?* Ex faciliore in Clodium et Curionem, *Ac vide, an facile fieri*

93 *tu potueris, cum is factus non sit, cui tu concessisti.* Ex

difficiliore, *Vide quaeso, Tubero, ut, qui de meo facto non dubitem, de Ligarii audeam dicere.* Et ibi, *An sperandi Ligario causa non sit, cum mihi apud te locus sit etiam pro altero deprecandi?* Ex minore pro Caecina, *Itane scire esse armatos sat est, ut vim factam probes; in manus eorum incidere non est satis?* Ergo, ut breviter 94 contraham summam, ducuntur argumenta a personis, causis, locis, tempore, (cuius tres partes diximus, praecedens, coniunctum, insequens,) facultatibus, (quibus instrumentum subiecimus) modo, (id est, ut quidque sit factum) finitione, genere, specie, differentibus, propriis, remotione, divisione, initio, incrementis, summa, similibus, dissimilibus, pugnantibus, consequentibus, efficientibus, effectis, eventis, iugatis, comparatione, quae in plures diducitur species.

Illud adiciendum videtur, duci argumenta non a con- 95 fessis tantum sed etiam a fictione, quod Graeci καὶ ὑπόθεσις vocant; et quidem ex omnibus iisdem locis, quibus superiora, quia totidem species esse possunt fictae quot verae. Nam fingere hoc loco est proponere aliquid, quod, 96 si verum sit, aut solvat quaestionem aut adiuvet; deinde id, de quo quaeritur, facere illi simile. Id quo facilius accipiant iuvenes nondum scholam egressi, primo familiaribus magis ei aetati exemplis ostendam. Lex: *Qui parentes non 97 auerit, vincitur.* Non alit aliquis, et vincula nihilominus recusat. Utitur fictione, si miles, si infans sit, si reipublicae causa absit. Et illa contra optionem fortium, si tyrannidem petas, si templorum eversionem. Plurimum ea res 98 virium habet contra scriptum. Utitur his Cicero pro Caecina, **UNDE TU AUT FAMILIA AUT PROCURATOR TUUS.** *Si me villicus tuus solus deiecisset. Si vero ne habeas quidem servum praeter eum, qui me deiecerit,* et alia in eodem libro plurima. Verum eadem fictio valet et ad qua- 99 litates: *Si Catilina cum suo consilio nefariorum hominum, quos secum eduxit, hac de re posset iudicare, condemnaret L. Murenam;* et ad amplificationem: *Si hoc tibi inter coenam in illis immanibus poculis tuis accidisset.* Sic et, *Si respublica vocem haberet.*

Has fere sedes accepimus probationum in universum, 100

quas neque generatim tradere sat est, cum ex qualibet earum innumerabilis argumentorum copia oriatur; neque per singulas species exequi patiatur natura rerum, quod qui sunt facere conati, duo pariter subierunt incommoda, ut et nimium dicerent nec tamen totum. Inde plurimi, cum in hos inexplicabiles laqueos inciderunt, omnem, etiam quem ex ingenio suo poterant habere, conatum velut astricti certis legum vinculis perdidierunt, et magistrum respicientes naturam ducem sequi desierunt. Nam ut per se non sufficere scire, omnes probationes aut a personis aut a rebus peti, quia utrumque in plura dividitur: ita ex antecedentibus et iunctis et sequentibus trahenda esse argumenta qui acceperit, num protinus in hoc sit instructus, ut, quid in quaque causa ducendum sit ex his, sciat? praesertim, cum plurimae probationes in ipso causarum complexu reperiantur, ita ut sint cum alia lite nulla communes, eaeque sint et potentissimae et minime obviae, quia communia ex praeceptis accepimus, propria inveniendae sunt. Hoc genus argumentorum sane dicamus ex circumstantia, quia *πεπλοραστρι* dicere aliter non possumus, vel ex iis, quae cuiusque causae propriae sunt: ut in illo adultero sacerdote, qui lege, qua unius servandi potestatem habebat, se ipse servare voluit, proprium controversiae est dicere, *Non unum nocentem servabas, quia te dimisso adulteram occidere non licebat*. Hoc enim argumentum lex facit, quae prohibet adulteram sine adultero occidere. Et illa, in qua lata lex est, ut argentarii dimidium ex eo, quod debebant, solverent; creditum suum totum exigerent. Argentarius ab argentario solidum petit. Proprium ex materia est argumentum creditoris, idcirco adiectum esse in lege, ut argentarius totum exigeret; adversus alios enim non opus fuisse lege, cum omnes praeterquam ab argentariis totum exigendi ius haberent. Cum multa autem novantur in omni genere materiae tum praecipue in iis quaestionibus, quae scripto constant, quia vocum et in singulis ambiguitas frequens et adhuc in coniunctis magis. Et haec ipsa plurium legum aliorumve scriptorum vel congruentium vel repugnantium complexu varientur necesse est, cum res rei aut ius iuris quasi signum est. *Non debui tibi*

pecuniam; nunquam me appellasti, usuram non accepisti, ultro a me mutuatus es. Lex est, Qui patri proditionis reo non affuerit, exheres sit. Negat filius, nisi si pater absolutus sit. Quid signi? Lex altera, Prodicionis damnatus cum advocato exulet. Cicero pro Cluentio Publum Popilium et Tiberium Guttam dicit non iudicii corrupti sed ambitus esse damnatos. Quid signi? quod accusatores eorum, qui erant ipsi ambitus damnati, e lege sint post hanc victoriam restituti. Nec minus in hoc curae debet adhiberi, quid proponendum quam, quomodo sit quod proposuerimus probandum. Hic omnino vis inventionis, si non maior, certe prior. Nam ut tela supervacua sunt nescienti, quid petat: sic argumenta, nisi provideris, cui rei adhibenda sint. Hoc est, quod comprehendere arte non possit. Ideoque, cum plures eadem didicerint, generibus argumentorum similibus utentur; alius alio plura, quibus utatur, inveniet. Sit exempli gratia proposita controversia, quae communes minime cum aliis quaestiones habet: *Cum Thebas everisset Alexander, invenit tabulas, quibus, centum talenta mutua Thessalis dedisse Thebanos, continebatur. Has, quia erat usus commilitio Thessalorum, donavit his ultro; postea restituti a Cassandro Thebani reposcunt Thessalos.* Apud Amphictionas agitur. Centum talenta et credidisse eos constat et non recepisse. Lis omnis ex eo, quod Alexander ea Thessalis donasse dicitur, pendet. Constat illud quoque, non esse his ab Alexandro pecuniam datam; quaeritur ergo, an proinde sit, quod datum est, ac si pecuniam dederit? Quid proderunt argumentorum loci, nisi haec prius videro, nihil eum egisse donando, non potuisse donare, non donasse? Et prima quidem actio facilis ac favorabilis repetentium iure, quod vi sit ablatum; sed hinc vehemens quaestio et aspera exoritur de iure belli, dicentibus Thessalis, hoc regna, populos, fines gentium atque urbium contineri. Inveniendum contra est, quo distet haec causa a ceteris, quae in potestatem victoris venirent; nec circa probationem res haeret, sed circa propositionem. Dicamus in primis: In eo, quod in iudicium deduci potest, nihil valere ius belli; nec armis erepta nisi armis posse retineri. Itaque, ubi illa valeant,

115 non esse iudicem; ubi iudex sit, illa nihil valere. Hoc veniendum est, ut adhiberi possit argumentum: Ideo captivos, si in patriam suam redierint, liberos esse, quia bello parta non nisi eadem vi possideantur. Proprium est et illud causae, quod Amphictiones iudicant (ut alia apud centumviros alia apud privatum iudicem in iisdem quaestionibus ra-
 116 tio); tum secundo gradu, non potuisse donari a victore ius, quia id demum sit eius, quod teneat; ius, quod sit incorporale, apprehendi manu non posse. Hoc reperire est difficilius quam, cum inveneris, argumentis adiuvere, ut alia sit condicio heredis alia victoris, quia ad illum ius ad
 117 hunc res transeat. Proprium deinde materiae, ius publici crediti transire ad victorem non potuisse, quia, quod populus crediderit, omnibus debeat, et, quamdiu quilibet unus super fuerit, esse eum totius summae creditorem, Thebanos
 118 autem non omnes in Alexandri manu fuisse. Hoc non extrinsecus probatur, quae vis est argumenti, sed ipsum per se valet. Tertii loci pars prior magis vulgaris, non in tabulis esse ius; itaque multis argumentis defendi potest. Mens quoque Alexandri duci debet in dubium, honorari eos an deceperit. Illud iam rursus proprium materiae et velut novae controversiae, quia restitutione recepisse ius, etiamsi quod amiserint, Thebani videntur. Hic et, quid Cassander velit, quaeritur; sed vel potentissima apud Amphictionas aequi tractatio est.
 119 Haec non idcirco dico, quod inutilem horum locorum, ex quibus argumenta ducuntur, cognitionem putem, alioqui nec tradidisset; sed ne se, qui cognoverint ista, si cetera negligant, perfectos protinus atque consummatos putent, et, nisi in ceteris, quae mox praecipienda sunt, elaboraverint,
 120 mutam quandam scientiam consecutos intelligant. Neque enim Artibus editis factum est, ut argumenta inveniremus, sed dicta sunt omnia, antequam praeciperentur, mox ea scriptores observata et collecta ediderunt. Cuius rei probatio est, quod exemplis eorum veteribus utuntur et ab oratoribus illa repetunt, ipsi nullum novum et, quod non sit
 121 dictum, inveniunt. Artifices ergo illi, qui dixerunt; sed habenda his quoque gratia est, per quos labor nobis est de-

tractus. Nam, quae priores beneficio ingenii singula invenerunt, nobis et non sunt requirenda et nota sunt omnia. Sed non magis hoc sat est, quam palaestram didicisse, nisi corpus exercitatione, continentia, cibus, ante omnia natura iuvatur, sicut contra ne illa quidem satis sine arte profuerint. Illud quoque studiosi eloquentiae cogitent, neque omnibus
 122 in causis, quae demonstravimus, cuncta posse reperiri; neque, cum proposita fuerit materia dicendi, scrutanda singula et velut ostiatim pulsanda, ut sciant, an ad probandum id, quod intendimus, forte respondeant, nisi cum discunt et adhuc usu carent. Infinitam enim faciat ipsa res dicendi tar-
 123 ditatem, si semper necesse sit, ut temptantes unumquodque eorum, quod sit aptum atque conveniens experiendo noscamus; nescio, an etiam impedimento futura sint, nisi et animi quaedam ingenita natura et studio exercitata velocitas recta nos ad ea, quae conveniunt causae, ferant. Nam, ut can-
 124 tus vocis plurimum iuvat sociata nervorum concordia; si tamen tardior manus, nisi inspectis demensisque singulis, quibus quaeque vox fidibus iungenda sit, dubitet, potius fuerit esse contentum eo, quod simplex canendi natura tulerit: ita huiusmodi praeceptis debet quidem aptata esse et citharae
 125 modo intenta ratio doctrinae; sed hoc exercitatione multa consequendum, ut, quemadmodum illorum artificum, etiamsi alio spectant, manus tamen ipsa consuetudine ad graves, acutos, medios horum sonos fertur: sic oratoris cognitionem nihil moretur haec varietas argumentorum et copia sed quasi offerat se et occurrat, et, ut litterae syllabaeque scribentium cogitationem non exigunt, sic rationem sponte quadam sequantur.

DE EXEMPLIS.

XI. Tertium genus ex iis, quae extrinsecus adducuntur in causam; Graeci vocant παράδειγμα, quo nomine et generaliter usi sunt in omni similitum appositione et specialiter in iis, quae rerum gestarum auctoritate nituntur. Nostri fere similitudinem vocari maluerunt, quod ab illis παραβολή dicitur, alterum exemplum, quanquam et hoc simile est; illud exemplum. Nos, quo facilius propositum explicemus, 2

utrumque παράδειγμα esse credamus, et ipsi appellemus exemplum. Nec vereor, ne videar repugnare Ciceroni, quanquam collationem separet ab exemplo. Nam idem omnem argumentationem dividit in duas partes, inductionem et ratiocinationem, ut plerique Graecorum in παραδείγματα et επιχειρήματα, dixeruntque παράδειγμα ἡθοικῆν ἐπαγωγὴν. Nam illa, qua plurimum est Socrates usus, hanc habuit viam: cum plura interrogasset, quae fateri adversario necesse esset, novissime id, de quo quaerebatur, inferebat, cui simile concessisset. Id est inductio. Hoc in oratione fieri non potest; sed, quod illic interrogatur, hic fere sumitur. Illa interrogatio talis: *Quod est pomum generosissimum? nonne, quod optimum? concedetur. Quid equus? qui generosissimus? Nonne, qui optimus?* et plura in eundem modum. Deinde, cuius rei gratia rogatum est, *Quid homo? Nonne is generosissimus, qui optimus?* fatendum erit. Hoc in testium interrogatione valet plurimum, in oratione perpetua dissimile est; etenim sibi ipse respondet orator. *Quod pomum generosissimum? puto, quod optimum; et equus? qui velocissimus: ita hominum, non qui claritate nascendi sed qui virtute maxime excellat.*

Omnia igitur ex hoc genere sumpta necesse est aut similia esse aut dissimilia aut contraria. Similitudo assumitur interim et ad orationis ornatum; sed illa, cum res exiget; nunc ea, quae ad probationem pertinent, exequar. Potentissimum autem est inter ea, quae sunt huius generis, quod proprie vocamus Exemplum, id est rei gestae aut ut gestae utilis ad persuadendum id, quod intenderis, commemoratio. Intuendum igitur est, totum simile sit an ex parte, ut aut omnia ex eo sumamus aut quae utilia sunt. Simile est, *Iure occisus est Saturninus sicut Gracchi.* Dissimile, *Brutus occidit liberos proditorem molientes; Manlius virtutem filii morte multavit.* Contrarium, *Marcellus ornamenta Syracusanis hostibus restituit; Verres iisdem sociis abstulit.* Et probandorum et culpandorum ex his confirmatio eisdem gradus habet. Etiam in iis, quae futura dicemus, utilis similitum admonitio est, ut si quis dicens, Dionysium idcirco petere custodes salutis suae, ut, eorum

adiutus armis tyrannidem occupet, hoc referat exemplum, eadem ratione Pisistratum ad dominationem pervenisse.

Sed ut sunt exempla interim tota similia ut hoc proximum: sic interim ex maioribus ad minora, ex minoribus ad maiora ducuntur. *Urbes violata propter matrimonia ever-sae sunt; quid fieri adultero par est? Tibicines, cum ab urbe discessissent, publice revocati sunt; quanto magis principes civitatis viri et bene de republica meriti, cum invidiae cesserint, ab exilio reducendi?* Ad exhortationem vero praecipue valent imparia. Laudabilior in femina quam in viro virtus. Quare, si ad fortiter faciendum accendatur aliquis, non tantum afferent momenti Horatius et Torquatus quantum illa mulier, cuius manu Pyrrhus est interfectus; et ad moriendum non tam Cato et Scipio quam Lucretia: quod ipsum est ex maioribus ad minora. Singula igitur horum generum ex Cicerone (nam unde potius?) exempla ponamus. Simile est hoc pro Murena, *Etenim mihi ipsi accidit, ut cum duobus patriciis, altero improbissimo altero modestissimo atque optimo viro, peterem; superavi tamen dignitate Catilinam, gratia Galbam.* Maius minoris, pro Milone, *Negant, intueri lucem esse fas ei, qui a se hominem occisum esse fateatur. In qua tandem urbe hoc homines stultissimi disputant? nempe in ea, quae primum iudicium de capite vidit M. Horatii, fortissimi viri, qui nondum libera civitate tamen populi Romani comitiis liberatus est, cum sua manu sororem esse interfectam fateretur. Minus maioris: Occidi, non Spurium Maelium, qui annona le- vanda iacturisque rei familiaris, quia nimis amplecti ple- bem videbatur, in suspicionem incidit regni affectandi, etc. deinde, Sed eum (auderet enim dicere, cum patriam peri- culo liberasset) cuius nefandum adulterium in pulcina- ribus, et totus in Clodium locus. Dissimile plures causas* habet, fit enim genere, modo, tempore, loco ceterisque, per quae fere omnia Cicero praeiudicia, quae de Cluentio vide- bantur facta, subvertit; contrario vero exemplo censoriam notam laudando censorem Africanum, qui eum, quem peie- rasse conceptis verbis palam dixisset, testimonium etiam pol- licitus, si quis contra diceret, nullo accusante, traducere

equum passus esset; quae, quia erant longiora, non suis
14 verbis exposui. Breve autem apud Vergilium contrarii exemplum est:

*At non ille, satum quo te mentiris, Achilles
Talis in hoste fuit Priamo.*

- 15 Quaedam autem ex iis, quae gesta sunt, tota narrabimus, ut Cicero pro Milone: *Pudicitiam cum eriperet militi tribunus militaris in exercitu C. Marii, propinquus eius imperatoris, interfectus ab eo est, cui vim afferebat. Facere enim probus adolescens periculose, quam perpeti turpiter maluit; atque hunc ille summus vir scelere solutum periculo liberavit.* Quaedam significare satis erit, ut idem ac pro eodem: *Neque enim posset Ahala ille Servilius aut P. Nasica aut L. Opimius aut me consule senatus non nefarius haberi, si sceleratos interfici nefas esset.* Haec ita dicentur, prout nota erunt, vel utilitas causae aut decor postulabit.
- 17 Eadem ratio est eorum, quae ex poeticis fabulis ducuntur, nisi quod iis minus affirmationis adhibetur; cuius usus qualis esse deberet, idem optimus auctor ac magister
18 eloquentiae ostendit. Nam huius quoque generis in eadem oratione reperietur exemplum: *Itaque hoc, iudices, non sine causa etiam fictis fabulis doctissimi homines memoriae prodiderunt, eum, qui patris ulciscendi causa matrem necavisset, variatis hominum sententiis, non solum divina
19 sed sapientissimae deae sententia liberatum.* Illae quoque fabellae, quae, etiamsi originem non ab Aesopo acceperunt, (nam videtur earum primus auctor Hesiodus) nomine tamen Aesopi maxime celebrantur, ducere animos solent praecipue rusticorum et imperitorum, qui et simplicius, quae ficta sunt, audiunt, et capti voluptate facile iis, quibus delectantur, consentiunt. Siquidem et Menenius Agrippa plebem cum patribus in gratiam traditur reduxisse nota illa de membris humanis adversus ventrem discordantibus fabula. Et Horatius
20 ne in poemate quidem humilem generis huius usum putavit in illis versibus, *Quod dixit vulpes aegroto cauta leoni. Αἴνον* Graeci vocant et αἰσωπίονος, ut dixi, λόγους et λιβυζοῦς; nostrorum quidam, non sane recepto in usum nomine,

apologationem. Cui confine est παραβολὰς genus illud, 21 quod est velut fabella brevior et per allegoriam accipitur: *Non nostrum, inquit, onus; bos clitellas.*

Proximas exempli vires habet similitudo, praecipue 22 illa, quae ducitur citra ullam translationum mixturam ex rebus paene paribus: *Ut, qui accipere in Campo consue- runt, iis candidatis, quorum nummos suppressos esse putant, inimicissimi solent esse: sic eiusmodi iudices infestum reo venerunt.* Nam παραβολή, quam Cicero col-
23 lationem vocat, longius res quae comparentur repetere solet. Neque hominum modo inter se opera similia spectantur, ut Cicero pro Murena facit: *Quodsi e portu solventibus, qui iam in portum ex alto invehuntur, praedicere summo studio solent et tempestatum rationem et praedonum et locorum; quod natura affert, ut iis faveamus, qui eadem pericula, quibus nos perfuncti sumus, ingrediantur: quo me tandem ammo esse oportet, prope iam ex magna iactatione terram videntem, in hunc, cui video maximas tempestates esse subeundas?* sed et a mutis atque etiam
24 inanimis interim huiusmodi ducitur. Et quoniam similitum alia facies in alia ratione: admonendum est, rarius esse in oratione illud genus, quod εἰκόνα Graeci vocant, (quo exprimitur rerum aut personarum imago, ut Cassius: *Quis istam faciem lanipedis senis torquens?*) quam id, quo probabilius fit, quod intendimus: ut, si animum dicas excolendum, similitudine utaris terrae, quae neglecta spinas ac dumos, culta fructus creat; aut si ad curam rei publicae hor-
25 teris, ostendas, apes etiam formicasque, non modo muta sed etiam parva animalia, in commune tamen laborare. Ex hoc genere dictum illud est Ciceronis: *Ut corpora nostra sine mente ita civitas sine lege suis partibus, ut nervis ac sanguine et membris, uli non potest.* Sed ut hac corporis humani pro Cluentio ita pro Cornelio equorum, pro Archia saxorum quoque usus est similitudine. Illa (ut dixi) pro-
26 piora: *ut remiges sine gubernatore sic milites sine imperatore nihil valere.* Solent tamen fallere similitudinum species, ideoque adhibendum est his iudicium. Neque enim ut navis utilior nova quam vetus sic amicitia; vel, ut laudanda, quae

pecuniam suam pluribus largitur, ita, quae formam. Verba sunt in his similia *vetustatis et largitionis*, vis quidem longe diversa [*pecuniae et amicitiae*]. Itaque in hoc genere maxime quaeritur, an simile sit, quod infertur. Etiam in illis interrogationibus Socratis, quarum paulo ante feci mentionem, cavendum, ne incaute respondeas; ut apud Aeschinen Socraticum male respondit Aspasiae Xenophontis uxor, quod Cicero his verbis transfert: *Dic mihi, quaeso, Xenophontis uxor, si vicina tua melius habeat aurum, quam tu habes: utrumne illius an tuum malis? Illius, inquit. Quid si vestem et ceterum ornatum muliebrem pretii maioris habeat, quam tu habes: tuumne an illius malis? Illius vero, respondit. At cedo, inquit, si virum illa meliorem habeat, quam tu habes: utrumne tuum virum malis an illius?* Hic mulier erubuit, merito; male enim responderat, se malle alienum aurum quam suum; nam est id improbum. At, si respondisset, malle se aurum suum tale esse, quale illud esset, potuisset pudice respondere, malle se virum suum talem esse, qualis melior esset.

30 Scio quosdam inani diligentia per minutissimas ista partes secuisse, et esse aliquid minus simile, ut simia homini et marmora deformata prima manu, aliquid plus, ut illud, *Non ovum tam simile ovo*; et dissimilibus inesse simile, ut formicae et elephanto genus, quia sunt animalia; et similibus dissimile, ut — *Canibus catulos et matribus hoedos*, differunt enim aetate; contrariorum quoque aliter accipi opposita, ut noctem luci, aliter noxia, ut aquam frigidam febre, aliter repugnantia, ut verum falso, aliter disparata, ut dura non duris; sed, quid haec ad praesens propositum magnopere pertineant, non reperio.

32 Illud est annotandum magis, argumenta duci ex iure simili: ut Cicero in Topicis, *Ei, cui domus usus fructus relictus sit, non restitutum heredem, si corruerit, quia non restituat servum, si is decesserit*; ex contrario: *Nihil obstat, quo minus iustum matrimonium sit mente coeuntium, etiamsi tabulae signatae non fuerint. Nihil enim proderit signasse tabulas, si mentem matrimonii non fuisse constabit*; ex dissimili, quale est Ciceronis pro Caecina: *Ut, si*

qui me exire domo coegisset armis, haberem actionem; si qui introire prohibuisset, non haberem? Dissimilia sic deprehenduntur, *Non, si, qui argentum omne legavit, videri potest signalam quoque pecuniam reliquisse: ideo etiam, quod est in nominibus, dari voluisse creditur.*

Ἀναλογίαν quidam a simili separaverunt, nos eam subiectam huic generi putamus. Nam, ut unum ad decem ita decem ad centum, simile certe est; et, ut hostis sic malus civis. Quamquam haec ulterius quoque procedere solent: *si turpis dominae consuetudo cum servo, turpis domino cum ancilla; si mutis animalibus finis voluptas, idem homini.* Cui rei facillime occurrit ex dissimilibus argumentatio: *Non idem est dominum cum ancilla coisse, quod dominam cum servo; nec, si mutis finis voluptas, rationalibus quoque; quin immo ex contrario: Quia mutis ideo non rationalibus.*

Adhibebitur extrinsecus in causam et auctoritas. Haec secuti Graecos, a quibus *ῥητορικῶς* dicuntur, iudicia aut iudicationes vocant, non de quibus ex causa dicta sententia est, (nam ea quidem in exemplorum locum cedunt) sed si quid ita visum gentibus, populis, sapientibus viris, claris civibus, illustribus poetis referri potest. Ne haec quidem vulgo dicta et recepta persuasionem populari sine usu fuerint. Testimonia sunt enim quodammodo vel potentiora etiam, quod non causis accommodata sed liberis odio et gratia mentibus ideo tantum dicta factaque, quia aut honestissima aut verissima videbantur. An vero me de incommodis vitae disserentem non adiuvabit earum persuasio nationum, quae fletibus natos, laetitia defunctos prosequuntur? Aut si misericordiam commendabo iudici, nihil proderit, quod prudentissima civitas Atheniensium non eam pro affectu sed pro numine accepit? Iam illa septem praecepta sapientium nonne quasdam vitae leges existimamus? Si causam veneficii dicat adultera: non M. Catonis iudicio damnata videatur, qui nullam adulteram non eandem esse veneficam dixit? Iam sententiis quidem poetarum non orationes modo sunt refertae sed libri etiam philosophorum, qui quamquam inferiora omnia praeceptis suis ac litteris credunt, repetere tamen auctoritatem a

40 plurimis versibus non fastidierunt. Neque est ignobile exemplum, Megarios ab Atheniensibus, cum de Salamine contenderent, victos Homeri versu, qui tamen ipse non in omni editione reperitur, significans, Aiace[m] naves suas Atheniensibus iunxisse. Ea quoque, quae vulgo recepta sunt, hoc ipso, quod incertum auctorem habent, velut omnium fiunt: quale est, *Ubi amici, ibi opes*; et, *Conscientia mille testes*; et apud Ciceronem, *Pares autem (ut est in velere proverbio) cum paribus maxime congregantur*; neque enim durassent haec in aeternum, nisi vera omnibus viderentur. Ponitur a quibusdam et quidem in parte prima deorum auctoritas, quae est ex responsis, ut, *Socraten esse sapientissimum*. Id rarum est non sine usu tamen. Utitur eo Cicero in libro de aruspicum responsis et in contione contra Catilinam, cum signum Iovis columnae impositum populo ostendit; et pro Ligario, cum causam C. Caesaris meliorem, quia hoc dii iudicaverint, confitetur. Quae cum propria causae sunt, divina testimonia vocantur; cum aliunde arcessuntur, argumenta. Nonnunquam contingit iudicis quoque aut adversarii aut eius, qui ex diverso agit, dictum aliquid aut factum assumere ad eorum, quae intendimus, fidem.

Propter quod fuerunt, qui exempla et has auctoritates inartificialium probationum esse arbitrarentur, quod ea non inveniret orator sed acciperet. Plurimum autem refert. Nam testis et quaestio et his similia de ipsa re, quae in iudicio est, pronuntiant; extra petita, nisi ad aliquam praesentis disceptationis utilitatem ingenio applicantur, nihil per se valent.

DE USU ARGUMENTORUM.

XII. Haec fere de probatione vel ab aliis tradita vel usu percepta in hoc tempus sciebam. Neque mihi fiducia est, ut ea sola esse contendam, quin immo hortor ad quaerendum et inveniri posse fateor; quae tamen adiecta fuerint, non multum ab his abhorrebunt. Nunc breviter, quemadmodum sit utendum eis, subiungam. Traditum fere est, argumentum oportere esse confessum; dubiis enim probari dubia qui possunt? Quaedam tamen, quae in alterius rei probationem ducimus, ipsa probanda sunt. *Occidisti virum,*

eras enim adultera. Prius de adulterio convincendum est, ut, cum id coeperit esse pro certo, fiat incerti argumentum. *Spiculum tuum in corpore occisi inventum est*; negat suum; ut probationi prosit, probandum est. Illud hoc loco monere inter necessaria est, nulla esse firmiora, quam quae ex dubiis facta sunt certa. *Caedes a te commissa est, cruentam enim vestem habuisti*; non est tam grave argumentum, si fatetur quam si convincitur. Nam si fatetur, multis ex causis potuit cruenta esse vestis; si negat, hic causae cardinem ponit, in quo si victus fuerit, etiam in sequentibus ruit. Non enim videtur in negando mentiturus fuisse, nisi desperasset, id posse defendi, si confiteretur.

Firmissimis argumentorum singulis instandum, infirmiora 4 congreganda sunt; quia illa per se fortia non oportet circumstantibus obscurare, ut, qualia sunt, appareant, haec imbecilla natura mutuo auxilio sustinentur. Itaque si non possunt valere, quia magna sint, valebunt, quia multa sunt; utique vero ad eiusdem rei probationem omnia spectant. Ut, si quis hereditatis gratia hominem occidisse dicatur: *Hereditatem sperabas et magnam hereditatem, et pauper eras et tum maxime a creditoribus appellaberis; et offenderas eum, cuius eras heres, et mulaturum tabulas sciebas.* Singula levia sunt et communia, universa vero valent etiam si non ut fulmine tamen ut grandine.

Quaedam argumenta ponere satis non est, adiuvanda 6 sunt: *cupiditas causa sceleris fuit*, quae sit vis eius; *ira*, quantum efficiat in animis hominum talis affectio; ita et firmiora erunt ipsa et plus habebunt decoris, si non nudos et velut carne spoliatos artus ostenderint. Multum etiam refert, 7 si argumento nitentur odii, utrum hoc ex invidia sit an ex iniuria an ex ambitu, vetus an novum, adversus inferiorem, parem, superiorem, alienum, propinquum. Suos habent omnia ista tractatus et ad utilitatem partis eius, quam tuemur, referenda sunt. Nec tamen omnibus semper, quae in 8 venerimus, argumentis onerandus est iudex, quia et taedium afferunt et fidem detrahunt. Neque enim potest iudex credere satis esse ea potentia, quae non putamus ipsi sufficere qui diximus. In rebus vero apertis argumentari

tam sit stultum quam in clarissimum solem mortale lumen inferre.

- 9 His quidam probationes adiciunt, quas *παθητικὰς* vocant, ductas ex affectibus. Atque Aristoteles quidem potentissimum putat ex eo, qui dicit, si sit vir bonus; quod ut optimum est: ita longe quidem sed sequitur tamen, 10 videri. Inde enim illa nobilis Scauri defensio: *Q. Varius Sucionensis ait Aemilium Scaurum rem publicam populi Romani prodidisse; Aemilius Scaurus negat.* Cui simile quiddam fecisse Iphicrates dicitur, qui cum Aristophontem, quo accusante similis criminis reus erat, interrogasset, an is accepta pecunia rem publicam proditurus esset;isque id 11 negasset: *Quod dicis, inquit, te non fecisse, ego feci?* Intuendum autem et, qui sit, apud quem dicimus, et id, quod illi maxime probabile videatur, requirendum; qua de re locuti sumus et prooemii et suasoriae praeceptis. Altera ex 12 affirmatione probatio est: *Ego hoc feci; Tu mihi hoc dixisti; et O facinus indignum!* et similia; quae non debent quidem deesse orationi et, si desunt, multum nocent; non tamen habenda sunt inter magna praesidia, cum hoc in 13 eadem causa fieri ex utraque parte similiter possit. Illae firmiores ex sua cuique persona probationes, quae credibilem rationem subiectam habeant: ut vulneratus aut filio orbatus non fuerit alium accusaturus quam nocentem, quando, si negotium innocenti facit, liberet eum noxa, qui admiserit. Hinc et patres adversus liberos et adversus suos quisque 14 necessarios auctoritatem petunt.
- 14 Quaesitum etiam, potentissima argumenta primone ponenda sint loco, ut occupent animos, an summo, ut inde dimittant, an partita primo summoque, quod Homericam dispositione in medio sint infirma, ut animis crescant? Quae, prout ratio causae cuiusque postulabit, ordinabuntur, uno, ut ego censeo, excepto, ne a potentissimis ad levissima decrescat oratio.
- 15 Ego haec breviter demonstrasse contentus ita posui, ut locos ipsos et genera quam possem apertissime ostenderem. Quidam executi sunt verbosius, quibus placuit, proposita locorum communium materia, quo quaeque res modo

dici posset, ostendere; sed mihi supervacuum videbatur. Nam et fere apparet, quid in iniuriam, quid in avaritiam, 16 quid in testem inimicum, quid pro teste amico dicendum sit; et de omnibus his omnia dicere infinitum est, tam hercule quam si controversiarum, quae sint quaeque futurae sint, quaestiones, argumenta, sententias tradere velim. Ipsas 17 autem argumentorum velut sedes non me quidem omnes ostendisse confido, plurimas tamen.

Quod eo diligentius faciendum fuit, quia declamationes, quibus ad pugnam forensem velut praepilatis exerceri solebamus, olim iam ab illa vera imagine orandi recesserunt atque ad solam compositae voluptatem nervis carent, non alio 18 medius fidius vitio dicentium, quam quo mancipiorum negotiatores formae puerorum virilitate excisa lenocinantur. Nam ut illi robur ac lacertos barbamque ante omnia et alia, quae natura proprie maribus dedit, parum existimant decora, quaeque fortia, si liceret, forent ut dura molliunt: ita nos habitum ipsum orationis virilem et illam vim stricte robusteque dicendi tenera quadam elocutionis cute operimus, et, dum levia sint ac nitida, quantum valeant, nihil interesse 19 arbitramur. Sed mihi naturam intuenti nemo non vir donec formosior erit, nec tam aversa unquam videbitur ab opere suo providentia, ut debilitas inter optima inventa sit, nec id ferro speciosum fieri putabo, quod, si nasceretur, monstrum erat. Libidinem iuvat ipsum effeminati sexus mendacium, nunquam tamen hoc continget malis moribus regnum, ut, si qua pretiosa fecit, fecerit et bona. Quapropter 20 eloquentiam, licet hanc (ut sentio enim, dicam) libidinosam resupina voluptate auditoria probent, nullam esse existimabo, quae ne minimum quidem in se indicium masculi et incorrupti, ne dicam gravis et sancti viri, ostendet. An vero statuarum 21 artifices pictoresque clarissimi, cum corpora quam speciosissima fingendo pingendove efficere cuperent, nunquam in hunc inciderunt errorem, ut Bagoam aut Megabyzum aliquem in exemplum operis sumerent sibi sed Doryphoron illum aptum vel militiae vel palaestrae, aliorum quoque iuvenum bellicosorum et athletarum corpora decora vere existimaverunt: nos, qui oratorem studemus effingere, non arma sed

22 tympana eloquentiae demus? Igitur et ille, quem institui-
mus, adolescens, quam maxime potest, componat se ad imi-
tationem veritatis, initurusque frequenter forensium certami-
num pugnam iam in schola victoriam spectet et ferire vitalia
ac tueri sciat; et praeceptor id maxime exigat, inventum
praecepitque probet. Nam, ut ad peiora iuvenes laude ducun-
23 tur, ita laudari in bonis gaudent. Nunc illud male est, quod
necessaria plerumque silentio transeunt, nec in dicendo vi-
detur inter bona utilitas. Sed haec et in alio nobis tractata
sunt opere et in hoc saepe repetenda. Nunc ad ordinem in-
ceptum.

DE REFUTATIONE.

XIII. Refutatio dupliciter accipi potest. Nam et
pars defensoris tota est posita in refutatione, et, quae dicta
sunt ex diverso, debent utrinque dissolvi. Et hoc est pro-
prie, cui in causis quartus assignatur locus. Sed utriusque
similis condicio est. Neque vero ex aliis locis ratio argu-
mentorum in hac parte peti potest quam in confirmatione,
nec locorum aut sententiarum aut verborum et figurarum alia
2 condicio est. Affectus plerumque haec pars mitiores habet.

Non sine causa tamen difficilius semper est creditum,
quod Cicero saepe testatur, defendere quam accusare. Pri-
mum, quod est res illa simplicior, proponitur enim uno mo-
do, dissolvitur varie; cum accusatori satis sit plerumque,
verum esse id, quod obiecerit: patronus neget, defendat,
transferat, excuset, deprecetur, molliat, minuatur, avertat, de-
spiciat, derideat. Quare inde recta fere atque, ut sic di-
3 rantur. Tum accusator praemeditata pleraque domo affert,
patronus etiam inopinatis frequenter occurrit. Accusator dat
testem, patronus ex re ipsa refellit. Accusator criminum in-
vidia, vel si falsa sint, materiam dicendi trahit, de parricidio,
sacrilegio, maiestate; quae patrono tantum neganda sunt.
Ideoque accusationibus etiam mediocres in dicendo suffe-
cerunt; bonus defensor nemo nisi qui eloquentissimus fuit.
Quaquam ut, quod sentio, semel finiam, tanto est accusare
quam defendere, quanto facere quam sanare vulnera, facilius.

Plurimum autem refert, et quid protulerit adversarius 4
et quomodo. Primum igitur intuentum est, id, cui respon-
suri sumus, proprium sit eius iudicii an ad causam extra ar-
cessitum. Nam si est proprium: aut negandum aut defen-
dendum aut transferendum; extra haec in iudiciis fere nihil
est. Deprecatio quidem, quae est sine ulla specie defensio- 5
nis, rara admodum et apud eos solos iudices, qui nulla certa
pronuntiandi forma tenentur. Quaquam illae quoque apud
C. Caesarem et Triumviros pro diversarum partium homini-
bus actiones, etiamsi precibus utuntur, adhibent tamen patro-
cinia; nisi hoc non fortissime defendentis est, dicere, *Quid*
aliud egimus, Tubero, nisi ut, quod hic potest, nos posse-
mus? Quodsi quando apud Principem aliumve, cui, utrum 6
velit, liceat, dicendum erit, *dignum quidem morte eum, pro*
quo loquemur, clementi tamen servandum esse vel talem:
primum omnium non erit res nobis cum adversario sed cum
iudice, deinde forma deliberativae magis materiae quam iu-
dicialis utemur. Suadebimus enim, ut laudem humanitatis
potius quam voluptatem ultionis concupiscat. Apud iudices 7
quidem secundum legem dicturos sententiam de confessis
praecipere ridiculum est. Ergo, quae neque negari neque
transferri possunt, utique defendenda sunt, qualiacunque
sunt, aut causa cedendum. Negandi duplicem ostendimus
formam, aut non esse factum aut non hoc esse, quod factum
sit. Quae neque defendi neque transferri possunt, utique
neganda, nec solum si finitio potest esse pro nobis, sed
etiam si nuda infitatio superest. Testes erunt: multa in eos 8
dicere licet; chirographum: de similitudine litterarum dis-
seremus. Utique nihil erit peius quam confessio. Ultima
est actionis controversia, cum defendendi negandive non est
locus, id est translatio. Atqui quaedam sunt, quae neque 9
negari neque defendi neque transferri possunt. *Adulterii*
rea est, quae, cum anno vidua fuisset, enixa est; his non
erit. Quare illud stultissime praecipitur, quod defendi non
possit, silentio dissimulandum; siquidem est id, de quo iudex
pronuntiaturus est. At si extra causam sit adductum et 10
tantum coniunctum: malim quidem dicere, nihil id ad quae-
stionem nec esse in his morandum et minus esse, quam ad-

versarius dicat; tamen velut huic simulationi oblivionis ignosciam. Debet enim bonus advocatus pro rei salute brevem negligentiae reprehensionem non pertimescere.

- 11 Videndum etiam, simul nobis plura aggredienda sint an amolienda singula. Plura simul invadimus, si aut tam infirma sunt, ut pariter impelli possint, aut tam molesta, ut pedem conferre cum singulis non expediat; tum enim toto corpore obnitendum et, ut sic dixerim, directa fronte pugnandum est. Interim, si resolvere ex parte diversa dicta difficilius erit, nostra argumenta cum adversariorum argumentis conferemus, si modo haec ut valentiora videantur effici poterit. Quae vero turba valebunt, diducenda erunt, ut, quod paulo ante dixi: *Heres eras et pauper et magna pecunia appellabaris a creditoribus et offenderas et mutaturum tabulas testamenti sciebas*. Urent universa. At si singula quaeque dissolveris, iam illa flamma, quae magna congerie convaluerat, diductis quibus alebatur, concidet, ut, si vel maxima flumina in rivis diducantur, qualibet transitum praebent. Itaque propositio quoque secundum hanc utilitatem accommodabitur, ut nunc singula ostendamus nunc complectamur universa. Nam interim quod pluribus collegit adversarius, sat est semel proponere; ut, si multas causas faciendi, quibus arguit reum, dicet accusator fuisse: nos, non enumeratis singulis, semel hoc intuendum negemus, quia non, quisquis causam faciendi sceleris habuit, et fecerit.
- 15 Saepius tamen accusatori congerere argumenta, reo dissolvere expediet.

Id autem, quod erit ab adversario dictum, quomodo refutari debeat, intuendum est. Nam si erit palam falsum, negare satis est, ut pro Cluentio Cicero eum, quem dixerat accusator epoto poculo concidisse, negat eodem die mortuum.

- 16 Palam etiam contraria et supervacua et stulta reprehendere nullius est artis, ideoque nec rationes eorum nec exempla tradere necesse est. Id quoque, (quod *obscurum* vocant) quod secreto et sine teste aut argumento dicitur factum, satis natura sua infirmum est; sufficit enim, quod adversarius non probat; item si ad causam non pertinet. Est tamen oratoris interim efficere, ut quid aut contrarium esse aut a

causa diversum aut incredibile aut supervacuum aut nostrae potius causae videatur esse coniunctum. Obiicitur Oppio, quod de militum cibariis detraxerit; asperum crimen; sed id contrarium ostendit Cicero, quia iidem accusatores obiecerint Oppio, quod is voluerit exercitum largiendo corrumpere. Testes in Cornelium accusator lecti a tribuno codicis pollicentur; facit hoc Cicero supervacuum, quia ipse fateatur. Petit accusationem in Verrem Q. Caecilius, quod fuerat quaestor eius; ipsum Cicero ut pro se videretur, effecit. Cetera, quae proponuntur, communes locos habent. Aut enim coniectura excutiuntur, an vera sint; aut finitione, an propria; aut qualitate, an inhonesta, iniqua, improba, inhumana, crudelia et cetera, quae ei generi accidunt. Eaque non modo in propositionibus sed in toto genere actionis intuenda: An sit crudelis, ut Labieni in Rabirium lege perduellionis; inhumana, ut Tuberonis Ligarium exulem accusantis atque id agentis, ne ei Caesar ignoscat; superba, ut in Oppium ex epistola Cottae reum factum. Proinde praecipites, insidiosae, impotentes deprehenduntur. Ex quibus tamen fortissime invaseris, quod est aut omnibus periculosum, ut dicit Cicero pro Tullio: *Quis hoc statuit unquam, aut cui concedi sine summo omnium periculo potest, ut eum iure potuerit occidere, a quo metuisse se dicat, ne ipse posterius occideretur?* aut ipsis iudicibus, ut pro Oppio monet pluribus, ne illud actionis genus in equestrem ordinem admittant. Nonnunquam tamen quaedam bene et contentumuntur vel tanquam levia vel tanquam nihil ad causam pertinentia. Multis hoc locis fecit Cicero; et haec simulatio interim hucusque procedit, ut, quae dicendo refutare non possumus, quasi fastidiendo calcemus.

Quoniam vero maxima pars eorum similibus constat: rimandum erit diligentissime, quid sit in quoque, quod assumitur, dissimile. In iure facile deprehenditur. Est enim scriptum de rebus utique diversis, tantoque magis ipsarum rerum differentia potest esse manifesta. Illas vero similitudines, quae ducuntur ex mutis animalibus aut inanimis, facile est eludere. Exempla rerum varie tractanda sunt, si nocebunt; quae si vetera erunt, fabulosa dicere licebit; si

indubia, maxime quidem dissimilia. Neque enim fieri potest, ut paria sint omnia, ut si Nasica post occisum Gracchum defendatur exemplo Ahalae, a quo Maelius est interfectus, *Maelium regni affectatorem fuisse, a Graccho leges modo latas esse populares; Ahalam magistrum equitum fuisse, Nasicam privatam esse*, dicatur. Si defecerint omnia: videndum erit, an obtineri possit, ne illud quidem recte factum. Quod de exemplis idem etiam de iudicatis observandum.

25 Quod autem posui, referre, quo quidque accusator modo dixerit, huc pertinet, ut, si est minus efficaciter elocutus, ipsa eius verba ponantur; si acri et vehementi fuerit usus oratione, eandem rem nostris verbis mitioribus proferamus, 26 ut Cicero de Cornelio, *Codicem attigit*; et protinus cum quadam defensione, ut, si pro luxurioso dicendum sit, *Obiecta est paulo liberalior vita*. Sic et pro sordido parcum, 27 pro maledico liberum dicere licebit. Utique committendum nunquam est, ut adversariorum dicta cum sua confirmatione referamus, aut etiam loci alicuius executione adiuvemus, nisi cum eludenda erunt: *Apud exercitum mihi fueris, inquit; tot annis forum non attigeris; abfueris tamdiu; et, cum tam longo intervallo veneris, cum his, qui in foro habitant,* 28 *de dignitate contendas?* Praeterea in contradictione interim totum crimen exponitur, ut Cicero pro Scauro circa Bostarem facit veluti orationem diversae partis imitatus, aut pluribus propositionibus iunctis, ut pro Vareno, *cum iter per agros et loca sola faceret cum Pompuleno, in familiam Anchariam incidisse dixerunt, deinde Pompulenum occisum esse, illico Varenum vinctum asservatum, dum hic ostenderet, quid de eo fieri vellet*. Quod est utique faciendum, si erit incredibilis rei ordo et ipsa expositione fidem perditurus. Interim per partes dissolvitur, quod contextu nocet; et plerumque id est tutius. Quaedam contradictiones natura sunt singulae; id exemplis non eget.

29 Communia bene apprehenduntur non tantum, quia utriusque sunt partis, sed quia plus prosunt respondentis. Neque enim pigebit, quod saepe monui, referre; commune 30 qui prior dicit, contrarium facit. Est enim contrarium, quo

adversarius bene uti potest: *At enim non verisimile est, tantum scelus M. Cottam esse commentum. Quid? hoc verisimile est, tantum scelus Oppium esse conatum?* Artificis autem est, invenire in actione adversarii, quae contra semetipsa pugnent aut pugnare videantur, quae aliquando ex rebus ipsis manifesta sunt, ut in causa Caecilia Clodia aurum se Caelio commodasse dicit, quod signum magnae familiaritatis est; venenum sibi paratum, quod summi odii argumentum est. Tubero Ligarium accusat, quod is in 31 Africa fuerit, et quaeritur, quod ab eo ipse in Africam non sit admissus. Aliquando vero praebet eius rei occasionem minus considerata ex adverso dicentis oratio; quod accidit praecipue cupidis sententiarum, ut ducti occasione dicendi non respiciant, quid dixerint, dum locum praesentem non totam causam intuentur. Quid tam videri potest contra 32 Cluentium quam censoria nota? Quid tam contra eundem, quam filium ab Egnatio corrupti iudicii, quo Cluentius Oppianicum circumvenisset, crimine exheredatum? At haec 33 Cicero pugnare invicem ostendit: *Sed tu, Atti, consideres, censeo, diligenter, utrum censorium iudicium grave velis esse an Egnatii. Si Egnatii: leve est, quod censores de ceteris subscripserunt. Ipsum enim Egnatium, quem tu gravem esse vis, ex senatu eiecerunt. Sin autem censorium: hunc Egnatium, quem pater censoria subscriptione exheredavit, censores in senatu, cum patrem eiecissent, retinuerunt*. Illa magis vitiose dicuntur quam acute repre- 34 henduntur, argumentum dubium pro necessario, controversum pro confesso, commune pluribus pro proprio, vulgare, supervacuum, serius constitutum, contra fidem. Nam et illa accidunt parum cautis, ut crimen augeant, quod probandum est; de facto disputent, cum de auctore quaeratur; impossibilia aggrediantur, pro effectis relinquunt vixdum inchoata, de homine dicere quam de causa malint; hominum vitia re- 35 bus assignent, ut, si quis decemviratum accuset non Appium; manifestis repugnent; dicant, quod aliter accipi possit; summam quaestionis non intueantur, non ad proposita respondeant; quod unum aliquando recipi potest, cum mala causa adhibitis extrinsecus remediis tuenda est, ut cum pe-

culatus reus Verres fortiter et industrie tuitus contra piratas Siciliam dicitur.

36 Eadem adversus contradictiones nobis oppositas praecepta sunt, hoc tamen amplius, quod circa eas multi duobus vitiis diversis laborant. Nam quidam etiam in foro tanquam rem molestam et odiosam praetereunt, et iis plerumque, quae composita domo attulerunt, contenti sine adversario dicunt; et scilicet multo magis in scholis, in quibus non solum contradictiones omittuntur, verum etiam materiae ipsae sic plerumque finguntur, ut nihil dici pro parte altera
37 possit. Alii diligentia lapsi verbis etiam vel sententiolis omnibus respondendum putant, quod est et infinitum et supervacuum; non enim causa reprehenditur sed actor, quem ego semper videri malim disertum, ut, si dixerit quod rei prosit, ingenii credatur laus esse non causae; si forte quod
38 laedat, causae non ingenii culpa. Itaque illae reprehensiones aut obscuritatis, qualis in Rullum est, aut infantiae in dicendo, qualis in Pisonem, aut inscitiae rerum verborumque et insulsi-
39 visis facere volueris, odium. Alia respondendi patronis ratio; et aliquando tamen eorum non oratio modo sed vita etiam, vultus denique, incessus, habitus recte incusari solet; ut adversus Quintium Cicero non haec solum sed ipsam etiam praetextam demissam ad talos insectatus est. Pres-
40 serat enim turbulentis contionibus Cluentium Quintius. Nunquam elevandae invidiae gratia, quae asperius dicta sunt, eluduntur, ut a Cicerone Triarius. Nam cum Scauri columnas per urbem plaustris vectas esse dixit, *Ego porro, inquit, qui Albanas habeo columnas, citellis eas apportavi.* Et magis hoc in accusatores concessum est, quibus convi-
41 ciari aliquando patrocinii fides cogit. Illa vero adversus omnes et recepta et non inhumana conquestio, si callide
42 quid acuisse, breviassse, obscurasse distulisse dicuntur. Defensionis quoque permutatio reprehenditur saepe, ut Attius adversus Cluentium, Aeschines adversus Ctesiphontem facit, cum ille Ciceronem lege usurum modo, hic minime de lege dicturum Demosthenem queritur.

Declamatores vero inprimis sunt admonendi, ne contradictiones eas ponant, quibus facillime responderi possit, neu sibi stultum adversarium fingant. Facimus autem, quod maxime uberes loci popularesque sententiae nascuntur, materiam dicendi nobis, quod volumus, ducentibus, ut non sit ille inutilis versus:

Non male respondit, male enim prior ille rogarat.

Fallet haec nos in foro consuetudo, ubi adversario, non ipsi
43 nobis respondebimus. Aiunt Attium interrogatum, cur causas non ageret, cum apud eum in tragoediis tanta vis esset optime respondendi, hanc reddidisse rationem, quod illic ea dicerentur, quae ipse vellet, in foro dicturi adversarii essent, quae minime vellet. Ridiculum est ergo in exercitationibus,
44 quae foro praeparantur, prius cogitare, quid responderi quam quid ex diverso dici possit. Et bonus praeceptor non minus laudare discipulum debet, si quid pro diversa quam si quid pro sua parte acriter excogitavit. Rursus aliud in scho-
45 lis permittendum semper, in foro rarum. Nam loco a petitore primo contradictione uti qui possumus, ubi vera res agitur, cum adversarius adhuc nihil dixerit? Incidunt tamen
46 plerique in hoc vitium vel consuetudine declamatoria vel etiam cupiditate dicendi, dantque de se respondentibus venustissimos lusus, cum modo, *se vero nihil dixisse, neque tam stulte dicturos; modo, bene admonitos ab adversario et agere gratias, quod adiuti sint,* iocantur; frequentissime vero, id quod firmissimum est, *nunquam iis responsurum adversarium fuisse, quae proposita non essent, nisi illa sciret vera esse et ad fatendum conscientia esset impulsus;* ut pro Cluentio Cicero: *Nam hoc persaepe dixisti, tibi sic*
47 *renuntiari, me habere in animo causam hanc praesidio legis defendere. Itane est? ab amicis imprudentes videntur prodimur? et est nescio quis de iis, quos amicos nobis arbitramur, qui nostra consilia ad adversarium deferat? Quisnam hoc tibi renuntiavit? quis tam improbus fuit; cui ego autem narravi? Nemo, ut opinor, in culpa est; nimirum tibi istud lex ipsa renuntiavit.* At quidam
48 contradictione non contenti totos etiam locos explicant: *scire se hoc dicturos adversarios et ita persecuturos.* Quod

factum venuste nostris temporibus elusit Vibius Crispus, vir ingenii iucundi et elegantis: *Ego vero, inquit, ista non dico;* 49 *quid enim attinet illa bis dici?* Nonnunquam tamen aliquid simile contradictioni poni potest, si quid ab adversario testationibus comprehensum in advocationibus iactatum sit; respondebimus enim rei ab illis dictae, non a nobis excogitatae; aut, si id genus erit causae, ut proponere possimus certa, extra quae dici nihil possit: ut, cum res furtiva in domo deprehensa sit, dicat necesse est reus, aut se ignorante illatam aut depositam apud se aut donatam sibi; quibus omnibus, etiamsi proposita non sunt, responderi potest. At in scholis recte plenioribus et contradictionibus occurremus, ut in utrumque locum, id est primum et secundum, simul plurimum exerceamur. Quod nisi fecerimus, nunquam utemur contradictione; non enim erit, cui respondeamus.

51 Est et illud vitium magnum sollicite et circa omnia momenta luctantis; suspectam enim facit iudici causam, et frequenter, quae statim dicta omnem dubitationem sustulissent, dilata ipsi praeparationibus fidem perdunt, quia patronus et aliis crediderit opus fuisse. Fiduciam igitur orator prae se ferat semperque ita dicat, tanquam de causa optime sentiat; 52 quod sicut omnia in Cicerone praecipuum est. Nam illa summa cura securitatis est similis, tantaque in oratione auctoritas, ut probationis locum obtineat dubitare nobis non audentibus. Porro, qui scierit, quid pars adversa, quid nostra habeat valentissimum, facile indicabit, quibus maxime rebus vel occurrendum sit vel instandum.

53 Ordo quidem in parte nulla minus affert laboris. Nam si agimus, nostra confirmanda sunt primum, tum, quae nostris opponuntur refutanda; si respondemus, prius incipiendum est a refutatione. Nascuntur autem ex his, quae contradictioni opposuimus, aliae contradictiones, euntque interim longius; ut gladiatorum manus, quae secundae vocantur, fiunt et tertiae, si ista prima ad vocandum adversarii ictum prolata erat, et quartae, si geminata captatio est, ut bis cavere, bis repetere oportuerit. Quae ratio et ultra ducit. Sed 55 illam etiam, quam supra ostendi, simplicem ex affectibus atque ex affirmatione sola probationem recipit refutatio, qualis

est illa Scauri, de qua supra dixi; quin nescio an etiam frequentior, ubi quid negatur. Videndum praecipue utrique parti, ubi sit rei summa. Nam fere accidit, ut in causis multa dicantur, de paucis iudicetur.

In his probandi refutandique ratio est, sed adjuvanda 56 viribus dicentis et ornanda. Quamlibet enim sint ad dicendum, quod volumus, accommodata: ieiuna tamen erunt et infirma, nisi maiore quodam oratoris spiritu implentur. Quare 57 et illi communes loci de testibus, de tabulis, de argumentis aliisque similibus magnam vim animis iudicum afferunt; et hi proprii, quibus factum quodque laudamus, aut contra iustum vel iniustum docemus, maius aut minus, asperius aut mitius. Ex his autem alii ad comparisonem singulorum argumentorum faciunt, alii ad plurium, alii ad totius causae inclinationem. Ex quibus sunt qui praeparent animi 58 iudicis, sunt qui confirmant. Sed praeparatio quoque aut confirmatio aliquando totius causae est aliquando partium, et proinde, ut cuique conveniant, subiicienda. Ideoque minor, inter duos diversarum sectarum velut duces non mediocri contentione quaesitum, singulisque quaestionibus subiiciendi essent loci, ut Theodoro placet, an prius docendus iudex quam movendus, ut praecipit Apollodorus; tanquam perierit haec ratio media, et nihil cum ipsius causae utilitate sit deliberandum. Haec accidunt his, qui praecipiant, qui ipsi non dicunt in foro, ut artes, a securis otiosisque compositae, ipsa pugnae necessitate turbentur. Namque omnes 60 fere, qui legem dicendi quasi quaedam mysteria tradiderunt, certis non inveniendorum modo argumentorum locis sed concludendorum quoque nos praeceptis illigaverunt; de quibus brevissime praelocutus, quid ipse sentiam, id est quid clarissimos oratores fecisse videam, non tacebo.

QUID ENTHYMEMA ET QUOTUPLEX; QUIBUS CONSTET EPICHIREMA, ET QUOMODO REFELLATUR.

XIV. Igitur enthymema et argumentum ipsum, id est rem, quae probationi alterius adhibetur, appellant et argumenti elocutionem; eam vero, ut dixi, duplicem: ex consequentibus, quod habet propositionem coniunctam-

que ei protinus probationem, quale pro Ligario, *Causa tum dubia, quod erat aliquid in utraque parte, quod probari posset; nunc melior ea iudicanda est, quam etiam dii adinverunt*; habet enim rationem et propositionem, non habet conclusionem. Ita est ille imperfectus syllogismus. Ex pugnantis vero, quod etiam solum enthymema quidam vocant, fortior multo probatio est. Tale est Ciceronis pro Milone: *Eius igitur mortis sedetis ulores, cuius vitam si putetis per vos restitui posse, nolitis*. Quod quidem etiam aliquando multiplicari solet, ut est ab eodem et pro eodem reo factum: *Quem igitur cum omnium gratia nohât, hunc voluit cum aliquorum querela? quem iure, quem loco, quem tempore, quem impune non est ausus, hunc iniuria, iniquo loco, alieno tempore, cum periculo capitis non dubitavit occidere?* Optimum autem videtur enthymematis genus, cum in propositione dissimili vel contraria ratio subiungitur, quale est Demosthenis: *Non enim, si quid unquam contra leges actum est, idque tu es imitatus, idcirco te convenit poena liberari; quin e contrario damnari multo magis. Nam ut, si quis eorum damnatus esset, tu haec non scripsisses: ita, damnatus tu si fueris, non scribet alius*.

Epichirematos et quattuor et quinque et sex etiam factae sunt partes a quibusdam. Cicero maxime quinque defendit, ut sit propositio deinde ratio eius tum assumptio et eius probatio, quinta complexio; quia vero interim et propositio non egeat rationis et assumptio probationis, nonnunquam etiam complexione opus non sit: et quadripertitam et tripartitam et bipertitam quoque fieri posse ratiocinationem. Mihi et pluribus nihilominus auctoribus tres summum videntur. Nam ita se habet ista natura, ut sit, de quo quaeratur et per quod probetur; tertium adici potest velut ex consensu duorum antecedentium. Ita erit prima intentio, secunda assumptio, tertia connexio. Nam confirmatio primae ac secundae partis exornatio et eisdem cedere possunt, quibus subiiciuntur. Sumamus enim ex Cicerone quinque partium exemplum: *Melius gubernantur ea, quae consilio reguntur quam quae sine consilio administrantur*. Hanc primam partem numerant; eam deinceps rationibus variis et

quam copiosissimis verbis approbari putant oportere. Hoc ego totum cum sua ratione unum puto; alioqui si ratio pars est, est autem varia ratio: plures partes esse dicantur. Assumptionem deinde ponit: *Nihil autem omnium rerum melius quam omnis mundus administratur*. Huius assumptionis quarto in loco iam porro inducunt approbationem; de quo idem quod supra dico. Quinto inducunt loco complexionem, quae aut id infert solum, quod ex omnibus partibus cogitur, hoc modo, *Consilio igitur mundus administratur*; aut, unum in locum cum conduxit breviter propositionem et assumptionem, adiungit, quid ex his conficiatur, ad hunc modum: *Quodsi melius geruntur, quae consilio quam quae sine consilio administrantur, nihil autem omnium rerum melius quam omnis mundus administratur: consilio igitur mundus administratur*. Cui parti consentio.

In tribus autem, quas fecimus, partibus non est forma semper eadem sed una, in qua idem concluditur, quod intenditur: *Anima immortalis est. Nam quidquid ex se ipso movetur, immortale est; anima autem ex se ipsa movetur, immortalis igitur est anima*. Hoc fit non solum in singulis argumentis sed in totis causis, quae sunt simplices, et in quaestionibus. Nam et hae primam habent propositionem: *Sacrilegium commisisti; Non, quisquis hominem occidit, caedis tenetur*, deinde rationem; (sed haec est in causis et quaestione longior quam in singulis argumentis) et plerumque summa complexione, vel per enumerationem vel per brevem conclusionem, testantur, quid effecerint. In hoc genere propositio dubia est, de hac enim quaeritur. Altera est complexio non par intentioni sed vim habens parem: *Mors nihil ad nos, nam quod est dissolutum, sensu caret; quod autem sensu caret, nihil ad nos*. In alio genere non eadem propositio est quae connexio: *Omnia animalia meliora sunt quam inanima, nihil autem melius est mundo, mundus igitur animal*. Hic potest videri de re contentio. Potuit enim sic constitui ratiocinatio: *Animal est mundus, omnia enim animalia meliora sunt quam inanima et cetera*. Haec propositio aut confessata est ut proxima, aut probanda ut, *Qui beatam vitam vivere volet, philosophetur*

oportet, non enim conceditur; cetera sequi nisi confirmata prima parte non possunt; ut et assumptio interim confessa est ut, *Omnes autem volunt beatam vitam vivere*; interim probanda ut illa, *Quod est dissolutum, sensu caret*; cum, soluta corpore anima an sit immortalis vel ad tempus certe maneat, sit in dubio. Quam assumptionem alii rationem alii vocant.

- 14 Epichirema autem nullo differt a syllogismis, nisi quod illi et plures habent species et vera colligunt veris, epichirematibus frequentior circa credibilia est usus. Nam si contingeret semper controversa confessis probare: vix esset in hoc genere usus oratoris. Nam quid ingenio est opus, ut dicas: *Bona ad me pertinent, solus enim sum filius defuncti, vel solus heres, cum iure bonorum possessio testati secundum*
- 16 *tabulas testamenti detur, ad me igitur pertinet*. Sed cum ipsa ratio in quaestionem venit: efficiendum est certum id, quo probaturi sumus, quod incertum est: ut si ipsa forte intentione dicatur, *Aut filius non es aut non es legitimus aut non es solus*; itemque *Aut non es heres, aut non iustum testamentum est, aut capere non potes, aut habes coheredes*; efficiendum est iustum, propter quod nobis bona adiudicari debeant. Sed tum est necessaria illa summa connexio, cum intervenit ratio longior. Aliquando sufficiunt intentio ac ratio: *Silent enim leges inter arma nec se expectari iubent, cum ei, qui expectare velit, ante iniusta poena luenda sit quam iusta repetenda*. Ideoque id enthymema, quod est ex consequentibus, rationi simile dixerunt. Sed et singula, interimque recte, ponuntur, ut ipsum illud *Silent leges*
- 18 *inter arma*; et a ratione incipere fas est, deinde concludere, ut ibidem: *Quodsi duodecim tabulae nocturnum furem quoquo modo, diurnum autem, si se telo defenderet, interfici impune voluerunt: quis est, qui, quoquo modo quis interfectus sit, puniendum putet?* Variavit hic adhuc et rursus rationem tertio loco posuit, *cum videat, aliquando*
- 19 *gladium nobis ab ipsis porrigi legibus*. Prioris autem partis duxit ordinem: *Insidiatorei vero et latroni quae potest inferri iniusta nex?* hoc intentio; *Quid comitalus nostri, quid gladii volunt?* hoc ratio; *Quos habere certe non li-*

ceret, si uti illis nullo pacto liceret, hoc ex ratione et intentione connexio.

Huic generi probationis tribus occurritur modis, id est est per omnes partes. Aut enim expugnantur intentio aut assumptio aut conclusio nonnunquam omnia, sed omnia haec tria sunt. Intentio expugnatur: *Iure occidi eum, qui insidiatus sit*. Nam prima statim quaestio pro Milone est, *an ei fas sit lucem intueri, qui a se hominem nequam esse fateatur*. Expugnatur assumptio omnibus iis, quae de refutatione diximus. Et ratio quidem nonnunquam est vera, cum eius propositio vera non sit; interim verae propositionis falsa ratio est. *Virtus bonum est*, verum est; si quis rationem subiiciat, *quod ea locupletes faciat*: verae intentionis falsa sit ratio. Conclusio autem aut vera negatur, cum aliud colligit quam id, quod ex prioribus efficitur; aut nihil ad quaestionem dicitur pertinere. Non est vera sic: *Insidiator iure occiditur; nam qui curavit, ut vim afferret ut hostis, debet etiam repellere ut hostis; recte igitur Clodius ut hostis occisus est*; non utique, nondum enim Clodium insidiatorem ostendimus. Sed fit vera connexio: *Recte igitur insidiator ut hostis occiditur*; nihil ad nos, nondum enim Clodius insidiator apparet. Sed ut potest vera esse intentio et ratio et tamen falsa connexio: ita, si illa falsa sunt, nunquam est vera connexio.

Enthymema ab aliis oratoribus syllogismus ab aliis pars dicitur syllogismi, propterea quod syllogismus utique conclusionem et propositionem habet et per omnes partes efficit, quod proposuit, enthymema tantum intenta intelligi contentum sit. Syllogismus talis: *Solum bonum virtus, nam id demum bonum est, quo nemo male uti potest; virtute nemo male uti potest, bonum est ergo virtus*. Enthymema ex consequentibus: *Bonum est virtus, qua nemo male uti potest*; et contra, *Non est bonum pecunia; non enim bonum, quo quisque male uti potest; pecunia potest quis male uti, non igitur bonum est pecunia*. Enthymema expugnantibus: *An bonum est pecunia, qua quisque male uti potest? Si pecunia, quae est in argento signato, argentum est: qui argentum omne legavit, et pecuniam, quae*

est in argento signato, legavit; argentum autem omne legavit, igitur et pecuniam, quae est in argento, legavit, habebit formam syllogismi. Oratori satis est dicere, Cum argentum legaverit omne: pecuniam quoque legavit, quae est in argento.

- 27 Peregisse mihi videor sacra tradentium artes, sed consilio locus superest. Namque ego, ut in oratione syllogismo quidem aliquando uti nefas non duco, ita constare totam aut certe confertam esse aggressionum et enthymematum stipatione minime velim. Dialogis enim et dialecticis disputationibus erit suavior quam nostri operis actionibus, quae quidem inter se plurimum differunt. Namque illis homines docti et inter doctos verum quaerentes minutius et scrupulosius scrutantur omnia, et ad liquidum confessumque perducunt, ut qui sibi et inveniendi et iudicandi vindicent partes, 29 quarum alteram *τοπιωήν* alteram *κριτικήν* vocant. Nobis ad aliorum iudicia componenda est oratio, et saepius apud omnino imperitos atque illarum certe ignaros litterarum loquendum est, quos nisi et delectatione allicimus et viribus trahimus et nonnunquam turbamus affectibus: ipsa, quae iusta ac vera sunt, tenere non possumus. Locuples et speciosa vult esse eloquentia; quorum nihil consequetur, si conclusionibus certis et crebris et in unam prope formam cadentibus concisa et contemptum ex humilitate et odium ex quadam servitute et ex copia satietatem et ex similitudine fastidium 31 tulerit. Feratur ergo non semitis sed campis, non uti fontes angustis fistulis colliguntur sed ut beatissimi amnes totis valibus fluunt ac sibi viam, si quando non acceperit, faciat. Nam quid illa miserius lege velut praeformatas infantibus litteras persequentium et, ut Graeci dicere solent, quem mater amictum dedit, sollicito custodientium: propositio ac 32 conclusio ex consequentibus et repugnantibus? Non inspiret? non augeat? non mille figuris variet ac verset? ut ea nasci et ipsa provenire natura, non manu facta et arte suspecta magistrum fateri ubique videantur? Quis unquam sic dixit orator? Nonne apud ipsum Demosthenem paucissima huius veneris vel artis reperiuntur? Quae apprehensa Graeci magis (non hoc solum peius faciunt) in catenas ligant et inex-

plicabili serie connectunt, et indubitata colligunt et probant confessa et se antiquis per hoc similes vocant, deinde interrogati nunquam respondebunt, quem imitentur. Sed de figuris alio loco.

Nunc illud adiciendum, ne iis quidem consentire me, 33 qui semper argumenta sermone puro et dilucido et distincto ceterum minime lato ornatuque putant esse dicenda. Namque ea distincta quidem ac perspicua debere esse confiteor, in rebus vero minoribus etiam sermone ac verbis quam maxime propriis et ex usu; at si maior erit materia, nullum his ornamentum, qui modo non obscuret, subtrahendum puto. Nam et saepe plurimum lucis affert ipsa translatio, cum etiam iuriconsulti, quorum summus circa verborum proprietatem labor est, *litus* esse audeant dicere, qua fluctus *eludit*. Quoque 35 quid est natura magis asperum, hoc pluribus condiendum est voluptatibus; et minus suspecta argumentatio dissimulatione, et multum ad fidem adjuvat audientis voluptas. Nisi forte existimamus Ciceronem haec ipsa mala argumentatione dixisse, *silere leges inter arma, et gladium nobis interim ab ipsis porrigi legibus*. Hic tamen habendus istis modus, ut sint ornamento non impedimento.

LIBER VI.

Libro sexto haec continentur: Prooemium, in quo conquestio de fortuna sua. De peroratione. De affectibus. De risu. De altercatione. De iudicio et consilio.

PROOEMIUM.

Haec, Marcelle Victori, ex tua voluntate maxime ingressus, tum si qua ex nobis ad iuvenes honos pervenire posset utilitas, novissime paene etiam necessitate quadam officii delegati mihi sedulo laborabam; respiciens tamen illam curam meae voluptatis, quod filio, cuius eminens ingenium sollicitam quoque parentis diligentiam merebatur, hanc optimam partem relicturus hereditatis videbar, ut, si me, quod aequum et optabile fuit, fata interceptissent, praeceptore ta-

2 men patre uteretur. At me fortuna id agentem diebus ac noctibus festinantemque meta meae mortalitatis ita subito prostravit, ut laboris mei fructus ad neminem minus quam ad me pertineret. Illum enim, de quo summa conceperam et in quo spem unicam senectutis reponebam, repetito vul-
 3 nere orbitatis amisi. Quid nunc agam? aut quem ultra esse usum mei, diis repugnantibus, credam? Nam ita forte accidit, ut eum quoque librum, quem de causis corruptae eloquentiae emisi, iam scribere aggressus ictu simili ferirer. Nunc igitur optimum fuit, infaustum opus, et quidquid hoc est in me infelicitium litterarum, super immaturum funus consumpturis viscera mea flammis iniicere neque hanc impiam
 4 vivacitatem novis insuper curis fatigare. Quis enim mihi bonus parens ignoscat, si studere amplius possum; ac non oderit hanc animi mei firmitatem, si quis in me alius usus vocis, quam ut incusem deos superstes omnium meorum? Nullam in terras despiciere providentiam tester; si non meo casu, cui tamen nihil obici, nisi quod vivam, potest, at illorum certe, quos utique immeritos mors acerba damnavit, erepta prius mihi matre eorundem, quae nondum expleto aetatis undevicesimo anno duos enixa filios, quamvis acer-
 5 bissimis rapta fatiis, felix decessit? Ego vel hoc uno malo sic eram afflictus, ut me iam nulla fortuna posset efficere felicem. Nam cum omni virtute, quae in feminas cadit, functa insanabilem attulit marito dolorem; tum aetate tam puellari, praesertim meae comparata, potest et ipsa nume-
 6 rari inter vulnera orbitatis. Liberis tamen superstibus, et, quod nefas erat, sed optabat ipsa, me salvo maximos cruciatus praecipiti via effugit. Mihi filius minor quintum egres-
 7 sus annum prior alterum ex duobus eruit lumen. Non sum ambitiosus in malis nec augere lacrimarum causas volo, utinamque esset ratio minuendi. Sed dissimulare qui possum, quid ille gratiae in vultu, quid iucunditatis in sermone, quos ingenii igniculos, quam substantiam placidae et (quam scio vix posse credi tantam) altae mentis ostenderit; qualis amo-
 8 rem quicumque alienus infans mereretur. Illud vero insidiantis, quo me validius cruciaret, fortunae fuit, ut ille mihi blandissimus me suis nutricibus, me aviae educanti, me

omnibus, qui sollicitare illas aetates solent, anteferet. Quapropter illi dolori, quem ex matre optima atque omnem laudem supergressa paucos ante menses ceperam, gratulor Minus enim est, quod flendum meo nomine quam quod illius gaudendum est. Una post haec Quintiliani mei spe
 9 ac voluptate nitebar, et poterat sufficere solatio. Non enim flosculos, sicut prior, sed iam decimum aetatis ingressus annum, certos ac deformatos fructus ostenderat. Iuro per
 10 mala mea, per infelicem conscientiam, per illos manes, numina mei doloris, has me in illo vidisse virtutes ingenii, non modo ad percipiendas disciplinas, quo nihil praestantius cognovi plurima expertus, studiique iam tum non coacti (sciunt praeceptores) sed probitatis, pietatis, humanitatis, liberalitatis, ut prorsus posset hinc esse tanti fulminis metus, quod observatum fere est, celerius occidere festinam
 11 maturitatem, et esse nescio quam, quae spes tantas decerpit, invidiam, ne videlicet ultra, quam homini datum est, nostra provehantur. Etiam illa fortuita aderant omnia, vocis
 12 iucunditas claritasque, oris suavitas et in utraque lingua, tanquam ad eam demum natus esset, expressa proprietas omnium litterarum. Sed haec spes adhuc; illa maiora, constantia, gravitas, contra dolores etiam ac metus robur. Nam quo ille animo, qua medicorum admiratione mensium octo valetudinem tulit? ut me in supremis consolatus est? quam etiam deficiens iamque non noster ipsum illum alienatae mentis errorem circa solas litteras habuit? Tuosne ego,
 13 meae spes inanes, labentes oculos, tuum fugientem spiritum vidi? Tuum corpus frigidum exangue complexus animam recipere auramque communem haurire amplius potui? Dignus his cruciatibus, quos fero, dignus his cogitationibus. Tene consulari nuper adoptione ad omnium spes honorum
 14 prius admotum, te avunculo praetori generum destinatum, te, omnium spes, acutissimae eloquentiae candidatum? Superstes parens tantum poenas—! Et si non cupido lucis certe patientia vindicet te reliqua mea aetate. Nam frustra mala omnia ad crimen fortunae relegamus. Nemo nisi sua culpa diu dolet. Sed vivimus, et aliqua vivendi ratio quae-
 15 renda est, credendumque doctissimis hominibus, qui unicum

adversorum solatium litteras putaverunt. Si quando tamen ita resederit praesens impetus, ut aliqua tot luctibus alia cogitatio inseri possit, non iniuste petierim morae veniam. Quis enim dilata studia miretur, quae potius non abrupta 15 esse mirandum est? Tum, si qua fuerint minus effecta iis, quae levius adhuc afflicti coeperamus: imperitanti fortunae remittantur, quae, si quid medioerium alioqui in nostro ingenio virium fuit, ut non extinxerit, debilitavit tamen. Sed vel propter hoc nos contumacius erigamus, quod illam ut perferre nobis difficile est, ita facile contemnere. Nihil enim sibi adversus me reliquit, et infelicem quidem sed cer- 16 tissimam tamen attulit mihi ex his malis securitatem. Boni autem consulere nostrum laborem vel propter hoc aequum est, quod in nullum iam proprium usum perseveramus, sed omnis haec cura alienas utilitates (si modo quid utile scribimus) spectat. Nos miseri sicut facultates patrimonii nostri ita hoc opus aliis praeparabamus aliis relinquemus.

DE PERORATIONE.

I. Peroratio sequebatur, quam *cumulum* quidam *conclusionem* alii vocant. Eius duplex ratio est posita aut in rebus aut in affectibus. Rerum repetitio et congregatio, quae Graece dicitur *ἀνακεφαλαίωσις*, a quibusdam Latinorum *enumeratio*, et memoriam iudicis reficit et totam simul causam ponit ante oculos et, etiamsi per singula minus moverat, turba valet. In hac, quae repetemus, quam brevissime dicenda sunt, et, quod Graeco verbo patet, decurrendum per capita. Nam, si morabimur, non iam enumerationem sed quasi altera fiet oratio. Quae autem enumeranda sententiis et figuris utique varianda; alioqui nihil est odiosius recta illa repetitione velut memoriae iudicum diffidentis. 3 Sunt autem innumerabiles, optimeque in Verrem Cicero: *Si pater ipse iudicaret, quid diceret, cum haec probarentur?* et deinde subiecit enumerationem; aut cum idem in eundem per invocationem deorum spoliata a praetore templa dinumerat. Licet et dubitare, num quid nos fugerit, et quid responsurus sit adversarius his et his, aut quam spem accu-

sator habeat omnibus ita defensis. Illa vero iucundissima, 4 si contingat aliquod ex adversario ducere argumentum, ut si dicas: *Reliquit hanc partem causae, aut invidia premere maluit*, aut *ad preces confugit merito, cum sciret haec et haec*. Sed non sunt singulae species persequendae, ne 5 sola videantur, quae forte nunc dixerō, cum occasiones et ex causis et ex dictis adversariorum et ex quibusdam fortuitis quoque oriantur. Nec referenda modo nostra sed postulandum etiam ab adversariis, ut ad quaedam respondeant. Id autem, si et actionis supererit locus et ea proposuerimus, 6 quae refelli non possint. Nam provocare, quae inde sint fortia, non arguentis est sed monentis. Id unum epilogi 7 genus visum est plerisque Atticorum et philosophis fere omnibus, qui de arte oratoria scriptum aliquid reliquerunt. Id sensisse Atticos credo, quia Athenis affectus movere etiam per praeconem prohibebatur orator. Philosophos minus miror, apud quos vitii loco est affici; nec boni mores videntur, sic a vero iudicem avēti, nec convenire bono viro vitii uti. Necessarios tamen affectus fatebuntur, si aliter obtineri vera et iusta et in commune profutura non possint. Ceterum illud constitit inter omnes, etiam in aliis partibus 8 actionis, si multiplex causa sit et pluribus argumentis defensa, utiliter *ἀνακεφαλαίωσις* fieri solere; sicut nemo dubitaverit multas esse causas, in quibus nullo loco sit necessaria, si breves et simplices fuerint. Haec pars perorationis accusatori patronoque ex aequo communis est.

Affectibus quoque iisdem fere utuntur, sed aliis 9 hic atque ille saepius ac magis, nam huic concitare iudices, illi flectere convenit. Verum et accusator habet interim lacrimas ex miseratione eius rei, quam ulciscitur; et reus de indignitate calumniae conspiracy vehementius interim queritur. Dividere igitur haec officia commodissimum, quae plerumque sunt, ut dixi, prooemio similia sed liberiora plenioraque. Inclinatio enim iudicum ad nos petitur initio par- 10 eius, cum admitti satis est et oratio tota superest; in epilogo vero est, qualem animum iudex in consilium ferat, et iam nihil amplius dicturi sumus, nec restat, quo reseremus. Est igitur utrisque commune, conciliare sibi, avētere ab 11

adversario iudicem, concitare affectus et componere. Et brevissimum quidem hoc praeceptum dari utrique parti potest, ut totas causae vires orator ponat ante oculos: et cum viderit, quid invidiosum, favorabile, invisum, miserabile aut sit in rebus aut videri possit: ea dicat, quibus, si iudex 12 esset, ipse maxime moveretur. Sed certius est ire per singula.

Et quae concilient quidem accusatorem, in praeceptis exordii iam diximus. Quaedam tamen, quae illic ostendere sat est, in peroratione implenda sunt magis, si contra impotentem, invisum, perniciosum suscepta causa est: si iudicibus ipsis aut gloriae damnatio rei aut deformitati futura absolutio. Nam egregie in Vatinius Calvus, 13 *Factum, inquit, ambitum scitis omnes, et hoc vos scire omnes sciunt.* Cicero quidem in Verrem etiam emendari posse infamiam iudiciorum damnato reo dicit; quod est unum ex supra dictis. Metus etiam, si est adhibendus, ut faciat idem, hunc habet locum fortiolem quam in prooemio. Qua 14 de re quid sentirem, alio iam libro exposui. Concitare quoque invidiam, odium, iram, liberius in peroratione contingit; quorum invidiam gratia, odium turpitude, iram offensio iudici facit, si contumax, arrogans, securus sit, quae non ex facto modo dictove aliquo sed vultu, habitu, aspectu moveri solet. Egregieque nobis adolescentibus dixisse accusator Cossutiani Capitonis videbatur, Graece quidem sed 15 in hunc sensum, *Erubescis Caesarem timere.* Summa tamen concitandi affectus accusatori in hoc est, ut id, quod obiecit, aut quam atrocissimum aut etiam, si fieri potest, quam maxime miserabile esse videatur. Atrocitas crescit ex his, quid factum sit, a quo, in quem, quo animo, quo tempore, quo loco, quo modo: quae omnia infinitos tractatus habent. Pulsatum querimur: de re primum ipsa dicendum: tum si senex, si puer, si magistratus, si probus, si bene de re publica meritus; etiam si percussus sit a vili aliquo contemptoque vel ex contrario a potente nimium vel ab eo, quo minime oportuit, et si die forte sollempni aut iis temporibus, cum iudicia eius rei maxime exercerentur, aut in sollicito civitatis statu, item in theatro, in templo, in

contione: crescit invidia; et si non errore nec ira vel etiam, 17 si forte ira sed iniqua, quod patri affuisset, quod respondisset, quod honores contra peteret, et si plus etiam videri potest voluisse quam fecit. Plurimum tamen affert atrocitatis modus, si graviter, si contumeliose: ut Demosthenes ex parte percussi corporis, ex vultu ferientis, ex habitu invidiam Midiae quaerit. Occisus utrum ferro an igne an veneno, 18 uno vulnere an pluribus, subito an expectatione tortus, ad hanc partem maxime pertinet. Utitur frequenter accusator et miseratione, cum aut eius casum, quem ulciscitur, aut liberorum ac parentum sollicitudinem conqueritur. Etiam 19 futuri temporis imagine iudices movet, quae maneant eos, qui de vi et iniuria questi sunt, nisi vindicentur; fugiendum de civitate, cedendum bonis aut omnia, quaecumque inimicus fecerit, perferenda. Sed saepius id est accusatoris, avertere iudicem a miseratione, qua reus sit usus, atque ad fortiter iudicandum concitare. Cuius loci est etiam occupare, quae dicturum facturumve adversarium putes. Nam et cautiores ad custodiam suae religionis iudices facit et gratiam responsuris aufert, cum ea praedicta sunt ab accusatore; iani, si pro reo petentur, non sint nova: ut Servius Sulpicius contra Aufidiam, ne signatorum, ne ipsius discrimen obiciatur sibi, praemonet. Nec non ab Aeschine, quali sit usus Demosthenes actione, praedictum est. Docendi quoque inter iudices, quid rogantibus respondere debeant: quod est unum repetitionis genus.

Periclitantem vero commendat dignitas et studia 21 fortia et susceptae bello cicatrices et nobilitas et merita maiorum. Hoc, quod proxime dixi, Cicero atque Asinius certatim sunt usi, pro Scauro patre hic ille pro filio. Com- 22 mendat et causa periculi, si suscepisse inimicitias ob aliquod factum honestum videtur: praecipue bonitas, humanitas, misericordia. Iustius enim tunc petere ea quisque videtur a iudice, quae aliis ipse praestiterit. Referenda pars haec quoque ad utilitatem rei publicae, ad iudicum gloriam, ad exemplum, ad memoriam posteritatis. Plurimum tamen va- 23 let misratio, quae iudicem non flecti tantum cogit sed motum quoque animi sui lacrimis confiteri. Haec petentur aut ex

iis, quae passus est reus, aut iis, quae cummaxime patitur, aut iis, quae damnatum manent; quae et ipsa duplicantur, cum dicimus, ex qua illi fortuna et in quam recidendum sit.

24 Affert in his momentum et aetas et sexus et pignora; liberi, dico, et parentes et propinqui. Quae omnia tractari varie solent. Nonnunquam etiam ipse patronus has partes subit: ut Cicero pro Milone, *O me miserum! o te infelicem! Revocare me tu in patriam, Milo, potuisti per hos, ego te in patria per eosdem retinere non potero?* Maximeque, si, ut tunc
25 accidit, non conveniunt ei qui accusatur preces. Nam quis ferret Milonem pro capite suo supplicantem, qui a se virum nobilem interfectum, quia id fieri oportuisset, fateretur? Ergo et illi captavit ex ipsa praestantia animi favorem et in locum lacrimarum eius ipse successit.

His praecipue locis utiles sunt prosopopoeiae, id est fictae alienarum personarum orationes, quales litigatorem decent. Patronum nuda res movent. At cum ipsos
26 loqui fingimus, ex personis quoque trahitur affectus. Non enim audire iudex videtur aliena mala desilentis sed sensum ac vocem auribus accipere miserorum, quorum etiam mutus aspectus lacrimas movet; quantoque essent miserabiliora, si ea dicerent ipsi, tanto sunt quadam portione ad afficiendum potentiora, cum velut ipsorum ore dicuntur, ut scenicis actoribus eadem vox eademque pronuntiatio plus ad movendos
27 affectus sub persona valet. Itaque idem Cicero, quanquam preces non dat Miloni, eumque potius animi praestantia commendat, accommodavit tamen ei verba, convenientes etiam forti viro conquestiones: *Frustra, inquit, mei suscepti labores. O spes fallaces! O cogitationes inanes meas!*

Nunquam tamen debet esse longa miseratio, nec sine causa dictum est, *nihil facilius quam lacrimas inarescere.*
28 Nam cum etiam veros dolores mitiget tempus: citius evanescat necesse est illa, quam dicendo effinximus, imago; in qua si moramur: lacrimis fatigatur auditor et requiescit et
29 ab illo, quem ceperat, impetu ad rationem redit. Non patiamur igitur frigescere hoc opus, et affectum, cum ad summum perduxerimus, relinquamus, nec speremus fore, ut aliena quisquam diu ploret. Ideoque cum in aliis tum ma-

xime in hac parte debet crescere oratio; quia, quidquid non adiecit prioribus, etiam detrahere videtur, et facile deficit affectus, qui descendit.

Non solum autem dicendo sed etiam faciendo quae-30 dam lacrimas movemus, unde et producere ipsos, qui periclitentur, squalidos atque deformes et liberos eorum ac parentes institutum, et ab accusatoribus cruentum gladium ostendi et lecta e vulneribus ossa et vestes sanguine perfusas videmus, et vulnera resolvi, verberata corpora nudari. Quarum rerum ingens plerumque vis est velut in rem prae-31 sentem animos hominum ducentium, ut populum Romanum egit in furorem praetexta C. Caesaris praelata in funere cruenta. Sciebatur interfectum eum, corpus denique ipsum impositum lecto erat, at vestis tamen illa sanguine madens ita repraesentavit imaginem sceleris, ut non occisus esse Caesar sed tum maxime occidi videretur. Sed non ideo pro-32 baverim, quod factum et lego et ipse aliquando vidi, depictam tabula supra Jovem imaginem rei, cuius atrocitate iudex erat commovendus. Quae enim est actoris infantia, qui mutam illam effigiem magis quam orationem pro se putet locuturam? At sordes et squalorem et propinquorum
33 quoque similem habitum scio profuisse, et magnum ad salutem momentum preces attulisse. Quare et obsecratio illa iudicum per carissima pignora, utique si et reo sunt liberi, coniux, parentes, utilis erit; et deorum etiam invocatio velut ex bona conscientia profecta videri solet; stratum deni-34 que iacere et genua complecti, nisi si tamen persona nos et anteacta vita et rei condicio prohibebit. Quaedam enim tam fortiter tuenda quam facta sunt. Verum sic habenda est auctoritatis ratio, ne sit invisiva securitas. Fuit quondam inter
35 haec omnia potentissimum, quo L. Murenam Cicero accusantibus clarissimis viris eripuisse praecipue videtur, persuasitque, nihil esse ad praesentem rerum statum utilius quam pridie Calendas Ianuarias ingredi consulatum. Quod genus nostris temporibus totum paene sublatum est, cum omnia curae tutelaeque unius innixa periclitari nullo iudicii exitu possint.

De accusatoribus et reis sum locutus, quia in periculis
36

maxime versatur affectus. Sed privatae quoque causae utrumque habent perorationis genus, et illud, quod est ex enumeratione probationum, et hoc, quod ex lacrimis, si aut statu periclitari aut opinione litigator videtur. Nam in parvis quidem litibus has tragoedias movere tale est, quasi si personam Herculis et cothurnos aptare infantibus velis.

- 37 Ne illud quidem indignum est admonitione, ingens in epilogis meo iudicio verti discrimen, quomodo se dicenti, qui excitatur, accommodet. Nam et imperitia et rusticitas et rigor et deformitas afferunt interim frigus, diligenterque sunt haec actori providenda. Et quidem repugnantes eos patrono et nihil vultu commotos et intempestive residentes et facto aliquo vel ipso vultu risum moventes saepe vidi, praecipue vero cum aliqua velut scenice fiunt.
- 38 Transtulit aliquando patronus puellam, quae soror esse adversarii dicebatur, (nam de hoc lis erat) in adversa subsellia, tanquam in gremio fratris relicturus, at is a nobis praemonitus discesserat. Tum ille, alioqui vir facundus, inopinatae rei casu obmutuit et infantem suam frigidissime reportavit.
- 39 Alius imaginem mariti pro rea proferre magni putavit; at ea saepius risum fecit. Nam et ii, quorum officii erat, ut traderent eam, ignari, qui esset epilogus, quotiens respexisset patronus, offerebant palam, et prolata novissime deformitate ipsa (nam senis cadaveri erat infusa) praeteritam
- 40 quoque orationis gratiam perdidit. Nec ignotum, quid Glyconi, cui Spiridion fuit cognomen, acciderit. Huic puer, quem is productum quid fleret interrogabat, *a paedagogo se vellicari* respondit. Sed nihil illa circa Cepasios Ciceronis fabula efficacius ad pericula epilogorum. Omnia tamen haec tolerabilia iis, quibus actionem mutare facile est; at, qui a stilo non recedunt, aut conticescunt ad hos casus aut frequentissime falsa dicunt. Inde est enim, *Tendit ad genua vestra supplices manus*, et *Haeret in complexu liberorum miser*, et *Revocat ecce me*; etiamsi nihil horum
- 41 is, de quo dicitur, faciat. Ex scholis haec vitia, in quibus omnia libere fingimus et impune, quia pro facto est, quidquid volumus; non admittit hoc idem veritas, egregieque Cassius dicenti adolescentulo: *Quid me torvo vultu intueris, Severe?*

Non mehercule quidem faciebam, sed sic scripsisti. Ecce! et quam potuit truculentissime eum aspexit. Illud praecipue 44 monendum, ne quis nisi summis ingenii viribus ad movendas lacrimas aggredi audeat; nam ut est longe vehementissimus hic, cum invaluit, affectus: ita, si nihil efficit, tepet; quem melius infirmus actor tacitis iudicum cogitationibus reliquisset.

45 Nam et vultus et vox et ipsa illa excitati rei facies ludibrio etiam plerumque sunt hominibus, quos non permoverunt. Quare metiatur ac diligenter aestimet vires suas actor et, quantum onus subiturus sit, intelligat; nihil habet ista res medium sed aut lacrimas meretur aut risum.

Non autem commovere tantum miserationem sed 46 etiam discutere epilogi est proprium cum oratione continua, quae motos lacrimis iudices ad iustitiam reducat tum etiam quibusdam urbane dictis, quale est *Date puero panem, ne ploret*; et corpulento litigatori, cuius adversarius, item puer, 47 circa iudices erat ab advocatione latus: *Quid faciam? ego te baiulare non possum*. Sed haec tamen non debent esse mimica. Itaque nec illum probaverim, quanquam inter clarissimos sui temporis oratores fuit, qui, pueris in epilogum productis, talos iecit in medium, quos illi diripere coeperunt; namque haec ipsa discriminis sui ignorantia potuit esse miserabilis; neque illum, qui, cum esset cruentus gladius 48 ab accusatore prolatus, quo is hominem probabat occisum, subito ex subselliis ut territus fugit, et, capite ex parte velato, cum ad agendum ex turba prospexisset, interrogavit, *an iam ille cum gladio recessisset?* Fecit enim risum sed ridiculus fuit. Discutiendae tamen oratione eiusmodi scena 49 nae, egregieque Cicero, qui contra imaginem Saturnini pro Rabirio graviter et contra iuvenem, cuius subinde vulnus in iudicio resolvebatur, pro Vareno multa dixit urbane.

Sunt et illi leniores epilogi, quibus adversario satis-50 facimus, si forte sit eius persona talis, ut illi debeatur reverentia, aut cum amice aliquid commonemus et ad concordiam hortamur. Quod est genus egregie tractatum a Passieno, cum Domitiae uxoris suae pecuniaria lite adversus fratrem eius Aenobarbum ageret; nam, cum de necessitudine multa

dixisset, de fortuna quoque, qua uterque abundabat, adiecit:
Nihil vobis minus deest, quam de quo contenditis.

- 51 Omnes autem hos affectus, etiamsi quibusdam videntur in prooemio atque in epilogo sedem habere, in quibus sane sint frequentissimi, tamen aliae quoque partes recipiunt sed breviores, ut cum ex iis plurima sit res eruenda. At hic, 52 si usquam, totos eloquentiae aperire fontes licet. Nam et, si bene diximus reliqua, possidebimus iam iudicum animos, et e confragosis atque asperis eveci tota pandere possumus vela, et, cum sit maxima pars epilogi amplificatio, verbis atque sententiis uti licet magnificis et ornatis. Tunc est commovendum theatrum, cum ventum est ad ipsum illud, quo veteres tragoediae comoediaeque cluduntur, *Plodite.*
- 53 In aliis autem partibus tractandus erit affectus, ut quisque nascetur, nam neque exponi sine hoc res atroces et miserabiles debent; cum de qualitate alicuius rei quaestio 54 est, probationibus uniuscuiusque rei recte subiungitur. Ubi vero coniunctam ex pluribus causam agimus: etiam necesse erit uti pluribus quasi epilogis, ut in Verrem Cicero fecit. Nam et Philodamo et nauarchis et cruci civis Romani et 55 aliis plurimis suas lacrimas dedit. Sunt, qui hos *μερικὸς ἐπιλόγους* vocent, quo partitam perorationem significant. Mihi non tam partes eius quam species videntur. Siquidem et epilogi et perorationis nomina ipsa aperte satis ostendunt, hanc esse consummationem orationis.

DE AFFECTIBUS.

- II. Quamvis autem pars haec iudicialium causarum summa praecipue constet affectibus, et aliqua de his necessario dixerim: non tamen potui ac ne debui quidem istum locum in unam speciem concludere. Quare adhuc opus superest, cum ad obtinenda, quae volumus, potentissimum, tum supradictis multo difficilius, movendi iudicum animos atque in eum, quem volumus, habitum formandi 2 et velut transfigurandi. Qua de re pauca, quae postulabat materia, sic attingi, ut magis, quid oporteret fieri, quam quo id modo consequi possemus, ostenderem. Nunc altius omnis rei repetenda ratio est.

Nam et per totam, ut diximus, causam locus est affectibus, et eorum non simplex natura nec in transitu tractanda, quo nihil afferre maius vis orandi potest. Nam cetera 3 forsitan tenuis quoque et angusta ingenii vena, si modo vel doctrina vel usu sit adiuta, generare atque ad frugem aliquam perducere queat; certe sunt semperque fuerunt non parum multi, qui satis perite, quae essent probationibus utilia, reperirent. Quos equidem non contemno, sed hactenus utiles credo, ne quid per eos iudici sit ignotum, atque (ut dicam, quod sentio) dignos, a quibus causam disertis docerentur; qui vero iudicem rapere et, in quem vellet habitum animi, posset perducere, quo dicto flendum, irascendum esset, rarus fuit. Atqui hoc est, quod dominetur in iudiciis, 4 haec eloquentiam regunt. Namque argumenta plerumque nascuntur ex causa, et pro meliore parte plura sunt semper, ut, qui per haec vicit, tantum non defuisse sibi advocatum sciat. Ubi vero animis iudicum vis afferenda est, et ab ipsa 5 veri contemplatione abducenda mens: ibi proprium oratoris opus est. Hoc non docet litigator, hoc libellis non continetur. Probationes enim efficiant sane, ut causam nostram meliorem esse iudices putent, affectus praestant, ut etiam velint; sed id, quod volunt, credunt quoque. Nam cum irasci, 6 favere, odisse, misereri coeperunt: agi iam rem suam existimant; et, sicut amantes de forma iudicare non possunt, quia sensum oculorum praecipit animus: ita omnem veritatis inquirendae rationem iudex omittit occupatus affectibus; aestu fertur et velut rapido flumini obsequitur. Ita argumenta ac 7 testes quid egerint, pronuntiatio ostendit; commotus autem ab oratore iudex, quid sentiat, sedens adhuc atque audiens confitetur. An, cum ille, qui plerisque perorationibus petitur, fletus erumpit, non palam dicta sententia est? Hue igitur incumbat orator, hoc opus eius, hic labor est, sine quo cetera nuda, ieiuna, infirma, ingrata sint; adeo velut spiritus operis huius atque animus est in affectibus.

Horum autem, sicut antiquitus traditum accepimus, duae 8 sunt species: alteram Graeci *πάθος* vocant, quod nos vertentes recte ac proprie *affectum* dicimus, alteram *ἦθος*, cuius nomine, ut ego quidem sentio, caret sermo Romanus;

mores appellantur, atque inde pars quoque illa philosophiae
 9 ἡθικὴ moralis est dicta. Sed ipsam rei naturam spectanti
 mihi non tam mores significari videntur quam *morum quae-*
dam proprietates; nam ipsis quidem omnis habitus mentis
 continetur. Cautiores voluntatem complecti quam nomina
 interpretari maluerunt. Affectus igitur hos *concitatos*, illos
mites atque *compositos* esse dixerunt; in altero vehementer
 commotos, in altero lenes; denique hos imperare, illos per-
 suadere; hos ad perlationem, illos ad benivolentiam praeva-
 10 lere. Adiciunt quidam peritorum, πάθος temporale esse.
 Quod ut accidere frequentius fateor: ita nonnullas credo
 esse materias, quae continuum desiderent affectum. Nec ta-
 men minus artis aut usus hi leniores habent; virium atque
 impetus non tantundem exigunt. In causis vero etiam pluri-
 11 bus. Nam cum ex illo et hoc loco nihil non ab oratore tra-
 ctetur: quidquid de honestis et utilibus denique faciendis et
 non faciendis dicitur, ἡθος vocari potest. Quidam commen-
 dationem atque excusationem propria huius officii putaverunt,
 nec abnuo esse ista in hac parte; sed non concedo, ut sola
 12 sint. Quin illud adhuc adicio, πάθος atque ἡθος esse in-
 terim ex eadem natura, ita ut illud maius sit hoc minus, ut
 amor πάθος, caritas ἡθος; interdum diversa inter se, sicut
 in epilogis, nam quae πάθος concitavit, ἡθος solet mitigare.
 Proprie tamen mihi huius nominis exprimenda natura est,
 quatenus appellatione ipsa non satis significari videtur.
 13 Ἠθος, quod intelligimus quodque a dicentibus desideramus,
 id erit, quod ante omnia bonitate commendabitur, non solum
 mite ac placidum sed plerumque blandum et humanum et
 audientibus amabile atque iucundum, in quo exprimendo
 summa virtus ea est, ut fluere omnia ex natura rerum homi-
 numque videantur, quo mores dicentis ex oratione perluceant
 14 et quodammodo agnoscantur. Quod est sine dubio inter con-
 iunctas maxime personas, quotiens ferimus, ignoscimus, sa-
 tisfacimus, monemus, procul ab ira, procul ab odio. Sed
 tamen alia patris adversus filium, tutoris adversus pupillum,
 mariti adversus uxorem moderatio est; hi enim praeferunt
 eorum ipsorum, a quibus laeduntur, caritatem, neque alio

modo invisos eos faciunt, quam quod amare ipsi videntur;
 alia, cum senex adolescentis convicium, honestus inferioris
 fert; hic enim tantum concitari illic etiam affici debet. Sunt 15
 et illa ex eadem natura sed motus adhuc minoris, veniam
 petere, adolescentium defendere amores. Nonnunquam etiam
 lenis caloris alieni derisus ex hac forma venit sed his non
 ex locis tantum. Verum aliquanto magis propria fuit virtus
 simulationis, satisfaciendi rogandi εἰσωνεία, quae diversum
 ei, quod dicit, intellectum petit. Hinc etiam ille maior ad 16
 conciliandum odium nasci affectus solet, cum hoc ipso, quod
 nos adversariis summittimus, intelligitur tacita impotentiae
 exprobratio. Namque eos graves et intolerabiles id ipsum
 demonstrat, quod cedimus, et ignorant cupidi maledicendi
 aut affectatores libertatis, plus invidiam quam convicium pos-
 se; nam invidia adversarios, convicium nos invisos facit.
 Ille iam paene medius affectus est ex amoribus et ex desi- 17
 deriis amicorum et necessariorum; nam et hoc maior est et
 illo minor. Non parum significanter etiam illa in scholis
 ἡθος dixerimus, quibus plerumque rusticos, supersticiosos,
 avaros, timidos secundum condicionem propositorum effingi-
 mus. Nam si ἡθος mores sunt: cum hos imitamur, ex his
 ducimus orationem.

Denique hoc omne bonum et comem virum poscit. 18
 Quas virtutes cum etiam in litigatore debeat orator, si fieri
 potest, approbare: utique ipse aut habeat aut habere creda-
 tur. Sic proderit plurimum causis, quibus ex sua bonitate
 faciet fidem. Nam qui, dum dicit, malus videtur, utique male
 dicit; non enim videtur iusta dicere, alioqui ἡθος videretur.
 Quare ipsum etiam dicendi genus in hoc placidum debet esse 19
 ac mite; nihil superbum, nihil elatum saltem ac sublime de-
 sideret; proprie, iucunde, credibiliter dicere sat est, ideo-
 que et medius ille orationis modus maxime convenit.

Diversum est huic, quod πάθος dicitur, quodque nos 20
 affectum proprie vocamus; et, ut proxime utriusque diffe-
 rentiam signem, illud comoediae hoc tragoediae simile.
 Haec pars circa iram, odium, metum, invidiam, miserationem
 fere tota versatur. Quae quibus ex locis ducenda sint, et
 manifestum omnibus et a nobis in ratione prooemii atque

21 epilogi dictum est. Et metum tamen duplicem intelligi volo, quem patimur et quem facimus, et invidiam; namque altera invidium altera invidiosum facit. Hoc autem hominis, illud rei est; in quo et plus habet operis oratio. Nam quaedam videntur gravia per se, parricidium, caedes, veneficium; 22 quaedam efficienda sunt. Id autem contingit, cum magnis alioqui malis gravius esse id, quod passi sumus, ostenditur; quale est apud Virgilium:

O felix una ante alias Priameia virgo,
Hostilem ad tumulum Troiae sub moenibus altis
Iussa mori —

(quam miser enim casus Andromachae, si comparata ei felix 23 Polyxena); aut cum ita exaggeramus iniuriam nostram, ut etiam, quae multo minora sunt, intoleranda dicamus: *Si pulsasses, defendi non poteras; vulnerasti*. Sed haec diligentius, cum ad eam amplificationem venerimus, dicemus. Interim notasse contentus sum, non id solum agere affectus, ut, quae sunt, ostendantur acerba ac luctuosa, sed etiam ut, quae toleranda haberi solent, gravia videantur: ut cum in maledicto plus iniuriae quam in manu, in infamia plus poe- 24 nae dicimus quam in morte. Namque in hoc eloquentiae vis est, ut iudicem non in id tantum compellat, in quod ipsa rei natura ducetur; sed aut, qui non est, aut maiorem quam est, faciat affectum. Haec est illa, quae *dehonestis* vocatur, rebus indignis, asperis, invidiosis addens vim oratio; qua virtute praeter alias plurimum Demosthenes valuit.

25 Quodsi tradita mihi sequi praecepta sufficeret: satisfaceram huic parti, nihil eorum, quae legi vel didici, quod modo probabile fuit, omittendo; sed eruere in animo est, quae latent, et penitus ipsa huius loci aperire penetralia, quae quidem non aliquo tradente sed experimento meo ac 26 natura ipsa duce accepi. Summa enim, quantum ego quidem sentio, circa movendos affectus in hoc posita est, ut moveamur ipsi. Nam et luctus et irae et indignationis aliquando etiam ridicula fuerit imitatio, si verba vultumque tantum non etiam animum accommodarimus. Quid enim aliud est causae, ut lugentes utique in recenti dolore disertissime quaedam exclamare videantur, et ira nonnunquam indoctis

quoque eloquentiam faciat, quam quod illis inest vis mentis et veritas ipsa morum? Quare in iis, quae verisimilia esse 27 volumus, simus ipsi similes eorum, qui vere patiuntur, affectibus, et a tali animo proficiscatur oratio, qualem facere iudicem volet. An ille dolebit, qui audiet me, qui in hoc dicam, non dolentem? irascetur, si nihil ipse, qui in iram concitat se idque exigit, similia patietur? siccis agentis oculis lacrimas dabit? Fieri non potest. Nec incendit nisi 28 ignis, nec madescimus nisi humore, nec res ulla dat alteri colorem, quem non ipsa habet. Primum est igitur, ut apud nos valeant ea, quae valere apud iudicem volumus, afficiamurque antequam afficere conemur. At quomodo fiet, ut 29 afficiamur? neque enim sunt motus in nostram potestatem. Temptabo etiam de hoc dicere. Quas *phantasiae* Graeci vocant, nos sane *visiones* appellemus, per quas imagines rerum absentium ita repraesentantur animo, ut eas cernere oculis ac praesentes habere videamur. Has quisquis bene conce- 30 perit, is erit in affectibus potentissimus. Hunc quidam dicunt *εὐφραστότων*, qui sibi res, voces, actus secundum verum optime finget; quod quidem nobis volentibus facile continget. An vero inter otia animorum et spes inanes et velut somnia * quaedam vigilantium ita nos haec, de quibus loquor, imagines prosequuntur, ut peregrinari, navigare, proeliari, populos alloqui, divitiarum, quas non habemus, usum videamur dispo- nere, nec cogitare sed facere: hoc animi vitium ad utilitatem non transferemus? At hominem occisum queror; non omnia, 31 quae in re praesenti accidisse credibile est, in oculis habebor? non percussor ille subitus erumpet? non expavescet circumventus? exclamabit? vel rogabit vel fugiet? non ferientem, non concidentem videbor? non animo sanguis et pallor et gemitus extremus denique expirantis hiatus insidet?

Insequetur *ἐνάγγελος*, quae a Cicerone *illustratio* et *evi-* 32 *dentia* nominatur, quae non tam dicere videtur quam ostendere; et affectus non aliter, quam si rebus ipsis intersimus, sequentur. An non ex his visionibus illa sunt: *Excussi manibus radii, revolutaque pensa?* — *Levique patens in* 33 *pectore vulnus?* equus ille in funere Pallantis, — *positis insignibus?* Quid? non idem poeta penitus ultimi fati con-

cepit imaginem, ut diceret: *Et dulces moriens reminiscitur Argos?* Ubi vero miseratione opus erit: nobis ea, de quibus queremur, accidisse credamus atque id animo nostro persuadeamus. Nos illi simus, quos gravia, indigna, tristia passos queremur, nec agamus rem quasi alienam sed assumamus parumper illum dolorem. Ita dicemus, quae in nostro simili casu dicturi essemus. Vidi ego saepe histriones atque comoedos, cum ex aliquo graviore actu personam deposuissent, flentes adhuc egredi. Quodsi in alienis scriptis sola pronuntiatio ita falsis accedit affectibus: quid nos faciemus, qui illa cogitare debemus et moveri periclitantium vice possumus? Sed in schola quoque rebus ipsis affici convenit easque veras sibi fingere, hoc magis quod illic ut litigatores loquimur frequentius quam ut advocati. Orbem agimus et naufragum et periclitantem, quorum induere personas quid attinet, nisi affectus assumimus? Haec dissimulanda mihi non fuerunt, quibus ipse, quantuscunque sum aut fui, pervenisse me ad aliquod nomen ingenii credo; frequenter motus sum, ut me non lacrimae solum deprehenderent sed pallor et veri similis dolor.

DE RISU.

III. Huic diversa virtus, quae risum iudicis movendo et illos tristes solvit affectus et animum ab intentione rerum frequenter avertit et aliquando etiam reficit et a satietate vel a fatigatione renovat. Quanta sit autem in ea difficultas, vel duo maxime oratores, alter Graecae alter Latinae eloquentiae principes, docent. Nam plerique Demostheni facultatem defuisse huius rei credunt, Ciceroni modum. Nec videri potest noluisse Demosthenes, cuius pauca admodum dicta nec sane ceteris eius virtutibus respondentia palam ostendunt, non displicuisse illi iocos sed non contigisse. Noster vero non solum extra iudicia sed in ipsis etiam orationibus habitus est nimius risus affectator. Mihi quidem, sive id recte iudico sive amore immodico praecipui in eloquentia viri labor, mira quaedam in eo videtur fuisse urbanitas. Nam et in sermone cotidiano multa et in altereationibus et interrogandis testibus plura quam quisquam dixit facete, et ipsa illa, quae sunt in Verrem dicta frigidius, aliis assi-

gnavit et testimonii loco posuit; ut, quo sunt magis vulgaria, eo sit credibilis, illa ab oratore non ficta sed passim esse iactata. Utinamque libertus eius Tiro aut alius, quisquis fuit, qui tris hac de re libros edidit, parcius dictorum numero indulsissent et plus iudicii in eligendis quam in congerendis studii adhibuissent: minus obiectus calumniantibus foret; qui tamen nunc quoque, ut in omni eius ingenio, facilius, quod reitici quam quod aditici possit, invenient. Afferunt autem summam rei difficultatem primum, quod ridiculum dictum plerumque falsum est, hoc semper, humile; saepe ex industria depravatum, praeterea nunquam honorificum; tum varia hominum iudicia in eo, quod non ratione aliqua sed motu animi quodam nescio an enarrabili iudicatur. Neque enim ab ullo satis explicari puto, licet multi temptaverint, unde risus, qui non solum factu aliquo dictove sed interdum quodam etiam corporis tractu lacessitur. Praeterea non una ratione moveri solet, neque enim acute tantum ac venuste sed stulte, iracunde, timide dicta aut facta ridentur; ideoque anceps eius rei ratio est, quod a derisu non procul abest risus. Habet enim, ut Cicero dicit, *sedem in deformitate aliqua et turpitudine*, quae cum in aliis demonstrantur, urbanitas; cum in ipsos dicentes recidunt, stultitia vocatur.

Cum videatur autem res levis et quae ab scurris, mimis, insipientibus denique saepe moveatur: tamen habet vim nescio an imperiosissimam, et cui repugnari minime potest. Erumpit etiam invitus saepe, nec vultus modo ac vocis exprimit confessionem sed totum corpus vi sua concutit. Rerum autem saepe (ut dixi) maximarum momenta vertit, ut cum odium iramque frequentissime frangat. Documento sunt iuvenes Tarentini, qui multa de rege Pyrrho securius inter coenam locuti, cum rationem facti reposcerentur, et neque negari res neque defendi posset: risu sunt et opportuno ioco elapsi. Namque unus ex iis, *Immo*, inquit, *nisi lagona defecisset, occidissemus te*; eaque urbanitate tota est invidia criminis dissoluta.

Verum hoc, quidquid est, ut non ausim dicere carere omnino arte, quia nonnullam observationem habet, suntque ad id pertinentia et a Graecis et a Latinis composita prae-

cepta: ita plane affirmo, praecipue positum esse in natura
 12 et in occasione. Porro natura non tantum in hoc valet,
 ut acutior quis atque habilior sit ad inveniendum; (nam id
 sane doctrina possit augeri) sed inest proprius quibusdam
 decor in habitu ac vultu, ut eadem illa minus alio dicente
 13 urbana esse videantur. Occasioni vero et in rebus est tanta
 vis, ut saepe adiuti ea non indocti modo sed etiam rustici
 salse dicant, et in eo, cum quis aliquid dixerit prior. Sunt
 enim longe venustiora omnia in respondendo quam in provo-
 14 cando. Accedit difficultati, quod eius rei nulla exercitatio
 est, nulli praeceptores. Itaque in conviviis et sermonibus
 multi dicaces, quia in hoc usu cotidiano proficimus. Ora-
 toria urbanitas rara, nec ex parte propria sed ad hanc con-
 15 suetudinem accommodata. Nihil autem vetabat et componi
 materias in hoc idoneas, ut controversiae permixtis salibus
 fingerentur, vel res proponi singulas ad iuvenum talem ex-
 16 ercitationem. Quin illae ipsae, (*dicta sunt ac vocantur*) quas
 certis diebus festae licentiae dicere solebamus, si paulum
 adhibita ratione fingerentur, aut aliquid in his serium quoque
 esset admixtum, plurimum poterant utilitatis afferre; quae
 nunc iuvenum vel sibi ludentium exercitatio est.

17 Pluribus autem nominibus in eadem re vulgo utimur;
 quae tamen si diducas, suam quandam propriam vim ostendunt.
 Nam et urbanitas dicitur, qua quidem significari
 video sermonem praeferentem in verbis et sono et usu pro-
 prium quandam gustum urbis et sumptam ex conversatione
 doctorum tacitam eruditionem, denique cui contraria sit ru-
 18 sticitas. Venustum esse, quod cum gratia quadam et ve-
 nere dicatur, apparet. Salsum in consuetudine pro ridiculo
 tantum accipimus; natura non utique hoc est, quanquam et
 ridicula oporteat esse salsa. Nam et Cicero omne, quod
 salsum sit, ait esse Atticorum, non quia sunt maxime ad ri-
 sum compositi; et Catullus, cum dicit, *Nulla est in corpore*
mica salis, non hoc dicit, nihil in corpore eius esse ridicu-
 19 lum. Salsum igitur erit, quod non erit insulsum, velut quod-
 dam simplex orationis condimentum, quod sentitur latente
 iudicio velut palato, excitatque et a taedio defendit oratio-
 nem. Sane tamen, ut ille in cibis paulo liberalius aspersus,

si tamen non sit immodicus, affert aliquid propriae voluptatis:
 ita hi quoque in dicendo habent quiddam, quod nobis
 faciat audiendi sitim. Facetum quoque non tantum circa
 ridicula opinor consistere. Neque enim diceret Horatius, 20
 facetum carminis genus natura concessum esse Vergilio.
 Decoris hanc magis et excultae cuiusdam elegantiae appella-
 tionem puto. Ideoque in epistolis Cicero haec Bruti refert
 verba: *Nae illi sunt pedes faceti ac deliciis ingredienti*
mollius. Quod convenit cum illo Horatiano, *molle atque*
facetum Vergilio. Locum vero accipimus, quod est contra- 21
 rium serio; nam et fingere et terrere et promittere interim
 iocus est. Dicacitas sine dubio a dicendo, quod est omni
 generi commune, ducta est, proprie tamen significat sermo-
 nem cum risu aliquos incessentem. Ideo Demosthenen urba-
 num fuisse dicunt, dicacem negant.

Proprium autem materiae, de qua nunc loquimur, est 22
 ridiculum, ideoque haec tota disputatio a Graecis *περὶ*
γέλοτον inscribitur. Eius prima divisio traditur eadem, quae
 est omnis orationis, ut sit positum in rebus aut in verbis.
 Usus autem maxime triplex. Aut enim ex aliis risum peti- 23
 mus aut ex nobis aut ex rebus mediis. Aliena aut re-
 prehendimus aut refutamus aut elevamus aut repercutimus
 aut eludimus. Nostra ridicule indicamus et, ut verbo Cicero-
 nis utar, dicimus aliqua subabsurda. Namque eadem, quae,
 si imprudentibus excidant, stulta sunt, si simulamus, venusta
 creduntur. Tertium est genus, ut idem dicit, in decipiendis 24
 expectationibus, dictis aliter accipiendis ceterisque, quae
 neutram personam contingunt ideoque a me media dicuntur.
 Item ridicula aut facimus aut dicimus. Facto risus 25
 conciliatur interim admixta gravitate: ut M. Caelius praetor,
 cum sellam eius curulem consul Isauricus fregisset, alteram
 posuit loris intentam; dicebatur autem consul a patre flagris
 aliquando caesus; interim sine respectu pudoris, ut in illa
 pyxide Caeliana, quod neque oratori neque ulli viro gravi
 conveniat. Idem autem de vultu gestuque ridiculo dictum 26
 sit; in quibus est quidem summa gratia, sed maior, cum cap-
 tare risum non videntur; nihil enim est his, quae sicut salsa
 dicuntur, insulsius. Quanquam autem gratiae plurimum di-

centis severitas affert, sitque ridiculum id ipsum, quod qui dicit illa, non ridet: est tamen interim et aspectus et habitus oris et gestus non inurbanus, cum iis modus contingit. Id porro, quod dicitur, aut est lascivum et hilare, qualia A. Galbae pleraque; aut contumeliosum, qualia nuper Iunii Bassi; aut asperum, qualia Cassii Severi; aut lene, qualia Domitii Afri. Refert, his ubi quis utatur. Nam in convictibus et cotidiano sermone lasciva humilibus, hilaria omnibus convenient. Laedere nunquam velimus, longeque absit propositum illud: *Potius amicum quam dictum perdidit*. In hac quidem pugna forensi malim mihi lenibus uti licere; nonnunquam et contumeliose et aspere dicere in adversarios permissum est, cum accusare etiam palam et caput alterius iuste petere concessum sit. Sed hic quoque tamen inhumana videri solet fortunae insectatio, vel quod culpa caret vel quod recidere etiam in ipsos, qui obiecerunt, potest. Primum itaque considerandum est, et quis et in qua causa et apud quem et in quem et quid dicat. Oratori minime convenit distortus vultus gestusque, quae in mimis rideri solent. Dicacitas etiam scurrilis et scenica huic personae alienissima est. Obscenitas vero non a verbis tantum abesse debet sed etiam a significatione. Nam si quando obiici potest, non in ioco exprobranda est. Oratorem praeterea ut dicere urbane volo: ita videri affectare id, plane nolo. Quapropter ne dicet quidem salse, quotiens poterit, et dictum potius aliquando perdet quam minuet auctoritatem. Nec accusatorem autem atroci in causa, nec patronum in miserabili iocantem feret quisquam. Sunt etiam iudices quidam tristiores quam ut risum libenter patiantur. Solet interim accidere, ut id, quod in adversarium dicimus, aut in iudicem conveniat aut in nostrum quoque litigatorem; quanquam aliqui reperiuntur, qui ne id quidem, quod in ipsos recidere possit, evitent. Quod fecit Longus Sulpicius, qui, cum ipse foedissimus esset, ait eum, contra quem iudicio liberali aderat, ne faciem quidem habere liberi hominis; cui respondens Domitius Afer, *Ex tui, inquit, animi sententia, Longe, qui malam faciem habet, liber non est?* Vitandum etiam, ne petulans, ne superbum, ne loco, ne tempore alienum, ne praeparatum et domo

allatum videatur, quod dicimus. Nam adversus miseros, sicut supra dixeram, inhumanus est iocus. Sed quidam ita sunt receptae auctoritatis ac notae verecundiae, ut nocitura sit in eos dicendi petulantia. Nam de amicis iam praeceptum est. Illud non ad orandi fere consilium sed ad hominis pertinet: laessat hoc modo, quem laedere sit periculosum, ne aut inimicitiae graves insequantur aut turpis satisfactio. Male etiam dicitur, quod in plures convenit, si aut nationes totae incessantur aut ordines aut condicio aut studia multorum. Ea, quae dicit vir bonus, omnia salva dignitate ac verecundia dicit. Nimum enim risus pretium est, si probitatis impendio constat.

Unde autem concilietur risus et quibus ex locis peti soleat, difficillimum dicere. Nam si species omnes persequi velimus: nec modum reperiemus et frustra laborabimus. Neque enim minus numerosi sunt loci, ex quibus haec dicta, quam illi, ex quibus eae, quas sententias vocamus, ducuntur, neque alii. Nam hic quoque est inventio et elocutio, atque ipsius elocutionis vis alia in verbis alia in figuris. Risus igitur oriuntur aut ex corpore eius, in quem dicimus, aut ex animo, qui factis ab eo dictisque colligitur, aut ex his, quae sunt extra posita. Intra haec enim est omnis vituperatio; quae si gravius posita sit, severa est; si levius, ridicula. Haec aut ostenduntur aut narrantur aut dicto notantur. Rarum est, ut oculis subiicere contingat, ut fecit C. Iulius; qui, cum Helvio Manciae saepius obstrepenti sibi diceret, *Etiā ostendam, qualis sis*, isque plane instaret interrogatione, qualem se ostensurus esset: digito demonstravit imaginem Galli in scuto Cimbrico pictam, cui Manciatum simillimus est visus. Tabernae autem erant circa forum, ac scutum illud signi gratia positum. Narrare, quae salsa sint, inprimis est subtile et oratorium, ut Cicero pro Cluentio narrat de Cepasio atque Fabricio aut M. Caelius de illa D. Laelii collegaeque eius in provinciam festinantium contentione. Sed in his omnibus cum elegans et venusta exigitur tota expositio, tum id festivissimum est, quod adicit orator. Nam et a Cicerone sic est Fabricii fuga illa condita: *Itaque cum callidissime se putaret dicere, et cum illa verba gra-*

vissima ex intimo artificio deprompsisset, *Respicite C. Fabricii senectutem; cum hoc, Respicite, ornandae orationis causa saepe dixisset: respexit ipse; at Fabricius a subselliis demisso capite discesserat, et cetera, quae adiecit; nam est notus locus; cum in re hoc solum esset, Fabricium a iudicio recessisse. Et Caelius cum omnia venustissime finxit tum illud ultimum, Hic subsecutus quomodo transierit, utrum rate an piscatorio navigio, nemo sciebat. Siculi quidem, ut sunt lascivi et dicaces, aiebant in delphino sedisse et sic tanquam Ariona transvectum. In nar-
41 rando autem Cicero consistere facetias putat, dicacitatem in iaciendo. Mire fuit in hoc genere venustus Afer Domitius, cuius orationibus complures huiusmodi narrationes insertae reperiuntur; sed dictorum quoque ab eodem urbane sunt
43 editi libri. Illud quoque genus est positum non in hac veluti iaculatione dictorum et inclusa breviter urbanitate sed in quodam longiore actu, quod de L. Crasso contra Brutum Cicero in secundo de Oratore libro et aliis quibusdam locis
44 narrat. Nam, cum Brutus in accusatione Cn. Planci ex duobus lectoribus ostendisset, contraria L. Crassum patronum eius in oratione, quam de Colonia Narbonensi habuerat, suasisse iis, quae de lege Servilia dixerat: tris excitavit et ipse lectores, hisque patris eius dialogos dedit legendos; quorum cum in Privernati unus, alter in Albano, tertius in Tiburti sermonem habitum complecteretur: requirebat, ubi essent eae possessiones? Omnes autem illas Brutus vendiderat; et tum paterna emancupare praedia turpius habebatur. Similis in apologis quoque et quibusdam interim etiam historiis exponendi gratia consequi solet.
45 Sed acutior est illa atque velocior in urbanitate bre-
46 vitas. Cuius quidem duplex forma est dicendi ac respon-
dendi, sed ratio communis in partem; nihil enim quod in lacessendo dici potest, non etiam in repercutiendo. At quaedam propria sunt respondentium; illa etiam ira concitati afferre solent, haec plerumque in altercatione aut in rogandis testibus requiruntur. Cum sint autem loci plures, ex quibus dicta ridicula ducantur: repetendum est mihi, non omnes eos oratoribus convenire; in primis autem ex amphibolia ne-*

que illa obscura, quae Atellani e more captant, nec, qualia vulgo iactantur a vilissimo quoque, conversa in maledictum ferè ambiguitate; ne illa quidem, quae Ciceroni aliquando sed non in agendo exciderunt, ut dixit, cum is candidatus, qui coci filius habebatur, coram eo suffragium ab alio peteret: *Ego quoque tibi favebo*. Non, quia excludenda sint
48 omnino verba duos sensus significantia, sed quia raro belle respondeant, nisi cum prorsus rebus ipsis adiuvantur. Quale non hoc modo paene et ipsum scurrile Ciceronis est in eundem, de quo supra dixi, Isauricum: *Miror, quid sit, quod pater tuus, homo constantissimus, te nobis varium reliquit*. Sed illud ex eodem genere praeclarum, cum obiiceret Mi-
49 loni accusator in argumentum factarum Clodio insidiarum, quod Bovillas ante horam nonam devertisset, ut expectaret, dum Clodius a villa sua exiret, et identidem interrogaret, quo tempore Clodius occisus esset: respondit, *Sero*; quod vel solum sufficit, ut hoc genus non totum repudietur. Nec
50 plura modo significari solent, sed etiam diversa, ut Nero de servo pessimo dixit: *Nulli plus apud se fidei haberi, nihil ei neque oclusum neque signatum esse*. Pervenit res us-
51 que ad aenigma, quale est Ciceronis in Pletorium Fonteii accusatorem, *cuius matrem, dixit, dum vixisset, ludum, postquam mortua esset, magistros habuisse*. Dicebantur autem, dum vixit, infames feminae convenire ad eam solitae; post mortem bona eius venibant. Quanquam hic *ludus* per translationem dictus est, *magistri* per ambiguitatem. In me-
52 talepsin quoque cadit eadem ratio dictorum, ut Fabius Maximus, incusans Augusti congiariorum, quae amicis dabantur, exiguitatem, *hemnaria* esse dixit; nam *congiarium* commune liberalitatis atque mensurae, ea mensura ducta in minutionem rerum. Haec tam frigida, quam est nomen
53 fictio adiectis, detractis, mutatis litteris: ut *Acisculum*, quia esset pactus, *Pacisculum*; et Placidum nomine, quod is acerbus natura esset, *Acidum*; et Tullium, cum fur esset, *Tollium* dictos invenio. Sed haec eadem genera commodius
54 in rebus quam in nominibus respondent. Afer enim venuste Mallium Suram, multum in agendo discursantem, salientem, manus iactantem, togam deicientem et reponentem, non

agere, dixit, *sed satagere*. Est enim dictum per se urbanum, *satagere*, etiamsi nulla subsit alterius verbi similitudo.

55 Fiunt et adiecta et detracta aspiratione et divisio coniunctisque verbis similiter saepius frigida, aliquando tamen recipienda. Eademque condicio est in iis, quae a nominibus trahuntur. Multa ex hoc Cicero in Verrem, sed ut ab aliis dicta, modo *futurum*, ut *omnia verberet*; [cum diceretur ei Verres] modo *Herculi*, quem expilaverat, *molestiorem pro Erymanthio fuisse*; modo *malum Sacerdotem, qui tam nequam verrem reliquisset*; quia Sacerdoti Verres successerat.

56 Praebet tamen aliquando occasionem quaedam felicitas hoc quoque genere bene utendi: ut pro Caecina Cicero in testem Sex. Clodium Phormionem, *Nec minus niger, nec minus confidens quam est ille Terentianus Phormio*.

57 Acriora igitur sunt et elegantiora, quae trahuntur ex vi rerum. In his maxime valet similitudo, si tamen ad aliquid inferius leviusque referatur; quae iam veteres illi iocabantur, qui Lentulum *Spintherem* et Scipionem *Serapionem* esse dixerunt. Sed ea non ab hominibus modo petitur verum etiam ab animalibus, ut nobis pueris Iunius Bassus, 58 homo inprimis dicax, *Asinus albus* vocabatur. Et Sarmentus seu P. Blessus Iulium, hominem nigrum et macrum et pandum, *fibulam ferream* dixit. Quod nunc risus petendi genus 59 frequentissimum est. Adhibetur autem similitudo interim palam, interim inseri solet parabola; cuius est generis id Augusti, qui militi libellum timide porrigenti, *Noli*, inquit, 60 *timere, quasi assem elephanto des*. Sunt quaedam veri similia; unde Vatinius dixit hoc dictum, cum reus, agente in eum Calvo, frontem candido sudario tergeret, idque ipsum accusator in invidiam vocaret, *Quamvis reus sum*, inquit, et 61 *panem candidum edo*. Adhuc est subtilior illa ex simili translatio, cum, quod in alia re fieri solet, in aliam mutamur. Ea dicatur sane fictio: ut Chrysippus, cum in triumpho Caesaris eborea oppida essent translata, et post dies paucos Fabii Maximi lignea, *thecas esse oppidorum Caesaris* dixit. Et Pedo de mirmillone, qui retiarium consequen- 62 batur nec feriebat, *Vicum*, inquit, *capere vult*. Iungitur amphiboliae similitudo, ut a L. Galba, qui pilam negligenter

petenti, *Sic*, inquit, *petis, tanquam Caesaris candidatus*. Nam illud *petis* ambiguum est, securitas similis. Quod haec- 63 nus ostendisse satis est. Ceterum frequentissima aliorum generum cum aliis mixtura est, eaque optima, quae ex pluribus constat. Eadem dissimilium ratio est. Hinc eques Romanus, ad quem in spectaculis bibentem cum misisset Augustus, qui ei diceret, *Ego si prandere volo, domum eo: Tu enim*, inquit, *non times, ne locum perdas*. Ex con- 64 trario non una species. Neque enim eodem modo dixit Augustus praefecto, quem cum ignominia mittebat, subinde interponenti precibus, *Quid respondebo patri meo? Dic, me tibi displicuisse*; quo Galba penulam roganti: *Non possum commodare, domi maneo*; cum coenaculum eius perpleret. Tertium adhuc illud: (siquidem, ut ne auctorem ponam, verecundia ipsius facit) *Libidinosior es quam ullus spado*; quo sine dubio et opinio decipitur sed ex contrario. Et hoc ex eodem loco est sed nulli priorum simile, quod dixit M. Vestinus, cum ei nuntiatum esset, *Aliquando desinet putere*. Onerabo librum exemplis similemque iis, qui 65 risus gratia componuntur, efficiam, si persequi voluero singula veterum.

Ex omnibus argumentorum locis eadem occasio est. Nam et finitione usus est Augustus de pantomimis duobus, qui alternis gestibus contendebant, cum eorum alterum *sal- 66 torem* dixit alterum *interpellatorem*; et partitione Galba, 66 cum penulam roganti respondit, *Non pluit, non opus est tibi; si pluit, ipse utar*. Proinde genere, specie, propriis, differentibus, iugatis, adiunctis, consequentibus, antecedentibus, repugnantibus, causis, effectis, comparatione parium, maiorum, minorum similis materia praebet. Sicut in tropos quoque omnes cadit. An non plurima καὶ ὑπερβολὴν di- 67 cuntur? quale refert Cicero de homine praelongo, *caput eum ad fornicem Fabium offendisse*; et quod P. Oppius dixit de genere Lentulorum, cum assidue minores parentibus liberi essent, *nascendo interiturum*. Quid ironia? nonne 68 etiam quae severissime sit, ioci prope genus est? Qua urbane usus est Afer, cum Didio Gallo, qui provinciam ambitiosissime petierat, deinde, impetrata ea, tanquam coactus quere-

batur, *Age*, inquit, *aliquid et rei publicae causa elabora*; quaque Cicero lusit, cum, Vatini morte nuntiata, cuius parum 69 certus dicebatur auctor, *Interim*, inquit, *usura fruar*. Idem per allegoriam M. Caelium, melius obiiicientem crimina quam defendentem, *Bonam dextram, malam sinistram habere* dicebat. Emphasi A. Tullius dixit, *ferrum in Tuo-70 cium incidisse*. Figuras quoque mentis, quae *σχηματα δια- volas* dicuntur, res eadem recipit omnes, in quas nonnulli diviserunt species ditorum. Nam et interrogamus et dubitamus et affirmamus et minamur et optamus, quaedam ut miserantes, quaedam ut irascentes dicimus. Ridiculum est au-71 tem omne, quod aperte fingitur. Stulta reprehendere facillimum est, nam per se sunt ridicula; sed rem urbanam facit aliqua ex nobis adiectio. Stulte interrogaverat exeuntem de theatro Carpathium Titius Maximus, an spectasset? fecit Carpathius dubitationem eius stultiorem dicendo, *Non, sed in orchestra pila lusi*.

72 Refutatio cum sit in negando, redarguendo, defendendo, elevando: ridicule negavit Manius Curius; nam, cum eius accusator in sipario omnibus locis aut nudum eum in nervo aut ab amicis redemptum ex alea pinxisset: *Ergo* 73 *ego*, inquit, *nunquam vici?* Redarguimus interim aperte, ut Cicero Vibium Curium multum de annis aetatis suae mentientem, *Tum ergo, cum una declamamus, non eras natus*; interim et simulata assensione, ut idem Fabia Dolabellae dicente, triginta se annos habere, *Verum est*, inquit; *nam* 74 *hoc illam viginti annis audio*. Belle interim subiicitur pro eo, quod neges, aliud mordacius: ut Iunius Bassus, querente Domitia Passieni, quod ineusans eius sordes calceos eam veteres diceret vendere solere, *Non mehercules*, inquit, *hoc inquam dixi; sed dixi, emere te solere*. Defensionem imitatus est eques Romanus, qui obiiicienti Augusto, 75 quod patrimonium comedisset, *Meum*, inquit, *putavi*. Elevandi ratio est duplex, ut aut verecundiam quis aut iactantiam minuat: quemadmodum C. Caesar Pomponio ostendenti vulnus ore exceptum in seditione Sulpicianae, quod is se passum pro Caesare pugnantem gloriabatur, *Nunquam fugiens respexeris*, inquit; aut crimen obiectum, ut Cicero obiurgan-

tibus, quod sexagenarius Publiliam virginem duxisset, *Cras mulier erit*, inquit. Hoc genus dicti *consequens* vocant 76 quidam, atque illi simile, quod Cicero Curionem semper ab excusatione aetatis incipientem, *facilius cotidie prooemium habere*, dixit; quia ista natura sequi et cohaerere videantur. Sed elevandi genus est etiam causarum relatio, qua Ci-77 cero est usus in Vatinium. Qui pedibus aeger, cum vellet videri commodioris valetudinis factus et diceret, se iam bina milia passuum ambulare, *Dies enim*, inquit, *longiores sunt*. Et Augustus nuntiantibus Tarraconensibus, palmam in ara eius enatam, *Apparet*, inquit, *quam saepe accendatis*. Transtulit crimen Cassius Severus. Nam cum obiurgare-78 tur a praetore, quod advocati eius L. Varo Epicureo, Caesaris amico, convicium fecissent, *Nescio*, inquit, *qui conviciati sint, et puto Stoicos fuisse*.

Repercutiendi multa sunt genera, venustissimum, quod etiam similitudine aliqua verbi adiuvatur: ut Trachalus dicenti Suelio, *Si hoc ita est, is in exilium; si non est ita, redis*, inquit. Elusit Cassius Severus obiiiciente quodam, 79 quod ei domo sua Proculcius interdixisset, respondendo, *Numquid ergo illuc accedo?* Sic eluditur et ridiculum ridiculo: ut divus Augustus, cum ei Galli torquem aureum centum pondo dedissent, et Dolabella per iocum temptans tamen ioci sui eventum dixisset, *Imperator, torque me dona: Ma-* 80 *lo*, inquit, *ter civica donare*; mendacium quoque mendacio, ut Galba, dicente quodam, victoriato se uno in Sicilia quinque pedes longam murenam emisse: *Nihil*, inquit, *mirum; nam ibi tam longae nascuntur, ut iis piscatores pro resti-* 81 *bis cingantur*. Contraria est neganti confessionis simulatio, sed ipsa quoque multum habet urbanitatis. Sic Afer, cum ageret contra libertum Claudii Caesaris, et ex diverso quidam condicionis eiusdem, cuius erat litigator, exclamasset, *Praeterea tu semper in libertos Caesaris dicis: Nec mehercule*, inquit, *quicquam proficio*. Cui vicinum est non negare, quod obiiicitur, cum et id palam falsum est et inde materia bene respondendi datur: ut Catulus dicenti Philippo, *Quid latras? Furem video*, inquit. In se dicere 82 non fere est nisi scurrarum et in oratore utique minime pro-

habile; quod fieri totidem modis quot in alios potest. Ideo-
83 que hoc, quamvis frequens sit, transeo. Illud vero, etiamsi
ridiculum est, indignum tamen homine tolerabili, quod aut
turpiter aut potenter dicitur; quod fecisse quendam scio, qui
humiliori libere adversus se loquenti, *Colaphum*, inquit,
tibi ducam et formulam scribam, quod caput durum ha-
beas. Hic enim dubium est, utrum ridere audientes an in-
dignari debuerint.

84 Superest genus decipiendi opinionem aut dicta
aliter intelligendi, quae sunt in omni hac materia vel vengu-
stissima. Inopinatum et a lacessente poni solet, quale est,
quod refert Cicero, *Quid huic abest, nisi res et virtus?* aut
illud Afri, *Homo in agendis causis optime vestitus*; et in
occurrento, ut Cicero, audita falsa Vatini morte, cum ob-
vium libertum eius interrogasset, *Rectene omnia?* dicenti,
85 *Recte; Mortuus est?* inquit. Plurimus autem circa simu-
lationem et dissimulationem risus est, quae sunt vi-
cina et prope eadem: sed simulatio est certam opinionem
animi sui imitantis, dissimulatio aliena se parum intelligere
fingentis. Simulavit Afer, cum in causa subinde dicentibus,
Celsinam de re cognovisse, quae erat potens femina: *Quis*
86 *est, inquit, iste?* Celsinam enim videri sibi virum finxit. Dis-
simulavit Cicero, cum Sex. Annalis testis reum laesisset, et
instaret identidem accusator ei, *Dic, M. Tulli, numquid*
potes de Sex. Annali? versus enim dicere coepit de libro
Ennii annali sexto:

Quis potis ingentis causas evolvere belli.

87 Cui sine dubio frequentissimam dat occasionem ambiguitas:
ut Cascellio, qui consultatori dicenti, *Navem dividere volo;*
Perdes, inquit. Sed averti intellectus et aliter solet, cum
ab asperioribus ad leniora deflectitur: ut qui interrogatus,
quid sentiret de eo, qui in adulterio deprehensus esset, *Tar-*
88 *dum fuisse* respondit. Ei confine est, quod dicitur per su-
spicionem: quale illud apud Ciceronem querenti, quod uxor
sua ex fico sese suspendisset, *Rogo, des mihi surculum ex*
illa arbore, ut inseram. Intelligitur enim, quod non dicitur.
89 Et hercule omnis salse dicendi ratio in eo est, ut aliter,
quam est rectum verumque, dicatur; quod fit totum fingen-

dis aut nostris aut alienis persuasionibus aut dicendo, quod
fieri non potest. Aliena finxit Iuba, qui querenti, quod ab 90
equo suo esset aspersus, *Quid? Tu, inquit, me Hippocen-*
taurum putas? sua C. Cassius, qui militi sine gladio decur-
renti, *Heus, commilito, pugno bene uteris*, inquit. Et Galba
de piscibus, qui cum pridie ex parte adesi et versati postera
die appositi essent, *Festinemus, alii subcoenant*, inquit.
Tertium illud Cicero, ut dixi, adversus Curium; fieri enim
certe non poterat, ut, cum declamaret, natus non esset. Est 91
et illa ex ironia fictio, qua usus est C. Caesar. Nam cum
testis diceret, a reo femina sua ferro petita, et esset facilis
reprehensio, cur illam potissimum partem corporis vulnerare
voluisset: *Quid enim faceret*, inquit, *cum tu galeam et lo-*
ricam haberes? Vel optima est simulatio contra simulantem, 92
qualis illa Domitii Afri fuit: Vetus habebat testamentum, et
unus ex amicis recentioribus, sperans aliquid ex mutatione
tabularum, falsam fabulam intulerat, consulens eum, an pri-
mipilari seni iam testato rursus suaderet ordinare suprema
iudicia. *Noli, inquit, facere; offendis illum.*

Lucundissima sunt autem ex his omnibus lenia et, ut sic 93
dixerim, boni stomachi: ut Afer idem ingrato litigatori con-
spectum eius in foro vitanti per nomenclatorem missum ad
eum, *Amas me*, inquit, *quod te non vidi?* Et dispensatori,
qui, cum ad reliqua non responderet, dicebat subinde, *Non*
comedi panem et aquam bibo: Passer redde, quod debes.
Quae ἐπὶ τὸ ἦθος vocant. Est gratus iocus, qui minus ex- 94
probrat quam potest, ut idem dicenti candidato, *Semper do-*
num tuam colui; cum posset palam negare, *Credo*, inquit,
et verum est. Interim de se dicere ridiculum et, quod in
alium si absentem diceretur, urbanum non erat, quoniam
ipsi palam exprobratur, movet risum: quale Augusti est, cum 95
ab eo miles nescio quid improbe peteret, et veniret contra
Marcianus, quem suspicabatur et ipsum aliquid iniuste roga-
turum: *Non magis*, inquit, *faciam, commilito, quae petis,*
quam quod Marcianus a me petiturus est.

Adiuvant urbanitatem et versus commode positi, seu 96
toti ut sunt, (quod adeo-facile est, ut Ovidius ex tetrastichon
Macri carmine librum in malos poetas composuerit) quod fit

gratius, si qua etiam ambiguitate conditur: ut Cicero in Lartium, hominem callidum et versutum, cum is in quadam causa suspectus esset, *Nisi si qua Ulixes intervasit Lartius*; seu 97 verbis ex parte mutatis: ut in eum, qui, cum antea stultissimus esset habitus, post acceptam hereditatem primus sententiam rogabatur, *Cuius hereditas est, quam vocant sapientiam, pro illo, facilitas est*; seu ficti notis versibus similes, quae *περφοδια* dicitur; et proverbia opportune aptata: ut homini nequam lapsus et, ut allevaretur, roganti, *Tollat te, qui non novit*. Ex historia etiam ducere urbanitatem, eruditum est: ut Cicero fecit, cum ei testem in iudicio Verri roganti dixisset Hortensius, *Non intelligo haec aenigmata. Atquid debes*, inquit, *cum Sphingem domi habeas*; acceperat autem ille a Verre Sphingem aeneam magnae pecuniae.

99 Subabsurda illa constant stultissimi imitatione, et quae, nisi fingantur, stulta sunt: ut, qui mirantibus, quod humile candelabrum emisset, *Pransorium erit*, inquit. Sed illa similia absurdis sunt acria, quae tanquam sine ratione dicta feruntur: ut servus Dolabellae, cum interrogaretur, an dominus eius auctionem proposuisset, *Domum*, inquit, *ven-100 didit*. Deprehensi interim pudorem suum ridiculo aliquo explicant: ut, qui testem dicentem se a reo vulneratum interrogaverat, an cicatricem haberet, cum ille ingentem in * femine ostendisset, *Latus*, inquit, *oportuit*. Contumeliis quoque uti belle datur: ut Hispano obiciienti bis acerba crimina accusatori, *Mentiris*, inquit. Et Fulvius Propinquus legato interroganti, an in tabulis, quas proferebat, chirographus esset, *Et verus*, inquit, *domine*.

101 Has aut accepi species aut inveni frequentissimas, ex quibus ridicula ducerentur; sed repetam necesse est, infinitas esse tam salse dicendi quam severe, quas praestat persona, locus, tempus, casus denique, qui est maxime varius.

102 Itaque haec, ne omisisse viderer, attigi; illa autem, quae de * usu ipso et modo iocandi complexus sum, adeo infirmarem.

Plane necessaria his adiicit Domitius Marsus, qui de urbanitate diligentissime scripsit, quaedam non ridicula sed cuilibet severissimae orationi convenientia eleganter dicta et proprio quodam lepore incunda; quae sunt quidem urbana

sed risum tamen non habent. Neque enim ei de risu sed de 103 urbanitate est opus institutum, quam propriam esse nostrae civitatis et sero sic intelligi coeptam, postquam Urbis appellatione, etiamsi nomen proprium non adiceretur, Romam tamen accipi sit receptum. Eamque sic finit: Urbanitas 104 est virtus quaedam in breve dictum coacta et apta ad delectandos movendosque homines in omnem affectum animi, maxime idonea ad resistendum vel lacessendum, prout quaeque res aut persona desiderat. Cui si brevitatis exceptionem detraxeris, omnes orationis virtutes complexa sit. Nam, si consistat rebus et personis: quod in utrisque oporteat dicere, perfectae eloquentiae est. Cur autem brevem esse eam voluerit, nescio quidem. At, quam in eodem libro dicat 105 fuisse et in multis, narrandi urbanitatem paulo post ita finit, Catonis (ut ait) opinionem secutus, *Urbanus homo erit, cuius multa bene dicta responsaque erunt, et qui in sermonibus, circulis, conviviiis, item in contionibus, omni denique loco ridicule commodeque dicet. Risus erunt, quicunque haec faciet orator*. Quas si recipimus finitiones, 106 quidquid bene dicetur, et urbane dicti nomen accipiet. Ceterum illi, qui hoc proposuerat, consentanea fuit illa divisio, ut dictorum urbanorum alia seria alia iocosa alia media faceret. Nam est eadem omnium bene dictorum. Verum mihi etiam iocosa quaedam videntur posse non satis urbane referri. Nam meo quidem iudicio illa est urbanitas, in qua 107 nihil absonum, nihil agreste, nihil inconditum, nihil peregrinum neque sensu neque verbis neque ore gestive possit deprehendi; ut non tam sit in singulis dictis quam in toto colore dicendi, qualis apud Graecos *ἀρτιμετρός* ille reddens Athenarum proprium saporem. Ne tamen iudicium Marsi, 108 hominis eruditissimi, subtraham: seria partitur in tria genera, honorificum, contumeliosum, medium. Et honorifici ponit exemplum Ciceronis pro Ligario apud Caesarem, *Qui nihil soles oblivisci nisi iniurias*; et contumeliosi, quod Attico scripsit de Pompeio et Caesare, *Habeo, quem fugiam; quem sequar, non habeo*; et medii, quod *ἀποφθεγματικόν* vocat et est ita, cum dixerit, *Nec gravem mortem accidere viro forti posse nec immaturam consulari neque miseram*

sapienti. Quae omnia sunt optime dicta: sed cur proprie
 110 nomen urbanitatis accipiant, non video. Quod si non totus,
 ut mihi videtur, orationis color meretur, sed etiam singulis
 dictis tribuendum est: illa potius urbana dixerim, quae sunt
 generis eiusdem, quo ridicula dicuntur et tamen ridicula non
 sunt, ut de Pollione Asinio seriis iocisque pariter accom-
 111 modato dictum est, *Esse eum omnium horarum;* et de
 actore facile dicente ex tempore, *Ingenium eum in nume-
 rato habere;* etiam Pompeii, quod refert Marsus, in Cicero-
 nem diffidentem partibus, *Transi ad Caesarem, me timebis.*
 Erat enim, si de re minore aut alio animo aut denique non
 ab ipso dictum fuisset, quod posset inter ridicula numerari.
 112 Etiam illud, quod Cicero Cerelliae scripsit reddens rationem,
 cur illa C. Caesaris tempora tam patienter toleraret, *Haec
 aut animo Catonis ferenda sunt aut Ciceronis stomacho;*
 stomachus enim ille habet aliquid ioco simile. Haec, quae
 movebant, dissimulanda mihi non fuerunt; in quibus ut erra-
 verim, legentes tamen non decepi, indicata et diversa opi-
 nione, quam sequi magis probantibus liberum est.

DE ALTERCATIONE.

IV. Altercationis praecepta poterant videri tunc
 inchoanda, cum omnia, quae ad continuam orationem perti-
 nent, peregissem, nam est usus eius ordine ultimus; sed,
 cum sit posita in sola inventione, neque habere dispositio-
 nem possit nec elocutionis ornamenta magnopere desideret
 aut circa memoriam et pronuntiationem laboret: prius quam
 secundam quinque partium, hanc, quae tota ex prima pen-
 det, tractaturus non alieno loco videor; quam scriptores alii
 fortasse ideo reliquerunt, quia satis ceteris praeceptis in
 2 hanc quoque videbatur esse prospectum. Constat enim ex
 intentione ac depulsione, de quibus satis traditum est; quia,
 quidquid in actione perpetua circa probationes utile est, idem
 in hac brevi atque concisa prosit necesse est. Neque alia
 dicuntur in altercatione sed aliter, aut interrogando aut re-
 spondendo. Cuius rei fere omnis observatio in illo testium
 3 loco excussa nobis est. Tamen quia latius hoc opus aggressi
 sumus, neque perfectus orator sine hac virtute dici potest,

paululum impendamus huic quoque peculiaris operae, quae
 quidem in quibusdam causis ad victoriam vel plurimum valet.
 Nam ut in qualitate generali, in qua, rectene factum quid an
 4 contra sit, quaeritur, perpetua dominatur oratio; et quaestio-
 nem finitionis actiones plerumque satis explicant et omnia
 paene, in quibus de facto constat aut coniectura artificiali
 ratione colligitur: ita in iis causis, quae sunt frequentissimae,
 quae vel solis extra artem probationibus vel mixtis conti-
 nentur, asperrima in hac parte dimicatio est, nec alibi dixe-
 ris magis mucrone pugnari. Nam et firmissima quaeque me- 5
 moriae iudicis inculcanda sunt, et praestandum, quidquid in
 actione promisimus, et refellenda mendacia. Nusquam est
 denique, qui cognoscit, intentior. Nec immerito quidam
 quanquam in dicendo mediocres hac tamen altercandi prae-
 stantia meruerunt nomen patronorum. At quidam litigatori- 6
 bus suis illum modo ambitiosum declamandi sudorem prae-
 stitisse contenti cum turba laudantium destituunt subsellia
 pugnamque illam decretoriam imperitis ac saepe pullatae
 turbae relinquunt. Itaque videas alios plerumque iudiciis 7
 privatis ad actiones advocari alios ad probationem. Quae
 si dividenda sunt officia: hoc certe magis necessarium est,
 pudendumque dictu, si plus litigantibus prosunt minores. In
 publicis certe iudiciis vox illa praeconis praeter patronos
 ipsum, qui egerit, citat.

Opus est igitur imprimis ingenio veloci ac mobili, 8
 animo praesenti et acri. Non enim cogitandum sed dicendum
 statim est et prope sub conatu adversarii manus exigenda.
 Quare cum in omni parte huiusce officii plurimum facit, to-
 tas non diligenter modo sed etiam familiariter nosse causas:
 tum in altercatione maxime necessarium est, omnium per-
 sonarum, instrumentorum, temporum, locorum habere noti-
 tiam. Alioqui et tacendum erit saepe et, aliis subiicienti-
 bus, plerumque studio loquendi fatue modo accedendum;
 quo nonnunquam accidit, ut in nostra credulitate aliena stul-
 titia erubescamus. Neque tantum hoc ipsis monitoribus cla- 9
 rescit; quidam faciunt aperte, quae rixemur. Videas enim *
 plerosque ira percitos exclamantes, ut iudex audiat, contra-
 rium id esse, quod admoneantur, sciatque ille, qui pronuntia-

10 turus est in causa, malum, quod tacetur. Quare bonus alter-
 cator vitio iracundiae careat; nullus enim rationi magis
 obstat affectus et fert extra causam et plerumque deformia
 convicia facere ac mereri cogit et in ipsos nonnunquam iu-
 dices incitat. Melior moderatio ac nonnunquam etiam pa-
 tientia. Neque enim refutanda tantum, quae ex contrario
 dicuntur, sed contemnenda, elevanda, ridenda sunt; nec us-
 quam plus loci recipit urbanitas. Hoc, dum ordo est et
 pudor; contra turbantes audendum et impudentiae fortiter
 11 resistendum. Sunt enim quidam praeduri in hoc oris, ut ob-
 strepant ingenti clamore et medios sermones intercipient et
 omnia tumultu confundant, quos ut non imitari sic acriter
 propulsare oportebit, et ipsorum improbitatem retundendo,
 et iudices vel praesidentes magistratus appellando frequen-
 tius, ut loquendi vices serventur. Non est res animi iacentis
 et mollis supra modum frontis, fallitque plerumque, quod
 12 probitas vocatur, quae est imbecillitas. Valet autem in al-
 tercatione plurimum acumen, quod sine dubio ex arte non
 13 venit; natura enim non docetur, arte tamen adiuvatur. In
 qua praecipuum est, semper id in oculis habere, de quo
 quaeritur et quod volumus efficere; quia propositum tenen-
 tes in rixam non ibimus nec causae debita tempora convi-
 ciano conteremus gaudebimusque, si hoc adversarius facit.
 14 Omni tempore fere parata sunt meditatis diligenter,
 quae aut ex adverso dici aut responderi a nobis possint.
 Nonnunquam tamen solet hoc quoque esse artis genus, ut
 quaedam in actione dissimulata subito in altercando profer-
 rantur; est inopinatis eruptionibus aut incursionibus ex insidiis fa-
 ctæ simillimum. Id autem tum faciendum, cum est aliquid,
 cui responderi non statim possit; potuerit autem, si tempus
 ad disponendum fuisset. Nam, quod fideliter firmum est, a
 primis statim actionibus arripere optimum est, quo saepius
 15 diutiusque dicatur. Illud vix saltem praecipuum videtur,
 ne turbidus et clamorosus tantum sit altercator, et quales fere
 sunt, qui litteras nesciunt. Nam improbitas, licet adversario
 molesta sit, iudici invisæ est. Nocet etiam diu pugnare in iis,
 16 quae obtinere non possis. Nam, ubi vinci necesse est, ex-
 pedit cedere; quia, sive plura sunt, de quibus quaeritur, fa-

cilior erit in ceteris fides, sive unum, mitior solet poena ir-
 rogari verecundiae. Nam culpam praesertim deprehensam
 pertinaciter tueri, culpa altera est.

Dum stat acies: multi res consilii atque artis est, ut 17
 errantem adversarium trahas et ire quam longissime cogas,
 ut vana interim spe exultet. Ideo quaedam bene dissimulan-
 tur instrumenta. Instant enim et saepe discrimen omne com-
 mittunt, quod deesse nobis putant, et faciunt probationibus
 nostris auctoritatem postulando. Expedi etiam dare aliquid 18
 adversario, quod pro se putet, quod apprehendens maius
 aliquid cogatur dimittere; duas interim res proponere, qua-
 rum utramlibet male sit electurus; quod in altercatione fit
 potentius, quam in actione, quia in illa nobis ipsi responde-
 mus, in hac adversarium quasi confessum tenemus. Est in- 19
 primis acuti videre, quo iudex dicto moveatur, quid respuat;
 quod et vultu saepissime et aliquando etiam dicto aliquo
 factove eius deprehenditur. Et instare proficientibus et ab
 iis, quae non adiuvent, quam mollissime pedem oportet re-
 ferre. Faciunt hoc medici quoque, ut remedia proinde per-
 severent adhibere vel desinant, ut illa recipi vel respui vi-
 dent. Nonnunquam, si rem evolvere propositam facile non 20
 sit, inferenda est alia quaestio, atque in eam iudex, si fieri
 potest, avocandus. Quid enim, cum respondere non possis,
 agendum est, nisi ut aliud invenias, cui adversarius respon-
 dere non possit? In plerisque idem est, ut dixi, qui circa 21
 testes, locus et personis modo distat, quod hic patronorum
 inter se certamen illic pugna inter testem et patronum.

Exercitatio vero huius rei longe facillior. Nam est uti-
 lissimum, frequenter cum aliquo, qui sit studiorum eorundem,
 sumere materiam vel verae vel etiam fictae controversiae,
 et diversas partes altercationis modo tueri; quod idem etiam
 in simplici genere quaestionum fieri potest. Ne illud quidem 22
 ignorare advocatum volo, quo quaeque ordine probatio sit
 apud iudicem proferenda; cuius rei eadem in argumentis
 ratio est, ut potentissima prima et summa ponantur. Illa
 enim ad credendum praeparant iudicem, haec ad pronun-
 tiandum.

DE IUDICIO ET CONSILIO.

V. His pro nostra facultate tractatis non dubitasset transire protinus ad dispositionem, quae ordine ipso sequitur, nisi vereretur, ne, quoniam fuerunt, qui iudicium inventioni subiungerent, praeterisse hunc locum quibusdam viderer, qui mea quidem opinione adeo partibus operis huius omnibus connexus ac mixtus est, ut ne a sententiis quidem aut verbis saltem singulis possit separari, nec magis arte traditur quam gustus aut odor. Ideoque nos, quid in qua re sequendum cavendumque sit, docemus ac deinceps docebimus, ut ad ea iudicium dirigatur. Praecipiam igitur, ne, quod effici non potest, aggrediamur, ut contraria vitemus et communia, ne quid in eloquendo corruptum, obscurum sit? Referatur oportet ad sensus, qui non docentur.

3 Nec multum a iudicio credo distare consilium, nisi quod illud ostendentibus se rebus adhibetur, hoc latentibus et aut omnino nondum repertis aut dubiis. Et iudicium frequentissime certum est, consilium vero est ratio quaedam alte petita et plerumque plura perpendens et comparans habensque in se et inventionem et iudicationem. Sed ne de hoc quidem praecepta in universum expectanda sunt. Nam ex re sumitur, cuius locus ante actionem est frequenter; nam Cicero summo consilio videtur in Verrem vel contrahere tempora dicendi maluisse quam in eum annum, quo erat

5 Q. Hortensius consul futurus, incidere. Et in ipsis actionibus primum ac potentissimum obtinet locum; nam, quid dicendum, quid tacendum, quid differendum sit, exigere consilii est; negare sit satis an defendere, ubi prooemio utendum et quali, narrandumne et quomodo, iure prius pugnandum an aequo, qui sit ordo utilissimus, tum omnes colores, asperere

6 an leniter an etiam summis loqui expediat. Sed haec quoque, ut quisque passus est locus, monuimus, idemque in reliqua parte faciemus; pauca tamen exempli gratia ponam, quibus manifestius appareat, quid sit, quod demonstrari posse

7 praeceptis non arbitror. Laudatur consilium Demosthenis, quod, cum suaderet bellum Atheniensibus parum id prospere expertis, nihil adhuc factum esse ratione monstrat; poterat enim emendari negligentia; at, si nihil esset erratum, melio-

ris in posterum spei non erat ratio. Idem, cum offensam vereretur, si obiurgaret populi segnitiam in asserenda libertate rei publicae, maiorum laude uti maluit, qui rem publicam fortissime administrassent. Nam et faciles habuit aures, et natura sequebatur, ut meliora probantes peiorum poeniteret. Ciceronis quidem vel una pro Cluentio quamlibet multis exemplis sufficiet oratio. Nam quod in eo consilium maxime mirer? primamne expositionem, qua matri, cuius filium premebat auctoritas, abstulit fidem? an, quod iudicii corrupti crimen transferre in adversarium maluit quam negare propter inveteratam, ut ipse dicit, infamiam? an, quod in re invidiosa legis auxilio novissime est usus? quo genere defensionis etiam offensus nondum praemollitas iudicum mentes; an, quod se ipsum invito Cluentio facere testatus est? Quid pro Milone? quod non ante narravit, quam praedictis iudiciis omnibus reum liberaret? quod insidiarum invidiam in Clodium vertit, quanquam revera fuerat pugna fortuita? quod factum et laudavit et tamen voluntate Milonis removit? quod illi preces non dedit et in earum locum ipse successit? Infinitum est enumerare, ut Cottae detraxerit auctoritatem, ut pro Ligario se opposuerit, Cornelium ipsa confessionis fiducia eripuerit. Illud dicere satis habeo, nihil esse non modo in orando sed in omni vita prius consilio, frustra sine eo tradi ceteras artes, plusque vel sine doctrina prudentiam quam sine prudentia facere doctrinam. Aptare etiam orationem locis, temporibus, personis est eiusdem virtutis. Sed hic quia latius fusus est locus mixtusque cum elocutione: tractabitur, cum praecipere de apte dicendo coeperimus.